

رواية راسين في الحلال كاملة



بقلم الكاتبة منال سالم

لتحميل المزيد من الروايات زوروا موقعنا

ايجي فور تريندس

او يمكنكم زيارة الموقع مباشرة من خلال

الروابط التالية

www.egy4trends.blogspot.com

www.egy4trends.com

قيل في التراث الشعبي (يا بخت من وفق
راسين في الحلال) ، وقيل أيضاً (امشي في
جنازة ، وماتمشيش في جوازة) ..

وهنا مربط الفرس ..

فهنالك من هو داعم للزيجات ،

ومن يفر منها كفرار الطريدة من صائدها ...

(راسين في الحلال)

هي كوميديا رومانسية مستوحاة من قلب
المجتمع المصري المعاصر حيث الحب
الذي ينبت وسط متاعب الحياة ومشاغلها
في مزج بين الواقع والخيال ...

الفصل الأول

الفصل الأول :

صاح صوت الميكروفون الداخلي في مطار
القاهرة الدولي ليعلن عن وصول الطائرة
القادمة من الولايات المتحدة الأمريكية..

وقف أحد الشباب من ذوي البشرة الشرقية
السمراء يراقب بأعين ثابتة جميع الدالفين
إلى الخارج ، و..

-رامي بنبرة قلقة : يا ربي ، ده كله خرج !

أومال هو مش باين ليه ؟؟

راقب رامي خروج بعض السيدات ، وكذلك
الأطفال الممسكين بأيدي آبائهم ، وبعض
الرجال المهمين ، ولكن لم يظهر ذلك
الشخص المنتظر..

زفر هو في ضيق ، ثم رفع يده لينظر إلى
الساعة التي يرتديها في معصمه ، و...

-رامي بنبرة منزعجة : ايه اللي أخره ده

كمان

.....

رامي سرحان عليه شاب في منتصف
العشرينات من عمره ، يعمل مع والده في
التوكيل الخاص بماركة شهيرة لإحدى
السيارات .. تخرج رامي من كلية (تجارة
انجليش) بتقدير جيد ، فأرادت والدته
السيدة سوزان أن يكمل تعليمه مع ابن
اختها في الولايات المتحدة ، ولكنه رفض
وأصر على البقاء في القاهرة ، و أصبح ناجحاً
في عمله مع والده المهندس سرحان ...

لدى رامى خصال طيبة ، وتبدو جلية على
قسمات وجهه ذو البشرة الفاتحة ، ورغم هذا
فشخصيته مميزة ، أما عينيه فهما عسلتان
، وشعره قصير يميل للون البني ، لديه قامة
طويلة ، وجسد نحيف ولكنه مشدود ..
يعشق رامى سباقات السيارات ، ولديه من
المعلومات عنها ما سهل عليه تحقيق
النجاح مع والده .. ٢

.....

لوى رامى فمه فى امتعاض ، ورفع يده عالياً
على شعره ليعبث بخصلاته القصيرة ، ثم ..
-رامى بنبرة شبه ضائقة : لولا إنك ابن خالتي
كان زمانى سيبتك ومشيت من بدري ... ١

.....

تحرك شاب ما في اتجاه بوابة الخروج ، كانت
ملامح وجهه غربية بشكل واضح ، فبشرته
بيضاء ، عينيه زرقاء ، وشعره ناعم يميل
للون الكستنائي .. أما جسده فهو رياضي
ممشوق ، عضلات ذراعيه تبرز من قميصه
السماوي الذي يتناسق مع لون عينيه ..
بينما تكاد ترى عضلات وركيه تخترقان
بنطاله الجينز الأسود .. ٢٧

شعر ذلك الشاب بحرارة العاصمة تلفح
جسده ، ففتح أزرار قميصه حتى منتصف
صدره لتظهر تلك القلادة الفضية التي
يرتديها حول عنقه ، وتحمل رمز السلام
العالمي .. ثم رفع يده الممسكة بالنظارة
القائمة ليغطي بها عينيه ..

حقاً كان ملفتاً للأنظار .. واعتلى وجهه
ابتسامة رضا عن حاله حينما لمح نظرات

الإعجاب الممزوجة بالانبهار في أعين الفتيات
.. فهو يعشق أن يكون مميزاً بين الآخرين ..
وهو واثق من أنه كان كذلك ١.

سحب حقيبة سفره الكبيرة ذات اللون
الأزرق القاتم من مقبضها المعدني ، وسار
بخطوات واثقة نحو بوابة المطار ..٣
جاب ببصره بين الواقفين باحثاً عن رامي ...
وظهرت ابتسامة عريضة على وجهه حينما
لمحه الأخير ..

لوح آياز بيده إلى رامي ، ثم سار بخطوات
ثابتة في اتجاهه ، وقام بنزع نظارته القاتمة ..
ومن ثم أرخى قبضته عن مقبض الحقيبة
ليصافح ابن خالته و...٤

-آياز بنبرة جادة: Hello dude (مرحباً بك

صديقي) ١

-رامي بنبرة متحمسة ، ونظرات دافئة
:حمدلله على السلام يا إيزوو ، كل ده تأخير
يا بني ، ده أنا فكرتك بتشتغلني ، ومش
جاي ولا حاجة

-آياز بنبرة هادئة : طالما أنا اديتك كلمة يبقى
خلاص ، خليك واثق فيا

-رامي باهتمام وهو ينظر إلى حقيبة السفر :
بس الواضح إنك ناوي تطول المرادي

-آياز وهو يمط شفتيه في جدية : احتمال ،
على حسب الوضع

وضع رامي يده على ظهر آياز ، ثم أمسك
بحقيبة السفر و..

-رامي مبتسماً ، وبنبرة متشوقة : طب يالا
لأحسن خالتك نفخاني اتصالات من الصبح

-آياز بنبرة مهتمة : طنط سوزان ، وحشاني

أوي ، صحتها عاملة ايه؟؟

-رامي بنبرة شبه ضائقة : يعني ، يوم كده

ويوم كده ، ما أنت عارفها عدوة الدكاترة ،

والأدوية !

-آياز مبتسماً ابتساماً زائفة : انت هاتقولي ،

ياالا Let's Go..

ثم سار كلاهما في اتجاه إحدى السيارات

المصفوفة أمام أحد الأرصفة في منطقة

الانتظار الملحقة بالمطار .. وضع رامي

الحقيبة في صندوق السيارة الأسود -

ماركةBMW، في حين جلس آياز في المقعد

الأمامي ، ورمق من حوله بنظرات متفحصة

..

دار رامي حول سيارته الغالية ، ثم ركب إلى
جوار ابن خالته ، وأدار المحرك ، ومن ثم
انطلق بها نحو منزله ..

.....

آياز كامل الشناوي ، شاب في أواخر
العشرينيات من عمره قد وصل توأاً إلى
الأراضي المصرية بعد فترة طويلة قضاه
مع أسرته في الولايات المتحدة الأمريكية ،
وتحديداً في ولاية أريزونا ، حيث نشأ وتربى في
كنف والديه (صوفيا و كامل) اللذين أغدقا
عليه بالحب والعاطفة منذ نعومة أظافره ..
أنهى آياز تعليمه الجامعي بتفوق مما جعله
مؤهلاً لاستكمال دراساته العليا في جامعة
مرموقة هناك ، وأيضاً سهّل عليه الحصول
على وظيفة مناسبة في مجال تخصصه ،

حيث درس علم (رياض الأطفال) ،
فأصبح من أمهر معلمي تلك المرحلة ..٩

.....

توقفت سيارة فارهة حمراء - موديل (الفولفو) - أمام بوابة معدنية خضراء تُحيط بصرح تعليمي شاهق ، ذو مبانٍ حديثة الطلاء ، ونوافذ زجاجية عاكسة للأضواء ، ثم ضغطت سيدة وقور - في أواخر الأربعينات من عمرها - على بوق السيارة ، لينتبه أحد الأشخاص إلى حضورها ، فنهض مهرولاً من على مقعده المعدني ، وركض في اتجاه البوابة ، وقام بفتحها على مصراعيها ، لتمر السيارة إلى الداخل .. ثم أغلق البوابة بعدها وهو يلوح لها و...

-إعتماد بنبرة جادة وآمرة ، وهي ترفع أحد
حاجبيها : ماتسيبش البوابة يا عم سيد ،
وإقفلها كويس ٣

-سيد بنبرة رسمية : حاضر يا مس اعتمادا
ثم قادت السيارة في اتجاه الجراج الملحق
بهذا الصرح التعليمي الضخم ، لتصفها
أسفل المظلة التي تحجب أشعة الشمس
الحارقة عن السيارات المصفوفة هناك ..
ترجلت الأستاذة إعتماد من سيارتها بعد أن
جمعت أشياءها وحقيبتها الجلدية الكبيرة
من المقعد المجاور لها ، وسارت بخطوات
ثابتة في اتجاه المبنى الذي تديره ..

.....

الأستاذة إعتماد فوزي هي ناظرة مرحلة
رياض الأطفال بمدرسة (اللافانيا) الدولية ،

والتي تم افتتاحها مؤخراً لتدخل المنافسة
مع باقي المدارس القديية منها على طريق
القاهرة - الإسماعيلية الصحراوي .. كانت
تعمل لسنوات رئيسة لقسم الرياضيات
بأحد المدارس التجريبية ، إلى أن تم الإعلان
عن وظيفة شاغرة في تلك المدرسة الجديدة
، فتقدمت إليها على الفور ، ونجحت في
الحصول على النظارة ..

الأستاذة إعتماذ هي أم لثلاثة أبناء ، شابين ،
وفتاة صغيرة .. تزوج الشابين ، وبقيت الفتاة
لتنهي تعليمها الثانوي .. تُوفي زوجها قبل
ثلاثة أعوام ، ومنذ وقتها و قد كرس حياتها
لتراعي أبنائها ، ولتكمل عملها الذي صار
شاغلها الأكبر ...

.....

مرت الأستاذة إعتماذ بإثنتين من العاملات
بمبنى رياض الأطفال ، ورمقتهما من خلف
نظارتها الطبية بنظرات حادة قبل أن تتوقف
عن السير أمامهما لتحدهما بنظرات أكثر
حدة و...

-إعتماذ بنبرة شبه منزعجة وهي تشير بيدها
: الرخام ده يتلمع كويس ، والجاردن تتكنس ،
ومدخل المبنى يتمسح ، مش كل يوم
هافضل أعيد وأزيد معاكو

-روحية بنبرة مرتعدة : حاضر يا مس اعتماد
-ناصره بنبرة عادية : يا مس إعتماذ أنا
نضفت الجاردن ، بس الهوا هو اللي جاب ال
آآ...

-إعتماذ مقاطعة بنبرة غاضبة : ده
مايخصنيش ، أنا كل اللي يهمني الImage)

صورة) بتاعة السكول تكون على مستوى ..

احنا انترناشونال ، مش حاجة أي كلام

-روحية وهي تمط شفيتها في عدم اقتناع :

طيب

-إعتماد بلهجة شبه أمرة ، ونظرات محذرة :

ربع ساعة وهاطلع أشوف اللي أنا قولته

اتعمل ولا لأ

-ناصره على مفض : ماشي يا مس

ثم تركتهما وانصرفت ، فرمقتها العاملتين

بنظرات استنكار و...

-ناصره بنبرة متشنجة : الولية دي

مابتديحش نفسها ، هاتك يا أوامر ، واحنا

مش هنرتاح منها أبداً

-روحية بنبرة متعصبة : الله يمسيها بالخير

أبلة دولت ، كانت زي النسمة معنا ، لولا

بس الظروف اللي حصلت لها كنا فضلنا زي ما

أحنا عايشين في النعيم ٢

-ناصره بنبرة ضائقة : اه والله ، بقالنا سنة في

الغلب ده ، ومش بنرتاح !

-روحية بنبرة ساخطة : والبعيدة ما بتريحش

نفسها أصلاً

-ناصره وهي تشير بيدها ، وبنبرة عادية :

طب يالا خيلنا نخلص بدل ما نسمعنا

كلمتين في جنبنا منها ، والواحد مش ناقص

عكننة

-روحية وهي توميء برأسها إيماءة خفيفة :

على رأيك

ثم إستأنفت كلتاها بقية العمل وهما

تتغامزان وتتهامسان بكلمات غير مفهومة ..

.....

في غرفة للمعلمات ملحقة بذات المبنى ،،
أرجعت رأسها للخلف وهي تفهقه عالياً ، ثم
اعتدلت في جلستها لتنظر إلى رفيقتها بأعين
دامعة من كثرة الضحك و...

-ريمان بنبرة بشوشة : مش ممكن ، انتي
رهيبة

-عاليا بنبرة دافئة : عشان تعرفي بس

-ليلة بنبرة ضاحكة : يا بنتي ، دي محدش
أدها

أخذت ريمان نفساً مطولاً لتسيطر به على
نوبة الضحك التي إنتابتها ، و..

-ريمان بهدوء مصطنع : ارحميني شوية ،
هاموت من الضحك

-عاليا مبتسمة ، وبنبرة رقيقة : حاضر ،

عشان خاطر بس

.....

ريمان قاسم هي فتاة مدللة في أوائل
العشرينات من عمرها ، تخرجت حديثاً من
كلية التربية بالمملكة المتحدة كمعلمة للغة
الإنجليزية ، حيث قضت الخمس سنوات
الأخيرة من عمرها بصحبة والدتها هناك لكي
تكمل تعليمها الجامعي ، وبعد أن تخرجت
التحقت بالعمل في أحد المدارس الخاصة
هناك لمدة عام ، ثم عادت للقاهرة مجدداً
لتستقر فيها ، ومن ثم بدأت العمل بمدارس
(اللافانيا) الدولية ...

تمتلك ريمان بشرة قمحية تميل للبياض
قليلاً ، أما عينيها فهما خضراوتان ، وذات
أهداب كثيفة .. في حين كان شعرها أسوداً

حديراً مع بعض التموجات المنتشرة في
أطرافه .. أما قوامها فكان إلى حد ما رقيقاً
متناسقاً مع طولها المعقول ...

رفيقتها المقربة هي عاليا راشد ، والتي
تخرجت من كلية رياض الأطفال لتعمل
كمعلمة لمرحلة ما قبل التعليم الأساسي ..
برعت عاليا في مهنتها كثيراً ، وأثبتت جدارتها
منذ اليوم الأول ..

انتقلت للعمل في مدارس (اللافانيا) الدولية
عن طريق ما يسمى بـ (الإعارة الداخلية) ،
فهي تعمل في الأساس في مدرسة حكومية ،
وفي العام المنصرم أرسلت الإدارة التعليمية
طلباً لمدرستها أفادت فيه بحاجة تلك
المدارس الدولية لمعلمات رياض اطفال
ذات كفاءات مميزة ، فقام مدير المدرسة
بترشيح اسمها للعمل ، وبالفعل انضمت

إلى فريق العمل الخاص بتلك المدارس
لتدرس للأطفال مادة (اللغة العربية) ..

تمتاز عاليا بأن بشرتها خميرية ناعمة ،
وعينيها العسلية كالمها ، تُحبذ النظر إليهما ..
وكما يُقال هي تجيد لغة العيون بهما .. أما
جسدها فهو رشيق ، ورغم هذا فهي لا تبرز
مفاتها منه لأنها فتاة محجبة تراعي عند
انتقاء ثيابها أن تختار الأنسب لها ..

.....

ثم دلفت إلى داخل الغرفة فتاة ثالثة ، وعلى
وجهها نظرات مرتبكة و..

-سارة بنبرة قلقة : بنات ، مس اعتماد جت ،
خدوا بالكم

-ريمان وهي تلوي فمها في امتعاض : اووف
، هي مش بتغيب خالص

-ليلة بتأفف : لأ طبعاً

-عاليا بنبرة استهجان : دي بتنزلنا في أجازة
العيد ، يعني استحالة تغيب لو الدنيا
اتشقلبت حتى

-سارة على مفض : طيب خلاص ، وطوا
صوتكم لأحسن نبص نلاقيها فوق دماغنا
-ريمان بهدوء مصطنع : كل واحدة تشوف
وراها ايه لأحسن تيجي تعملنا فيلم على
الفاضي

.....

سارة عصام الفتاة المحبوبة التي تأسر
القلوب ببساطتها مع الجميع ، هي خريجة
كلية التربية ، قسم اللغة الانجليزية ، وقد
التحقت بمدارس (الالفانيا) بعد تخرجها

مباشرة ، واستطاعت أن تضع اللمسة
الخاصة بها من خلال عملها مع الأطفال ..
هي فتاة محجبة ، وذات ملامح وجه طفولية
بريئة ، ولكنها ناضجة في تفكيرها ، عينيها
بنيتان ، وبشرتها بيضاء للغاية ... وجسدها
إلى حد ما متناسق مع طولها ..

.....

أدارت سارة رأسها في كل الإتجاهات بحثاً عن
بقية زميلاتها ، ثم ..

-سارة متسائلة في حيرة : أومال بقية البنات
فين ؟

-ليلة بنبرة عادية وهي تشير بيدها : في
الكانتين ، بيشتروا أكل

-سارة وهي تزم شفيتها في تعجب : ممممم ..
طب هاتجيبوا أكل عشان الفطار ولا آآ ..

-ريمان مقاطعة بجدية : أنا لأ ... عندي
انتفاخ ومحتاجة أخس شوية

-سارة بتهكم : هو انتي فيكي حاجة عشان
تخسي !!!

-ريمان بنبرة اكثر جدية ، وهي تضع يدها
على معدتها : برضوه ، أنا محتاجة أنزل
كرشي شوية ، مش معقول يبقى جسمي
حلو ، وطالعلي كرش

-عاليا بنبرة مازحة : ده عزيا بنتي ، أي حد
يسألك فلوسك بتروح فين ، تردني بكل ثقة
في كرشني طبعاً

-ليلة بنبرة ساخرة : وكله يهون عشان
الكرش

.....

ليلة الأيوبي - خريجة كلية الآداب ، قسم لغة
إنجليزية - هي فتاة متواضعة ، تعشق
الكماليات ، وتحبذ انتقاء كل ما هو غريب ..
ملامح وجهها بسيطة ، ولكنها رغم هذا
تمتلك شخصية قوية ومتفردة .. عينها
عسليتان مليئتان بالدفء والحنان .. ورغم
قصر قامتها إلا أنها تهتم برشاقة جسدها ،
ودائماً ترتدي الأحذية ذات الكعوب العالية ..
ارتدت ليلة الحجاب مؤخراً ، وحاولت قدر
الإمكان أن تجعل ذوقها الراقى في انتقاء
الملابس يتناسب مع مظهرها الجديد ..

.....

ضحكت الفتيات على دعابة عاليا الأخيرة ،
ثم بدأن بالتحرك عن مقاعدهن ، و انتشروا
في أرجاء الغرفة ليستأنفن عملهن المعتاد ...

ثم دلفت إلى داخل الغرفة فتاة رقيقة تحمل
في يدها مفكرة ورقية صغيرة ، ومدت يدها
لتعدل من وضعية الحجاب المتدلي من
رأسها و...

-أية بنبرة هادئة : هاي يا بنات

التفت إليها الجميع ، وبادلناها التحية و...

-سارة بهدوء : يويو ، منورة الـStaff Room)

(حجرة المعلمين)

-ريمان بنبرة رقيقة : هاي عليكي

-عاليا بنبرة مازحة وهي تلوح بيدها : يا هلا

فيكي ، إشلونك ، شو أحوالك ، شو تسوي ٢

ابتسمت لهم أية ابتسامة مصطنعة ، ثم ..

-أية متسائلة بحيرة : أومال بقية البنات فين

؟

-ليلة بصوت هاديء : في الكانتين

مطت أية شفتيها ، ثم هزت رأسها قليلاً ، و...

-أية بنبرة طبيعية : بقولكم كمان ١٠ دقائق

مس اعتماد هاتعمل اجتماع في أوضة

الملتيميديا ، محدش يتأخر ، أوكي

-ليلة وهي تعقد حاجبيها في استغراب : ليه

؟

-عاليا بنبرة محتجة : هي مش بتزهق ، ما

كانت لسه عاملة اجتماع من كام يوم

-أية وهي تتنهد في ارهاق : بصوا أنا ماليش

دعوة ، أنا ببلغكم باللي هي قالته

وضعت ريمان كف يدها على كتف ليلة ، ثم

رمقت أية بنظرات جادة ، و...

-ريمان بهدوء : اوكي يا أية ، احنا شوية

وهنحصلك

-أية بنبرة شبه جادة : طيب مانتسوش

تبلغوا الباقي ..

-سارة على مضض : طيب .. أنا هاتصل بيهم

، واخليهم يجولنا على هناك

-أيه بإيجاز : تمام ...

.....

في فيلا سرحان عليه ،،،

مرت السيارة عبر البوابة الحديدية بعد أن

قام الحارس بفتحها ، وإلقاء التحية على

رامي ، ثم قادها بحذر في اتجاه الجراج

الخلي الملحق بتلك الفيلا ذات اللون البيج

الذي يسر الأنظار ..

ترجل آياز أولاً من السيارة ، واتجه ناحية
صندوقها ، ثم قام بسحب حقيبته للخارج ،
ومن ثم أغلق الصندوق ..

أوقف رامي المحرك ، وترجل هو الآخر منها
، و..

-رامي بنبرة متشوقة ، ونظرات ممعنة : ايه
رأيك في الفيلا بتاعتنا

-آياز بنبرة مرحة : أنا لحد الوقتي ماشوفتش
غير الجراج ، أديني فرصة أدخل جوا ، واقول
رأبي

-رامي مبتسماً وهو يغمز : اه صح .. قولي
أخبار مزز بره ايه ؟

-آياز وهو يلوي فمه في امتعاض : هما دول
بنات

اتسعت عيني رامي في ذهول ، وعقد
حاجبيه في اندهاش واضح ، و..

-رامي وهو فاغر فمه في تعجب : يا شيخ !!
أما اللي عندك مش بنات ، أومال تقول ايه
على اللي عندنا ؟؟ دول غفر ولاد عساكر يا
إيزوو !!٥

-آياز بنبرة محتجة ، ونظرات ضيقة : مش
للدرجادي يعني٨

-رامي بتهكم : واضح إن أمريكا غيرتك أوي
.. بكرة تشوف أشباه البنات ، وتعرف إن أنا
عندي حق٩

-آياز بنبرة غير مهتمة : مش هاتفرق ، أنا
جاي عشان أشتغل ، مش فاضي للهري ده
-رامي بعدم اقتناع : هنشوف ..

-آياز بجديّة وهو ينظر حوله : خلينا ندخل ،

مش هانقضيهنا هنا

.....

قرع رامي الباب ، وظل ملتفتاً إلى آياز يحدثه

في بعض الأمور العامة إلى أن فتحت

الخدمة الباب ، وجحظت عينيها حينما رأت

ذلك الشاب الوسيم الواقف إلى جوار ابن رب

عملها ، فاعتدلت في وقفها ، وظلت ملسطة

عينيها عليه و..

-آياز بنبرة هادئة: Sure..

-رامي بصوت أجش : اوكي !

ثم استدار رامي برأسه ليجد وردة الخادمة

تسد الباب بجسدها الممتليء ، فحدجها

بنظرات جادة و..

-رامي بنبرة جادة : وردة ، انتي معايا ، ولا !!!

-وردة بنبرة متحمسة : هه ، رامي بيه ،

أفضل

ظلت الخادمة وردة متسمرّة في مكانها ،
ومحدقة في آياز بنظرات شرهة ، فرمقها
رامي بنظرات شبه منزعجة ، في حين أشاح
آياز بوجهه بعيداً عنها ، فاعتلت ابتسامة
عريضة وجهها و..

-رامي بنبرة شبه ضائقة : طب وسعي شوية

يا وردة ، ولا هنتخترقك عشان نعدي

-وردة وهي تتنحّح في حرج : احم .. لا

مؤاخذة يا رامي بيه ، أصل عقلي مش فيا

-رامي بتأفف : ليه يعني

-وردة بابتسامة بلهاء : مش كل يوم بنشوف

الحلويات دي ، ده تقفيل برا يا رامي بيه

-رامي باستغراب شديد : نعم ياختي ؟

-وردة بأريحية وهي تغمز بعينها : الشاب الـ

(الأفرانكة) اللي معاك ده ٢٥

استدار آياز برأسه في اتجاه الخادمة وردة ،

ورمقها بنظرات حادة قبل أن يقاطع بـ ...

-آياز بنبرة شبه متشنجة : على فكرة أنا

مصري ، دي مين دي يا رامي ؟؟؟!!!

-وردة بنبرة متلهفة وهي تضع يدها على

صدرها : محسوبتك وردة ، أنا الهاوس بيكر

-رامي مصححاً بنبرة شبه ساخطة : هاوس

كبير (House Keeper) يا وردة ، اتعلميها

بقى ، خدي الشنطة ووديها أوضة الضيوف

ثم مد يده إليها بالحقيبة ، فتناولتها منه ،

وتنهدت في حرارة ، ثم سارت في اتجاه الدرج

زفر آياز في انزعاج ، ثم وضع يده على كتف
رامي ، و...

-آياز هامساً وهو يشير بعينه : ودي ائلمتوا
عليها منين ؟

-رامي بضجر : الحاج سرحان جابها من البلد
عشان تخدم هنا

-آياز بعدم فهم : بلد ايه ؟؟ أنا مش فاهم
حاجة

-رامي بنبرة عادية تحمل التهكم في طياتها :
انت عارف إن المهندس سرحان غاوي يعمل
الخير ويرميه للبحر ، الدور ده بقى قال
يجبيلنا قنديل البحر عشان يرازي فيناء

-آياز بنبرة حائرة : برضوه مافهتتمش

-رامي بنبرة متأففة : يعني هو حب يساعد
بنت واحد من الفلاحين الغلابة اللي من بلده

عشان تصرف على عيلتها ، فشغلها خدامة
هنا ، ومن وقتها تقديراً إحنا اللي بقينا
شغالين عندها مش هي .. النصيبة إنها
عاجبة أبويا ، وبيقولك لهلوبة ، ومالهاش زي

١!

-آياز بنبرة مدهوشة : غريبة

-رامي بنظرات منزعجة ، ونبرة استنكار : أنا

لو عليا كنت (كَرَشْتها) من زمان

-آياز بنظرات ضيقة ، ونبرة استغراب : ايه؟؟

-رامي بضيق : أقصد كنت طردتها ، الله

يحرقها ، أثرت عليا بلكنتها بنت ال دي !!!

ثم سمع كلاهما صوتاً أنشويماً مألوفاً يأتي من

الأعلى ، فرفع الاثنین رأسيهما عالياً و..

-سوزان بنبرة دافئة : إيزووو .. حبيبي ،

حمدلله على سلامتك يا قلب خالتك

-آياز بنظرات حانية ، ونبرة ناعمة : طنط
سوزان ، ازي حضرتك

نزلت السيدة سوزان من على الدرج
بخطوات متريثة ، في حين سار آياز في
اتجاهها ، ثم توقفت أمامه ، ونظرت إليه
بحنو بالغ ، وقامت بفتح ذراعيه لتحتضنه
بشدة ، ثم ابتعدت عنه و...

-سوزان بنبرة معاتبة : كل ده غياب ، أنا
زعلانة منك ، ومن مامتك ، خلاص نستونا

-آياز بنبرة عميقة : سوري يا طنط ، انتي
عارفة المشاغل هناك ، وانا مكوتتش فاضي
وآآ...

-سوزان مقاطعة بعتاب : عاوز تفهمني ان
معندكوش أجازات ، لأ أنا مش مصدقة

-آياز مبتسماً ، وبنبرة دبلوماسية : على
العموم يا طنط أنا رجعت خلاص ، وناوي
استقر هنا

-سوزان بنبرة متحمسة : بجد ؟ ده خبر حلو
أوي ، أيوه كده فرحني

-آياز بنبرة متفائلة : اطمني ، أنا كمان ناوي
أدور على شقة وآآ..

-سوزان مقاطعة بجدية : شقة ايه ، انت
هاتقعد معنا هنا يا إيزوو

-آياز بإعتراض : لأ مش هاينفع ، أنا مش
باحب أفرض نفسي على حد أو آآ..

رفعت سوزان يدها في وجه آياز لتجعله يكف
عن الكلام ، ثم ..

-سوزان بصرامة : الكلام ده مش عاوزه
أسمعه ، انت هاتقعد معنا خلاص ، وبعدين

عمك سرحان هيفرح أوي لما يشوفك ، ولا

انت الغربة غيرتك علينا

-آياز نافياً : أبدأ .. أنا زي ما أنا

-سوزان بابتسامة دافئة : يبقى متفقين ، ده

بيتك ، واتصرف فيه على راحتك

-رامي غامزاً : أيوه يا عم ، مين أدك ..

-آياز بنبرة مغترة : طبعاً ، أنا ماليش زي

-سوزان بنبرة صافية : روح ارتاح انت يا

إيزووو ، وشوية وهتلاقي الفطار جاهز ..

-آياز مبتسماً في امتنان : شكراً ..

ثم تركتهما وانصرفت في اتجاه المطبخ ...

فمال آياز برأسه على رامي و...

-آياز بنبرة إعجاب : مامتك لسه زي ماهي ،

حنية وطيبة .. ماتغيرتش ..!

-رامي وهو يوميء برأسه : أيوه .. شبه سيتك

(جدتك) الله يرحمها

-آياز مبتسماً : الله يرحم الجميع

حضرت الخادمة وردة إلى الردهة ، ولم تكف
عن التحديق في آياز بنظرات عاشقة ، في حين

لوى هو فمه في انزعاج ، و..١

-وردة بنبرة متلهفة : أني جهزت الأوضة لسي

آآآ... ألا انت اسمك ايه يا حليوة

-آياز بنبرة تحمل السخرية : آياز يا (فلور)V

-وردة ببلاهة : إزازV

-آياز بضيق : نعم؟؟

-رامي بنبرة شبه غاضبة : إزاز مين يا هبله

انتي ، بقولك اسمه آياز ، آياز...!!!!!!

فتحت الخادمة وردة فمها وكأنها فهمت ما

قاله ، ثم ..

-وردة ببراءة : ياختي حيلوة ، وده معناتوه ايه

؟؟

-رامي بسخط : باردة

-وردة وهي تعقد حاجبيها في عدم فهم : لأ

أني سُخنة ، وحرانة ، وعاوزه آآآ...

-آياز مقاطعاً بضيق : ششش .. تعرفي

تسكتي شوية يا فلور انتي ه

-رامي بتهكم : هي فاهمة معنى اسمك لما

هتناديها بفلاور

-وردة مبتسمة في سعادة : إنت بتدلعني يا

أبيضاني ... والنبي طالعة من بؤك اشطا يا

أزاز بيه ١٩

-رامي بسخط : هي لزقتك في دماغها ، مش
هانعرف نغيرها ولو عملنا ايه ، أنا من الأول
قايل دي مخها متركب شمال ، تعالى يا أزاز
.. قصدي يا آياز معاياه

.....

في مبنى رياض الأطفال بمدارس اللافانيا
الدولية ،،،

جلست المعلمات متأهبات في غرفة
الاجتماعات ، وبدأت الهمهمات الجانبية
بينهن إلى أن ساد الصمت فجأة في أرجاء
المكان حيث دلفت الأستاذة إعتماد بوجهها
- دائم التجهم- إلى داخل الغرفة و...

-اعتماد بنبرة رسمية ، ونظرات حادة وضيقة

: صباح الخير

-الجميع بهدوء : صباح النور مس إعتماد

سحبت الأستاذة إعتماذ المقعد الجلدي ،
وجلست على رأس طاولة الاجتماعات ، و...

-اعتماد بنبرة جادة : فاضل اسبوعين يا بنات
على الدراسة ، وأنا عاوزة مقترحاتكم ل
اليوم الأول) ، عاوزين نستقبل الأطفال
بشكل جديد

-ريمان بنبرة عادية : احنا ممكن نعمل
ألعاب ترفيهية ليهم

-ليلة مقترحة بهدوء : ممكن نجيب العرايس
الكبيرة زي (بين تن ، ودورا ، ومينيون)
والشخصيات المشهورة ، بيتهيا لي هيجبوا

-سارة وهي توميء برأسها : صح يا مس
اعتماد ، الأطفال فعلاً بيحبوا يلعبوا معاهم ،
وكمان ممكن نجيب هدايا

-عاليا بنبرة متحمسة : كمان ممكن نعمل

يوم رياضي ، هاتبقى حاجة خفيفة أوي

مطت الأستاذة اعتماد شفتيها في اقتناع ، ثم

هزت رأسها قليلاً ، ورفعت أحد حاجبيها في

جدية و..

-اعتماد بنبرة جادة : تمام يا بنات .. مس أية

، اكتبى ده كله في ورقة الاجتماعات ، وأنا

هاعمل تصويت على المقترحات كلها ،

ونشوف الأفضل ايه وبتنفذ فوراً

-أية وهي توميء برأسها ايجابياً : اوكي

ثم تنحنت السيدة اعتماد ، واعتدلت في

جلستها أكثر و..

-اعتماد بجدية : طبعاً كلكم عارفين إن

زميلتنا مس ريهام اتجوزت ، وقدمت

استقالتها ، ومكانها بقى فاضي هنا في الـ)

كي جي) ، فمتوقع إن ينضم لنا زميلة
جديدة على آخر الاسبوع٦

-ليلة متسائلة بنبرة عادية : هو حضرتك
هاتعملي انترفيو (مقابلة) ؟

-اعتماد بنبرة رسمية : شور

-ريمان بنبرة طبيعية : ينفع أقول لكام حد
أعرفه يجي يقدم

-اعتماد بجدية : مافيش مانع مس ريمان ،
بس لازم تتأكدي إن مستواه يليق بينا

-ريمان مبتسمة في حماسة : Of course مس
اعتماد

ثم استدارت برأسها قليلاً في اتجاه أية)
سكرتيرة مكتبها) ، و..

-اعتماد بنبرة ثابتة : مس أية أتأكدي إن
اعلان الNew Teacher (المعلمة الجديدة)
نزل على موقع المدرسة .. مش عاوزين
غلطة

-أية بخفوت : اوكي ..

-عاليا بنبرة هادئة: أنا أعرف بنت كويسة يا
مس اعتماد ، ينفع أخليها تيجي الانترفيو ؟-
اعتماد بجدية: مستواها ايه يا مس عاليا ؟-
عاليا وهي تمط شفيتها في حيرة: ممم..
يعني كويسة .. زينا تقريباً-اعتماد بصرامة ،
ونظرات ضيقة : مافيش حاجة اسمها يعني
عندنا ، في ممتاز يليق بينا ، أو لأ ماينفعش ،
احنا مدارس دولية مش مدرسة حكومي
على الطريق ، أظن كلامي واضح ... !!!لوت
عاليا شفيتها في انزعاج ، وأطرقت رأسها

للأسفل في حرج ، بينما أكملت الأستاذة
اعتماد باقي جدول اجتماع اليوم..

.....

في غرفة آياز بالفيلا ،،،

تمدد آياز على الفراش ، وعقد ساعديه خلف
رأسه ، ثم ..

-آياز متسائلاً بنبرة جادة : ها قولت ايه ؟

حدجه رامى بنظرات استغراب ، ثم جلس
على طرف الفراش ، وقام بثني ركبته أسفل
منه ، و...

-رامى بنبرة معترضة : لأ طبعاً ، انت مجنون

-آياز بهدوء : لأ أنا بتكلم جد

-رامي بتأفف : يا عم بطل الهبل ده ،
محدثش هايقبل باللي انت بتقوله ، أصلاً
مافيش راجل فيكي يا مصر عمل كده
اعتدل آياز في جلسته ، ثم رمق رامي
بنظرات متحدية و..

-آياز بنبرة مهتمة : ليه يعني؟؟ دي حاجة
عادية عندنا على فكرة ، ورجالة كتير
بيشتغلوها ، أنا كمان عامل الماستر بتاعي
فيها وآآ...

-رامي بجدية : معلش برا حاجة ، وهنا حاجة
تانية خالص

-آياز بتحدي : وأنا عاوز أثبت نفسي هنا
-رامي على مضض : صدقني محدش
هايقبل باللي انت بتقوله ده ، أصلاً مش
هتلاقي مدرسة تشغلك ، انت عارف لو كنت

مدرس أي حاجة تانية هتتخطف خطف ،
وخصوصاً إن انت معاك جنسية ولغة ..
يعني فرصة لأي حد

-آياز بإصرار : أنا هادور ، وأكيد هلاقي

المناسب ليا

-رامي مقترحاً بهدوء : طب ما تشتغل
مدرس Science (علوم) ولا ماث للعيال
الكبيرة ، أو حتى بتاع ألعاب ، وش هتشتغل

-آياز بغرور : أنا مدرس كي جي ، مش أي
حاجة تانية ، وكمان أنا مرضهاش لنفسيه

-رامي باعتراض ، ونظرات ضيقة : ولا أنا

أرضها لك .. ١

ثم اقترب رامي منه ، ووضع يده على فخذة

، وربت عليه في جدية و..

-رامي بنبرة محذرة : يا بني انت وظيفتك

هاتبقى عاملة زي الدادة بالطبطا

ضيق آياز عينيه في استغراب شديد ، ثم ...

-آياز بتأفف : افندم؟؟ دادة !

-رامي بتهكم : أيوه ، اومال انت مفكر ايه ،

معروف في مصر إن مدرسات الحضانة

دادات للعيال ، لا شغلة ولا مشغلة ، آخرتهم

يشطفوا وينصفوا ريالة العيال

-آياز باعتراض شديد : انت غلطان ، دي أهم

وظيفة عندنا في الUS، ومش أي حد

بيشتغلها ، بالعكس لازم

يكون teacherالمرحلة دي متخصص أوي ،

وعامل دراسات عليا وآآآ....

-رامي مقاطعاً باستخفاف : كل اللي انت

بتقوله ده حلو بس عندكم ، لكن هنا لأ ..

محدث بيشتغل في الحضانات غير
المدرسات السّكّة والتعبانيين ، لكن
ماعمريش الصراحة شوفت راجل شغال
مدرس كي جي ...!!!

-آياز بحزم : أنا خدت قراري خلاص ، ومن
بكرة هاشوف الموضوع ده

-رامي بنبرة إحباط : صدقني مش هتلاقي ،
أنا واثق من اللي بقولهولك ، بلاش تتعب
نفسك على الفاضي ا

-آياز بضيق : سييني أخذ فرصتي

-رامي بجديّة : مش هتلاقي فرصة ، طب أنا
عندي اقتراح حلو ، ما تفكك من جو
المدرسة والمدرسين الفقّر ده ، وتعالى
اشتغل معنا في معرض العربيات ، والله

مافيش أحلى من كده ، روقان بال ، وحاجة

أخر جمال

-آياز باعتراض : مش هياحصل !!!

ثم نهض عن الفراش ، وسار في اتجاه
الشرفة ، ووضع يده في جيبه بنطاله ، وهدق
أمامه في الفراغ ، و..

-آياز بنبرة عازمة : أنا مش هاكون غير مدرس

كي جي وبس!!!!

.....

واصل قراءة الجزء التالي

الفصل الثاني

الفصل الثاني :

بعد مرور يومين ، تزاومت عشرات الفتيات
أمام بوابة مدارس اللافانيا الدولية من أجل
ملء طلب الالتحاق بالمدرسة ، فقد انتشر
الخبر سريعاً عبر صفحات التواصل
الإجتماعية عن وجود وظيفة شاغرة لمعلمة
رياض أطفال ، وبالفعل توافدت الكثيرات
من أجل المنافسة والفوز بتلك الوظيفة ذات
الراتب المجزي ..

شعرت عاليا بالضجر نتيجة الضوضاء العالية
والمتسببة من ثرثرة المتقدمات بطلب
الالتحاق بتلك الوظيفة ، فقد كانت غرفة
المعلمين قريبة من الاستقبال ، ونتيجة
التزاحم اضطرت بعض الفتيات أن تقف في
الحديقة الملاصقة للغرفة ، فبدى الصوت
اكثر إزعاجاً و..

-عاليا بتذمر : اوووف ، مش هانخلص ، كل

يوم دوشة

-ريمان بهدوء : ما انتي عارفة لازم مس

اعتماد تجيب حد جديد قبل ما الدراسة تبدأ

-عاليا بضيق : أنا قولتلها اجيب حد أعرفه

من دفعتي بس هي مرضتش ، عاوزه يكون

متخصص في اللغة

-ريمان بجدية : هي عندها حق ، احنا مدرسة

دولية ، ول لازم يكون الstaff على قدر من

الكفاءة

-عاليا بإنزعاج وهي ترفع أحد حاجبيها : طب

ما أنا البنت اللي هاتقدم شاطرة جداً وآآ...

-سارة مقاطعة بنبرة متأففة : يخربيت كده ،

شوية متخلفين واقفين برا

-ريمان متسائلة بحيرة : في ايه يا سارسورة

؟؟ مالك مضايقة من ايه ؟

-سارة بزمجرة ، ونظرات حادة : يا ريموو

البهايم اللي واقفين برا عمالين يتنططوا عليا

وأنا بفهمهم ازاي يكتبوا استمارة التقديم ،

كل واحدة عماللي انها سفيرة ولا وزيرة

وفاهمة ، وهي مخها مايفرقش عن

الشoes اللي هي لبسها

-عاليا بنبرة يائسة : بس ياختي عاجبين

أبلك ، وطالعة بيهم السنة

-سارة بتهكم : بكرة نشوف هايعملوا ايه في

الديمو .. وساعتها هتعرف انهم ريش على

مافيش !!

ضحكت الفتيات على دعابتها الأخيرة ، و...

-ريمان بنبرة مازحة : انتي فظيعة ، بتجيبني

مثل لكل حاجة ، يا الله عليكي

-سارة بضيق : سبيني أفك عن نفسي

شوية

-عاليا بجدية : بقولكم ايه أنا هاروح أقعد

شوية في الكانتين ، ماتيجوا بدل الدوشة

اللي هنا دي

-سارة وهي توميء برأسها ، وبنظرات

مشرقة : اشطا أنا معاكي

ثم استدارت برأسها ناحية ريمان ، وأشارت

لها بيدها و..

-سارة بنبرة متحمسة : يالا يا ريموو ،

مالهاش لازمة الأعدة هنا

-ريمان معترضة : بس أنا لسه مخلصتش

تحضير وآآ...

أمسكت سارة بذراع ريمان ، ثم قامت

بجذبها عنوة من على المقعد و..

-سارة مقاطعة بإصرار: نبقى نكمله بعدين ،

لسه اليوم عندنا طويل

-ريمان مبتسمة ابتسامة خفيفة : اوكي ..

ماشي

.....

عند منطقة الاستراحة الملحقة بالمدارس ،،،

دلفت فتاة ما نحيفة خارج المقصف

المخصص لشراء الأطعمة المغلفة والحلوى

وهي ممسكة بحقيبة بلاستيكة ممتلئة عن

آخرها بالحلوى والعصائر ، ثم تهادت في

خطواتها إلى أن اقتربت من طاولة بيضاء

مثبت بها مقاعد خشبية على الجانبين ،

وانضمت إلى باقي رفيقاتها ، ثم ناولتهن
الحلوى و...

-رانيا بنبرة رقيقة : كل واحد يشوف كان
طالب ايه ، أنا جبتلكم كل حاجة من عند
أحمد

-نشوى بنبرة عادية : أنا كنت طالبة
شيكولاته ، وعصير

-سحر متسائلة بجدية : مافيش شيبسي ؟

-رانيا وهي تهز رأسها بالنفي : لأ

-سحر وهي تلوي شفيتها في ضيق زائف :
اووف ، او مال أحمد عنده ايه بالظبط

-فريال بمزاح : معندوش إلا بسكويت ماري
للأطفال

ضحكت الفتيات عالياً على طرفتها ، في حين
لمحت رانيا من زاوية عينها بعض المعلمين
الذكور وهم يقتربون منهن ، فانتصبت في
جلستها ، وبدأت تعبت بخصلات شعرها
وكأنها لا تكثرث .. ولكنهم مروا بهن دون أن
يلقوا التحية ، فامتعض وجهها ، ولوت فمها
في استنكار ، ثم استدارت برأسها لتراقبهم
وهم يذفون إلى داخل المقصف ، ثم عاودت
النظر في اتجاه رفيقاتها و..

-رانيا متسائلة بنزقٍ : أومال مافيش رجالة
شغالة عندنا في الكي جي ليه ؟؟

-نشوى معترضة بشدة : انتي هبلة !!

مافيش الكلام ده عندنا ٢

-رانيا بعدم اقتناع وهي تقطب جبينها : ليه
يعني ؟؟؟!!

-فريال بنبرة شبه ساخرة : لأن الكي جي
عندنا عامل زي ال (حرمك) بتاع السلطان
، مُحرم علينا وجود أي راجل هناك

-رانيا بنظرات مصدومة ، ونبرة متشنجة :
نعم !! أو مال بس مدرسة دولية ، ومدرسين
، وهانتجوز ، وفي الآخر أشتغل مع بنات زيي ،
أل وأنا اللي كنت معشمة نفسي هاطلع
بعريس من هنا

-نشوي وهي تلوي فمها في استخفاف :
يبقى تنسي

-سحر بنبرة جادة : الكي جي عندنا معروف
عنه إنه فقر وبيجيب النحس لأي حد ،
فعشان تتجوزي لازم تطلعي الgrades)
(المراحل الأعلى)

اتسعت عيني رانيا في صدمة أكبر ، وفغرت
شفتيها في ذهول ممزوج بالضييق و...

-رانيا بإحباط : لأ بجد كده كتير ، يعني لا جواز
، ولا رجالة !!!

.....

في فيلا سرحان عليه ،،،

في غرفة آياز بالطابق العلوي ،،

ألقي آياز بجسده المرهق على الفراش بعد
أن قضى يومين في البحث عن وظيفة معلم
رياض أطفال ، ولكنه لم يوفق على الإطلاق

...

تنهد هو في تعب ، ثم أغمض عينيه ليتذكر
كيف جرت المقابلات مع مدراء المدارس
التي تقدم لها ، فبالرغم من كونه معلم كفء
، وذو خبرة عالية في مجاله ، إلا أن الرد كان

واحداً له (حضرتك معندناش وظيفة مدرس
كي جي ، الوظيفة دي للستات وبس)
اعتدل هو في نومته ، ثم ضرب الفراش
بقبضة يده و...

-آياز بحنق ، ونظرات مشتعلة : ايه التخلف
ده ، هما مفكرين إني مش هاقدر أشتغل ،
ده أنا عامل ماستر فيها ، أوووف !!!
ثم سمع صوت طرقات على باب غرفته ،
فنهض من على الفراش ، وسار في اتجاه
الباب ، وقام بفتحه ، فوجد الخادمة وردة
تقف أمامه وعلى وجهها ابتسامة سخيفة
و...

-وردة بنبرة متشوقة ، ونظرات حالمة :
هيبيح ، أعملك وكل يا أزاز بيه

-آياز بعدم فهم بعد أن لفظت اسمه بطريقة

خاطئة : نعم ؟

-وردة وهي تضع يدها بالقرب من فمها ،

وبنبرة مهتمة : يعني مام ، هام ، تاكل يا بيه

-آياز وهو يعيد رأسه للخلف، وبحزم : أها ...

لأ

-وردة بضيق زائف : لبييه بس ، ده أنا عليا

نفس في الوكل ، بنات البندر كيلاتهم

بيحسدوني عليه ، دوق انت بس وهتصدق

-آياز بتذمر : فلور ، بليز ، أنا تعبان ومش

ناقص وجع دماغ

-وردة بإصرار ، ونظرات فضولية : طب ما

تقولي ، مش يمكن أريحك

-آياز وهو يزفر في ضيق : يوووه ، واضح

انك Stupid (غبية) ومش بتفهمي

-وردة فاغرة شفتيها في بلاهة : هاه

ثم وضعت أصابع يدها على مقدمة رأسها
تحكها في عدم فهم ، واطرقت رأسها قليلاً
للأسفل ، فلمحت (شبيشياً) مقلوباً ،
فشهقت فزعاً ، ولطمت على صدرها و...

-وردة بنبرة مرتعدة ، ونظرات مذعورة : يا

نصيبتي

استدار آياز برأسه إلى حيث حدقت وردة
بعينيها ، ثم عاود النظر إليها وعلى وجهه
علامات الترقب الممزوجة بالحيرة و...

-آياز بقلق ، ونظرات متوجسة : What:؟؟؟٤

-وردة بنبرة منزعجة : الشبيش مقلوب ،

حرام يتساب كده ، ده فال وحش

-آياز بنظرات ضيقة ، وصوت خشن : افندم

-وردة وهي تزم شفيتها في قلق : أصلي يا
سي أزاز لما حد مننا يشوف شبشب
مقلوب لازم يعدله لأحسن يجيله النحس
والفقر والغلب وال... آآآ... ٢

لم ينتظر آياز طويلاً لكي تكمل وردة
تخاريفها الغير مقبولة بالمرّة ، حيث صفق
الباب في وجهها بعد أن رمقها بنظرات
ساخطة ، ثم عاد لفراشه وألقى بنفسه
مجدداً عليه ، وظل يتنهد في انزعاج .. ٢٠
لمح بطرف عينه جهاز الحاسوب النقال
الخاص به موضوعاً على الكومود ، فمد
يده ليمسك به ، ثم فتحه ، واخذ يتنقل بين
صفحات التواصل الاجتماعية المختلفة
متفقداً الرسائل الإلكترونية ، وأخر الأخبار ..

.....

في معرض عليوه للسيارات ،،،

تراجع رامي بمقعده الجلدي للخلف بعد أن
أداره ليواجه ذلك الحائط الزجاجي الذي
يكشف الطريق من خلفه ، وعدّل من هاتفه
المحمول الموضوع على أذنه ، ثم اطلق
ضحكة عالية من فمه قبل أن يتشدد بـ ...

-رامي هاتفياً بنبرة متحمسة : يا رودى أنا

وعدتك ، يبقى وش Trust me

-رودينا هاتفياً بنبرة محبطة : لأ ..

انت always (دائماً) بتشتغلني ، وأنا

معنتش هصدقك

-رامي بإصرار : يا بيبى ، انتي اللي في القلب

، وأنا مستعد أصلح غلطتي ، وأعزمك في

المكان اللي انتي تختاريه النهاردة

-رودينا وهي تمط شفيتها في دلال : مميم ..
اوكي .. بس بشرط تجيلي كمان هدية

-رامي بثقة ، ونظرات مغترة : شوور (طبعاً

(

ثم أنهى المكالمة الهاتفية معها ، وقام
بإطلاق سبة ، و...

-رامي بإمتعاض ، ونظرات متوعدة : بنت ال
..... هاتشتغلني ، مفكراني عيل سوكو بوكو
هايف مش فاهم حاجة ، ده أنا شائطها من
الواد حازم ، بالليل هاعمل معاها الصح ،
وأفضحها قصاد الكل .. ماهو اللي زيها لازم
يتربى كويس ... !!

ثم دلف إلى مكتبه والده المهندس سرحان ،
ذاك الرجل المنمق في ملابسه ، وأيضاً في
أسلوبه في التعامل مع الآخرين ..

عدل المهندس سرحان من وضعية نظارته
الطبية الفاخرة ، وجلس على المقعد
المقابل لمكتب ابنه ، و...

-سرحان بصوت آجش: رامي ، عاوزك تسافر
اسكندرية للمعرض الثاني تتابع العمال
هناك

-رامي بإستغراب : طب ما تبعت يا بابا أي
حد ، أنا مش فاضي

-سرحان بجدية ، ونظرات حادة : ده معرضنا
يا بني ، مالنا ولازم نخاف عليه ، انت
معندكش دم ، إزاي اسيبه كده من غير ما
أسأل

-رامي بعدم اكتراث : أنا مش فاضي ، ورايا
مشاغل

-سرحان بحنق : وانت من أمتى بتفضى غير

للسبق والمنظرة

-رامي وهو يزفر في انزعاج : يعني حضرتك

عارف إني مش بتسرمح ولا بقضيها ، أنا

بحب السباق أوي ، وعندى رالى عاوز أشترك

فيه ، فمش هاضيع وقتي في اني اتابع شوية

عمال يبيلطوا ولا ييمحروا

نهض سرحان عن المقعد ، ثم ضرب سطح

المكتب الزجاجي بقبضة يده بقوة ، وحدث

ابنه بنظرات شرسة قبل أن يردف بـ ...

-سرحان بنبرة غاضبة : هاتروح غصب عنك ،

أنا مش بهزر في الشغل

نهض رامي عن مقعده الجلدي ، وقبل أن

يفتح فمه للرد على والده ، سمع كلاهما

طرقات خفيفة على باب المكتب ، أعقبها

دخول سكرتيرة حسناء المظهر ، فافتى
الاثنين بالصمت ، ثم جلس سرحان على
مقعده ، بينما ظل ابنه واقفاً ومحدقاً في
السكرتيرة ..

-علا بنبرة رقيقة وهادئة : مستر رامى ،
ممكناً أخذ اذن ساعتين وأرجع

-رامى متسائلاً باقتضاب : ليه ؟

-علا وهي تتنحى فى خجل : احم .. اصل
أختى رايحة تقدم على شغل فى مدرسة
لافانيا الدولية ، وهي كانت أعدة بالبيبي
بتاعي ، بس مش هاينفع تسببه لوحده
وتنزل ، فلو أمكن أروح مكانها لحد ماهي
تقدم الapplication (طلب التوظيف) !

لوى رامى فمه ، ثم أدار رأسه قليلاً للجانب ،
ولم يجب عليها ، فشعرت علا بالحرى من

تكرار طلبها مجدداً ، فاستدارت برأسها ناحية
والده لعله يمنحها الإذن .. وأصابت الاختيار
حيث بادر بـ...

-سرحان متسائلاً بجدية : وهي اختك شغالة
مدرسة ؟

-علا بنبرة مهتمة : اه يا مستر سرحان ، هي
خريجة كلية البنات ١٨

-سرحان متسائلاً بإهتمام : وهي مدرسة ايه
؟

-علا بنبرة متلهفة : انجليش لطلبة اعدادي ،
بس هي مش فارق معاها تشتغل أي حاجة
إن شاء الله مدرسة كي جي

أثارت عبارة علا الأخيرة انتباه جميع حواس
رامي ، فرمقها بنظرات متفرسة و...

-رامي متسائلاً بجديّة : هما عاوزين مدرسين

في المدرسة اللي انتي قولتي عليها؟؟؟

-علا بايجاز وهي توميء برأسها : ايوه

-رامي متسائلاً بفضول أكثر : تخصص

انجليش ولا كي جي ؟

-علا بنبرة هادئة وناعمة : الاتنين

-رامي بحيرة : يعني هما عاوزين مدرسين

للمرحلتين

هزت علا رأسها بالنفي ، ثم رمقت رامي

بنظرات ثابتة قبل أن تتشدد بـ ..

-علا بحماس : لأ يا مستر رامي ، هما عاوزين

مدرسة كي جي تكون تخصص انجليش ،

وبمرتب عالي ، واختي شايفة انها فرصة

بالنسبها عشان تقدم يمكن تقبل

استغرب سرحان من اهتمام ابنه المفاجيء
بالسؤال عن طبيعة تلك الوظيفة الشاغرة ،
ولكنه لم يعقب .. استمر رامي في تقصي
بعض المعلومات عن طبيعة تلك الوظيفة
والمدرسة ، ثم في النهاية وافق على إعطائها
الإذن ..

دلفت السكرتيرة علا خارج المكتب وهي
تنظر بإمتنان لرب عملها ، في حين رمق
سرحان ابنه بنظرات حادة و..

-سرحان بجدية : ممكن أفهم انت بتسأل علا
كل الأسئلة دي ليه

-رامي مبتسماً في لؤم : عشان آياز

-سرحان بعدم فهم : آياز !!

-رامي بنبرة واثقة : لأنه أكثر واحد هيفرح
أوي لما يعرف إن وظيفة أحلامه موجودة

-سرحان بنظرات مصدومة ، ونبرة متعجبة :

هو آياز عاوز يشتغل مدرس حضانة ؟

-رامي بايجاز : ايوه

-سرحان بامتعض ، ونظرات استخفاف :

اتهبل ده ولا ايه ! مايشغل اي حاجة تانية ،
ولا هي الوظائف خلصت عشان يشتغل بتاع

حضانات

-رامي وهو يلوي فمه في تأفف : عاجباه يا

بابا ، متمسك إنه يكون مدرس كي جي ، أل

ايه ده حلم حياته انه يبقى كده

-سرحان بإستنكار : الكلام ده عنده في أمريكا

، مافيش الكلام ده في مصر ، الظاهر إنه

مفكرها مسألة سهلة وعادية

-رامي بصوت خشن : والله قولتله الكلام ده

، وهو راكب دماغه ، ويقاله يومين أخذها

كعب داير بيدور على شغلانة مدرس في
حضانة ، ومحدث موافق

-سرحان بهدوء : عندهم حق ، هو في راجل
يستحمل قرف العيال ، عقله انتبس وخليه
يجي يشتغل معانا في المعرض بدل
التخاريف الفاضية اللي في دماغه

-رامي بنبرة إحباط : والله أنا غلب حماري
معاه ، ان قدرت تكلمه يا بابا تبقى عملت
فيه وفيا أكبر معروف

-سرحان بنبرة عازمة : انا هاكلمه وهاخليه
يرجع عن الفكر الغبي ده

-رامي مبتسماً في مزاح : تبقى معلم
بصحيح يا بشمهندس لو عملت كده فعلاً

-سرحان بنبرة ساخطة : اتلم يا وَاَد

-رامي بحماس ، ونظرات متفائلة : حاضر ،
المهم هاسيبك أنا وألحق أروح لآياز أبلغه
بالخبر ده ، يمكن تضرب معاه

-سرحان بعدم اقتناع : والله انت أهبل أكثر
منه ، ده بدل ما تشوف مصالحنا

-رامي بإيجاز : بعدين يا بابا عن اذنك

ثم أخذ رامي سلسلة مفاتيحه ، ودلف إلى
خارج المكتب بخطوات سريعة ..

.....

في غرفة المعلمات بمدارس اللافانيا ،،،

توقفت معلمتين أمام الغرفة وهما
ممسكتان ببعض الكتب الدراسية ، و...

-ميادة بجدية وهي تنظر إلى محتوى الكتاب
: شوفي ده ، بيتهيا لي هيبقى مناسب

-هناك بنظرات حائرة ، ونبرة شله جادة : مش
عارفة بصراحة ، بس هو مختلف عن بتاع
السنين اللي فاتوا

-ميادة بنبرة متحمسة : ده الإصدار الجديد
للمنهج ، أنا شايفة انه هايكون مفيد أوي
-هناك بتوجس : بس تفتكري مس إعتما
هتوافق على إننا نبدل المنهج وهو لسه
مافتش عليه كتير

-ميادة بنبرة عازمة : والله لو أصرينا على ده
ممکن توافق

-هناك وهي تمط شفيتها في امتعاض :
معتقدش إنها هتوافق ، دي دماغها صعب
أوي

.....

ميادة عبد العزيز هي معلمة كفؤ ، ومن
أمهر من تولى مهنة التدريس في مبنى رياض
الأطفال ، ورغم إصرار الإدارة على نقلها
للمراحل العليا ، إلا أنها رفضت ، وفضلت
البقاء في مبنى رياض الأطفال كمعلمة أولى
للغة الإنجليزية ..

لم يحالف ميادة الحظ في الزواج رغم تقدم
الكثيرين لخطبتها ، ولكنها كانت تبحث عن
الشريك المثالي الذي يضيف إليها ، وليس
ذلك الزوج العادي الذي يصبح - لاحقاً -
عبئاً عليها .. ٣

بينما زميلتها المقربة هي هناء حافظ .. فتاة
متخرجة حديثاً ، وتعمل بكل جهد لتطوير
نفسها ، تم خطبتها مرة واحدة ، ولكن
للأسف لم يكتمل مشروع الزواج بسبب
ظروف العريس المادية المتعسرة .. ٢

.....

ثم وجدت كلتاهما من تقاطع حديثهما
الجانبى ، فالتفتا بفرع على إثر صوتها
الصارخ

-إعتماد بغضب عارم ، ونظرات مستشافة :
ده اسمه إهمال ، والكل هيتحاسب على ده
-ميادة بقلق ، ونظرات ضيقة : في ايه يا مس
اعتماد ؟

-هنا بتوجس : ايه اللي حصل يا مس
اعتماد ؟

-إعتماد بإنفعال شديد : علبة المناديل
الخشب الجديدة مش موجودة في مكانها
-ميادة بنظرات جاحظة ، ونبرة مندهشة : نعم

!

-هناك بنبرة مدهوشة ، ونظرات متسعة : هاه

-إعتماد بعصبية تحمل التهديد : لو اللعبة
مظهرتش خلال ساعة واحدة ، الكل هيتحول
للتحقيق ...!٢

-ميادة متسائلة بدهشة : طيب نفهم بس يا
مس اعتماد إيه الموضوع عشان نتصرف
-إعتماد بإنفعال شديد : هافضل أعيد في
كلامي عشان تفهموا !!

-هناك فاعرة شفيتها في ذهول : الله !
ثم تركتهما وانصرفت وعلى وجهها علامات
الغضب الممزوجة بالعصبية ..

حدقت كلتاهما في بعضهما البعض في
استغراب ، و...

-هناك متسائلة بتعجب : مالها دي

-ميادة بجدية ، ونظرات ضيقة : الظاهر إن
الموضوع فيه سرقة

-هناك بدهشة : سرقة !! دي مناديل

-ميادة بنبرة متمهلة : مش عارفة ، بس
طالما هاتعمل تحقيق يبقى فيه اشتباه في
سرقة

-هناك مزحة : طب يا شارلوك هولمز مين
بقى اللي سرقها

-ميادة بإيجاز : هيبان .. بس لازم نبليغ البنات
باللي حصل

-هناك بتنهيدة : اوكي

.....

انتشر خبر فقدان علبة المناشف الورقية –
والمصنوعة من الخشب – في مبنى رياض

الأطفال بالمدارس كسرعة البرق ، واجتمعت
جميع المعلمات في الغرفة الخاصة بهن
للترتيب من أجل عملية البحث عنها ،
وأصبحت أصواتهن عالية وتداخلت بسبب
المناقشات والهمهمات الجانبية ، فنهضت
ريمان عن المقعد ، ورفعت يديها عالياً في
الهواء لتلوح بهما و..

-ريمان بنبرة عالية : يا بنات ، اسمعوني !
انتبه الجميع لها ، وبدأت أصواتهن تنخفض
تدرجياً ، فتابعت هي ب ...

-ريمان بجدية : واضح كده إن محدش فينا
شاف العلبة دي وآآ...

-عاليا مقاطعة بنبرة جادة : على فكرة ممكن
يكون حد من اللي جه يقدم في المدرسة
أخذها

-هناك بنبرة عادية : ده وارد برضوه

-ريمان بنبرة مستفسرة : طب واللي

هايخدها هايعمل بيها ايه ؟

-ميادة بامتعاوض : مش عارفة ، بس الواضح

إن الموضوع ده مهم أوي عند مس اعتماد

-عاليا بإستنكار واضح : يعني سابت كل

حاجة بتحصل ، ومركزة في اللي سرق شوية

مناديل ، ولا علبة فاضية

-رانيا وهي تلوي شفيتها في استهجان : أنا

عارفة ، بس أهو جالبنا الكلام مع اللي ما

تتسمى

-نشوى بإنزعاج : ايوه ، على رأيك .. بوز

الإخص دي ما بتصدق تلاقي بلوى وتلبسها

لأي حد

تنحنت سارة بصوت عالي ، ثم قامت
بتقليد نبرة صوت الأستاذة إعتقاد و...

-سارة بنبرة مقلدة : إنتي مقصرة يا مس
نشوى ، إزاي تسيبي العلبة تضيع ، لافت
نظر بسرعة ، نقول خصم من المرتب ،
نخليها رقد أحسن

ضحكت الفتيات على طريقة سارة في
تقليدها ، في حين تابعت ليلة ب ...

-ليلة بمزاح : أه لو شافتك يا سارة ، هتلبسي
وش في الحيط

تعالت قهقات الفتيات عالياً ، وتحول الأمر
إلى مزاح هزلي ، ثم لمحت إحداهن الأستاذة
اعتقاد وهي تأتي من بعيد ، فأشارت لهن
بالهدوء ، فإدعين جميعاً أنهن يبحثن عن
طريقة لإيجاد العلبة ..

وقفت الأستاذة إعتماذ أمام باب الغرفة ، ثم
رمقت الجميع بنظرات متفحصة ، في حين
ساد الصمت أرجاء الغرفة و...

-إعتماذ بنبرة متصلبة ، ونظرات جادة :
سوري يا بنات ، أنا لاقيت العلبة ، كانت
واقعة ورا الاستاند اللي في الريسبشن ،
معلش انتو عارفني مش بحب حاجة تضيع
... يالا أسيبكم تكملوا شغلكم بلاش عطلة ،
وضياع وقت على الفاضي ...!!!

ثم تركتهم وانصرفت ببرود مستفز ،
فتحولت نظراتهن جميعاً إلى سخط ممزوج
بالحنق و...

-فريال بضيق : الست دي مش طبيعية

-ريمان بغیظ : دي باردة

-رانيا بنبرة محتقنة : والله العظيم دي
بتستهيل ، بقالها ساعتين ماعدنا على
أعصابنا ، وفي الآخر تقولك لاقيتها

-عاليا بسخط : ده احنا لسه هانشوف من ده
كثير

-سارة بإنزعاج : ربنا يصبرنا على ما بلانا
-نشوى بنبرة متشنجة : لأ وجاية تقول كملوا
شغلکم ، تقولش إحنا كنا بنلعب

-ميادة بضيق واضح : ماهو عتاب السفية
اجتنابه

-عاليا بنبرة ساخرة : وعلى رأي المثل
خنفسة شافت بنتها على الحيط ، قالت دي
لوليا بخيط

ضحكت الفتيات مجدداً ، وبدأوا في تقليد
الأستاذة إعتماذ في عدد من المواقف التافهة
، وتحول الأمر برمته إلى مزاح ساخر ..
طرقت سحر بقبضة يدها على الطاولة
الخشبية في انزعاج ، ثم مالت على رانيا
بجسدها ، و...

-سحر مضيعة بنبرة ضائقة : اوووف ،
ضيعت علينا أعدة الكانتين ، وشباب
الكانتين

-رانيا وهي توميء برأسها موافقة : على
رأيك ، كان زمانا طلعلنا بمصلحة
حدجتها ريمان بنظرات متفرسة ، ثم ...

-ريمان متسائلة بإستغراب : مصلحة ايه ؟

-سحر وهي تتنحج بحج : احم .. آآ..
ماتخديش في بالك ، أهو أي كلام بيتقال
وخلص

-ريمان بعدم اقتناع : أها-

.....

في فيلا سرحان عليه ،،،

صعد رامي إلى غرفة آياز ، وأخبره عن
الوظيفة الشاغرة في مدارس اللافانيا ، فتملك
الأخير الحماس بدرجة كبيرة ، وسار مبتعداً
عن رامي ، وأخذ يرسم بخياله الواسع أحلامه
وطموحاته عن تلك الوظيفة وكيفية تطويرها
.. في حين تابع رامي بهدوء ردة فعله ، ثم
جلس على الفراش ، وأمسك بهاتفه
المحمول وظل يتابع بعض الرسائل القادمة
إليه عبر برنامج (الواتس آب) ..

توقف آياز فجأة عن التفكير ، و التفت
برأسه ناحية رامي وحده بنظرات جادة و...
-آياز بنبرة شبه معاتبة : مش كنت تقولي من

بدري

-رامي بنبرة استغراب وهو ينظر لشاشة
هاتفه : ليه ؟

-آياز بضيق زائف : يعني كنت روحت
وعملت الapplication (طلب التوظيف)
بالمرة

-رامي بعدم اكتراث : يوم من يوم قريب يا
إيزوو

-آياز بنبرة متحمسة : أنا مش هايجيلي نوم
لحد بكرة

ترك رامي هاتفه المحمول على الفراش ، ثم
انتصب في جلسته ، ورمق آياز بنظرات ضيقة

و..

-رامي بنبرة ساخرة : ليه يعني ! ده انت لو
عريس وفرحك بكرة مش هايكون شكلك
عامل كده

-آياز بنبرة متشوقة : أصل انت مش عارف أنا
بحب شغلي أد ايه ، ومستني أثبت نفسي
هنا في بلدي ، واطبق كل اللي اتعلمته برا
على الأطفال هناء

-رامي وهو يمتد شفطيه في جدية زائفة :
أحب أبشرك إن ده مش هايحصل هنا

-آياز بإصرار : لالا.. You don't know me..)

(انت مش عارفيني)

-رامي بإستهجان : والله انت اللي مش
عارف البلد دي ، ولا عيال البلد دي ، ولا
مدرسين البلد دي ، بكرة تشوف بنفسك
إنك هاتروح ومش هتلاقي فرصة في المدرسة
دي

-آياز بنبرة متحمسة للغاية ، ونظرات واثقة :
شوف يا رامي الوظيفة هاتكون ليا ، ولازم
تبقى واثق إن أنا جاي وناوي أعمل انقلاب
في التعليم

-رامي مبتسماً في تحدي : انقلاب مرة واحدة
، ماشي هانشوف ، والمياه تكذب الغطاس

-آياز بنظرات متفائلة ، ونبرة جادة : بكرة
هاتعرف مين هو آياز كامل الشناوي ، أول
مدرس كي جي في مصر

!!!

.....
واصل قراءة الجزء التالي

الفصل الثالث

الفصل الثالث :

في مبنى رياض الأطفال بمدارس اللافانيا
الدولية ،،

استمر توافد المتقدمات لملء طلب
الإلتحاق بالوظيفة الشاغرة لليوم الثالث على
التوالي مع بدء مواعيد العمل ..

أصر رامي على اصطحاب آياز إلى مقر
تلك المدرسة ، فسعد الأخير بمساعدة ابن
خالته له ..

تأنق آياز على غير عاداته ، فتلك الوظيفة
بالنسبة له هي حلم حياته المنتظر ، وبالتالي
عليه أن يثبت أنه يستحقها منذ أول يوم له ..
لذا ارتدى بدلة ضيقة من اللون الرصاصي
فأبرزت عضلاته المشدودة ، ومن أسفلها
ارتدى قميصاً أسود اللون ، وفتح أزراره حتى
بداية صدره .. ووضع حذائه الأسود اللامع في
قدميه ، كما مشط شعره بطريقة جذابة ،
ولم ينس أن يضع بعضاً من عطره المميز ..
فبدى أكثر وجاهة ، وأكثر وسامة .. ٧

صف رامي السيارة أمام بوابة المدرسة
الجانبية ، ثم استدار برأسه في اتجاه آياز ، و..

-رامي بهدوء ، ونظرات إعجاب : Good

Luck يا إيزوو

أخذ آياز نفساً عميقاً ، ثم أغمض عينيه في
قلق ، و زفره بقوة ، ومن ثم فتح عينيه و...

-آياز بنبرة شبه متوترة : ثانكس مان

-رامي بنبرة مشجعة وهو يربت على فخذة :

أنا هستناك هنا ، ومش هوصيك .. عاوزك

تشلهم من الإنبهار

ابتسم له ابتسامة خفيفة ، ثم هز رأسه

موافقاً ، و...٢

-آياز بنبرة متعشمة : hope so (أتمنى)

ثم أمسك آياز بالمقبض ، وفتحه ، وترجل

من السيارة ، وسار في اتجاه البوابة الحديدية

، وهو يحمل في يده ملفاً مغلفاً ..

تابعه رامي بعينين متفرستين إلى أن تواری

تماماً عن الأنظار ، فوضع هو نظارته

الشمسية القاتمة ، وظل ينظر من مرآة

السيارة الجانبية على المارة تارة ، وعلى

الوافدين للمدرسة تارة أخرى ..

.....

تطائر عطر آياز في الجو بطريقة رهيبة ،
فاستنشق كل من يمر بجواره أو حتى على
مقربة منه ذلك العطر وبحث عن مصدره ..
فكانت النتيجة أن يروا ذلك الوسيم وهو
يقترب من المبنى ..

لمحته العاملة روحية وهي جالسة على
مقربة من مدخل المبنى ، فاتسعت عينيها
في دهشة ، واعتلى ثغرها ابتسامة راضية و...

-روحية بنظرات منبهرة ، ونبرة متحمسة :

بت يا ناصرة بصي كده

-ناصره بنفاز صبر : في ايه ؟

-روحية بإصرار وهي تشير بعينيها : الشاب

اللي جاي علينا ده

استدارت العاملة ناصرة برأسها إلى حيث

أشارت زميلتها ، فجحظت عينيها و...

-ناصره بذهول : ايه ده .. هو في حد كده٢

-روحية بخفوت وهي تميل برأسها عليها :

باين عليه ولي أمر جاي يقدم لابنه هنا٣

-ناصره بحماس : يا ريت

-روحية بنظرات متفحصة ، ونبرة شبه عازمة

: وشه بيقول إنه من بلاد برا

-ناصره وهي تلوي فمها في امتعاض : واتي

عرفتيها لوحديك يا أم العريفة ، ما يمكن

يكون من هنا

-روحية بإصرار : يا بت مافيش راجل عندنا

شكله حلو أوي كده ، احنا رجالتنا عدم

اللامؤاخذة مايتبصش في وشهم١٦

-ناصرة بنبرة أقرب للهمس ، ونظرات مترقبة
: طب اسكتي بقى لأحسن باينه جاي علينا
-روحية بخفوت شديد وهي توميء برأسها :
طيب .. طيب

توقف آياز في مكانه حائراً لا يعرف إلى أين
يتجه ، ثم التفت برأسه على الجانبين
ليبحث عن يدله على مكتب المدير ، فرأى
العاملتين ، فقرر أن يسير ناحيتهما .. وما إن
توقف أمامهما حتى نزع نظارته عن عينيه ،
ورمقهما بنظرات ثابتة و..

-آياز بنبرة رخيمة وعميقة: Good morning!
ابتسمت روحية له ابتسامة عريضة ، وظلت
محدقة بعينه الزرقاوتين ، ، ثم مالت
برأسها على زميلتها ، وهمست بـ ... ١

-روحية بثقة : مش قولتلك انه مش من هنا

-ناصره بخفوت : الظاهر طلع عندك حق

انتبه آياز لحدثهما الخافت عنه ، فابتسم
لهما ابتسامه مصطنعة ، وقرر أن يبدو
أمامهما كما ظنا (رجل أجنبي لا يعرف
كيفية التحدث باللغة العربية)

-آياز بجديّة: I wanna meet the principle

عاوز أقابل مدير المكان)

فغرت كلتاهما شفتيهما في عدم فهم ،
ونظرتا إلى بعضهما البعض ببلاهة و...

-روحية بحيرة : ده بيقول ايه ده ؟

-ناصره بنبرة عادية : مش عارفة ياختي ، ده

بيرطن (بيتكلم) بالإنجليزي

-روحية بصوت طبيعي : طب ما نشوف أبله

من الأبلوات يفهمونا بيقول ايه

-ناصره بإعتراض : وهو أنا لسه هأقوم وأدور

على حد !

-روحية بنبرة ممتعضة ، ونظرات ضيقة : هو

انتي ما بتعمليش حاجة لله أبداً

-ناصره بنبرة شبه منفعة : ليه ياختي ما أنا

طول اليوم واقفة على حيلي وآآ...

تابع آياز شجارهما الطريف - من وجهة

نظره - إلى أن شعر بالضجر فحدجها

بنظرات ضيقة ، لذا قاطعهما ب ...

-آياز بنبرة جادة : Please .. tell me where

can I go (من فضلكم ، أين يمكنني الذهاب

(؟

فغرت كلتاهما شفتيهما في عدم فهم ، ونظرا

إلى بعضهما البعض ببلاهة و...

-روحية وهي تزم شفيتها : آآ.. أنا مش عارفة

أرد أقول ايه

-ناصره بوجه متجههم الملامح ، ونبرة عادية :

بصي أنا هاوديه عند مس أية وهي تتصرف

معاه ..!

تنهد آياز في ارتياح ، وأشاح بوجهه للناحية

الأخرى ، و..

-آياز لنفسه بخفوت شديد : اووف ، اخيرا

فهمت !

وبالفعل نهضت العاملة ناصره عن مقعدها ،

وأشارت له بيدها لكي يتبعها ، وسارت في

اتجاه مكتب السكرتارية ...

.....

خارج مبنى رياض الأطفال ،،،

أرجع رامي ظهره للخلف على مقعد
السيارة ، وأغمض عينيه المرهقتين ليرتاح
قليلاً ، فهو عادة لا يستيقظ في مثل ذلك
التوقيت المبكر ...

في نفس الوقت توقفت سيارة أجرة أمام
بوابة المدرسة لتترجل منها عالياً وهي
تحمل حقيبة يدها وكذلك حقيبة حاسوبها
النقال ، ثم أسندت الأخيرة على الأرضية
الأسفلتية ، وانحنت بجسدها قليلاً للأمام
لكي تدفع ثمن الأجرة للسائق من نافذة
السيارة الأمامية بعد أن نزعت نظارتها البنية
لتكشف عن عينيها العسلية اللامعة ، و..

-عالياً بهدوء ، ونظرات ثابتة : اتفضل يا
اسطى حسابك

مد سائق سيارة الأجرة يده ليأخذ النقود
منها ، ثم قام بعدهم وهو عابس الوجه ،

ومن ثم حدجها بنظرات غير راضية قبل أن

يتشدد بـ ...

-السائق بخشونة : الحساب ناقص يا أبله

-عاليا بإعتراض ، ونظرات غريبة : نعم !!

ناقص ؟ ليه إن شاء الله ؟!

-السائق بتشنج : ايه يا أبله ، انتي مش

شايفة المشوار عامل إزاي

-عاليا محتجة : لأ معلش ، أنا كل يوم بأركب

من هناك لحد هنا وبدفع نفس الأجرة ، انت

اللي بتستعبط !

-السائق بنظرات مغتظة ، وبنبرة حادة :

باستعبط ايه يا أبله ، هي السكة كده

-عاليا بإصرار ، ونظرات قوية : لأ معلش .. أنا

مش هادفع إلا كده

-السائق وهو يلوي فمه في استهجان : نعم

ياختي ..!

ثم ترجل هو الآخر من سيارته الأجرة ،

ووقف أمام الباب ، ولوح بيده في الهواء و...

-السائق بصوت فج ، ونظرات مشتعلة : أنا

عاوز فلوسي يا أبله

-عاليا بنبرة مرتفعة ، ونظرات متحدية :

ملكش عندي إلا اللي خدته وبس ...!!!

-السائق بحشجة قوية : لأ بقى ، وأنا مش

سايبك إلا لما أخذ حقي

-عاليا بنبرة أكثر تحدياً وهي تشير بيدها :

خلاص تعالى خدهم في القسم

انتبه رامي لتلك الأصوات العالية التي

تصدر على مقربة منه ، ففتح عينيه ،

واعتمدل في جلسته ، وتابع الشجار الدائر بين

ذلك السائق الفظ وبين تلك الفتاة بسيطة
الملامح والتي كانت ترتدي بنطالاً من الجينز
الأزرق ، ومن الأعلى قميصاً طويلاً يصل إلى
ما بعد ركبتها من اللون النبيذي ، وفي
منتصف خصرها حزاماً جليداً رقيقاً من
اللون الذهبي ، وتلف رأسها بحجاب يجمع
بين اللونين ...

تعجب هو مما يحدث ، وانزعج كثيراً من
طريقة السائق الفجة في التعامل مع الفتاة ،
ثم لاحظ احتدام المشاجرة ، وتوجس خيفة
من أن يتناول ذلك الوقح على الفتاة سواء
باللفظ أو بالإعتداء البدني .. لذا ترجل من
السيارة ، وسار في اتجاههما ...

ضرب السائق بقبضة يده على سطح
السيارة المعدني عدة مرات ، و..

-السائق بفضاظة ، ونظرات محتقنة : بقولك
ايه ماتجننيش، أنا عاوز فلوسي ، ومش
ماشي غير لما أخذها

-عاليا بنزق ، ونظرات غير مهتمة : انت حر
ثم انحنت للأسفل قليلاً بجسدها لتمسك
بحقيبة حاسوبها النقال ، ولكنها تفاجئت
بالسائق يجذب الحقيبة عنوة منها ،
فانتفضت فزعاً ، واتسعت عينيها في ذهول ،
وفغرت شفيتها في صدمة رهيبة و...

-السائق بصوت غليظ : لأ مش هاتمشي يا
أبلة ، فلوسي الأول

-عاليا بنبرة مصدومة وملتعثمة : انت .. آآ..
انت بتعمل ايه ، س .. سيب اللاب بتاعي
وحاولت هي الأخرى جذب الحقيبة منه ..

تدخل رامي سريعاً ، ووقف في مواجهة
السائق وجذب الحقيبة منه ، فأخذتها عاليا ،
وعلقها على كتفها ، ثم حدجه بنظرات
شرسة قبل أن يتشدد بـ ..

-رامي بنبرة قوية ومتشنجة : في ايه يا
اسطى ، انت هتمد ايدك على المدام ولا ايه
؟

تمعن السائق في هيئة رامي بنظرات قلقة ،
وتوجس - إلى حد ما - خيفة منه ، خاصة
وأن ملامحه توحي بأنه رجل عسكري ، أو ذو
سلطة ما ، و..

-السائق بنبرة أقل حدة : أنا عاوز حقي يا
أستاذ ، يعني يرضيك أجيبها من آخر الدنيا
لحد هنا وتديني دول بس

-عاليا بنبرة محتجة ، ونظرات مغتظة : انت

عاوز تسرقني وأسكتلك ، انت خدت حقك

استدار رامي برأسه للخلف لينظر إليها

بنظرات عادية قبل أن يشير لها بيده و..

-رامي بهدوء : ثواني بس يا مدام

-عاليا بضيق ، ونظرات ثابتة : أنسة من

فضلك

-رامي مبتسماً ابتسامة خفيفة : سوري

-السائق بنبرة متهكمة : ده انتو لسه

هتتعرفوا على بعض ، أنا عاوز فلوسي

خلوني أمشي وأشوف مصالحي

-عاليا بنبرة معاندة : وأنا مش هاديك إلا دول

وبس ، واللي عندك اعمله

-السائق بصوت عالي وهو يلوح بيده : والله
ماهسيبك

كاد السائق أن يتهور ويمد يده ناحية عاليا
ليعتدي عليها ، فتراجعت هي سريعاً
للخلف في توتر ، ولكن منعه رامي من
الوصول إليها ، وسد عليه الطريق بجسده ،

..و

-رامي بنبرة متصلبة ، ونظرات حادة : جرى
ايه يا اسطى ! هو أنا مش مالي عينك ، ناوي
تمد ايدك عليها وأنا واقف

-السائق بتوجس وهو يلوح بيده : لأ يا باشا ،
بس آآ..

-عاليا مقاطعة بتذمر شديد ، ونظرات شبه
خائفة : ده اللي ناقص ، طب يجرب بس ،
وأنا هاكسرله إيده وهاجيبيله الأمن يبهذهله

استدار رامى مجدداً برأسه ناحيتها ، ورمقها
بنظرات استغراب ، وسرح لوهلة في ملامحها
التي توحى بالبساطة الممزوجة بالبراءة ،
ورغم هذا فهي تحاول أن تبدو قوية ، كما
تعجب من شجاعتها المفرطة على الرغم
من وقاحة السائق وتهوره ، ولكنه عاد سريعاً
إلى أرض الواقع ، وتنحنح في خشونة ..

-رامى بصوت أجش : استنى يا أنسة لحظة ،
أنا بتكلم معاه

ثم أشار لها بعينيه كي تصمت ، فلوت
شفتيها في اعتراض ، ثم أشاحت بوجهها
بعيداً عنه وزفرت في انزعاج ..

استدار هو برأسه ليواجه السائق ، وحدجه
بنظرات قوية و...

-رامي بنبرة جادة : خلاص هي معهاش إلا

دول

-السائق بنبرة احتجاج : با باشا والله ما ينفع

، ده ظلم !!

حدجه رامي مجدداً بنظرات أكثر سخطاً ، ثم

وضع يده في جيب بنطاله الجينز ، وأخرج

منه بعض النقود ، وأمسك بكف السائق

وفتحه ، ثم وضع النقود به ، وأغلق قبضة

يده بعنف ، و...

-رامي بضيق جلي : خد دول ، واتفضل

بقي

فغرت عاليا شفتيها في صدمة ، واتسعت

عينيها في ذهول بعدما رأت ما الذي فعله

هذا الغريب مع السائق ، ثم إزدادت ملامح

وجهها عبوساً ، وعقدت ما بين حاجبيها و...

-عاليا بإعتراض شديد ، ونظرات مشدوهة :

انت بتعمل ايه ؟

-رامي بإقتضاب : خلاص يا أنسة

رمقهما السائق بنظرات راضية قبل أن
يتركهما ويتجه نحو سيارته الأجرة و..

-السائق بنبرة سعيدة تحمل الوقاحة :

متشكرين أباشا ، وانتي يا أبله ابقني اركبي

مكروباز أحسن طالما انتي مش أد

التاكسيات ...!!!

اتسعت مقلتي عينيها أكثر ، ووجدت

السائق بنظرات شرسة ، ثم صرت على

أسنانها في غضب ، و..

-عاليا بنبرة متشنجة : انت .. انت آآ...

مد رامي يديه للأمام لكي يوقفها عن

الكلام ، و..

-رامي بهدوء حذر : خلاص يا أنسة حصل

خير

-عاليا بنبرة متعصبة ، ونظرات حادة : لأ
طبعاً ، انت ازاي تعمل كده ، ازاي تدفعله
أكثر من حقه

ابتسم لها رامي ابتسامة خفيفة ، ورفع أحد
حاجبيه و...

-رامي بعدم اكتراث : يا ستي مش مشكلة
زفرت هي مجدداً في ضيق ، ثم أطرقت
رأسها للأسفل ، ووضعت يدها في حقيبتها
لتخرج منها النقود ، و...

-عاليا متسائلة بضيق واضح : لأ مشكلة ،
حضرتك دفعت بقى كام ؟؟؟!!

-رامي مبتسماً في هدوء، وبنظرات متفحصة
: خليها عليا المرادي

رفعت هي وجهها لترمقه بنظرات ضيقة ، و..

-عاليا باستنكار : نعم ؟

-رامي بنبرة رخيمة : الموضوع مش

مستاهل

-عاليا بحنق ، ونظرات أكثر ضيقاً : لأ

مستاهل ، انت تعرفني ؟ أنا أعرفك ؟ في

سابق معرفة بينا ؟؟ لأ طبعاً ، يبقى مش من

حقك تدفعلي حاجة ، ولا من حقي أقبل

منك حاجة ، اتفضل قول دفعت كام

أشار هو لها بقبضتي يده لكي تهدأ قليلاً ،

واستغرب أكثر لردة فعلها القوية و...

-رامي بنبرة متمهلة : خلاص . اهدي ..

مافيش داعي للانفعال

-عاليا بنفاز صبر : يا مهون يا رب ، مش
كفاية إني متأخرة أصلاً ، كمان كنت ناقصة
عطلة ، قول عاوز كام ؟

-رامي مبتسماً وبنبرة هادئة : بكرة أقولك
-عالياً بنظرات مصدومة ، ونبرة مذهولة :
نعم ؟

-رامي بثقة ، ونظرات مغترة : يالا عشان
متتأخرش

ثم تركها وانصرف في اتجاه سيارته ، في حين
تسمرت هي في مكانها غير مستوعبة لما
حدث للتو ..

هزت عاليا رأسها في تعجب شديد ، ثم
أدركت أنها قد تأخرت بالفعل عن موعد
حضورها ، فسارت بخطوات راكضة في اتجاه
بوابة المدرسة ، لتدلف سريعاً إلى الداخل ..

.....
في داخل مبنى رياض الأطفال بمدرسة
اللافانيا ،،،

أوصلت العاملة ناصرة آياز إلى مكتب
السكرتارية ، وحاولت أن توضح له أن
السكرتيرة هي المسئولة عن أمور أولياء
الأمور و...

-ناصره بنبرة متلعثمة ، ونظرات حائرة وهي
تشير بيديها : بص ..this، آآ.. ده .. مس أية ..
آآ..go.. هي .. تعرف انجليشا ٣

حاول آياز أن يسيطر على نفسه حتى لا
ينهار ضاحكاً أمامها بسبب طريقتها الظريفة
في جعله يفهم ما الذي تقصده ..
ثم أومىء لها برأسه ، و..

-آياز بهدوء:thanks: (شكراً)

دلف آياز إلى داخل مكتب السكرتارية ، ثم
تنحى في خشونة ، فانتبهت له السكرتيرة أية
ونظرت إليه بنظرات شبه مصدومة ، ثم
اعتدلت في جلستها ، وسلطت عينيها عليه ،
واستشغقت بأنفها الصغير رائحة عطره
ال مميزة ، و..

-أية بابتسامة عريضة ، ونظرات لامعة : ايوه
حضرتك

-آياز بنبرة رخيمة ، ونظرات ثابتة : Can I
meet the manager, please (ممكن أقابل
المديرة من فضلك)

للحظة سرحت أية فيه ، وأغمضت عينيها
لتستمتع بعبير عطره ، ثم أدركت لاحقاً أنها
كانت محدقة بذلك الوسيم لفترة ، ولم تنتبه
إلى أنه قد انتهى من الكلام إلا حينما أعاد هو
تكرار جملته الأخيرة ، و...

-أية وهي تتنحى في خجل : احم .. آآ.. شور
ثم نهضت عن مقعدها الجلدي ، وأشارت
له بيدها لكي ينتظر في الخارج ، وتوجهت
هي ناحية مكتب الأستاذة إعتماذ ، ثم دلفت
إلى الداخل بعد أن طرقت الباب ، و...

-أية بهدوء : مس اعتماذ في واحد أجنبي برا
عاوز يقابلك

-إعتماذ بنبرة رسمية ، ونظرات ثابتة : مين ؟

-أية وهي تمط شفيتها في حيرة : مش عارفة
، بس جايز يكون ولي أمر طفل عندنا

-إعتماذ بنبرة شبه منزعجة : مش أية مش
أي حد يقولك عاوز أقابل المديرية تدخله
على طول حتى لو كان أجنبي ، ده مش
سوق ، دي مدرسة دولية ليها قواعد وأصول

شعرت أية بالخرج من توبيخ الأستاذة
إعتماد اللاذع لها ، ولوت شفيتها في استنكار
.. ثم ..

-أية متسائلة بنبرة خافتة : طب يعني أخليه
يمشي ؟

-إعتماد بجدية : لأ .. دخليه ، بس تاخدي
بالك بعد كده

-أية بإقتضاب : طيب

ثم سارت مبتعدة عن مكتب المديرية ،
وتوجهت إلى الخارج حيث يقف آياز ، و..

-أية بنبرة عادية وهي تشير بكف يدها
come please (تعالی من فضلك)

ابتسم لها آياز بعذوبة خطفت أنفاسها ،
وشعرت بالحرارة تنبعث من وجنتيها ،
وخاصة حينما مر من جوارها ...

-أية لنفسها بعدم تصديق : اوووف ، هو في

كده ، مز مز يعني .. !

ظلت هي مسلطة عينيها عليه إلى أن دلف

إلى داخل مكتب الأستاذة اعتماد ، وفجأة

لمعت عينيها و..

-أية بنبرة متحمسة : انا لازم أقول للبنات

عليه ، لازم يشوفوه !!

ثم سارت بخطوات أقرب للركض في اتجاه

غرفة المعلمات ...

.....

رحبت الأستاذة إتمام بآياز وطلبت منه

الجلوس على المقعد المواجه لها ، و...

-اعتماد بجدية : Yes , how can I help you

أيوه ، إزاي أقدر أساعدك) ؟

-آياز مبتسماً بهدوء : أنا بعرف أتكلم عربي

رفعت هي حاجبها في تعجب ، ثم رمقته
بنظرات أكثر تفحصاً و...

-اعتماد بنبرة رسمية : مممم .. تمام ، مين
حضرتك ؟

مد آياز يده بذلك الملف الذي كان يحمله
ويحتوي على سيرته الذاتية ، ثم أعطاه لها ،

و...

-آياز بنبرة متريثة : أنا آياز كامل الشناوي ،
مدرس رياض أطفال في ولاية أريزونا بالUS،
وعرفت إن في مكان فاضي لمعلم انجليش
هنا ، فكنت عاوز أقدم فيها

أطرقت اعتماد رأسها للأسفل لتطالع الملف
، ثم أمسكت بقلمها الحبر ، وبدأت في تدوين
بعض الملحوظات عنه ، وقامت برفع رأسها

مجدداً للأعلى لتحقق فيه بنظرات جادة قبل

أن تردف بـ

-اعتماد بنبرة جافة : عندك امتيازات حلوة

مستر آياز ، بس للأسف الوظيفة دي

لمدرسات إناث مش للذكور ، احنا معندناش

هنا مدرسين رجالة في الكي جي ، حضرتك

تقدر تقدم على وظيفة في المراحل الأعلى

مع سن أكبر للأطفال ، وأنا واثقة إنك

هتتقبل على طول

-آياز بهدوء حذر : أنا عارف الكلام ده كويس ،

بس أنا حابب أشتغل هنا ، وشايف نفسي

هاقدر أعمل حاجة كويسة للأطفال اللي في

السن ده

-اعتماد بنبرة أكثر جدية : مع كل احترامي

ليك ، وظايف رياض الأطفال غير مناسبة

للذكور ، مافيش أي مدرسة هنا بتقبل

تشغل مدرس راجل

-آياز بنبرة متريثة : كل ده أنا فاهمه ، وعارف

أسبابه ، بس عندي في أريزونا الموضوع

مختلف تماماً ، مدرسين رياض الأطفال

ممکن يكونوا ذكور طالما هما كفو

ومناسيبين ، مافيش أي مشاكل بالنسبة

للـGender (النوع)

-إعتماد بنبرة معترضة : ده في أمريكا ، لكن

في مصر الوضع مختلف ، وبصراحة أنا

مقدرش اجازف وأعمل حاجة زي كده

أخذ آياز نفساً مطولاً ، ثم زفره بهدوء ،

واستدار بجسده قليلاً ناحيتها ،و..

-آياز بنبرة رخيمة : حضرتك دي مش مجازفة

لأني مش جاي أتعلم لسه ، بالعكس أنا

عامل دراسات عليا في مجال تخصصي ،
وخذت الماستر بإمتياز ، والscores) درجات
(بتاعي موجود قصاد حضرتك تقديري
تشوفيه

-اعتماد وهي تمط شفيتها في حيرة : أنا
شايفة الCV) (السيرة الذاتية) بتاعك ، وفعلاً
في حاجات مبهرة ، بس النظام والروتين ، وآآ...

-آياز مقترحاً بخفوت : حضرتك تقديري
تحطيني في فترة اختبار وتشوفي إن كنت
هانجح ولا لأ

-اعتماد بعدم اقتناع : ماينفعش أعمل كده ،
لأن أنا عندي التزامات ومسؤوليات قصاد
الأطفال وأولياء الأمور ، مقدرش أجازف
بحاجة مش عارفة نتيجتها ، ده غير إن
الStaffكله من الأنسات يعني هايكون فيها
نوع من الحرج أحط راجل وسطهم

صمت آياز لبرهة لكي يفكر في طريقة ما
لإقناعها بأنه مؤهل لتلك الوظيفة ، ووضع
يده على طرف ذقنه ، وظل يحرك أصابعه
بطريقة ثابتة ، ثم انتصب في جلسته ، و...

-آياز بنبرة هادئة ، ونظرات متفائلة : طب أنا
عندي اقتراح لحضرتك

-اعتماد بإيجاز : خير

-آياز بصوت متحمس : مش في Demo)
عرض تجريبي (بيتعمل قبل اختيار أي
مدرس

أومأت اعتماد برأسها إيماءة خفيفة لتؤيده ،
ثم أمعنت النظر فيه لتعرف ما الذي يرمي
إليه ، في حين تابع هو ردة فعلها و..

-آياز مكماً بنبرة أكثر حماساً : أنا عاوز
اشترك في الديمو ده مع المتقدمين للوظيفة

، وحضرتك وباقي الزميلات اللي هنا تقدرنا
تقيموني وتحكموا عليا إن كنت أصلح ولا لأ
صمتت هي لتفكر في الإقتراح الذي قاله قبل
لحظات ، بينما راقب هو قسمات وجهها
محاولاً سبر أغوار عقلها لمعرفة ما الذي
تفكر فيه ..

تنهدت هي في حيرة ، ثم اعتدلت في جلستها
، وأسندت قلمها الحبر على المدونة التي
تكتب فيها ، ونظرت إليه بنظرات ثابتة ، و..

-اعتماد بنبرة جادة : أنا موافقة

تفاجيء هو بقرارها ، وارتسمت علامات
الإندهاش على ملامح وجهه ، بينما أكملت
هي حديثها ب

-إعتماد بنبرة رسمية ، ونظرات هادئة :

حضرتك تقدر تيجي بكرة مع بقية

المتقدمات للوظيفة الساعة عشرة الصبح ،
وتشارك معاهم وتورينا مهاراتك ، لكن
مقدرش اوعدك بحاجة أكثر من كده

-آياز بتلهف ، ونظرات ممتنة : Thank you
so much (شكراً جزيلاً) ، وأنا هاثبت
لحضرتك إني المناسب للوظيفة دي
-اعتماد بإقتضاب : إن شاء الله ، شرفت

-آياز بجديّة : Thanks again (شكراً مجدداً)
ثم نهض عن المقعد وعلى وجهه ابتسامة
عريضة ، ومد يده ليصافحها ، ومن ثم دلف
إلى خارج المكتب وهو يتعهد لنفسه بـ ...

-آياز بنبرة واثقة لنفسه : بكرة هاكون ضمن
الpromise,staff (وعد مني)

!!!!.....

.....

واصل قراءة الجزء التالي

الفصل الرابع

الفصل الرابع :

في غرفة المعلمات بمبنى رياض الأطفال
بمدرسة اللافانيا ،،،

جلست الفتيات يتحدثن سوياً ويثرثن
كالعادة عما حدث بالأمس لهن سواء في
منازلهن أو مع أفراد عائلتهن ..

في نفس الوقت شعرت ريمان بصداع
خفيف في رأسها ، فنهضت عن مقعدها ، و...

-ريمان بنبرة هادئة وهي تحقق بالجميع : أنا
هاروح أعمل كوفي ميكس لنفسي ، حد اعوز
معايا ؟

-ليلة بعدم اكتراث : أنا مش اعوزة

-فريال بنبرة عادية : ماشي يا ريموو ،
أعمليلي بليز معاكي

نهضت سارة هي الأخرى عن مقعدها ،
ونظرت في اتجاه ريمان و...

-سارة مبتسمة في هدوء : بصي اسبقينا
انتي على البوفية سخني المياه ، وأنا
هاشوف البنات وأحصلك

-ريمان بجدية : بس أوعي تتأخري عليا

-سارة بنبرة متحمسة : لأ دقيقتين بالكثير
وأجيلك

-ريمان مبتسمة ابتسامة خفيفة : أوكي

خرجت ريمان من الغرفة وهي تحمل في
يدها كيس (القهوة السريعة) واتجهت
ناحية المطبخ الصغير الملحق بالمبنى ...

بعد لحظات دلفت السكرتيرة أية إلى داخل
الغرفة وهي تلهث بصعوبة ، ثم انحنت قليلاً
بجسدها للأمام ، ووضعت يدها على صدرها
لتلتقط أنفاسها ، بينما تعجبت المعلمات
بالموجودات بالغرفة من حالتها ، و...

-فريال متسائلة باستغراب : مالك يا أية ؟

-سارة بإندهاش : خدي نفسك يا بنتي

-رانيا بتوتر : اوعى يكون في اجتماع تاني ،

احنا مش بنخلص أبداً

-نشوى بجدية : يا بنات اسكتوا شوية ،

سيبوها تاخذ نفسها الأول

رفعت أية يدها في الهواء لتطلب منهم الهدوء
قليلاً ، و...

-أية بنبرة لاهثة : اس... اسمعوني بس

-رانيا متسائلة بحيرة : في ايه ؟

أخذت أية نفساً عميقاً ، ثم زفرته مرة واحدة
، واعتدلت في وقفها ، ورمقت الجميع
بنظرات ثابتة و..

-أية بنبرة شبه عالية : في واحد مز موجود
عندنا في الكي جي

-الجميع بإندهاش : اييييييه !!!

تعالى بعض الهمهمات والثرثرات الجانبية ،
فلم تفهم أية ما الذي يتحدث عنه ، لذا
رفعت صوتها أكثر و...

-أية بنبرة شبه هادرة : بصوا هو أنا معرفش
هو مين ، لكن هو موجود عند مس إعتما

-رانيا بتلهف : انتي بتهزري صح ؟

-أية وهي تهز رأسها بالنفي : لأ طبعاً

-نشوى بنبرة متشوقة ، ونظرات جاحظة :
أوبا مز في الكي جي ، دي من عجائب الدنيا
السبع

-سحر بهدوء : احنا واخدين على كده

-رانيا بنبرة شبه جادة وتحمل الحماسة في
طياتها : طب أنا عاوزه أشوف المزد

-سارة باستغراب : طب مش احنا المفروض
نشوف الأول مين عاوز يشرب آآآ...

-ليلة مقاطعة بمزاح : وده وقت أكل ولا

شرب

-نشوى بتلهف : على رأيك ، ده وقت المزع

-آية بجدية ، ونظرات ثابتة : بقولكم ايه أنا
هارجع المكتب قبل ما يخرج من عند مس
اعتماد ، ولو عاوزين تشوفوه تعالوا ، اوكي ..

ثم تركت الفتيات في حيرتهن ، وسارت
مسرعة في اتجاه غرفة مكتبها ...

في نفس التوقيت دلفت عاليا إلى داخل
الغرفة ووجهها عابس نوعاً ما ، وهي تتمم
بكلمات غير مفهومة ، وأسندت حقيبتها
على الطاولة المستديرة .. ثم سحبت أقرب
مقعد لتلقي بجسدها عليه .. واقتربت منها
سارة و...

-سارة متسائلة بحيرة : مالك يا عاليا ؟ ايه
اللي أخرك كده

زفرت هي في ضيق بعد أن أخذت نفساً
مطولاً ، ثم استدارت برأسها في اتجاهها و...

-عاليا بحنق ، ونظرات ضيقة : الزفت
السواق اللي بيوصلني لهذا الأجرة مش
عاجباه ، وكان بيتخانق معايا وخلي واحد
غريب يتدخل ويدفعلي الأجرة

-سارة بنبرة متشوقة : انتي هاتكروتي الحكاية

ولا ايه ، قوليلي كل حاجة بالتفصيل

زفرت عاليا مجدداً في ضيق ، وحاولت أن
تتهرب من حصار رفيقتها سارة لها ، ولكن
أصرت الأخيرة على معرفة كل شيء ..

مالت رانيا على نشوى وهمست لها ب ...

-رانيا بخفوت شديد ، ونظرات ثاقبة كالصقر

: بقولك ايه عاوزين نشوف المز اللي أية

بتقول عليه

-نشوى بإمتعاض وهي تلوي شفيتها : يا
بت اهدي على نفسك شوية ، هو أي حاجة
أية تقولها هانجري وراها ، مش عاوزاكي
تباني مدلوقة كده

-رانيا وهي تعقد حاجبيها في جدية : مش
يمكن يكون كلامها جد

-نشوى بنبرة أقرب للهمس : وافرضي مقلب
عملاه عشان تشوف مين فينا اللي هاتريل
على الراجل ، محدش هنا سهل ، خدي بالك
يا رووني

-رانيا بضيق واضح : اووووف ، يعني احنا
مش هانروح نطل عليه

-نشوى بجدية وهي تهز رأسها بالنفي : لأ
طبعاً ، على الأقل في الآخر مش الوقتي
-رانيا على مضض : طيب

.....

زفرت ريمان في انزعاج بسبب تأخر سارة
في الحضور إليها ، وخاصة انها قد انتهت من
غلي المياه ، فوقفت في مكانها حائرة ، ثم
حسنت أمرها بإعداد كوب القهوة السريعة
لها فقط ، وبالفعل صبت محتويات الكيس
وقلبته مع المياه ، وأمسكت بكوبها الزجاجي
، ودلفت إلى خارج المطبخ وهي تحاول
جاهدة ألا تسكب محتوياته بسبب حرارته
العالية ..

في نفس التوقيت كان آياز قد انتهى من
مقابلة المديرية ، وسار في الاتجاه الذي أتى
منه وهو متحمس للفوز بتلك الوظيفة
الجديدة ..

استدار هو برأسه ناحية اليسار ليتفحص
أعمال الأطفال اليدوية المعلقة على

الحوائط ، واعتلى ثغره ابتسامة اعجاب ، ولم
ينتبه إلى ريمان القادمة في اتجاهه

شهقت ريمان في فزع حينما رأته ذلك
الشاب على وشك الاصطدام بها فتوقفت
فجأة عن السير لتتحاشاه ، ولكن اندفعت
محتويات الكوب الساخن في اتجاهه ، وبللت
سترته ، فتسمر هو في مكانه ، وأطرق رأسه
للأسفل ليتفحص ملابسه ..

اتسعت عينيها في رعب ممزوج بالإحراج ،
واندفعت (لا إرادياً) في اتجاه تلك الطاولة
الصغيرة الموضوعة في منتصف الردهة
لتحضر من عليها بعض المناشف الورقية
لتجفف بها ملابسه .. وسارت عائدة ناحيته ،
ثم مدت يدها المرتعشة ناحية السترة
لتمسحها و...

-ريمان بنبرة متلعثمة وهي مجفلة لعينيها
I am so sorry, I didn't mean it: (أنا أسفة

جداً ، لم أقصد هذا)

لم ينظر آياز إليها ، بل ظل مسلطاً بصره
على السترة التي تلطخت بفعل القهوة ،
وأشار لها بيده لكي لا تقترب و...

-آياز بنبرة شبه منزعة :It's okay (حصل

خير)

-ريمان بتوتر شديد : والله I didn't see you..

بليز accept my apology (أنا ماشوفتكش ،

من فضلك تقبل إعتذاري)

اكتفى آياز بإبتسامة باردة لا معنى لها ، ثم

تركها ، وانصرف .. بينما ظلت هي واقفة في

مكانها والذهول الممزوج بالقلق مسيطر

عليها ، وحاولت أن تتحدث معه ولكنه كان
قد تلاشى من أمام ناظريها كالشبح ..

لمحت العاملة ناصرة آياز وهو يسير غاضباً
في اتجاه مدخل المبنى ، فركضت خلفه و...

-ناصره بنبرة عالية : يا .. يا .. أستاذ ، مـ..
اسمها ايه ، أيوه مستر ، يا مستر

توقف آياز عن السير ، والتفت برأسه في
اتجاه العاملة ، ورمقها بنظرات جادة ، بينما
لمحت هي تلك البقعة الكبيرة التي لطخت
حلته وأفسدت هيئته ، فاعتلى ثغرها
ابتسامة عريضة ، وظنت أنه لن يفهمها و...

-ناصره مبتسمة في بلاهة وهي تمزح : انت
ريلت على نفسك ، هههههههههههههههه ..

شكلك يضحك يا مستر

حدجها هو بنظرات ساخطة ، وعبست ملامح

وجهه أكثر ، و...

-آياز بحدة: It's not your business (هذا

ليس من شأنك)

-ناصره بعدم مبالاة : أنا مش فاهمة أيتها

حاجة من اللي بتترطنه ده ، بس الجاكيته

بتاعتك لامؤاخذه في دي الكلمة (وسخه)

ومش آآ...

صدر آياز على أسنانه في حنق ، وانزعج أكثر

من طريقة العاملة الساخرة على هيئته ،

فأطلق سبه باللغة الانجليزية ، وتركها

وانصرف إلى خارج المبنى تماماً ..

تعجبت ناصره من حالته وضربت كفها

بالأخر و...

-ناصرة وهي تزم شفيتها في تأفف : فعلاً ..
أخرت خدمة الغُز علقه ...!!!

.....

عادت أية إلى غرفة مكتبها ، وقبل أن تدخل
إليه ، رأت ريمان متسمرة في مكانها ، وعلى
وجهها علامات عبوس غريبة ، فرفعت
حاجبها في اندهاش ، وقطبت جبينها في
استغراب ، و...

-أية لنفسها بخفوت : هي مالها دي ؟!

كانت على وشك الذهاب ناحيتها ، ولكنها
سمعت صوت رنين الهاتف من داخل
الغرفة ، فركضت سريعاً لكي تجيب عليه ،

و...

-أية هاتفياً بنبرة لاهثة : أيوه يا مس اعتماد

....

ثم صمتت للحظة لكي تستمع إلى ما تطلبه
منها ، و...

-أية بهدوء وهي ترمش بعينيها : طيب ..
تمام مممم... اوكي ... ممم.. حاضر هابلغ
الجميع ما فيش غياب بكرة ، اوكي ..

أنهت هي المكالمة معها ، ومن ثم تنهدت
في ارهاق و...

-أية لنفسها بتعب : اووووف ، قلبي كان
هايقف ، الحمد لله إني لحقت أرد عليها وإلا
كان زماني خدت كلمتين في جنابي منها
ثم صمتت للحظة لتذكر نفسها بذلك
الشاب الوسيم الذي كان متواجداً قبل
قليل في مكتب المديرية ، فضربت جبينها
بقبضة يدها في ندم و...

-أية بضيق : اوووف ، طالما اتصلت بيا يبقى
المز مشى من عندها ، يا خسارة البنات مش
لحقوا يشوفوه ..!!!!

.....

اتجه آياز خارج بوابة المدرسة ، وبحث
بعينه عن ابن خالته رامي فلم يجده في
مكانه ، فأخفض بصره لينظر إلى سترته
المتسخة ، ثم زم شفثيه في سخط و...

-آياز بإنزعاج : راح فين ده كمان ! اليوم قفل
معايا بدري

ثم وضع يده بداخل جيب بنطاله ، وأخرج
هاتفه المحمول ليهاتفه و...

-آياز هاتفياً بضيق : انت فين ؟

-رامي هاتفياً بهدوء : أنا موجود ، انت عملت
ايه

عادت ريمان للغرفة وهي تغمغم بخفوت
غير مستوعبة ما فعلته للتو مع ذاك
الغريب الذي لم تتبين ملامح وجهه ، فرأتها
سارة على تلك الحالة ، فضيقت عينيها ،
وسلّطت أنظارها عليها و...

-سارة باستغراب : مالك انتي كمان ؟

-ريمان بخفوت ، ونظرات زائغة : أنا عملت
كارثة

اعتدلت عاليا هي الأخرى في جلستها ،
ووضعت ساقاً فوق الأخرى ، و...

-عاليا بجدية : هو يوم قفيل باين عليه

-سارة متسائلة بفضول : عملتي ايه انتي
التانية ؟

-ريمان بقلق : أنا وقعت الكوفي ميكس على
واحد

-سارة بنبرة أقرب للجدية : واحد مين ؟

-ريمان بإقتضاب : معرفش ، بس هو

اتضايق أوي

-عاليا وهي تلوي شفيتها في تهكم : يعني

بعد ما سلخته عاوزاه يضحكك مثلاً

رفعت سارة كفي يدها في الهواء ، و...

-سارة بلهجة أمره ، ونظرات دقيقة : أنا

عاوزه أسمع انتي عملتي ايه ، قولي يالا

وبالتفصيل الممل

قربت ليلة مقعدها من الثلاث فتيات ،

وجلست ملاصقة إلى ريمان ، و...

-ليلة متسائلة بتوجس : اوعي يكون الواد

المز اللي أية قالتلنا عليه هو اللي اتسلق؟

-ريمان بإنزعاج : معرفش

-سارة بجدية : ششش .. اسكتوا كلكم خيلنا

نعرف كل اللي حصل

وبدأ صوت الهمهمات والهمسات الجانبية في

الانتشار بينهن .. تابعت رانيا ما يحدث بين

مجموعة الفتيات بنظرات حادة و...

-رانيا بخفوت : نووشة ، بيتهياي الكل

مشغول ، تعالي احنا نبص على المز

-نشوى مبتسمة في لؤم : اوكي ، بس يا رب

مايكونش مشى

ثم نهضت كلتاها عن مقعديهما ، فالتفتت

سحر لهما و...

-سحر متسائلة بنبرة عادية : رايعين فين يا

بنات

-رانيا بتلعثم : آآآ.. ه.. هانعمل حاجة

تتشرب

مطت فريال ذراعيها في الهواء لكي تتمطع قليلاً ، ثم أرخت جسدها المرهق ، و..

-فريال بنبرة متعشمة : طب بليزيا رووني
اعمليلي نسكافيه معاكي

-رانيا بإيجاز : طيب ..

ثم أشارت لرفيقتها نشوى بعينيها لكي تسير معها إلى الخارج ، وبالفعل اتجهت كلتاهما إلى مكتب السكرتيرة أية ، ووقفنا في الخارج وقبل أن يحدقا في باب غرفة الأستاذة اعتماد تفاجئا بها تفتح الباب ، فتراجعتا للخلف وتملكهما التوتر ..

حدجتهما الأستاذة إتمام بنظرات متفحصة

، و...

-اعتماد متسائلة بنبرة رسمية : عاوزين
حاجة يا بنات

استدارت نشوى برأسها في اتجاه رانيا ،
وتبادلت كلتاهما النظرات الحائرة ، و...

-نشوى بارتباك : آآ.. لأ

-رانيا بتلعثم : أنا .. قصدي .. آآ.. احنا بنعمل
مشروبات وآآ..

-اعتماد بنبرة جادة وهي تشير بيدها : من
فضلكم خلصوا اللي وراكم ، مافيش وقت
نضيعه ، اتفضلوا يالا

-نشوى وهي تتنحجح في حرج : احم .. حاضر

-رانيا وهي تلوي فمها في انزعاج : طيب

ثم تأبطت كلتاهما في ذراع الأخرى ، وسارتا
عائدتين إلى غرفة المعلمات

.....

في سيارة رامي ،،،،،

قأء رآمى سىآرته عآئءآً إىلآ الفىلآ التى
ىقطن بها مع عآئلته ، وكن بين الحىن والآخر
ىلتفت برأسه فى آتآه آىآز لىرمقه بنظرات
متفحصة لهىئته ، ولآكثر من مرة آاول أن
سىطر على نفسه كى لآ ىضحك على هىئة
آىآز ، فى حىن بءى الإنزعآآ آلىآً على الآخىر
، و...

-آىآز بحنق : بص قءآمك ، مش كل شوىة
هآتبص كءه

-رآمى بنبرة مرآة : بصرآة ومن آىر زعل ،
شكلك مسآرة على الآخر ٢

-آىآز بوجه ممتعض ، ونبرة منفعلة : آلآص
بقى

-رامي متابعاً بسخرية : يعني ده بس اللي
حصلك من أول مقابلة ، أومال لو شغلوك
عندهم ، هترجعلنا بهدومك مقطعة٤

-آياز بنبرة شبه حادة : رامي ، خلاص كفاية ،
ده حصل بدون قصد ، فمافيش داعي
تشتغلني كل شوية

-رامي مبتسماً في مرح : ماشي .. ماشي ،
مش هاتكلم تاني ...!

استدار آياز برأسه في اتجاه النافذة ، وسلط
بصره على الطريق ، وزفر لأكثر من مرة
بتأفف وهو يتذكر ما حدث ، ثم ...

-آياز لنفسه بجدية : مش لازم أسمح لأي
حد مهما كان يهزأني ولا يقلل من قيمتي

٤!.....

.....

واصل قراءة الجزء التالي

الفصل الخامس

الفصل الخامس :

اجتمعت الفتيات عقب انتهاء اليوم
الدراسي في أحد الكافيات العامة ، وبدأن
ثرثرتهن المعتادة حول طبيعة العمل مع
الأستاذة إعتماذ وتحكماتها الغير مبررة، و....

-أية بنبرة ساخطة : والله انتو ربنا بيحبكم

إنكم مش أعدين معاها في مكتب واحد

-ميادة بلهجة شبه جادة : يا بنتي دي أصلاً

مش تطاق ، أسلوبها وحش أوي

-هناك بحرق : هو في حد أصلاً يوجبها ، بجد أنا
مش متخيلة إن في مديرة بالشكل البشع

٢٥د

-ليلة بهدوء : على فكرة في أسوأ منها

-رانيا وهي تزم شفيتها في تأفف : معتقدش

-عاليا بنبرة شبه حادة : دي مش بني آدمة ،

مافيش حد اتعامل معاها إلا وشتها وقال

كلام زبالة عنها

-ميادة بجدية : ده طبع فيها ١

-هناك بتنهيده : فين أيام مس دولت ، بجد

كانت سكرة ولذيذة وبتحترم الكل

-ميادة وهي توميء برأسها إيماءة خفيفة :

اه فعلاً.. كانت بتقدر ظروف أي واحدة

-سارة بنبرة متذمرة تحمل في طياتها التهكم :
جربي انتي بس تقولي لأبلك اعتماد عاوزه
أخذ اذن ، يمكن تقييم عليكي الحد

-هنا بضرر : أعوذو بالله

-عاليا بنفاز صبر : ربنا يهونها علينا ، ونخلص
بقي

-أية بنبرة ناعمة : انتو عارفين لو كلنا عملنا
ربطاية عليها ممكن تمشي

-ريمان وهي تعقد حاجبيها في عدم اقتناع :
معتقدش

-نشوى بعدم اكتراث : هي أصلاً متقدرش
تعملنا حاجة

-رانيا بإنزعاج : ماتفككم من السيرة دي ،
وخلونا نشوف حاجة تانية أحسن

-ميادة بنبرة جادة : بصوا يا بنات دي منزلة
بوست على الفيس بوك بتقول فيه محدش
يغيب بكرة

-أية بهدوء : أيوه صحيح ، ما أنا قولتلكم
عشان مقابلات الوظيفة الجديدة

-عاليا بتذمر : يادي الغلب ، يعني مافيش
يوم يعدي علينا من غير ما نرتاح

-ريمان بعدم اكتراث : عادي يا بنتي ، ما
احنا واخدين على كده

-سارة وهي تزفر في ضيق : أوووف .. بنات
كفاية كلام في السيرة دي وخلصونا نركز في اللي
هانشر به ..

.....

في فيلا سرحان عليه ،،،،

عاد كلاً من رامى وآياز إلى الفيلا ، ولم
يسلم الأخير من تعليقات رامى الساخرة ،
وما زاد الطين بلة هو انضمام الخادمة وردة
إليه في مزاحه و...

-وردة ببلاهة : عيني عليك يا سي أزاز ، كده
تبقى موحوح من أول يوم ليك في أبصر ايه

ده

-آياز بنبرة مغتازة ، ونظرات حادة : فلور ،
بليز Enough (كفاية) ٣

وضعت وردة إصبعيها على طرف ذقنها ،
وظلت تحكها في حيرة ، و...

-وردة بعدم فهم ، ونظرات حائرة : عاوز تنف
؟ يعني أجيبلك منديل ؟ بس يا خويا مش
هو اتكب على رجلك ولا مراخيرك)
مناخيرك / أنف) ، فهمني !!! ع

-آياز بضجر : يا ربي ، أنا مش هاخلص ، فلور

ابعدى عن نافوخي ، حلو كده .. مفهوم !

-رامي مبتسماً ابتسامه خفيفة : خفي عليه

يا وردة ، هو مش ناقص

-وردة بنبرة متحمسة : أنا عاوزه بس أطمئن

انك كان هاتسيب علامة ولا آآ...

-آياز مقاطعاً بضجر : أنا ماشي

ثم سار مبتعداً عنهما ، فأسرع رامي في

خلفه ، وأمسك به من ذراعه ، و...

-رامي بجديّة : استنى يا إيزووو ، ما أنت

عارف وردة ، وانا قايلك قبل كده إنها هبلة

وآآ...

-آياز بحنق : رامي ، أنا محتاج أركز ، مش

فايق لا لهزار ولا لتريقة ، مستقبلي كله

متوقف على مقابلة بكرة

-رامي بنبرة عادية ، ونظرات ثابتة : أنا مش
عاوزك تتعشم كثير ، معتقدش إن المديرية
دي هترضى تشغلك

-آياز بإصرار : أنا عاوز أوريها هي أو غيرها
إني KG Teacher مؤهل ، مش بس كلام
تنهد رامي في ارهاق ، ثم أجفل عينيه قليلاً
، ووضع إصبعيه فيهما بعد أن أغمضهما
ليفركهما ، و...

-رامي بنبرة هادئة : بقولك ايه ، تعالى نخرج
نغير جو

-آياز بإيجاز : ماليش مزاج ، وبعدين انا عاوز
أستعد للانترفيو (مقابلة)

-رامي بإصرار : طب تعالى أحكيك على
حاجة حصلت النهاردة قدام المدرسة بتاعتك
دي

ضيق آياز عينيه ، ورمقه بنظرات جادة و..

-آياز متسائلاً بفضول : حاجة ايه دي

ابتسم رامى لأنه قد استطاع أن يصرف
تفكير ابن خالته عما حدث له ، وبدأ في سرد
ذلك الموقف الغريب الذي حدث مع إحدى
الفتيات أمام بوابة المدرسة ، فأعجب آياز
بتصرف رامى الرجولي ، ثم تركه بعد ذلك
واتجه ناحية الدرج ليصعد إلى غرفته
الموجودة في الطابق العلوي ليبدل ثيابه
ويستعد لتلك المقابلة التي ستحدد مصيره
المستقبلي ...

.....
في صباح اليوم التالي ،،،

في مبنى رياض الأطفال الملحق بمدارس
اللافانيا الدولية ،،،

تجمعت بعض المعلمات المتقدمات بطلب
الإلتحاق بتلك الوظيفة - وممن تنطبق
عليهن الشروط - في الاستقبال الملحق
بالمبني من أجل حضور العرض التقديمي
الخاص بكل واحدة منهن على حدا ...

.....

أوقفت عاليا سيارة الأجرة أمام بوابة
المدرسة - كالعادة - وترجلت منها بعد أن
دفعت الأجرة للسائق ، ثم استدارت برأسها
في كل الاتجاهات لكي تبحث عن ذلك
الغريب الذي وعدّها بالقدوم اليوم من أجل
أخذ ذلك المبلغ المالي الذي دفعه لها
بالأمس ، ولكنها للأسف لم تجده .. فزمت
شفتيها في ضيق و...

-عاليا بتذمر : يعني مجاش زي ما قالي !
طب أنا هاعمل ايه الوقتي ، مش معقول
هافضل واقفة كده في الشارع أستناه ..

وقفت هي حائرة للحظة في مكانها محاولة
التفكير في حل ما ، ورفعت يدها الممسكة
بهاتفها المحمول لتنظر في شاشته ، فوجدت
أن الوقت الخاص بالتوقيع بالحضور قد
قارب على الإنتهاء لذا تشدقت بـ ...

-عاليا بضيق : خلاص بقى أنا مش ناقصة
أكتتب تأخير تاني

ثم عدلت من وضعية حجابها الأزرق النيلي ،
وقامت بجذب كنزتها البيضاء الطويلة
للأسفل قليلاً ، وسارت ناحية البوابة ...

.....

وصلت أيضاً المعلمات اللاتي يعملن
بالمدرسة إلى المبنى ، وجلست في الغرفة
الخاصة بهن ، وبدأن الاستعداد لحضور تلك
المقابلات التقييمية للمعلمات الجدد ..
كذلك أكتمل حضور باقي المعلمات الغائبات
بعد عودتهن من حضور تلك الدورة التدريبية
الخاصة بطريق التقييم الحديثة ، وأيضاً
العائدات من رحلة المدرسة الترفيهية إلى
مدينة رأس سدر .. ثم تسألن عن آخر
المستجدات في المدرسة عامة وفي قسم
رياض الأطفال خاصة ، و...

-نشوى مبتسمة ابتسامة خفيفة : حمدلله

على السلامة يا مس جانيت

اعتدلت جانيت حنا - معلمة الموسيقى

ومسئولة النشاط الطلابي في قسم رياض

الأطفال – في جلستها على المقعد الجلدي ،

و...

-جانيت بنبرة سعيدة : الله يسلمك يا نووشا

-رانيا متسائلة بفضول : اتبسطي يا مس

جانيت في الرحلة

-جانيت بنبرة متحمسة : اه أوي .. بصراحة

كانوا عاملين بروجرام هايل

-فريال وهي تمط شفيتها في إعجاب :

كويس والله ، أول حد أسمع

-جانيت بنبرة رقيقة : بصي هو طبعاً في

حاجات كانت مش أد كده ، بس at least

على الأقل) معظم الحاجة كانت معقولة

أسندت نادية – معلمة اللغة الانجليزية

ومسئولة تنسيق الأنشطة ذات الصفات

الهادئة ، وملامح الوجه الطفولية – حقيبتها

الصغيرة على الطاولة ، ثم جلست على
المقعد الشاغر و...

-نادية بخفوت وهي تشير بيدها : الحق
يتقال هما هنا بيهتموا بالنشاط الترفيهي
للمدرسين

-جانيت بإيماءة خفيفة : أه جدا ، أنا سامعة
انهم ناويين يعملوا رحلة ثانية لبورتو السخنة

-فريال بجدية : بس أكيد مش دلوقتي

-جانيت بنبرة عادية : لالا .. قدام شوية

-نادية وهي تمط شفيتها : مممم...

ثم دلفت إلى داخل الغرفة معلمة أخرى
تمتاز بالشخصية المرححة والمحبة للحياة ،
وقامت بنزع شالها الصيفي عن عنقها ، ثم
ثبتت الدبوس المتواجد أعلى حجابها ، و...

-هبة بنبرة عالية : صباح الخير عليكم

بادلتها معظم الموجودات التحية ، في حين
إلتفتت لها سارة و...

-سارة بإبتسامة عريضة : ناموسيتك كحلي
يا هانم ، كل ده تأخير

-هبة بتنهيذة إرهاق : هاعمل ايه بس ، كان
ورايا حاجات أد كده امبارح ، ونمت على
الفجر ومكونتش بصراحة قادرة أقوم ولا
حتى أجي النهاردة

-سارة وهي تزم شفيتها : الحمد لله إننا قولنا
للأبونية ميعديش عليكى كان زمانا كلنا
اتأخرنا

-هبة بنبرة شبه جادة : طالما مردتيش
عليكم ، يبقى تعرفوا إني في غيبوبة
ومصحتش لسه

-سارة وهي تعيد رأسها للخلف : أها

.....

فتحت منة رشوان - معلمة اللغة الانجليزية
، وخريجة كلية الآلسن - حقيبتها الفاخرة
لتخرج منها أحمر الشفاه والمرآة الصغيرة
لتضع منه القليل على شفتيها المكتنزتين ،
ثم رمقت رفيقتها سالي ياسر - معلمة اللغة
الانجليزية ، ومسئولة الترجمة في القسم -
بنظرات جادة قبل أن تردف بـ ٢٦...

-منة بنبرة ضجرة ، ونظرات منزعة : دورة
ولا ليها أي لازمة ، ما نابنا بس إلا دماغنا
اتصدعت ، ومخنا ورم من كتر الرغي اللي
على الفاضية والمليانة

-سالي بنبرة مازحة : هو انتي بيعجبك حاجة
يا سنوفة

-منة وهي تلوي شفيتها في ضيق : وليه
أصلاً تعجبني ، طالما مش اد كده يبقى لازم
أقول رأيي بصراحة ..

-سارة مقاطعة بنبرة متشوقة : بس على
الأقل شوفتوا وجوه جديدة بدل وش البومة
اللي معنا دي

-منة على مضض : أبداً والله ، ده كله يقرف
، مافيش حد عدل

تنحنت الأستاذة حنان – رئيسة قسم اللغة
الانجليزية الخاص بمرحلة الرياض – في
هدوء ، ثم حدقت في زميلاتها و....

-حنان بهدوء وورزاة : بس استفدنا من
الكتب الموجودة في الدورة ، بجد هيفرق
معانا أوي لو جنبناهم هنا

-سارة بعدم اكتراث : يا أبله حنان كبري

دماغك !

مدت سالي يدها داخل حقيبتها الجلدية

الصغيرة ، ثم أخرجت منها كيس (قهوة

سريعة) ولوحت به في الهواء ، و...

-سالي بنبرة مرحة : مين فيكم بقى يا حلوين

هايعملي النسكافيه بتاعي

-ريمان بإعتراض : اكيد مش أنا ، توبة من

بعد اللي حصله

-سارة غامزة ، وبخفوت : صح ، ده انتي

سلختي الجدع

-سالي متسائلة بعدم فهم : سلخت مين ؟

-سارة بهدوء: بعدين هاقولك

نهضت ميادة عن المقعد ، ومدت يدها في
اتجاه رفيقتها سالي وأخذت منها كيس
القهوة السريعة و...

-ميادة بنبرة هادئة : أنا هاروح أعمل
النسكافيه ، هاتيه يا سالوكة ، حد عاوز تاني
معايا ؟

وبدأت المعلمات في تناول الإفطار سريعاً ،
وكذلك إعداد المشروبات الساخنة ، ولم
تكف أي منهن عن الثرثرة الروتينية ..

.....

أمسكت السكرتيرة أية بسماعة الهاتف ،
وقامت بالاتصال بمكتب مديرتها و..

-أية هاتفياً بنبرة رقيقة : مس اعتماد الكل
موجود وجاهز ، هنبداً امتى ؟

-اعتماد هاتفياً بنبرة جادة : خمس دقائق
مس أية وهاكون موجودة في أوضة)
المالتميديا) ، خلي كل teachers)
المعلمات) يروحوا هناك

-أية هاتفياً بهدوء : اوكي يا مس إعتما
ثم أنهت المكالمة معها ، ووضعت السماعة
في مكانها ، وانصرفت خارج مكتبها لتبلغ
المتقدمات للوظيفة بالذهاب إلى مكان عقد
المقابلة ..

.....

أصر رامي على إيصال آياز إلى المدرسة
رغم اعتراض الأخير على هذا ، ولكنه كان
يأمل أن يرى تلك الفتاة غريبة الشأن
مجدداً ، خاصة وأنها ربما تأتي في نفس
توقيت الأمس ..

ترجل آياز من السيارة – وكذلك فعل رامى
- فاستغرب الأول مما يفعله ابن خالته
وخاصة أنه كان يتلفت حوله بطريقة مريبة ،
بالإضافة إلى لحاقه به لذا ...

-آياز متسائلاً بنبرة متعجبة : انت راىح فىن ؟

-رامى وهو يتنحى بخشونة ، وبنظرات
مرتبكة : احم .. آآ.. لأ عادى ، أنا بس بفك

رجلى

-آياز وهو يلوى فمه فى عدم اقتناع : نعم ؟
تفك رجليك ؟ لىه يعنى

-رامى مبتسماً ابتساماً سخيفة : عادى
متخدش فى بالك ، المهم انت وريهم
شطارتك ، و.. Good Luck (حظ سعيد)

-آياز وهو يتنهد فى قلق : Oh, yeah (يا ريت)

قام رامى بمصافحة آياز ، ثم استند بظهره
على مقدمة سيارته وتابع ابن خالته إلى أن
اختفى من أمام ناظره ، فاستدار برأسه في
كافة الاتجاهات ، وظل يراقب الطريق
والمارة بنظرات مترقبة لعله يجد الفتاة
المنشودة قادمة ..

.....

في غرفة الوسائط المتعددة (المالتيميديا)

““

احتشدت المعلمات بداخل تلك الغرفة ،
وانضمت بعد ذلك إليهن الأستاذة إعتماذ –
ناظرة الرياض ، وكذلك المديرية سهى ،
والمديرة رحاب ، ومدير المدارس الأستاذ
أسامة ، ورؤوساء أقسام اللغة الانجليزية
بكافة المراحل ...

عم الهدوء المكان ، وبدأت كل معلمة
متقدمة للوظيفة في عرض مهاراتها أمام
الموجودين ..

حقاً كان الموقف مهيباً للجميع ، فالأعين
المتربصة بك تجعلك في قمة ارتباكك
بالإضافة إلى عدم قدرتك على التركيز ..

فشلت بعض المتقدمات في تقديم عرضهن
رغم بساطة الفكرة المطروحة و تفوقهن
الأكاديمي ..

.....

سأل آياز عن مكان غرفة الوسائط
المتعددة من حارس البوابة ، فأرشده إليها ،
فشكره بإمتنان ، ثم سار بخطوات ثابتة في
اتجاه الغرفة ..

وطوال الطريق إليها لم يكف آياز عن تنظيم
أنفاسه المضطربة ، وتهدئة توتره حتى يبدو
واثقاً من نفسه أمام المديرية وغيرها من
المتواجدين بالغرفة ...

.....

توقف آياز في الرواق المؤدي إلى الغرفة وقام
بإغلاق زرار سترته الكحلية الداكنة ، وعدل
من وضعية التي شيرت الأبيض الذي يرتديه
من الأسفل ، ثم رمق بنطاله الجينز الأسود
بنظرات متفحصة ليتأكد من عدم وجود أي
شيء عالق به ، ثم وضع حقيبة حاسوبه
المحمول على كتفه ، وأمسك بالحقيبة
الأخرى في يده ، واستمر في السير للأمام
حتى رأى بعض المعلمات اللاتي ينتظرن
دورهن في الدخول .. فاقترب من إحداهن و..

-آياز بنبرة رخيمة وهادئة : Excuse me, did

they start (من فضلك ، هل بدأوا ؟)

استدارت تلك الفتاة الشابة برأسها للخلف

لتجد ذلك الوسيم محدقاً بها ، ففغرت

شفتيها في إعجاب ، وتنحنت في خجل ، و...

-الفتاة بتلعثم : آآ.. آآ.. اه .. قصدي yes, they

started (أيوه هما بدأوا)

-آياز مبتسماً ابتسامة خفيفة : ثانكس)

(شكراً)

ثم أسند ظهره للخلف ، وتفقد حقيبة

حاسوبه الخاص ، وكذلك الحقيبة الأخرى

التي معه ليتأكد من وجود ما يريد

استخدامه أثناء العرض التقديمي الخاص به

..

سمع آياز صوت همهمات جانبية استطاع
أن يستشف عما تدور ، وكما خمن إنها حوله
، وعن سبب وجوده .. ورغم نظرات
الاستغراب الممزوجة بالإعجاب إلا أنه
تحاشى النظر إلى تلك الفتيات ، وحاول ألا
يعيرهن الانتباه ، فوضع نظارته الشمسية
على وجهه ، وأشاح بوجهه للناحية الأخرى ،
وظل يحتسب الدقائق المتبقية له لكي
يدلف إلى الداخل ...

.....

بداخل غرفة المالميديا ،،،

شعرت معظم المتواجدين بالغرفة بالملل
والضجر من طرق المعلمات حديثات التخرج
(التقليدية) في شرح جزئيات محددة من
المنهج ، فتلك السن الصغيرة تحتاج إلى
وسائل أكثر تشويقاً ، ولكن ما يُقدم إلى الآن

مجرد شرح رتيب يبعث النعاس على

النفس ..

أعلنت الأستاذة إعتماذ عن تبقي مرشح
واحد فقط لكي يقدم عرضه التقديمي ،
فزفرت معظم الموجودات بالغرفة في تأفف
وضيق ، وصدرت همهمات جانبية ، ثم ...

-إعتماذ بنبرة رسمية : هانت يا بنات ،

معدتش إلا هو !!

مالت نشوى على رفيقتها رانيا ، وهمست

لها ب ...

-نشوى وهي تعقد حاجبيها بإستغراب : هو

!! انتي سمعتي زي ما أنا سمعت

-رانيا بنظرات جاحظة ، ونبرة خافتة : أه ..

-نشوى متسائلة بحيرة : هو في راجل جاي

يقدم هنا

-رانيا بعدم اقتناع : لأ معتقدش

ثم أشارت الأستاذة إعتماذ للسكرتيرة أية
بيدها لكي تدلف إلى الخارج وتحضر المعلم
الأخير والمتقدم لتلك الوظيفة

ترقبت جميع المعلمات دخول هذا الرجل
إلى الغرفة .. وأثار فضولهن جميعاً سبب
موافقة الأستاذة إعتماذ على حضوره
للمقابلة الخاصة بالمعلمات ...

حدقت جميعهن في مدخل الباب ، وانتظرن
بتلهف رؤيته يدلف للداخل ..

في حين أخذ آياز نفساً عميقاً ، وزفره على
عجالة قبل أن يدلف للغرفة ليتغلب على
ذلك التوتر الرهيب الذي سيطر عليه ..

ارتسمت المفاجأة على وجوههن جميعاً
حينما رأين ذلك الوسيم يقتحم الغرفة

بعطره المميز ، وبملامح وجهه الغربية

والجميلة ..

راقب آياز نظرات تلك الفتيات له ، وكذلك

المدراء والأستاذة إعتماذ ، فأخذ نفساً آخرأ

عميقاً ، و...

-آياز بنبرة رخيمة : Good Morning ladies ,

I am Ayaz (صباح الخير سيداتي .. أنا آياز)

ثم قام بإسناد حقيبيته على الطاولة

الصغيرة ، وأفرغ محتوياتهما ، وبدأ في تنظيم

أوراقه ، ثم رفع رأسه وابتسم لهن ابتسامة

خفيفة ساحرة ، و..

-آياز بهدوء أسر : Few seconds and I will

Start (ثواني قليلة وهبدأ على طول)

وكان على رؤوسهن الطير ، لم تتحرك أي

منهن قيد أنملة من مكانها أو تحيد

بأبصارهن عنه، بل ظللن محدقات به ، غير
عابثات بنظراته الغريبة لهن ، فقد كان شكله
حقاً مميّزاً ، وملفتاً للأنظار .. ١

انتهى آياز من تقديم نفسه في عدة أسطر
قليلة ، ثم بدأ في شرح ذلك الدرس المبسط
بطريقة شيقة جعلت جميعهن متحمسات
للمشاركة ..

وعلى ما يبدو أن نسبة الأدرينالين قد اعتلت
فجأة في الأجواء ، فتغير المناخ من رتيب إلى
حماسي ، ومن ممل كئيب إلى انفعالي
تفاعلي ..

استطاع آياز بمهارة أن يجذب جميع الأنظار
إليه ، وبفراسته تمكن أن يرى في أعين
المدراء ورؤوساء الأقسام نظرات الإعجاب
الممزوجة بالإنبهار مما قدمه .. فاكتمب

المزيد من الثقة واستمر في تقديم عرضه
بشغف ..

لم تصدق المعلمات أن هناك رجلاً قادراً
على القيام بتلك المهنة التي احتكروها
لسنوات طوال في مصر ، و...

-عاليا بإعجاب : بجد رهيب

-سارة بنبرة متحمسة : أنا ماشوفتش واحد
زيه كده

-عاليا وهي توميء برأسها : فعلاً ، رغم إني
درست رياض أطفال لمدة ٤ سنين وبدأت
في الدراسات العليا إلا إني مقابلتش راجل
عنده الطاقة دي كلها ١

حدقت ريمان في آياز بنظرات متفحصة ،
وارتسمت علامات الارتباك على وجهها
حينما أيقنت من لهجته وطريقته أنه ذاك

الذي لطخته بقهوتها السريعة ، لذا أخفضت

رأسها قليلاً للأسفل ، و...

-ريمان بتوتر وهي بتلع ريقتها : بنات

-سارة بنظرات ضيقة ، ونبرة عادية : أيوه يا

ريمو

-عاليا بهدوء : في ايه يا ريمان ؟

-ريمان بتلعثم : ده .. ده الشاب اللي انا

دلقت عليه الكوفي ميكس

رفعت سارة رأسها فجأة للأعلى ، ورمقت

ريمان بنظرات حادة ، و...

-سارة بنبرة عالية قليلاً : نعم ، هو ده اللي

سلخته؟؟!!!!!!ه

ساد الصمت فجأة في أرجاء غرفة

المالتيميديا ، وانتبه آياز لذلك الصوت

الأثنوي ، واستدار بعينه في اتجاهه ليجد
اثنين من المتواجدين بالغرفة يتحدثان عنه
، وإحدهما مرسوم على وجهها علامات
الارتباك ، ونظرات التوتر ..

ضيق آياز عينيه ، وحدجها بنظرات قوية ،
فشعرت ريمان بالحرغ الشديد من نظراته
المسلطة عليها وعلى سارة خاصة وأنها قد
رأت ملامح الجدية الممزوجة بالإنزعاج قد
ارتسمت على وجهه وبدت واضحة للجميع ،
لذا أيقنت أنه قد استمع إلى حوارهما ،
فأجفلت عينيها من الخجل ، و...

-ريمان بخفوت شديد : أنا .. انا ماشية

-سارة بإندهاش : ريمان انتي رايحة فين ؟!!

ابتلعت ريمان ريقها مجدداً ثم سحبت
حقيبة يدها ، ونهضت عن المقعد ، وسارت

بخطوات مرتبكة في اتجاه آياز لكي تدلف إلى
الخارج من باب الغرفة المجاور له

حذق آياز في تلك الفتاة التي مرت من
أمامه بنظرات ثابتة دون أن يرمش ، وتابعها
بعينه إلى أن خرجت تماماً من الغرفة و...

-آياز لنفسه بضيق : يبقى أكيد هي ...!!!

ثم انتبه إلى صوت الأستاذة إعتماذ الصادح

ب....

-اعتماذ بلهجة رسمية : مستر آياز ، حضرتك

معانا

تنحني آياز في خشونة ، ثم اعتدل في وقفته ،

و..

-آياز مبتسماً بهدوء : sure (طبعاً)

ثم استأنف باقي شرح الدرس إلى أن انتهى
تماماً من إيضاح كل شيء ، فشكرته
الأستاذة إعتما د ، وكذلك باقي المدراء
وروؤساء الأقسام على حضوره ومشاركته ،
ثم أشارت لجميع المعلمات المتواجدات
بالغرفة بالانصراف ، ورغم نظرات الامتعاض
والتذمر التي سادت فجأة في الأجواء إلا أن
جميعهن امتثلن لأوامر ناظرتهن ، ودلفن
خارج الغرفة ، ولم يبق إلا آياز والأستاذة
إعتما د ، وباقي المدراء و...

-اعتما د بنبرة جادة : شكراً مستر آياز على
الدرس الشيق ده ، وانتظر الرد على الانترفيو
الرائع ده

-آياز بإبتسامة خفيفة : أتمنى إني أكون أثبت
نفسى قصاد حضراتكم

-اعتماد مبتسمة بثقة : انت أبهرتنا مستر

آياز ، وأنا متوقعة لك مستقبل باهر

-آياز بنبرة متفائلة : hope so | (أتمنى ده)

-اعتماد بنبرة جادة : ان شاء الله خير

ثم مدت يدها لتصافحه ، فنظر لها هو

بإمتنان ، ومن ثم قام بجمع متعلقاته

الخاصة وانصرف من غرفة المالتيميديا ...

جلست الأستاذة إعتماذ بصحبة المدراء

وبدأت المناقشة الجادة لإختيار الأنسب لتلك

الوظيفة الهامة ..

لم يكن الخيار سهلاً على الإطلاق ، فهناك

عدة معايير موضوعة لانتقاء من سيتعامل

مع تلك السن الصغيرة والحرجة ، ولكن

الأخطر هو أن يكون الاختيار هو ...

-اعتماد بجدية : آياز كامل الشناوي هو

المناسب يا مستر أسامة

-أسامة بنظرات جدية ، ولهجة رسمية : بس

يا مس إعتماذ حضرتك محتاجة مدرسة كي

جي ، مش مدرس

-إعتماذ بإصرار : هو كان أفضل المتقدمين ،

بالعكس كان أحسنهم

-سهى بنبرة هادئة : بصراحة هو أبهرني ،

عنده استايل في الشرح والتقديم

-رحاب بنبرة رسمية : الأهم عندنا مصلحة

الطفل وسلامته ، وتوفير مناخ ملائم

للعملية التعليمية

-إعتماذ بنبرة متحمسة : أنا شايفة إنه

هايكون أكثر حد حريص على ده

-سهى بقلق : بس هو راجل ، وانتى يا مس
إعتما؁ كل اللي عن؁ك بنات ، وآآ...

-إعتما؁ مقاطعة ب؁ءية : ؁ه مش مشكلة
بالنسبالي ، طالما عن؁ه رؤية ماشية مع فكر
المدرسة يبقى ليه لآ ، ليه مايخدش فرصة
ويثبت نفسه

-أسامة بلهجة جاة لل؁اية : أظن إن لو
وافقنا على تعيينه هنلاقي إعتراض كبير من
أولياء الأمور اللي متعودين على إن
الTeacher في الكي جي واحدة مش واحد

-إعتما؁ ب؁ماس : ولي الأمر بيعترض على
أي ؁اجة جءية طالما معندوش فكرة عنها،
لكن لو هو جرب وشاف بنفسه إن اختيارنا
موفق ساعتها هيشكرنا على اللي عملناه

-أسامة بعدم اقتناع : بصراحة أنا مش
مرحب بالفكرة دي ، هو ممتاز ، بس غير
مناسب للمرحلة العمرية دي

-إعتماد بنبرة جادة تحمل الإصرار : مستر
أسامة ، إحنا متعودين من حضرتك على
تشجيع أي فكر جديد ، ودايما حضرتك
بتطلب مننا إننا Think out of the box)
نفكر برا الصندوق / نخرج عن المألوف) ،
وده اللي أنا بأعمله ، وصدقني وجود مستر
آياز هايعمل فارق كبير معانا

لم تكف الأستاذة إعتماد عن إقناع الجميع
بآياز ، وبعد نقاش حاد وجاد استمر لما
يقرب الساعة ، تم حسم القرار بـ ...

-أسامة وهو يتنهد في إرهاق : على
مسئوليتك يا مس إعتماد ، هيتم تعيين

مستر آياز الشناوي مدرس كي جي ، بلغيه

بقبلنا ليه

ارتسمت ابتسامه واسعه على ثغرها ،

وشعرت أن الدمويه عادت إليها بعد ذلك

الجدال المرهق و..

-إعتماد بنبرة متحمسة : شكراً ليك يا مستر

أسامة ، وإن شاء الله تتأكد من رؤيتي

-أسامة بنبرة هادئة : إن شاء الله ..

.....

في معرض عليوه للسيارات ،،،،

ظل آياز يجوب غرفة مكتب ابن خالته رامي

في توتر شديد إلى أن ضجر الأخير من حركته

الزائدة فتشدد ب ..

-رامي بإنزعاج ، ونظرات قوية : ارحم خالتي

العيانة ، كفاية برم ، حولتني

-آياز بقلق بالغ : اوووف ، الله يا رامي ،

هاموت وأعرف إيه النتيجة

-رامي بعد اكتشاف : باينة زي الشمس ، أكيد

مش هتاخذها يعني

-آياز بحدة : يا عم متقولش كده ، أنا واثق إيني

...آآآ

قطع حوارهما صوت رنين هاتف آياز

المحمول الذي تسمر في مكانه لثانية ، ثم

ركض في اتجاه المكتب ، ومد يده ليمسك

به ، ثم ضغط سريعاً على زر الإيجاب بعد أن

رأى رقم مدارس اللافانيا على شاشته و...

-آياز هاتفياً بتلهف : الووو .. أيوه .. ها

حدق رامى فى وجه آياز بعد أن نهض عن
مقعده محاولاً أن يستشف من تعبيراته ما
الذى يدور ، ولكن كان آياز جامد التعبيرات ،
ثابت الإنفعالات ..

لحظات وانتهى آياز من المكالمة ، فدار رامى
حول المكتب ، ووقف قبالته و...

-رامى بفضول شديد : ها إيه الأخبار ؟

أطرق آياز رأسه للأسف فى حزن ، ثم
أخفض عينيه فى ضيق زائف ، فشعر رامى
بانقباضه فى صدره و..

-رامى وهو يلوي فمه فى تهكم : أنا كنت
متوقع ده ، و على رأي سعد زغلول مافيش

فايدة

ارتسمت إبتسامة عريضة على وجه آياز ،
ورفع رأسه للأعلى ، وحدث مباشرة في وجه
رامي ، وأمسك به من ذراعيه و...

-آياز بنبرة عالية مليئة بالسعادة : أنا اتقبلت
يا رامي

-رامي ببلاهة : هاه

-آياز بنبرة متحمسة للغاية : خلاص بقيت
مدرس كي جي ٨!!!

.....

واصل قراءة الجزء التالي

الفصل السادس

الفصل السادس :

أصدر رامي على الاحتفال مع ابن خالته آياز
في أحد المقاهي الذي تم افتتاحه مؤخراً ،
ورغم عدم اقتناع الأول بتلك الوظيفة -
الديوية من وجهة نظره - إلا أنه لم يرد أن
يظهر هذا له ، وفضل أن يستمتعا بوقتتهما
معاً ..

في نفس التوقيت اتفقت أنسات مدرسة
اللافانيا الدولية على قضاء الأمسية في نفس
ذلك المقهى الحديث بعد أن اقترحت منة
عليهن هذا قبل انصرافهن من المدرسة ..

.....

في فيلا سرحان عليه ،،،

وقف آياز أمام المرأة يتأمل هيئته بعد أن
انتهى من ارتداء كامل ثيابه ، حيث فضل أن
يرتدي بنطالاً من الجينز ذي اللون الأزرق

الداكن ، ومن الأعلى تي شيرتاً من اللون
الأبيض ذو ياقة مثلثة أظهرت جزءاً من
قلادته التي يرتديها حول عنقه .. رفع هو يده
على رأسه ليمرر أصابعه في شعره الناعم ،
ثم مد يده الأخرى ليمسك بقنينة العطر
ومن ثم نثرها على ملابسه ..

سمع هو صوت طرقات على باب غرفته ،
فاستدار برأسه ناحيته ، ثم تحدث بهدوء بـ ..

-آياز بهدوء رخيم : ادخل

أطلت وردة برأسها أولاً من باب الغرفة ، ثم
دفعته بقدمها لتدلف إلى الداخل وهي
تحمل في يديها صينية مليئة بالطعام
الغريب ..

رمقها آياز بنظرات استغراب ، بينما حدقت
هي به بنظراتها الوالهة قبل أن تتشدد بـ ...

-وردة بحماس :عملتلك أكلة معتبرة يا سي

أزاز ، حاجة ترم بها عضمك

أخذ هو يستنشق بأنفه تلك الرائحة الغريبة

والنفاذة والتي أثارته حفيظته بدرجة كبيرة

و...

-آياز وهو يلوي فمه في تأفف : What is

this ؟ (ما هذا)

أسندت هي الصينية على المكتب الموجود

بالغرفة ، ثم كشفت الغطاء عنها ، و...

-وردة بنبرة متلهفة : ده فضلت خيرك

شوربة كوارع بالبهاريز إنما إبييه حكاية ،

وربنا لهتاكل صوابعك وراه ٩

-آياز وهو يلوي فمه في عدم فهم : ايه ؟؟

يعني ايه ده ؟

-وردة بإبتسامة بلهاء : دي رجلين العجل
النبي حارسك وصاينك

-آياز بنبرة تحمل التأفف : يبيع ، رجلين ..!!
يعني سايبة العجل كله وجاية تجييلي
رجليه أكلها ٣

-وردة غامزة وبنبرة واثقة : دول اللي فيهم
الخلاصة يا سي أزاا

-آياز بإنزعاج وهو يشير بإصبعه : فلاور ، لمي
القرف ده كله ، وخديه برا ، أنا مش ناقص
قلبان معدة ٢

-وردة بضيق زائف : ليه بس يا سي أزاا ، ده
أني عملهولك مخصوص ...

ثم صمتت لثانية قبل أن تردف بـ ...

-وردة بنبرة متشوقة ، ونظرات متسعة : ده
أني حتى وصيت الجزار يجييلك كوارع طازة

عشان تاخذ فايدتها كده وآآ.. وآآ... هههههههه
ما أنت فاهم بقى

-آياز بحيرة ، ونظرات ضيقة : فاهم ايه
بالظبط ، فلاور .. بقولك ايه ، أنا مودي حلو
ومش ناقص حد يعكمني ، فبليز ابعدني
عني ، ولا أقولك ، will leave (أنا ماشي)
ثم تركها آياز وانصرف إلى خارج غرفته ، في
حين تسمرت هي في مكانها ، وأطرقت رأسها
للأسفل لتنظر إلى الصينية بنظرات حزينة ،
و...

-وردة وهي تلوي شفيتها في ضيق واضح :
يا خسارة تعبني وشقايا ، ووقفتي على رجلي
عشان أعمله ده كله .. مالوش نصيب ،
أشربها أنا

ثم مدت كلتا يديها ، وأمسكت بالصحن
المليء بحساء الكوارع ، وتجرعته على فم
واحد و...

-وردة بتنهيذة إرتياح : يا سلام ، شوربة متينة
.. خسارة إنه مشربهاش ..!! ١٠

.....

بالقرب من أحد المقاهي الشهيرة ، وقفت
عاليا على قارعة الطريق وهي تضع هاتفها
المحمول على أذنها ، و...

-عاليا هاتفياً بنبرة شبه متعصبة : انتو فين ؟

-ريمان هاتفياً بهدوء : جاين على طول

-عاليا بنبرة متشنجة : وده ينفع ، مش احنا
متفقين نتقابل على الساعة ٧ ، أنا جاية من
أخر الدنيا ، وانتو لسه في الطريق

-ريمان هاتفياً بنبرة عادية : الدنيا زحمة موت
، وأنا على أد ما بقدر بحاول أدور على شوارع
فاضية عشان أجيلك

-عاليا وهي تزفر في ضيق : والبنات فين ؟
-ريمان بنبرة طبيعية : أنا معايا سارة وليلة ،
وهناء ، وسالي ، وممنة

-عاليا متسائلة بجدية : طب وبقية
المجموعة ؟

-ريمان بنبرة متريثة : نشوى ورائيا مش
جايين ، وهبة هتخلص الكورس اللي عندها
وتحصلنا ، وناديا مردتش عليا ، وفريال
اعتذرت

-عاليا بنبرة جادة : طيب وميادة وسحر
وجانيت وأية ١٠

-ريمان بصوت هاديء : ميادة هاتجيب باقي

البنات وتحصلنا

-عاليا بإقتضاب وهي ترفع أحد حاجبيها :

طب انجزوا يالا

-ريمان مبتسمة ابتسامة سخيفة : طيب ..

باي عشان أعرف أركز

-عاليا بإيجاز : ماشي ، وأنا هادخل استناكو

جوا

-ريمان بنبرة خافتة : اوكي .. باي

أنهت عاليا المكالمة ، ثم التفتت برأسها
للجانب لتضع الهاتف في حقيبتها وهي تعبر
الطريق ، فلم تنتبه إلى تلك السيارة القادمة
في اتجاهها ، وفجأة سمعت صوت مكابح
السيارة ينطلق عالياً ، فتوقفت في مكانها
فزعة ، وحدقت أمامها في رعب ..

.....

في نفس التوقيت كان رامي يتحدث مع آياز
حول سباق السيارات المنعقد في مطلع
الأسبوع المقبل ، وانتبه لتلك الفتاة التي
تقطع الطريق عليه وهي غير منتبهة لحركة
المرور ، فضغط بكل قوة على مكابح
السيارة ، وأمسك بالمقود بكلتا يديه ونجح
في إيقاف سيارته ، و...

-رامي بضيق شديد : يخربيت الغباء ،
اتعمت دي عشان تمشي بظهرها من غير
ما تبص

-آياز بقلق : كويس انك لحقت تفرمل

سمع كلاهما صوت الفتاة تصرخ بنبرة عالية
فيهما ، وتطلق بعض السباب فانزعج رامي

من طريقها الفظة ، لذا صر على أسنانه من
الحنق ، و...

-رامي بنبرة متوعدة : أنا نازل أديها كلمتين
يفوقوها

-آياز بهدوء : خلاص ما فيش داعي

-رامي بتذمر : أبدأ ، والله ما هيحصل ١٠

ترجل هو منها واتجه ناحية الفتاة الواقفة
أمام مقدمة السيارة ، ولكن اعترته الدهشة
حينما وجد أنها نفس الفتاة التي إلتقاها أمام
المدرسة ، فاعتلى ثغره ابتسامة عريضة ،
وتأمل هيئتها الرقيقة ، وجاب سريعاً ببصره
كنزتها الوردية الواسعة التي تصل إلى ما بعد
خصرها ، وبنطالها الأزرق السماوي الذي
يتناسق مع لون حجابها و...

-رامي مبتسماً وبنبرة متشوقة : انتي ، مش

معقول

جحظت عيني عاليا في ذهول حينما رأيت
ذلك الغريب أمامها ، وظلت فاعرة شفيتها
لبرهة غير مستوعبة ما تراه ، في حين استمر
هو في رسم تلك الابتسامة المستفزة على
وجهه ، و...

-رامي بنبرة واثقة : شوفتي الصدف الحلوة

تنحنحت عاليا في حرج ، واعتدلت في وقفاتها
، وضيقت عينيها لترمقه بنظرات حادة ، و...

-عاليا بغیظ : مش تفتح وانت سايق ، ولا
خلاص مافيش حد ماشي في الشارع إلا أنت

-رامي بهدوء حذر : طب ليه الغلط بس ١٢

-عاليا بتشنج : عشان انت اللي سايق مش
أنا ، المفروض تحترم الشارع اللي انت
ماشي عليه ، أرواح الناس مش لعبة وآآآ...

-رامي مقاطعاً بجدية وهو يشيح بكلتا يديه
في وجهها : ابييه في ايه لكل ده ، يا شيخة أنا
غلطان إني مخلتش وش العربية ياخذك
بالحضن ا

-عاليا بحنق ، ونظرات مشتعلة : نعم !!!

-رامي بضيق : اوعي كده من قدام العربية
خليني أغور من وشك ده

كورت هي قبضة يدها في غيظ جلي ،
وحدجته بنظرات نارية ، ثم ..

-عاليا بنبرة صارمة : خد عندك هنا ، انت
ازاي تمشي قبل ما أخلص كلامي

-رامي باستغراب : افندم !! هو لسه في كلام

تاني بايخ عاوزه تقوليه

-عاليا بنبرة واثقة وجادة : أه فيه ..

فتحت هي حقيبة يدها ، ثم أخرجت حافظة
نقودها ، وفتحتها ، وأخرجت منها مبلغاً مالياً
، ثم طوته في قبضة يدها ، وقامت بوضوح
الحافظة مجدداً بداخل حقيبتها ، ثم مدت
يدها في اتجاه كف يده و...

-عاليا وهي تلوي شفيتها في امتعاض : خد

فلوسك يا أخ ، أنا ما بحبش حد بيقشش

عاليا

رمقها هو بنظرات حادة منزعجة ، فنظرت
هي إليه شزراً ، ثم أسندت النقود على
مقدمة سيارته ، وتركته ، وأنصرفت بخطوات
سريعة بعيداً عنه ، في حين ظل هو متسماً

في مكانه للحظة غير مستوعباً للذي جرى
توأاً ..

تابع آياز الموقف من داخل السيارة ،
وتملكته الدهشة من ردة فعل تلك الفتاة
التي بدت إلى حد كبير مألوفة بالنسبة له ..

أفاق رامى من شروده على صوت بوق
السيارة ، فاستدار هو برأسه ليجد ابن خالته
يشير له بيده من داخل السيارة لكي يعود ..

أومىء هو برأسه ، وركب السيارة ، و...

-آياز متسائلاً باستغراب : ده طبيعي اللي
حصل

-رامى بإندهاش أكبر : أنا مذهول بصراحة ،
انا مشوفتش كده في حياتي

-آياز مبتسماً ابتسامه هادئة : أديك شوفت ،
بس لعلمك شكل البنت دي مش غريب
عليا

-رامي بامتعاظ : وهي واحدة زي دي
تتنسى

-آياز بجدية وهو يشير بيده : طب يالا ،
شوفلنا مكان نركن فيه عشان نلحق نقعد ،
ماتنساش أنا عاوز أرجع بدري ، انت عارف أنا
ورايا شغل وآآ..

-رامي مقاطعاً بتهكم : آآآه .. بدأنا جو
الموظفين ، ماشي يا سيدي

ثم أدار رامي محرك السيارة ، وانطلق بها
باحثاً عن مكان ليصفها فيه ..

.....

دلفت عاليا إلى داخل المقهى وهي تسب
وتزفر في انزعاج واضح مع نفسها ، ثم
نظرت حولها لتبحث عن طاولة شاغرة
لتجلس عليها ريثما تأتي باقي صديقاتها ..
وقف النادل على مقربة منها ، و...

-النادل بنبرة رسمية : أوَمري يا هانم

-عاليا بتردد : آآ.. أنا .. أنا جاية مع أصحابي

-النادل بجدية وهو ينظر إليها : طب في حجز
يا هانم ؟

-عاليا متسائلة بإستغراب : هو المفروض
نحجز قبل ما نيجي ؟

-النادل بهدوء : أيوه يا فندم ، ده النظام هنا

-عاليا وهي تلوي شفيتها في اندهاش : بس
احنا منعرفش إن النظام هنا بالحجز

-النادل بنبرة شبه جادة : والله يا فندم

الSystem (النظام) هنا كده

عضت عاليا على شفتيها السفلى في توتر ،

ثم أمسكت بطرف حجابها ذي اللون

الساوي بطرف إصبعيها ، وعبثت به ، و..

-عاليا بنبرة حائرة : طب والعمل ايه دلوقتي

؟

-النادل بنبرة رسمية : حضرتك شوفي

هاتعملي ايه ، لأن الموضوع مش بإيدي

جابت عاليا المكان ببصرها ، فوجدت معظم

الطاولات شاغرة ، فإنزعجت أكثر ، ثم

استدارت برأسها في اتجاه النادل ، وحدجته

بنظرات قوية قبل أن تتابع ب ...

-عاليا بضيق وهي تشير بيدها : أومال بإيد

مين فهمني لو سمحت ؟

-النادل بإقتضاب : معرفش

-عاليا بنبرة محتجة : متعرفش ، لا والله ،
طب فهمني بالعقل إزاي أجي مكان فاضي
زي ما انت شايف ، ويتقالي أصله مافيش
تربيذة فاضية وآآ...

-النادل مقاطعاً بجدية : يا هانم كله محجوز

-عاليا بتهكم صريح : خلاص الناس كلها
بقت حاجزة هنا !!!!

في نفس التوقيت دلف رامي ومن خلفه آياز
وهما يتحدثان سوياً ، فلفت انتباههما صوت
عاليا المحتقن مع النادل ، فتوقف رامي عن
الحركة فجأة ، واستدار برأسه ناحيتها ،
وحدق فيها بنظرات قوية ، في حين تابع آياز
ردة فعله باستغراب ، و..

-آياز متسائلاً بفضول : انت هتخانق معاها

تاني ؟

-رامي بانزعاج : لأ ، بس عاوز أعرف بتعمل

ايه هنا ؟

-آياز بعدم اكتر اث : سيبك منها ، وتعالى

نقعد

-رامي بإصرار : لأ استنى

-آياز بنفاد صبر : انت فظيع

-رامي بنبرة مهتمة : ثواني بس ، أنا هاشوف

فيه ايه

ثم تركه وانصرف ، في حين أكمل آياز

طريقه في اتجاه الطاولة المحجوزة بإسميهما

...

وقف رامي قبالة كلاً من النادل وعلياً ،
فحدقت فيه الأخيرة بنظرات مصدومة ،
واعترت الدهشة جميع ملامحها .. بينما
سلط هو عينيه على النادل و...

-رامي بصوت أجش : الآنسة عاوزه ايه ؟

-النادل بنبرة جادة : كانت عاوزه تحجز تربيذة
وآآ...

-رامي مقاطعاً بجديّة : هاتلها اللي هي
عاوزاه من غير نقاش

فغرت علياً شفيتها في صدمة ، ونظرت إليه
بإندهاش شديد ، وكانت على وشك التحدث
ورفض ما قاله ، ولكنه كان قد شق طريقه
بعيداً عنها ، وانصرف في اتجاه طاولته وظلت
هي متابعة إياها بعينيها ، والدهشة لم تخلو
بعد من ملامحها ، في حين أشار لها النادل

بيده لكي تفيق من شرودها وتتبعه إلى

الطاولة الخاصة بها ..

جلست عاليا على مسافة ليست بالبعيدة
عن طاولة رامى وآياز ، ولكنها انتقت لنفسها
مقعداً يجعلهما أمامها على مرمى البصر ...

وقف النادل أمام طاولتها ، وأمسك بقلمه
الحبر و..

-النادل بهدوء : تؤمري بإيه حضرتك

-عاليا بجدية : لما يجي بقية أصحابي

-النادل مبتسماً ابتساماً سخيفة : تمام يا

فندم

ثم تركها وانصرف ، بينما اختلست هي
النظرات إلى رامى الذي لم يكف هو الآخر
عن النظر إليها حينما تسنح له الفرصة ..

.....

دلفت الآنسات إلى داخل المقهى ، وبحث
عن عاليا ، فوجدن إياها جالسة على الطاولة
، فتوجهن إليها ، و...

-ريمان بنبرة متحمسة : لولو ، معلش يا قمر
، اتأخرنا عليكى ،

-عاليا وهي تتنحج بخشونة : احم .. كويس
انكم عارفين ده

-سالي بنبرة مازحة : برضوه احنا قولنا
نسبيك فرصة كده تاخدي راحتك ، يمكن
تظبطي مع حد كده ولا كده

-عاليا بضيق : سالي انتي عارفة إني مش
بتاعة كده ، أنا بادخل شمال في أي حد يجي

عاليا

-سالي بنبرة مراوغة : انتي هاتقوليلي ، ده
انتى مش محتاجة وصاية

-سارة مبتسمة بمرح : يا لولو الدنيا زحمة
آخر حاجة ، وريمان كانت هتلبس فى عريية
كذا حد ، بس ربنا ستر

-ريمان بإنزعاج زائف : لا والله محصلش كده
، أنا بسوق كويس

أسندت سارة يدها على كتف ريمان ،
ورمقتها بنظرات دافئة قبل أن تردف بـ ..

-سارة بنبرة رقيقة : اوعى تزعلي يا ريمووو ،
أنا بهزر معاكي

-ليلة مقاطعة بإهتمام وهي تمسك بهاتفها
المحمول : أنا باتصل بميادة ومش بترد

-منة بجدية : أكيد هي بتركن ، وبعدين ما
انتو عارفين ميادة ، هي أصلاً في الطبيعي
بتتأخر علينا

-هنا بنبرة عادية وهي تبتسم : على رأيك ،
من امتى هي بتيجي في ميعاد ٢

-عاليا بصوت جاد : طب اقعدوا بقى عشان
نشوف هانطلب ايه

-سالي بصوت ناعم : أنا عاوزة أكل حاجة
لأحسن ماتغدتش كويس

-ريمان متسائلة في حيرة : هو احنا هناكل ولا
نشرب

-منة بجدية : والله على حسب ، ممكن ناكل
بس ، وممكن نشرب ، مش عارفة نشوف
الكل عاوز ايه

-عاليا بنفاذ صبر :طب انجزوا بقى عشان أنا
قربت أثنق

-سالي متسائلة باستغراب : ليه ؟

-هناء متسائلة بفضول : هو في حاجة

حصلت واحنا مش موجودين ؟

-عاليا وهي تلوي فمها في امتعاض : يعني ..

حاجة زي كده

-منة بنبرة جادة : طب قولي على اللي حصل

، مش هناخد الكلام بالعافية منك

-عاليا بإنزعاج وهي ترمش بعينيها في توتر :

بعدين ، بعدين ، يالا عشان نطلب الأورد

أسند النادل الطلبات الخاصة برامي وآياز

على طاولتهما ، وقبل أن ينصرف ، بادر رامي

ب ...

-رامي بجدية وهو يشير بعينيه : عاوزك
تجييلي حساب التربيذة اللي هناك دي ،
ماتخدش منهم فلوس ، أنا اللي هحاسب
على كل طلباتهم

!!!!!!

.....

واصل قراءة الجزء التالي

الفصل السابع

الفصل السابع :

تعجب آياز مما فعله رامي ، وأمسك بقدح
الشاي وقربه من فمه ليرتشف منه بضع
قطرات قبل أن يتشدد ب ...

-آياز متسائلاً بفضول : عملت كده ليه ؟

-رامي مبتسماً ابتسامه زائفة : عادي يعني

-آياز بنبرة شبه جادة : عادي ازاي ؟ في حد

يدفع حساب واحدة مايعرفهاش ، ومعها

أصحابها كمان ، ويقول ده عادي ، إلا إن كان

الموضوع فيه حاجة

-رامي بهدوء مصطنع : ماتحطش في بالك يا

إيزوو

-آياز بعدم اقتناع : أووكي ..

أسند آياز قده الشاي أمامه ، واستدار

برأسه للجانب ليلمح تلك التي قابلها في

المدرسة ، فقطب جبينه ، و...

-آياز لنفسه متسائلاً بجدية : مش دي البنت

إياها

استمع رامى لصوت غمغمة غير مفهومة
تصدر عن آياز ، فحدجه بنظرات دقيقة ، و...

-رامى بهدوء : انت بتقول حاجة ؟

-آياز بنبرة غير مبالية : لأ عادى

-رامى مبتسماً ابتساماً مجاملة وهو يغمز
له : برضوه

-آياز مبتسماً ابتساماً عريضة : بالظبط ،
محدث أحسن من حد

-رامى بنبرة متريئة : لو خلصت يا ريت نقوم
-آياز بهدوء : اووكى ، am done (أنا خلصت
) ، يالا

أشار رامى للنادل بإصبعيه لكي يحضر إليه
، ثم همس له بكلمات غير واضحة ، فأوميء
النادل له موافقاً ، ومن ثم نهض الاثنين عن

الطاولة بعد أن وضع المبلغ المطلوب
لفاتورة الحساب بداخل الحافظة المخصصة
لهذا ...

تابعتهما عاليا بنظرات ضيقة ، وتنهدت في
ارتياح حينما رأت رامى يتعد .. و...
-عاليا وهي تتمم لنفسها بنبرة شبه فرحة :
كده أحسن

قطبت سارة جبينها في حيرة حينما رأت
تبدل ملامح عاليا للانفراج ، و...
-سارة متسائلة بفضول : في ايه يا بنتي ؟
انتي بتكلمي نفسك ولا ايه ؟

انتبهت لها عاليا ، وحاولت أن تبدو طبيعية
في انفعالاتها ، و...

-عاليا بهدوء مصطنع : لألألاً .. أنا بس بافكر
بصوت عالي

-سارة بعدم اقتناع : بتفكري !! في ايه يعني ؟

-عاليا بنبرة شبه متلعثمة : في آآ... في الشغل ،
واللي .. آآ... والحاجة يعني المطلوبة مني

-سارة وهي توميء برأسها إيماءة خفيفة :
أها ...

-عاليا بجدية وهي تشير بعينيها : البنات
جوم ..

-سارة بابتسامة عريضة : طب كويس

-ليلة بنبرة متحمسة : عاوزين بعد ما نطلب
أوردر الأكل نجيب تارت الشيكولاته ، بيقلوا
تحفة

-هناء بتلهف : لأأ .. التشيز كيك طعمها
تحفة

-منة بجدية : أنا عاوزة وافل

-سارة بنبرة شبه عالية : بقولكم ايه نشوف
الأول هناك ايه وبعد كده نحلي .. ماشي
وافقت غالبية الفتيات المتواجدات على
اقتراح سارة ، وبدأن بالإطلاع على قائمة
الطعام لاختيار ما هو مناسب ..

.....

تناولت الفتيات الطعام بعد إن اكتمل
حضورهن ، وطلبن مشروبات متنوعة ما بين
باردة وساخنة ، ثم ...

-عاليا بنبرة جادة وهي تشير بيدها للنادل :
لو سمحت الحساب

-النادل بهدوء : الحساب ادفع يا فندم

-ريمان بإندهاش : ايه ؟

-ميادة متسائلة بجديفة شديدة : ده مين إن

شاء الله اللي دفعلنا الحساب ده

-هنا بنبرة فرحة ، وبنظرات مشرقة : الله !

في حد دفعلنا

-منة بجديفة واضحة : انتي فرحانة على ايه ؟

استني أما نشوف مين ده

-هنا بعدم اكترات : مش مهم مين ، المهم

إن الحساب اندفع وخلص ، والفلوس بقت

في جيبنا

-سارة بتهكم : انسانة مادية

-ريمان بابتسامة هادئة : كلنا هذا الشخص

-ميادة بنبرة عادية : يا بنات استنوا شوية ،

احنا برضوه معرفناش مين اللي دفع

أسندت عاليا ذقنها على مرفقها ، وضيق

عينيها قليلاً ، و...

-عاليا بحيرة زائدة وهي قاطبة لجبينها : يا

ترى مين ؟

وكان عقلها أضاء فجأة ، واتسعت عينيها في

صدمة ، و...

-عاليا وهي تتمتم بذهول لنفسها : مش

معقول يكون هو !! لألاً .. استحالة بعد اللي

عملته فيه ، يا ربي !!

ثم تنهدت في إنزعاج بعد أن أخذت نفساً

عميقاً .. وتجهم وجهها قليلاً

تابعت ليلة التغيرات البادية عليها ، و...

-ليلة متسائلة باستغراب : مالك يا عاليا ؟

وشك قلب كده ليه ؟!

-عاليا بإقتضاب : مافيش

-ليلة بعدم اقتناع : ازاي مافيش ؟ الأكل
مش عاجبك ؟

-عاليا بنبرة شبه منزعة : لأ مش كده

-ليلة بحيرة : اومال ؟

نهضت عاليا فجأة عن مقعدها ، وعلقت
حقيبتها على كتفها ، و...

-عاليا بضيق : خلاص يا ليلة ، أنا أصلي
تعبانة ، وعاوزه أروح بقى ، وزى ما انتي
شايفة لسه السكة قدامنا طويلة ، وعندنا
شغل بكرة أد كده وآآ..

-ليلة مقاطعة بهدوء : طيب خلاص .. اهدي ،
احنا كده كده كلنا هانقوم بعد شوية ، اصبري
شوية

ثم قامت بجذبها للأسفل لتجلس مجدداً
ريثما تنتهي بقية رفيقاتها من تناول الطعام

.....

جمعت الفتيات متعلقتهن الشخصية قبل
أن ينصرفن ، وظل معظم الحديث الجانبي
بينهن جميعاً يدور حول هوية ذلك المجهول
الذي دفع لهن حساب الطعام ..

-ميادة بنبرة جادة : ممكن يكون ولي أمر ولا
حاجة

-هناك بعدم اقتناع : بيتهيألي لأ ، كان على
الأقل جه وسلم علينا

-منة بنبرة واثقة : بالظبط ، عشان يفهمنا
كمان إنه عمل واجب محترم معنا ،
وخصوصاً إن الحساب مش قليل

أصغت عاليا لكل ما يُقال دون أن تنبس
بكلمة ، في حين أردفت سالي بـ ..

-سالي بنبرة عادية : انتو مش اكلتو وخلص ،
كبروا بقى

-ريمان بنبرة أكثر جدية : مش هاينفع نكبر
دماغنا ، أكيد في حد عارفنا ، أو على الأقل
عارف حد فينا

ارتبكت عاليا بعد عبارة ريمان الأخيرة ،
وحاولت أن تبدو طبيعية كي لا يلاحظ أي
أحد اضطرابها ، و...

-عاليا بنفاذ صبر : خلاص بقى ، أنا دماغي
صدعت ، يالا بينا

ثم سارت مبتعدة عنهن ، فنظروا إليها
باستغراب ، ومن ثم لحقن بها دون تعقيب

...

.....

في فيلا سرحان عليه ،،،،

قضى رامي معظم ليلته وهو مستيقظ على
فراشه يطالع سقفية غرفته وهو مسند
لكفي يده خلف رأسه ، ويتذكر كل ما مر به
منذ أن التقى تلك الفتاة المتمردة التي
تناكفه دائماً ، و...

-رامي لنفسه بنبرة متمهلة : والله مجنونة
البت دي ، الله يكون في عون أهلها .. بس..
بس هي برضوه عندها حق ، واحدة غيرها
كانت آآآ...

توقف رامي عن الكلام ، واعتدل في نومته ،

و..

-رامي بنبرة معاتبة تحمل الصرامة لنفسه :
أنا عمال أفكر في البت دي ليه ؟ مالي بيها ،

ما تعمل اللي هي عاوزاه ، يووووه ، أنا عاوز
أنام ، أحسن حاجة أعملها أقوم أخذ دش
ثم نهض عن الفراش ، وأمسك بمنشفته
بعد أن أخرجها من خزانة الملابس ، واتجه
ناحية المراض الملحق بغرفته ، و...

-رامي بجدية شديدة : لازم أنسى البت دي
خالص وأشيها من دماغي ، وأركز في اللي

ورايا

.....

في غرفة جانبية بجوار المطبخ ،،،،

تنهدت وردة في عشق وهي تطالع تلك
الصورة التي التقطتها خلسة بهاتفها
المحمول لآياز ، ومن ثم استدارت بجسدها
لتنام على بطنها على فراشها ، وظلت تهز
ساقها الممتلئين في دلال ، و...

-وردة بخفوت : يا روح الروح ، قمر يا ناس ،
قريب أوي هاتكون من نصيبي يا سي إزاز
ثم قربت الهاتف من فمها ، وقامت بتقبيله
عدة مرات ، و...

-وردة بتنهيدة حارة : يا اختي على الجمال
، أني هاروح للشيخ مبروك يشوفلي تصريفة
معاك ، ماهو أني مش هاستنى واحدة من
الملزقين دول يخطفوك ، وانت تتاكل أكل ..
آآآآخ.....!!!!ه

.....

في منزل عاليا راشد ،،،

جابت عاليا غرفتها ذهاباً وإياباً وهي تتمتم
بكلمات ساخطة غير مفهومة ، ثم توقفت
عن الحركة ، ونظرت إلى نفسها في المرآة ،

-عاليا بنبرة منزعجة : لأ بجد ده كثير ، أنا

مش عارفة هو بيعمل كده ليه معايا ؟!

ثم زفرت في حيرة ، ووضعت كلتا يديها على

رأسها ، وخللت أصابعها في فروة شعرها ، و...

-عاليا بجدية : أنا مش هارتاح إلا لما أعرف

هو ليه دفع الحساب بعد اللي عملته فيه ،

طب وأنا أصلاً هاشوف تاني فين؟؟ يووووه ،

حاجة بجد تزهدق ..

جلست هي على طرف الفراش ، وظلت

تركل الأرض بقدميها ، ثم أرجعت ظهرها

للخلف لتتمدد على الفراش ، و...

-عاليا وهي تتنهد في إرهاق : دماغي صدعت

من كتر التفكير ، أنا هاقوم أعلمي ليمون

وأشربه وأنام ..!

.....

في منزل ليلة الأيوبي ،،،،

أمسكت ليلة بهاتفها المحمول ، وظلت
تضغط على أزراره لتكتب رسالة نصية
لرفيقتها سارة على تطبيق (الواتس) ، و...

-ليلة : ((أنا متأكدة إن في حاجة))

-سارة : ((معتقدش ، كان زمانتها قالت))

-ليلة : ((يا بنتي انتي مش شايفاه متغيرة
من ساعة ما روحنا المطعم))

-سارة : ((طب ليه مش سألتها ؟))

-ليلة : ((سألتها ، وقالت مافيش ، بس أنا
مش مصدقاها))

-سارة : ((بصي بكرة هيبان ، يمكن هي
مش حابة تحكي الوقتي))

-ليلة : ((اووكي ، أنا هاستنى وأشوف))

-سارة : ((تمام ، المهم أنا هانام بقى
لأحسن دماغي مش متظبطة))

-ليلة : ((أنا أعدة شوية))

-سارة : ((انتي بتقدري تسهري ، لكن أنا
على أدي ، يدوب باكتبلك وأنا مش شايفة
الحروف))

-ليلة : ((طب خلاص ، قومي نامي ، ونتكلم
بكرة في المدرسة))

-سارة : ((اوكي ، باي))

أنهت كلتاهما تلك المحادثة المكتوبة ، ثم
ضغطت ليلة على أيقونة صفحة التواصل
الاجتماعي (فيس بوك) لتشاهد أحدث
الصور الخاصة بمصورى الفوتوغرافى
المحترفين .. وأبدت إعجابها بالوضعيات

الغير تقليدية الخاصة بالمتزوجين

والمرتبطين حديثاً ، و...

-ليلة بنبرة خافتة : واو .. الصور تحفة ،

الواحد كان نفسه يتعلم التصوير زيهم ..

أكد لما هاتخطب لحد هاخليه يعمل صور

زي دول ..

مطت ليلة شفيتها في انبهار وهي تتابع

بعض الصور ، و...

-ليلة بنبرة شغوفة : مممم.. بس المصور ده

ممتاز أوي ، عليه حبة مناظر جامدة جدا ...

ثم نظرت إلى التوقيت بهاتفها ، فأدركت أن

الوقت قد أصبح متأخراً ، و...

-ليلة بتوتر : أووبا ، ده أنا سرحت مع نفسي ،

يدوب ألحق أنام الساعتين دول ...!

وأغلقت بعد ذلك هاتفها ، ثم تمددت على
فراشها ، وتدثرت جيداً قبل أن تغفو في
سبات عميق

.....

في صباح اليوم التالي ،،،

في مبنى الرياض الملحق بمدارس اللافانيا
الدولية ،،،

كان الكل يعمل على قدم وساق لإنهاء
التجهيزات الخاصة بالاستعداد للعام
الدراسي الجديد ..

كانت معظم المعلمات متواجداً في
الفصول الخاصة بهن ليراجعن ما هو
مطلوب وما ينقص من أجل شرائه ..

جلست رانيا على أحد المقاعد الموجودة
بغرفة المعلمات ، وأرجعته قليلاً للخلف
وهي مستندة عليه ، و...

-رانيا بنبرة ضجرة : أووف ، بجد حاجة تخنق ،
الواحد مش لاقى حاجة يعملها

-نشوى بنبرة عادية : يا بت قومي اعمليلك
حاجة ، هو انتي مش وراكي شغل أد كده ،
هاتفصلي مطنشة كده كتير

-رانيا بعدم اكتراث وهي تشيح بيدها :
بقولك ايه ، فكك من الكلام ده ، أنا عاوزه
أفضل كده مأتخةه

-نشوى بجدية : يا بنتي بدل ما أبلتك إعتما
تطب علينا وتسمعك كلمتين بايخين

-رانيا بنبرة غير مبالية : كبري منها

وفجأة اتسعت عيني نشوى في ذهول ،
وتسمرت للحظة في مكانها ، فتعجبت رانيا
مما أصاب رفيقتها ، و...

-رانيا وهي ترفع أحد حاجبيها في اندهاش :
مالك يا نوشا ؟ انتي تنحتي كده ليه

-آياز بنبرة رجولية رخيمة :Good morning،
دي الstaff roomصح ؟

استدارت رانيا برأسها وهي جالسة بوضعيتها
المتأرجحة على المقعد ، فرأت ذلك الوسيم
يطل بجسده الرياضي من باب الغرفة ،
فغرت شفيتها في صدمة ممزوجة بالذهول ،

و...

-رانيا بنبرة متلعثمة : آآ.. هاه

ظن آياز أن تلك الفتاة لم تعي ما يقوله ،
ففكر في ترجمة عبارته حتى يسهل عليها
فهمه ، لذا بادر بـ...

-آياز متسائلاً بنبرة هادئة وعلى ثغره
ابتسامة عذبة : دي أوضة الـ .. آآ.. احم
المعلمين صح ولا أنا غلطان ؟

تراجعت رانيا بمقعدها أكثر للخلف وهي تهز
رأسها موافقة ، ولكن للأسف فقدت
السيطرة على المقعد الذي تأرجح بدرجة
كبيرة ، وسقط على الأرضية الصلبة وهي
عليه ... ٥

حاول آياز أن يخفى ضحكته ، فأشاح بوجهه
للناحية الأخرى بعد أن وضع إصبعيه على
طرف فمه ٥

أسرعت رانيا بالنهوض من على الأرضية ،
حاولت أن تعدل من هيئتها المحرجة أمامه ،
بينما تشدقت نشوى بـ ...

-نشوى بنبرة مرتبكة : آآ... احم .. آآ..
ماتخذش في بالك ، هي .. هي رانيا متعودة
على كدها

-آياز متسائلاً بهدوء : طب انتي تمام ؟
-رانيا بنبرة محرجة : أنا كويسة على فكرة
-آياز بخفوت : أووكي

-نشوى متسائلة بفضول : اومال حضرتك
عاوز مين ؟

-آياز بنبرة طبيعية : مش عاوز حد
تبادلت كلاً من رانيا ونشوى النظرات الحائرة
، و...

-رانيا متسائلة بحيرة : طب جاي هنا ليه ؟
أصل دي أوضة teachers, لو عاوز مكتب
السكرتارية هتلاقيه هناك ، لكن آآ...

-آياز مقاطعاً بنبرة رزينة : أنا teacher (معلم
(هنا معاكو ٢

-رانيا فاعرة شفيتها في صدمة : نعم ؟

-نشوى بذهول : بتقول ايه ؟؟؟

.....

في معرض عليوه للسيارات ،،،،،

جلس المهندس سرحان واضعاً ساقاً فوق
الأخرى وهو ينظر إلى ابنه رامي بنظرات
متفحصة قبل أن يردف بـ...

-سرحان بنبرة شبه منزعجة : يعني برضوه
خليته يروح يهزأ نفسه في شغلانة زي دي ٣

-رامي بنبرة عادية وهو يمرر أصابعه في
شعره : والله هو اللي عاوز كده

-سرحان بنبرة شبه ضائقة : كان المفروض
تمنعه

-رامي بنبرة أقرب للجدية : ولا عمره كان
هايسمعلي كلمة ، لازم يجرب بنفسه عشان
يقتنع ويصدق إن الوظيفة دي مش مناسبة

-سرحان وهو يزم شفتيه في ضيق : ربنا
يهديه ، ويهديك

-رامي وهو يلوي فمه في استهجان : ايه يا
بشمهندس ، هو انت هاتقلب عليا ولا ايه ؟

-سرحان بنزق : بصراحة مخنوق من
تصرفاتك ، امتى هاتعقل وتتحمل المسؤولية
معايا

-رامي باندهاش شديد : اعقل ؟ أومال انا
باعمل ايه هنا طول اليوم في المعرض ؟
والتوكيلات والبيع وآآ...

-سرحان مقاطعاً بجدية : لأ يا حبيبي ، أنا
مش باتكلم عن المعرض ده ، أنا باتكلم على
الجديد

-رامي وهو يزفر في تعب : بابا ، أنا قولت
لحضرتك أنا مش فاضي أروح هناك ،
ويدوب وقتي مكفي اللي هنا بالعافية

-سرحان بضيق : يعني عاوزني أنا أفضل
رايح جاي وأنا في السن ده عشان سيادتك
مش فاضي

-رامي بنبرة ممتعضة : الله يخليك يا بابا ،
بلاش نفتح الكلام في الموضوع ده كل شوية

-سرحان بحدّة : يا بني ده مالنا ، وانت عارف
كويس إن المال السايب بيعلم السرقة
-رامي وهو يتنهد في إرهاق : خلاص يا بابا ،
أما يخلص المعرض نبقى نشوف هانعمل
فيه ايه

-سرحان بعدم اقتناع : أما نشوف ..

ثم صمت للحظة قبل أن يكمل حديثه بـ ...

-سرحان بنبرة شبه ماكرة : أومال أمك
مافتحتش معاك سيرة حاجة كده ولا كده
-رامي متسائلاً وهو يقطب جبينه في عدم
فهم : حاجة ايه دي ؟

-سرحان مبتسماً في سعادة : عروسة يا بني

-رامي وهو يزعم شفتيه في انزعاج : يا دين
النبي ، هي لسه برضوه مصممة على اللي
في دماغها

-سرحان بنبرة واثقة : أمك مش هترتاح إلا
لما تجوزك وبعذك ابن اختها

-رامي بعدم اكتراث : الكلام ده كله قضى يا
بابا ، أنا وقت ما هلاقي البنت المناسبة
هاتجوزها على طول ، فمافيش داعي
للحوارات اللي عفا عليها الزمن دي

-سرحان بنبرة عادية : خلاص قولها ده ..
عشان هي مش هتدريح نفسها إلا لما تعمل
اللي في دماغها

-رامي بتوجس : ربنا يستر بقى

.....

في مبنى الرياض بمدارس اللافانيا ،،،

اتسعت عيني كلاً من نشوى و رانيا في صدمة
بعد أن ألقى آياز على مسامعهما عبارته
الأخيرة ، و

-آياز بنبرة رخيمة : في حاجة غريبة في كلامي
؟

-نشوى متسائلة بفضول كبير : ازاي انت
مدرس هنا معنا ؟

-رانيا بنزق : أكيد انت غلطان ، دي أوضة
المدرسات ، بنات يعني ، بتوع الكي جي
-نشوى بنبرة متلهفة : ممكن تكون تايه ،
المدرسين في المبنى الثاني بتاع أقسام ال
آآآ....

-آياز مقاطعاً بنبرة واثقة : لأ أنا مكاني هنا
معاكو ، أنا الNew KGTeacher (معلم
رياض الأطفال الجديد) !..

-رانيا فاغرة شفيتها في صدمة : نعم ؟ طب

إزاي !!

-نشوى بعدم تصديق : اكيد انت بتهزر صح

؟

-آياز بهدوء حكيم : لأ .. ده تخصصي يا مس

، وأنا من أول النهاردة زميل معاكو

-رانيا لنفسها بتلهف ممزوج بالتشوق ،

وبنظرات ضيقة تحمل التوعد : انت هاتكون

عريس مش بس زميل ..! ١٠

-نشوى بنبرة متحمسة : منورنا يا مستر آآآ...

اسمك ايه ؟

-آياز بصوت هاديء : آياز الشناوي

-نشوي وهي تمط شفيتها في إعجاب : الله ،

اسمك حلو أوي ومميز

-آياز بنبرة إطراء : ثانكس ، وانتى ؟

-نشوى بتحمس : أنا نشوى

ثم استدارت برأسها ناحية رانيا ، وأشارت

بيدها لها ، و...

-نشوى متابعة بنفس الحماسة : ودي

صاحبتى رانيا

ظلت رانيا محدقة في آياز ، وبدأت تتفرس

في ملامحه الوسيمة لتحفرها في ذاكرتها ..

ابتسم آياز لكلتاهما ابتسامة مجاملة ، و...

-آياز مبتسماً في هدوء : Nice to meet you)

أنا فرحان إني قابلتكم)

-نشوى بنبرة ناعمة : ده احنا اللي فرحانين

اننا شوفناك ، إن شاء الله هاتتبسط معانا

أوي

-آياز بنبرة متمهلة : hope so (أتمنى)

-رانيا مبتسمة بلؤم وهي تحدجه بنظراتها
الحادة : أهلا بيك في الحرملك يا .. يا شهريار

!!

.....

واصل قراءة الجزء التالي

الفصل الثامن

الفصل الثامن :

في مبنى الرياض بمدارس اللافانيا الدولية ،،
كانت غالبية المعلمات مندمجات في تجهيز
الفصول وتزيينها من أجل العام الدراسي
الجديد ..

لم تتأخر أي واحدة عن تلبية نداء المساعدة
لرفيقاتها خاصة فيما يتعلق بأعمال القص
واللصق ..

وقفت ميادة على إحدى المقاعد الخشبية
لكي تقوم بتثبيت إحدى اللوحات التعليمية
، وعاونتها في ذلك منة ، و...

-منة بتذمر : عاوزين دبايس تانية ، دول
مش نافعين

-ميادة بجدية : ثبتيها زي ما يكون لحد ما
نروح الstore، ونطلب منهم

-منة بضيق وهي ترفع أحد حاجبيها :
مافيش حاجة بتتعمل بالساهل أبداً

-ميادة بهدوء : معلش بقى ، ما انتي عارفة
في كل حاجة لازم يطلعنا فيها اللي يعطلنا

-منة بنفاذ صبر : أوووف ، يا رب ننجز بقى

دلفت ريمان ومعها ليلة إلى داخل الفصل
الدراسي وهما تحملان بعض اللوحات
والأدوات الدراسية ، و...

-ريمان بنبرة شبه عالية : ميدووو .. دول
الحاجات اللي انتي طلبتيها ، أنا استلمتها
مكانك

استدارت ميادة برأسها للخلف وارتسم على
شفتيها ابتسامة مجاملة ، و...

-ميادة بنبرة إطراء : تسلمي يا ريموو ، مش
عارفة أقولك ايه ؟

-ريمان بنبرة عادية : ماتقوليش حاجة ، كلنا
أصحاب هنا

-ليلة بجدية وهي تشير بعينيها : بصوا احنا
هنسند الحاجة هناك جمب الlocker)
الدولاب (عشان لسه هنودي للباقي حاجاتهم

-ميادة بنبرة طبيعية : أوكي ، وكتر خيركم يا

بنات

وضعت ريمان الأدوات وبعض اللوحات
بجوار الخزانة ، ثم انصرفت ، وأعقبته ليلة ...

.....

في غرفة المعلمات بمبنى الرياض ،،،،

جلس آياز على أحد المقاعد الشاغرة ، ثم
فتح حقيبته الجلدية ذات الماركة الشهيرة ،
وأخرج مفكرة للملاحظات ، وقام بتدوين
بعض الكلمات بها ، فحاولت رانيا أن تقرأ ما
كتبه من على بعد ، ولكنها لم تفهم تلك
الرموز ، و..

-رانيا متسائلة بفضول وهي تعقد حاجبيها :

احم .. آآ.. هو انت بتكتب ايه ؟

رفع آياز رأسه في اتجاهها ، ورمقها بنظرات

حادة ، و...

-آياز باستغراب :what؟

-رانيا بحرج : اقصدي يعني، عاوز مساعدة ولا

حاجة ؟

-آياز باقتضاب : لأ

-رانيا متسائلة بفضول أكثر يحمل اللؤم :

على كده خطيبتك موافقة انك تشتغل هنا

؟

-آياز بجدية : أظن إن دي مسائل شخصية

مش هاتفرق معاكي في حاجة

احمرت وجنتي رانيا من شدة الإحراج ،

وأطرقت رأسها في خجل ، فحاولت نشوى أن

تلطف الأجواء قليلاً ، و...

-نشوى بنبرة محرجة : آآ.. تـ. تعالي معايا يا

رانيا ، مس إعتماذ كانت عاوزه آآ..

-رانيا مقاطعة بحددة : ماشي جاية ، يالا بينا

زفرت رانيا وهي عابسة الوجه ، وأسرعت

في خطاها إلى خارج الغرفة ، ولحقت بها

نشوى وهي تحاول أن تبدو طبيعية في

تصرفاتها ..

رمقهما آياز بنظرات منزعجة ، و...

-آياز لنفسه باستغراب : ايه البنات دول ؟! أنا

مشوفتش كده

بعد لحظات عرجت السكرتيرة آية على

الغرفة ، و...

-آية بنبرة رقيقة : مستر آياز

انتبه لها آياز ، ونهض عن مقعده ، و..

-آياز بهدوء Yes: (نعم)

-آية بنبرة هادئة : مس إعتماذ عاوزه تقابلك
في المكآب بآاعها شوية ، فيا ريت آضرتك
آسيب اللي في ايذك وآروحلها

-آياز وهو يوميء برأسه موافقاً : أوكي ..

وبالفعل أألق آياز مفكرآه، ووضعهآ بآآل
آقيبآه ، آم آبع السكرآيرة آية إلى آآرآ
الآرفة ..

.....

في مكآب الناظرة إعتماذ ،،،

آلس آياز على المقعد المواجه لمكآب
الأستاذة اعآماذ ، وظل مآقاً بها لبرهة قبل
أن آرذف هي ب ...

-اعتماد بنبرة رسمية وهي تمد يدها بورقة
ما : مستر آياز دي قائمة بالمطلوب من
حضرتك تجهيزه

أمسك آياز بالورقة ، ثم نظر إليها نظرة
خاطفة محاولاً فهم ما دون بها ، ثم رفع
بصره في اتجاه الأستاذة إعتماذ ، و...

-آياز متسائلاً بحيرة : في حاجات أنا عارفها ،
بس هل ينفع أستعين بحد من برا يساعديني
؟

-اعتماد بعدم فهم : حد مين يعني ؟

-آياز بهدوء : حد من قرابي ، يعني أنا لسه
جاي من الخارج ، ومعرفش الأماكن اللي
بتبيع آآ...

-اعتماد مقاطعة بجدية : لأ يا مستر آياز ،
انت مش مطلوب منك تشتري الحاجات

دي ، غالبيتها موجود عندنا في الstore.. انت
تقدر تروح تستلمهم من هناك

-آياز وهو يرفع حاجبيه في اندهاش :1..Wow

-اعتماد مكملة بنفس الثبات الانفعالي : ولو
حابب مساعدة خارجية مافيش مانع بما إن
حضرتك لسه جديد ، وأكيد لو طلبت من
الزميلات هنا مش هايمنعوا أكيد

-آياز وهو يتنحج في خشونة : احم .. يعني
خليها حالياً قريبي ده لحد ما أعرف بقية
الstaff.. كمان أنا مش حابب يكون في نوع
من الحرج وأنا آآ....

-اعتماد مقاطعة بنبرة رسمية : مافيش
حاجة اسمها حرج في الشغل ، كلنا هنا فريق
واحد ، والهدف الأول عندنا هو مصلحة
الطفل والمدرسة

-آياز بهدوء :done

نهض آياز عن المقعد ، ثم طوى الورقة ، ومد
يده لمصافحة الأستاذة اعتماد وهو يرمقها
بنظرات ممتنة ، و...

-آياز بابتسامة مجاملة : تمام .. Thanks a lot
for your help (شكراً جزيلاً على مساعدتك
(

-اعتماد بإيجاز :You are welcome (على
الرحب والسعة)

ثم انصرف إلى خارج المكتب ، وأغلق الباب
من خلفه ، ووضع يده في جيب بنطاله ،
وأخرج هاتفه المحمول، ثم ضغط على عدة
أزرار ، ومن ثم وضعه على أذنه ، و...

-آياز هاتفياً بهدوء : يا أهلا .. انت لسه صاحي
؟ ممم... تمام ، طيب بص أنا عاوز منك
خدمة ، أوكيdude (صاحبي)

.....
في غرفة المعلمات ،،،

أحضرت سارة عاصم بعد المشروبات
الباردة ، وكذلك الحلوى المغلفة ، وأسندتهم
على الطاولة بجوار حقيبة آياز الجلدية ، و...

-سارة بنبرة حماسية : يالا يا بنات عشان
نفطر

-ليلة بنبرة عادية : أوكي ، بس هاغسل ايدي
الأول لأحسن مش نضيفه خالص

-هبة بجدية : طب خديني معاكي لأحسن
التراب مبهدلني

-ليلة بنبرة غير مكترثة : تعالي براحتك

-ريمان متسائلة بحيرة : أومال فين عاليا ؟

-ليلة وهي تتنهد في إرهاق : لسه عندها

شغل بتخلصه

-ريمان وهي تمط شفيتها : الله يعينها

-سالي متسائلة بنبرة هادئة : حد يعملي

النسكافيه بتاعي يا بنات !

ضيقت سالي عينيها أكثر ، ثم استدارت في

اتجاه سارة ، و...

-سالي بنبرة حانية : سارسوورة حبيبتي

-سارة بهدوء مصطنع : عاوزه ايه يا سالوكة

-سالي بنبرة رقيقة : انتي اللي بتعرفي

تظبطي النسكافيه ، خليكي جدعة واعمليه

-سارة بتذمر : طب ما تخلي ميادة تعمله

-سالي بنبرة هادئة تحمل المزاح : والله لو
كانت هنا كنت قولت لها ، بس انتي عارفها ،
مش هاتطلع من الكلاس بتاعها إلا على أول
الدراسة

-سارة ضاحكة : ههههههههههه .. على رأيك ..
دي ميادة !

-سالي بنبرة لثيمة : طب يالا بقى

-سارة بنبرة عادية ونظرات جادة : ماشي ،
بس فين السكر ؟

-سالي بضيق : اووبس ، ده في الكلاس عندي
، يعني لازم أقوم أجيبه من الدولاب

-سارة مبتسمة ابتساماة عريضة : أحسن ..
عشان تيجي معايا

-سالي بنبرة محتجة : أل كنت ناقصة

-سارة بإصرار : يالا بقى ، تعالي هاتيه

وارجعي تاني

-سالي على ممرض وهي تزم شفتيها : طيب

-ريمان بنبرة عادية : أنا هاطلع الحاجة من

الأكياس عقبال ما تيجوا

-سارة بنبرة طبيعية : ماشي

-ريمان بنبرة عالية تقريباً : ونادوا على باقي

البنات في سكتكم

-سالي وهي تهز رأسها موافقة : ربنا يسهل ،

أنا هرن على نادية ، وعلى سحر وهناء وآآ...

-سارة مقاطعة بجدية : هناء غايبة النهاردة

-سالي متسائلة بحيرة : ليه ؟

-سارة مبتسمة : عندها عارضة بتخلصها ا

-سالي بنبرة مازحة : يا بنت المحظوظة ، هي

لسه مخلصتهاش

-سارة وهي تهز رأسها نافية : تؤ

-سالي بجدية : طب يالا بدل ما أتشل ..

وبالفعل إنصرفت المعلمات من الغرفة
وبقيت ريمان بمفردها في الغرفة ، وقامت
بفض محتويات الأكياس البلاستيكية ، ثم
ضربت مقدمة رأسها بكف يدها ، و..

-ريمان لنفسها بقلق : أوبس ، نسيت
المناديل ، أما أروح أجيب علبة من الكلاس
عندي

ثم سارت ريمان هي الأخرى إلى خارج
الغرفة واتجهت ناحية الفصل الخاص بها ..

في نفس التوقيت عادت رانيا إلى داخل
الغرفة ، و...

-رانيا لنفسها بزمجرة : مابقاش إلا حته البتاع

ده يهزأني بالشكل ده ، طب والله لأوريه ..!

وضعت رانيا كلتا يديها في وسط خصرها ،

وظلت تتأمل الغرفة بنظرات ماكرة ، ثم

لمحت عبوات المشروبات الباردة ، فاعتلى

وجهها ابتسامة شيطانية ، و...

-رانيا بتوعد : أنا بقى هأعرفك مين هي رانيا

!!

اقتربت رانيا من الطاولة ، ثم قامت بفتح

إحدى عبوات المشروبات الباردة ، وقامت

بإفراغ محتواها على حقيبة آياز ، وبداخلها ،

فابتلت مفكرته .. ثم أسندت العبوة إلى جوار

الحقيبة ، وتنهدت في إرتياح و...

-رانيا بنبرة متشفية وهي ترفع أحد حاجبيها

: أحسن .. وعقبال كل مرة ..

تنحنت رانيا ، ثم التفتت حولها بريية ، و...

-رانيا لنفسها بتوجس : أما أمشي أنا بقى
قبل ما حد يشوفني ويعرف إن أنا اللي

عملت كده ..٢

ثم سارت بخطوات راكضة إلى خارج الغرفة
، ولكنها اصطدمت بريمان التي أمسكتها
من ذراعيها ، ورمقتها بنظرات حائرة ، و...

-ريمان بإندهاش : ايه يا رانيا ؟ بتجري كده

ليه ؟

-رانيا بتعلم : آآ.. هـ.. آآ.. أصل .. لأ .. مافيش ،
أنا بس .. آآه ، بطني ، عاوزه أروح التويلت

ثم ركضت مبتعدة عن ريمان التي ظلت
محدقة بها وعلى وجهها علامات حيرة جلية

-ريمان باستغراب شديد : مالها دي ؟ مش

طبيعية ليه؟؟

هزت ريمان كتفيها في عدم اكتراث ، ثم
دلفت إلى داخل الغرفة ، فتفاجئت بما حدث
على الطاولة ، فاتسعت عينيها في ذهول ،
ووضعت كفي يدها على فمها و...

-ريمان بنبرة مصدومة : أووبس ، ايه اللي

حصل هنا !!!

سارت ريمان في اتجاه الطاولة ، وأخرجت
عدداً من المناشف الورقية من علبة (
المناديل) التي كانت بحوزتها ، وقامت
بتجفيف بقايا المشروب من على الطاولة
ومن على الحقيبة الجلدية ...

في نفس التوقيت دلف آياز هو الآخر إلى
الغرفة ، وتفاجيء بريمان وهي ممسكة
بحقيبته ، فتجهم وجهه ، و...

-آياز متسائلاً بنبرة غليظة : بتعملي ايه ؟
رفعت ريمان رأسها لتنظر إلى آياز بأعينها
الخضراوتين المصدومتين ، و..

-ريمان بتعلم جلي : أنا .. آآ.. أنا

-آياز بحدة وهو يقترب منها : انتي ماسكة
السويتكيس (حقيبة جلدية) بتاعتي ليه

ثم قام آياز بجذب الحقيبة من يدها ليصدم
بها مبتلة وشبه متسخة ، فاكفهرت ملامح
وجهه أكثر ، وقطب جبينه بشدة و...

-آياز بنبرة حادة : ايه اللي انتي عملتيه ده

ابتلعت ريمان ريقها في قلق ، وظلت تنظر

إليها بنظرات زائغة ، و...

-ريمان بتوتر شديد : أنا .. م.. آآ..

تفحص آياز الحقيبة ، وتملكه الانزعاج أكثر

حينما رأى مفكرته وقد أفسدها المشروب

-آياز بضيق جلي : محدش قالك إن دي

اسمها قلة ذوق لما تبوظي حاجة مش

بتاعتك

-ريمان بنبرة معترضة : بس آآ..

-آياز مقاطعاً بنبرة متشنجة : أنا مش عارف

إنتي ليه بتعملي معايا كده بالذات ، بجد

إنتي واحدة معندكيش أي احترام

لخصوصيات غيرك

-ريمان بنبرة محتجة : بس مش أنا اللي آآ..

-آياز مقاطعة بنبرة هادرة :Enough (كفاية)

!

-ريمان بنبرة متشنجة : لأ انت لازم تسمعني

، مين قالك إني أنا اللي عملت كده ، كل

الحكاية إني آآ..

-آياز مقاطعاً بنبرة جادة : مش عاوز أسمع

تبير ، أنا واخد بالي من حركاتك دي

-ريمان باندهاش شديد : افندم ؟ حركاتي !!

ثم قام بجذب علبة المناشف الورقية من

يدها عنوة ، و..

-آياز بحنق : أيوه ..

-ريمان وهي تمط شفتيها في زهول : مش

معقول ، بجد أنا مش مصدقة اللي بسمعه ،

حركات ، هو انت شايفني تافهة للدرجادي

عشان أتصرف بالطريقة دي ؟

-آياز بتهكم وهو يحدجها بنظرات حادة : انتي
أدرى بنفسك ، بس على الأقل لو غلطتي
اعتذري مش تبقي rude (وقحة) !! ٢

احتقن وجه ريمان بدماء الغضب ، وكانت
على وشك الصياح به ، ولكنه تركها وانصرف
إلى خارج الغرفة ، فظلت هي تغمغم
بكلمات غاضبة ..

.....

في معرض عليوه للسيارات ،،،،
طرقت السكرتيرة علا باب غرفة مكتب رامي
قبل أن تدلف إلى الداخل وهي تحمل
صندوق خشبي صغير به عدد من الأدوات
المدرسية ..

نهض رامي عن مقعده ، ودار حول المكتب ،
ثم اقترب من السكرتيرة ومد يده وأمسك
بالصندوق ، و...

-رامي متسائلاً بفضول : دي الحاجات كلها ؟

-علا وهي توميء برأسها إيجابياً : أيوه يا
رامي بيه

-رامي متسائلاً بفضول : مافيش حاجة
ناقصة يعني ؟

-علا وهي تهز رأسها بالنفي : لأ اطمئن ، أنا
بعث الساعي وجاب كل حاجة من المكتبة

-رامي بإيجاز وهو يتفحص المحتويات
بعينه : تمام

اتجه رامي إلى مكتبه ، ثم أسند الصندوق
على سطحه ، وأمسك بيده ما بداخله ..

تابعته السكرتيرة بإهتمام ، ووقفت خلفه ،

و..

-علا متسائلة بحيرة : بس حضرتك يا فندم

مقولتش انت عاوز الحاجات دي ليه ؟

-رامي بنبرة عادية : مش أنا اللي عاوزهم ده

آآ...

ثم انتبه رامي إلى أنه يتحدث بإسهاب مع

سكرتيرته في أمور لا تعنيها ، فعبس بوجهه ،

و..

-رامي بنبرة صارمة : انتي مش عندك شغل

يا أنسة ؟

انتفضت علا فزعة ، وتراجعت خطوة للخلف

، و..

-علا وهي تتنحج في حرج : احم .. آآ.. اه ..

سوري

تجهم رامي بملامحه أكثر ، وأشار لها بعينه

، و..

-رامي بجديّة وهو يزم شفّتيه : طب روعي

شوفي اللي وراكي ، وخدي الباب في ايدك ..

-علا بخفوت : حاضر

ثم تركته وانصرفت ، وأغلقت الباب من

خلفها .. فتابع هو تفحص باقي محتويات

الصندوق ، و...

-رامي بتهكم : على آخر الزمن رامي سرحان

يشتري كراريس وأقلام رصاص وبرايات ، ده

أنا معملتهاش وأنا في المدرسة ، منك لله يا

إيزووو ، هاتفضحني على آخر الزمن ..!!! ٢

ثم أمسك رامي بهاتفه المحمول ، و...

-رامي بتهيدة إرهاب : أما أكلم الباشا
وأقوله إن الحاجة معايا ، وأشوف إن كان
هايخدها هنا ، ولا أوديها له فين !

.....

في داخل أحد المساكن الشعبية بحي ما
نأئي قديم ،،،

راقبت وردة تلك السيدات ذوات الأعمار
المختلفة بنظرات جادة قبل أن تنتبه لصوت
تلك المرأة الخشن ، و..

-سيدة ما بصوت آجش : دورك يا بتي ا

-وردة بتوتر وهي تبتلع ريقها : ماشي

نهضت وردة عن الأريكة القديمة ثم سارت
خلف تلك المرأة العجوز إلى داخل غرفة ما
شبه مظلمة ، ومحاطة بأشياء غريبة ..

انتبهت وردة إلى صوت ذلك الكهل ذو اللحية
البيضاء ، و..

-الشيخ مبروك بصوت رخيم : اقعدني يا
وردة هنا

جحظت وردة بعينيها في صدمة ، وأمسكت
بطرف حجابها وعضت عليه بأسنانها ، ثم ..

-وردة بإندهاش شديد : وكمان عارف اسمي
يا سيدنا

-الشيخ مبروك بهدوء : عارفك وعارف اسم
أمك واسم ستك وآآ..

-وردة مقاطعة بحماس : بركاتك يا سيدنا
الشيخ

ألقى مبروك بحفنة من مادة ما تشبه التراب
في المبخرة الموضوعة أمامه ، فإزداد تصاعد
الأدخنة منها ، و..

-الشيخ مبروك متسائلاً بنبرة جادة : جاية

ليه يا وردة ؟

-وردة بنبرة متلهفة : بحبه يا سيدنا ، وعاوزاه

يكون ليا

-الشيخ مبروك وهو يمط شفتيه : مميمم ..

بس هو آآ...

-وردة بنبرة حزن زائفة : هو لسه مش

شايفني ، وأني عاوزه أملى عينيه ،

ومايشوفش إلا أنا بس ويتجاوزني

-الشيخ مبروك بنبرة هادئة : يعني اتني

عاوزه حجاب المحبة

-وردة بتحمس : حجاب محبة ، حجاب جواز ،

المهم نكون سوا قريب يا شيخنا

ثم اقتربت برأسها منه ، وغمزت له بزاوية

عينها ، و...

-وردة بخفوت : وأني هادفع المعلوم كله يا

سيدنا

أشار لها مبروك بيده ، فتراجعت هي

للخلف ، و...

-الشيخ مبروك بحدة زائفة : أنا مش باخد

حاجة ليا ، كله لأسيادنا .. حووش يا رب

حوووش ٢

-وردة بقلق : إيوه أومال ، المهم رضا أسيادنا

استدار مبروك بجسده للخلف ، ثم مد يده

ليمسك بمقبض أحد الأدراج ، ومن ثم قام

بفتحه ، وأخرج منه لفافة ما مطوية بالية ،

واعتدل بجسده مرة أخرى ، وألقى بتلك

اللفافة في حجر وردة التي انتفضت في مكانها

خائفة ، و...

-وردة متسائلة بتوجس : ايه دي يا سيدنا

-الشيخ مبروك بنبرة قوية : امسكها

متخافيش

أمسكت وردة بيدها المرتعشة بتلك اللفافة

، وقربتها من عينيها لتتفحصها ، و..

-الشيخ مبروك بنبرة جادة للغاية ، ونظرات

ثابتة : فضي اللي جوا الورقة دي في أي

حاجة تتشرب ، وخلي اللي عليه العين

يشرب منها ، ويومين بالظبط وتجيلي ،

وأقولك على اللي هاتعمليه بعد كده ا

-وردة بقلق بالغ : هو ده سم يا سيدنا ؟

-الشيخ مبروك بضيق : سم إيه يا بت إنتي

!! دي خلطة مخصوصة للعشاق

-وردة وقد سال لعابها : هاه .. عشاق

-الشيخ مبروك بنبرة خافتة : في ظرف

اسبوع اللي عليه العين هايكون تحت إيدك

-وردة بنظرات متلهفة ، ونبرة متشوقة : يا
ريت يا سيدنا ، وأني والله لهمرمغك في الخير
كله !!

.....

واصل قراءة الجزء التالي

الفصل التاسع

الفصل التاسع :

في مبنى الرياض بمدارس اللافانيا ،،،

جلس آياز على أحد المقاعد الشاغرة في
الحديقة الصغيرة الملحقة بالمبنى وهو يزفر
في ضيق ، و...

-آياز بنبرة متشنجة : قلة ذوق فعلاً ، بجد
الواحد ماشفش في حياته بنات زي كده ،
واحدة عاوزه تعرف أموري الخاصة ، والثانية
بتتعمد تبوظ كل اللي يخصني .. أنا لازم أأخذ
بالي بعد كده ، مش هادي الفرصة لأي واحدة
إنها آآ....

قطع تفكيره - ذو الصوت العالي - رنين
هاتفه المحمول ، فأخرجه من جيب سترته ،
ونظر إلى شاشته ، و...

-آياز بتنهيذة إرهاق : ده رامي ، كويس ، أما
أرد عليه

ضغط آياز على زر الإيجاب ، ووضع الهاتف
على أذنه ، و...

-آياز هاتفياً بنبرة جادة : ألوو .. أيوه يا رامي ،
انت فين ؟

-رامي هاتفياً بنبرة عادية : يا عم أنا موجود ،

إنت اللي فين ؟

-آياز بصوت منهك : أنا لسه في السكول

-رامي بنبرة مهتمة : حلو أوي ، أنا جبتلك

كل اللي انت عاوزه ، تحب أوديه على الفيلا ،

ولا أجيبهولك في محراب العلم

-آياز بنبرة شبه حانقة : انت .. انت بتتريق ؟

-رامي ساخراً : بصراحة مش قادر أمنع

نفسي من التريقة ، ماهو على آخر الزمن

بقيت شايل كراريس وكتب ورايح المدرسة ،

ده أنا معملتهاش وأنا لسه طالب ، بأعملها

الوقتي ، لأ وعلى إيد مين ، إيدك انت !!

-آياز بصوت جاد : مش وقت تريقة يا رامي ،

أنا عاوزك تجيبلي الحاجة الوقتي خليني

أخلص

-رامي متسائلاً بإستغراب : في ايه مالك ؟ هو
في حاجة حصلت ؟

-آياز بإقتضاب : لأ مافيش

-رامي متسائلاً بفضول أكبر : إزاي مافيش ،
ده باين من صوتك إن في حد ضايقتك ، أنا
متوقع ده من الأول ، مش هاتسلم من
الغفر اللي حواليك

-آياز متسائلاً بعدم فهم : غفر مين ؟

-رامي بتهكم : المدرسات اللي معاك ، اللي
مفكرين نفسهم حاجة وهما شبه الغفر

-آياز بتنهيذة إرهاق : كفاية يا رامي ، حاول
بس تجيلي على المبنى ، انت عارفه صح ؟

-رامي وهو يوميء برأسه موافقاً : أها

-آياز بجديّة : طيب أنا هاسيب خبر على
البوابة إنك انت جاي ، فهدخل على طول ،
هتسأل على أوضة اسمها Staff Room)

حجرة المعلمين) ، هتلاقيني هناك

-رامي مازحاً : أهم حاجة ماتهوش جوا

-آياز وهو يلوي فمه في تهكم : اطمئن ، هتلاقيني
ألف مين يدلك

-رامي غامزاً : من الغفر صح ، مش المزز!

-آياز بخفوت : أها .. مستنيك ، يالا باي

-رامي بتحمس : مسافة السكة يا باشا ،

سلام ..!

أنهى آياز المكالمة مع ابن خالته ، ثم أعاد
الهاتف في مكانه ، وبدأ في استكمال تنظيف
حقيبته الجلدية ومفكرته ..

.....
في غرفة المعلمات ،،،

كانت ريمان على وشك البكاء بسبب ما
فعله آياز بها وإتهامه الباطل لها بإفساد
أشياءه ..

احمر وجهها من الغضب ، وبدأت الدموع في
التجمع في مقلتيها ، و...

-ريمان بصوت مختنق : والله ده حرام ..!

عادت سارة ومعها سالي إلى الغرفة
فتفاجئت كلتاهما بحالة ريمان ، و...

-سارة متسائلة بقلق : ريمو ! في ايه يا بنتي

؟

-سالي باستغراب : انت يا بت ، مش احنا
ساييني الضحكة من هنا لهننا ، في ايه اللي
حصل وخلاكي تتقلبي كده

-ريمان بنبرة مختنقة : أنا كنت آآ...

لم تكمل ريمان عبارتها الأخيرة بسبب
دخول نشوى إلى الغرفة ، و...

-نشوى مقاطعة بصوت عالي : أومال
محدث شاف رانيا يا بنات ؟

-سارة بإيجاز : تؤ

-سالي بنبرة غير مهتمة : تلاقى في أي نيلة ،
ما انتي عارفة صاحبتك زي الزئبق محدش
بيعرف يتلم عليها

-نشوى وهي تحك رأسها بأصابعها في حيرة :
هاتكون راحت فين بس ، أنا آخر مرة كنت

شايفها جاية على هنا ، بس اتلبخت في كام
حاجة ، وآآ...

أصغت ريمان لما قالتة نشوى بإهتمام ،
وبدأت تساورها الشكوك حول رانيا .. خاصة
أنها كانت آخر من تواجد بالغرفة ، و...

-نشوى متابعة وهي تمط شفتيها : أنا
هاروح أشوفها في أوضة الArt(الرسم) ، أو
الجيم

احتقنت الدماء في عروق ريمان ، وبدأت
عينها تشتعلان من الغضب ، و..

-ريمان بحنق : إستني أنا جاية معاكي

-سارة بإندهاش : في ايه يا ريموو ، هو انتي

هاتتحوولي ولا ايه ؟

-سالي وهي ترفع حاجبها في استغراب : انتي
يا بت مش طبيعية ، انتي مش كنتي لسه
ضاربة بوز وحواجبك ٨٨ وآآ..

-ريمان مقاطعة بصرامة : هاتعرفوا الوقتي ،
يالا بس نشوف رانيا الأول ..!

ثم أسرع الفتيات بالخروج خلف ريمان
من الغرفة في اتجاه الغرفة المخصصة
للرسم ...

.....

بداخل غرفة الناظرة إعتماذ ،،،،

وقفت حنان بجوار الناظرة تعرض عليها
الخطة المقترحة للعام الدراسي المقبل ، و...

-إعتماذ بنبرة رسمية : تمام كده يا مس

حنان

-حنان بخفوت : وطبعاً أنا خدت موافقة كل
teachers (المعلمات) على التعديلات
دي ، وخلال يومين هاتكون كل حاجة
متظبطة في الplans (الخطط)

-إعتماد مبتسمة في رضا: عظيم يا مس
حنان ، تسلمي على المجهود بتاعك

-حنان بنبرة هادئة : على إيه بس يا مس
إعتماد ، ده واجبنا

-إعتماد بنبرة راجية : يا ريت كل المعلمات
يبقوا زيك كده حريصين على العمل ..
بالمناسبة قابلتي المدرس الجديد مستر آياز

-حنان باستغراب : مستر آياز ! هو ده معنا
هنا ؟

-إعتماد بهدوء : ايوه ، ده متعين معاكوا
جديد في الكي جي

-حنان ياندهاش شديد : مدرس راجل في

الكي جي ! غريبة الصراحة !!

-إعتماد بصوت متفائل : هي فعلاً حاجة

غريبة ، بس أنا واثقة إن مستر آياز هاي عمل

طفرة هنا في الكي جي

-حنان بنبرة رقيقة : ربنا يوفقه ويوفقنا

-إعتماد بصوت هاديء : يا رب

.....

أمام البوابة الرئيسية لمبنى الرياض ،،،

أوقف رامي سيارته أمام بوابة المبنى ، ثم

ترجل منها وتوجه ناحية صندوق السيارة ،

وقام بفتحه ، وأخرج منه صندوق كرتوني

مليء ببعض الأشياء الدراسية ، ثم أسنده

على الأرض ، وأغلق سيارته ، وحمل

الصندوق واتجه ناحية حارس البوابة و..

-رامي مبتسماً : سلامو عليكم

-سيد بهدوء وهو يلوح بيده : وعليكم السلام
يا فندم ، اتفضل

رفع رامي الصندوق الكرتوني للأعلى قليلاً ،

و...

-رامي وهو يتنحج في خشونة : إحم .. آآ.. أنا
جايب الحاجات دي عشان خاطر الأستاذ آياز

-سيد مبتسماً ابتساماً عريضة : ايوه يا فندم
، حضرتك الأستاذ رامي

-رامي وهو يوميء برأسه موافقاً : ايوه
بشحمي ولحمي

-سيد بنبرة مهتمة وهو يشير بيده : هو فعلاً
مبلغني إن حضرتك جاي ، اتفضل

ثم قام بفتح البوابة له قليلاً ، فدلف رامي
للداخل، و...

-رامي متسائلاً بجدية : معلش بقى قولي
أروح فين لأوضة المدرسين بدل ما ألف كده
مع نفسي وأتوه

-سيد مبتسماً ابتساماً عريضة : حاضر يا
باشا ، أنا هدل حضرتك على أوضة
المدرسات مش المدرسين

-رامي وهو يمط شفثيه في عدم اكتراث : لا
مؤاخذة

-سيد بهدوء : ولا يهملك .. أتفضل معايا
وبالفعل أعطى الحارس سيد الإرشادات
لرامي لكي يصل إلى غرفة المعلمات دون
الحاجة إلى الالتفاف حول مبنى الرياض ..

فلم يستغرق وصوله إلى هناك سوى بضعة
دقائق ..

دلف رامى إلى داخل العرفة فلم يجد بها أي
أحد ، لذا أسند الصندوق الكرتونى على
الطاولة الموضوع عليها الطعام ، و..

-رامى لنفسه بتعجب : هو ما فيش حد
يعني هنا ، لا ممز ولا غفر ، ولا أي حاجة ٣
مد رامى يده ، وأمسك بعلبة مشروب باردة
و..

-رامى لنفسه بإرهاق : الجو حر بدرجة صعب
أوى ، أنا أشرب البتاع ده وأبقى أخلى الواد
إيزوو يشتري مكانه ، أوووف على الحر ،
جهنم ...!!!! ٩

.....

في المكتبة الصغيرة للأطفال ،،،

كانت عاليا قد انتهت لتوها من ترتيب
المكتبة الصغيرة التي تم إلحاقها بالمبني
حيث قامت برص الكتب بطريقة مبسطة
وسهلة حتى يتمكن الطفل من الإطلاع على
الكتب المصورة والمفيدة ، والاستفادة منها

..

لم تتوقع هي أن تكون الغرفة متسخة
للغاية ، حيث كسا التراب كنزتها الوردية ،
ولطخ بنطالها الأبيض ، مما أزعجها للغاية ،

و...

-عاليا لنفسها بتذمر : ده جزاء اللي يعمل
خير في البلد دي يتمرمط المرمطة دي ،
يعني هدومي كلها بقت تراب وعفرة ،
والطرحة اتبهذلت ، وحاجة تقرف ، استغفر
الله العظيم يا رب ، أنا محتاجة أظبط كل
حاجة من الأول ، ماهو مش معقول هافضل

طول اليوم كده ، أيوه ، أنا هاروح الأوضة
بتاعتنا أحط الكتب دي هناك ، وأعدل
هدومي ، وأروح بعدها التويلت أغسل وشي
، وأنتعش كده

خرجت عاليًا من الغرفة ، وأغلقت الباب
خلفها ، وقررت أن تتجه إلى غرفة المعلمات

...

.....
في غرفة المعلمات ،،،،،

جلس رامي على أحد المقاعد ، وتواري
خلف الصندوق الكرتوني المسنود على
الطاولة ، وبدأ في إرتشاف محتوى علبة
المشروب البارد ..

وفي نفس التوقيت دلفت عاليًا إلى داخل
الغرفة وهي تسب وتزفر في إنزعاج جلي ، و..

-عاليا بضجر : أعوذو بالله ، إيه القرف ده ، ده
أنا مناخيري اتملت تراب ، أوووف ، أو مال لو
مكانتش الدادة بتنضف كل يوم ، كنا هنلاقي
إيه جوا

انتبه رامي إلى ذلك الصوت الأنثوي الذي
يألفه جيداً ، وارتسم على ثغره ابتسامة
عريضة ، ثم مال برأسه للجانب ليتأكد من
صدق حدسه ، وبالفعل رآها تلك الفتاة
دائمة الشجار حتى مع نفسها .. ١٣
-رامي لنفسه بسعادة وخفوت : ده أنا
نسيت خالص إنك شغالة هنا !..

لم تنتبه عاليا إلى وجود رامي بالغرفة ، حيث
كان شاغلها الأكبر هو تنظيف ملابسها
وحجابها من التراب العالق بهم ، وبحركة
عفوية منها قامت بنزع حجابها لتنضفه ،

فكشفت عن شعرها الأسود الطويل شبه
الناعم ، و..

-عاليا لنفسها بنبرة منزعجة : يا رب بس
مايكونش لزق التراب في شعري ، أنا مش
فاضية أغسله خالص النهاردة

-رامي بصوت أجش من الخلف : لأ هو
نضيف على فكرة

٦!!!

.....

واصل قراءة الجزء التالي

الفصل العاشر

الفصل العاشر :

في غرفة المعلمات بمبنى الرياض ،،،

جحظت عاليا بعينيها حينما استدارت
للخلف ووجدت رامي يتسم لها إبتسامة
عريضة ، فأرتبكت على الفور ، وحاولت أن
تغطي شعرها وهي تصيح فيه ..

-إنت .. إنت بتعمل ايه هنا ؟ ومين سامحك
تيجي الأوضة دي ؟ إنت أصلاً إيه اللي دخلك
المدرسة هنا ؟

لم تحيد عاليا بعينيها عنه ، بينما بادلها هو
تلك النظرات المتفحصة لها ولهيتها الغير
مهندمة ، ثم لوى زاوية فمه في تهكم ، و..

-كل دي أسئلة ، ما بالراحة شوية عشان
أعرف أجابك

ثم نهض عن المقعد ، وبدأ يتحرك في
اتجاهها ..

حاولت عاليا أن تعدل من وضعية حجابها ،
لكنه بدى لو كان يتعمد عدم الإنصياع لها ،
فإرتبكت أكثر ، وتراجعت خطوة للخلف
متحاشية النظر إليه ، فخشيت أن تبدو
أمامه كالبلهاء ، لذا نهزته وهي تشير بإصبعها
ب.....

-لو سمحت خليك في مكانك ، وإلا والله
العظيم آآآ...

توقفت هي عن إكمال عبارتها حينما أشار
هو لها بكفي يديه في الهواء لكي يطمئنها ،
و..

-طيب .. طيب ، بس إهدي

تراجعت عاليا في اتجاه المرأة الصغيرة
المعلقة عند مدخل الغرفة ، وبنبرة تحمل
النرفزة تشدقت ب...

-ثواني خليني أظبط الطرحة دي

ثم سريعاً وضعت هي (دبائيس) الحجاب
في فمها لكي تتمكن من ربطها جيداً ..

في حين عقد رامي ساعديه أمام صدره ،
وإستند بظهره على الطاولة ، وظل يتابع
عاليا بنظرات متمهلة ومتعجبة في آن واحد ،
وبنبرة رخيمة تحدث بـ...

-خدي راحتك يا أبله !

لوت هي شفتيها في استنكار جلي ، ورمقته
بنظرة حادة من طرف عينها اليسرى ، و..

-نعم ؟ أبله !!!!

ابتسم هو لها بغرور ، وبكل تعجرف تابع
حديثه معها بـ...

-أه أبله .. ولا تحبي أقولك عاليا ، أنا شايف

إن ده أفضل !!

صرت هي على أسنانها في حنق غير مبرر ،

ثم كورت قبضة يدها وكأنها تريد لكمه فوراً

على فكه :

-إنت .. إنت !

حل هو ساعديه ، ومد يده في اتجاهها

ليصافحها وهو يبتسم لها :

-أنا رامي ، تشرفت بيكي

رمقته عاليا بنظرات ساخطة ، ثم هزت

ساقها في عصبية بعد أن عقدت ساعديها

أمام صدرها ، وأردفت .. :

-جاي هنا ليه ؟

مط رامي فمه للأمام في برود ، ثم ابتسم لها
إبتسامة هادئة وهو ينظر لها بنظرات شبه
ضيقة ، و..

-هو المكان محظور عليا ولا حاجة يا .. يا
عاليا ؟

تشنج وجهها ، وبرزت عروق جبينها ، ورفعت
حاجبيها الاثنين في غيظ ، و..

-أه طبعاً محظور عليك وعلى أي حد غريب
يجي هنا من غير إذن

ابتسم رامي بثقة أكبر .. ثم وضع يديه في
جيبي بنطاله الخلفي ، ونظر لها بغرور ،
وتنفس بهدوء ثم تابع ب.. :

-أنا مافيش حاجة تقف في وشي ، ده أنا
رامي عليوه

حدجته هي بنظرات مغتازة ، ثم وضعت
يدها في منتصف خصرها ، وبنبرة متوعدة
أردفت بـ ... :

-والله ، طيب ! أنا هابلغ الأمن عنك
وهاخليهم يطلعوك برا يا رامى قشوع (اسم
بطل فيلم مصري) ...٢!

ضيق رامى عينيه أكثر في حيرة ، ثم تسائل
في فضول بـ...

-مين رامى قشوع ده ؟؟؟

وضعت هي إصبعيها على طرف ذقنها
وكأنها تتوعده بالإنتقام ، و..

-اصبر بس عليا ...!!!

-على فكرة أنا اسمى رامى سرحان عليوه ،
مش قشوع ده !

-هه !

كانت عاليا على وشك الخروج من الغرفة
حينما أسرع رامي في خطواته لكي يسبقها ،
ثم اعترض طريقها ووقف أمامها ، بنبرة شبه
راجية تحدث قائلاً :

-استني بس يا عاليا

صرت هي على أسنانها في ضيق ، وأشارت
بإصبعها ، و..

-كمان عاليا كده حاف ؟!!!!

ابتسم رامي لها إبتسامة عريضة ، ثم غمز
لها وهو يتحدث بنبرة هامسة بـ..

-بلاش حاف ، خليها بالزبدة بالعسل
بالمكسرات حتى ، المهم بأي حاجة مسكرة
زيك كده ! ها مرضية يا عاليا ؟

-والله ، إنت قاصد تفور دمي

-ليه بس سوء الظن ده ! ده أنا نيتي صافية

-مممم ، طب وسع أحسنلك

-لالالا ، أنا مش هاوسع إلا لما آآ...

قاطعته عاليا بصوتها الحاد وهي تهدر بـ ... :

-والله العظيم إنت مش هترتاح إلا لما

أعملك فضيحة هنا

-يا بنتي هو انتي بتدوري على المشاكل

بمغناطيس ؟ أنا جاي هنا في شغل ، إصبري

شوية واسمعييني

هدأت نبرتها إلى حد ما ، ورمقته بنظراتها

الجادة :

-والله ! وده من امتي ان شاء الله ؟!

- احم .. آآ.. من زمان ..

-ابن خالتك ؟

-أيوه ، ماهو متعين معاكم مدرس هنا
تابعت عاليا حديثها بنفس النبرة المتهكمة ،
وهي تنظر إليه بنظرات شبه ساخطة ، ثم
تابعت بـ : :

-يبقى حضرتك غلطان في العنوان ، هنا
مبني الكي جي للبنات وبس ، ولو جاي
فعلاً لابن خالتك زي ما بتقول يبقى شور
هتلاقيه في المبنى الرئيسي مش هنا ،
فاتفضل بقى هويينا

أصر رامي على كلامه ، ونفخ في إرهاب ، ثم
نظر لها مباشرة :

-لأ معلش ، أنا متأكد من اللي بأقوله ، وآآ..
قاطعته عالياً مجدداً بصوتها العالي وهي
تصرخ فيه بـ...

-واضح كده إن الكذب هواية عندك

لوى هو فمه في عدم تصديق ، ورفع حاجبه
للأعلى :

-نعم ؟

نظرت إليه عاليا بنظرات أكثر سخطاً ،
وأشارت له بإصبعها وهي تحدته بنبرة تحمل
نوعاً من الإهانة ب....

-زي ما سمعتني ، انت من النوع لما مش
بتلاقي واحدة تديك ريق حلو ، تعمل أي حجة
فارغة والسلام عشان بس تزهبها وتقرفها في
عيشتها يمكن تترمي عليك ، وتعتبرك
فارس احلامها الأول

رفع رامي حاجبيه في اعتراض :

- الكلام ده ليا أنا ؟

أومات هي برأسها موافقة قبل أن تكمل ب..

:

- أه ليك طبعاً ، وإن كنت بقى مفكرني مش

عارفة إنت عملت ايه في المطعم تبقى

غلطان ، لأ أنا واعية لكل حاجة بتعملها

كويس أوي ...!!!!

-وربنا أنا فعلا غلطان إني بأعمل معروف مع

اللي زيك

وضعت كلتا يديها في منتصف خصرها ،

وضيقت عينيها بشدة وهي تنظر إليه في

حنق :

-ايبيه ؟ اللي زيي ؟

هز رامي رأسه بإصرار ، ثم تابع بسخرية

واضحة ب... :

-أيوه .. أصل انتو اللي يعملكم قيمة في
الزمن ده ويعبركم ، بتتمردوا عليه

-والله !

ثم نظر إليها بنظرات متحدية ، وبنبرة واثقة
أكمل ب ..

-أيوه .. جنس نمرود ، وروحي إشتيكني ،
وأنا مستنيكي هنا ، بس متتأخريش!!!!

فغرت هي شفيتها في عدم استيعاب لما
قاله للتو ، في حين أشار هو لها بكف يده ،
ولم ينظر لها ، وبكل فظاظة تحدث ب .. :

-وسعي بقى ، عشان عاوز هوا ، وابقوا ركبوا
تكييف هنا لأحسن الجو خانقة ، ها .. خانقة

!!!

لم تصدق عاليا تصرف رامى الوقح معها ،
وتسمرت في مكانها لوهلة حتى أفاقت من

شرودها ، وكانت على وشك الانفجار ثائرة ،
لكنها نظرت حولها فلم تجده ، فمطت
شفتيها في إحتجاج :

-ماشي يا رامي ، ماشي ...!!!

.....
في غرفة الرسم ،،،

ركضت ريمان ومعها سارة وسالي ومن
قبلهن نشوى في اتجاه غرفة الرسم حيث من
المفترض أن تكون رانيا متواجدة هناك ،
ولكن للأسف لم تجدها أيّاً منهم ..

نفخت ريمان في غضب ، وصرت على
أسنانها في ضيق وهي تتحدث بنبرة منفعة

ب...

-راحت فين ؟

هزت نشوى كتفيها في عدم فهم ، ومطت
ثغرها للأمام :

-معرفش

رمقتها ريمان بنظراتها المشتعلة :

-مش إنتي صاحبتها ؟

أجابت عليها نشوى بتهكم واضح بـ ::

-ماشي .. بس ده مش معناه إن أنا معايا

خط سيرها يعني !..

-بس إنتو الاتنين ودنكم في بعض ليل نهار

-بقولك ايه يا ريمان ، أنا مش فاضية للكلام

ده ، خلي كل واحدة تخلص اللي وراها

وقفت سارة إلى جوار ريمان ، وأسندت كف

يدها على كتفها ، ونظرت لها بنظرات هادئة :

-اهدي يا ريموو ، كل مشكلة وليها حل

التفتت لها ريمان ورمقتها بنظرات محتقنة

قبل أن تنطق بنبذة متشنجة بـ .. :

-يا سارة إنتي مش متخيلة رانيا عملت فيا

ايه ، ولا حتى المصيبة اللي لابستهاني

-خلاص ، كل حاجة هاتتحل

-لأ مش هاتتحل لأنه كده مفكر إني أنا اللي

بوظت حاجته

رفعت سالي حاجبها في تساؤل :

-مين ده ؟

استدارت ريمان ناحيتها ، ونظرت لها بنظرات

عادية وهي تشير بيدها :

-المدرس الجديد

-مدرس ...!!!!

قالتها سارة بإستغراب قبل أن تتوقف
جميع الآنسات عن الحديث حينما سمعن
ذلك الصوت الصارم والمعروف للناظرة
إعتماد :

-في ايه اللي بيحصل هنا يا بنات ؟ انتو مش
متواجدين في أماكنكم ليه ؟

تنحنحت نشوى في حرج ، ونظرت لها
بتوجس :

-أنا .. أنا ماشية

تنفست سالي بهدوء ، وبخطوات متمهلة
تأبطت في ذراع سارة ، ثم سارت في اتجاه
الناظرة ، ورمقتها بنظرات عادية :

-احنا خلصنا اللي ورانا يا مس إعتماد ، وكنا
بنشوف إن كان في حد من زمايلنا محتاج
مساعدة ولا حاجة

مطت الناظرة إعتماذ شفيتها في إعجاب ،
وبنبرة مديح تحدثت بـ. :

-برافو يا مس سالي .. بأحب فيكي روح
الحماسة الزايذة دي

-العفو يا مس إعتماذ.. احنا بنتعلم من
حضرتك

-ماشي يا مس سالي ، ربنا معاكو
ثم تركتهن وإنصرفت في اتجاه مكتبها ، في
حين أرخت سارة ذراعها قليلاً وهي تنظر إلى
سالي و..:

-دراعي خذل ، ماتريحيش أوي عليه
-يا بت ده إنتي ليكي الشرف إني ماسكة
فيكي

ظل وجه ريمان متجهماً ، وعقدت ساعديها
أمام صدرها ، وبدأت في هز ساقها بعصبية ،
وغمغمت مع نفسها بكلمات مبهمة تشير
إلى حنقها .. تبادلت كلاً من سارة وسالي
النظرات ذات المغزى ، ثم أشارت سالي
لسارة بعينيها لكي تتحدث مع ريمان ..
فإمتثلت الأخيرة لطلبها ، وبالفعل وقفت
قبالة ريمان ثم وضعت يدها على ذراعها
ومسحت عليه بنعومة ، ونظرت لها بنظرات
عادية وبصوتها المتحمس نطقت بـ ...:

-خلاص بقى يا ريموو ، انسي اللي حصل
هزت ريمان رأسها معترضة قبل أن تجيبها بـ

:

-لأ-

-مش يمكن تكوني ظلماها !

بدى الانفعال واضحاً في صوت ريمان حينما
أجابتها بـ ..:

-والله أبدأ ، ده أنا متأكدة إنها السبب في اللي
حصل

خشيت سارة إن تمادت في الضغط على
ريمان أن تزداد غضباً ، لذا أخذت نفساً
عميقاً ، وزفرته على مهل ، وبصوتها الرقيق
تابعت حديثها بـ ..:

-بصي ، فوتي المرة دي ، وأوعدك بعد كده لو
هي ليها يد في حاجة احنا مش هانسيبها
-بالظبط كده

قالتها سالي حينما وقفت إلى جوار ريمان ،
ووضعت هي الأخرى يدها على كتفها

تراجعت ريمان خطوة للخلف ، ونظرت إلى
كلتاهما بأعين مشتعلة ، ثم ردت عليهما
بتذمر بـ :

-لأ ، إنتو مش فاهمين هي أخرجتني ازاي ،
وهو كده هايفكر إن أنا اللي عملت ده في
حاجته

قطبت سارة جبينها ، وبنبرة فضولية
تسائلت بـ ..:

-حاجة مين ده ؟

نفخت ريمان مجدداً من الضيق الجلي ،
ووضعت كفي يدها على وجهها لتخفيه ، و..

-يووووه

أشارت سالي لسارة بطرف عينها لكي
تتوقف عن الحديث ، ثم بادرت هي بـ ..:

-بقولكم ايه انتو الاتنين ، تعالوا نتكلم في
مكان تاني بدل ما نلاقي عفريت العلبة فوق

دماغنا

ابتسمت سارة ببلاهة ، ثم نظرت حولها في
قلق ، و..:

-على رأيك

أحاطت سالي ريمان بذراعها ، ثم دفعتها
لتسير معها وهي تتحدث بصوت هاديء ب ..
-ياللا يا ريموو ، يالا يا حبيبتي ، وربنا يهديكي

.....!ا

تجول رامى فى الحديقة الملحقة بمبنى
الرياض باحثاً عن آياز ، وبالفعل وجده
جالساً على أحد المقاعد الخشبية المثبتة
فى الأرضية ، فإتجه نحوه وهو يصيح ب..:

-إيزوووو ... باشا !

انتبه له آياز ، ونظر في اتجاهه ، ولوح له بيده
ثم نهض عن مكانه ، وبنبرة منزعجة أردف

..

-تعالى يا رامى

جلس رامى إلى جوار آياز ، فتنهد الأخير في
إستياء ، فنظر إليه رامى بإستغراب :

-مالك أخذ جمب كده ليه ؟

نفخ آياز مجدداً في ضيق جلي ، ثم حدق
مباشرة أمامه في الفراغ :

-اتخنقت

رفع رامى حاجبه في اندهاش ، ثم مال برأسه
للجانب ليتمكن من التمعن في وجه ابن
خالته ، وتحدث .. :

-بالسرعة دي

-هاعمل ايه ، ماهو ربنا مسلط عليا واحدة

كل ما تشوف حاجة تبغي تبوظها

ضيق رامي عينيه ، وبنبرة فضولية تسائل بـ

...

-مين دي ؟

هز آياز كتفيه في حيرة ، ثم لوح بذراعه في

الهواء وهو يتحدث بـ:

-مش عارف ، أهى بنت من البنات اللي

شغالين هنا

لكزه رامي في ذراعه بخفة ، ثم غمز له بطرف

عينه ، وبنبرة شبه مأكرة سأله :

-شبه الغفر ، ولا مزة تستاهل؟!!

لوى آياز فمه في استنكار قبل أن يجيبه بـ ...:

-يا عم انت فايق للكلام ده

-يا سيدي بأحاول أخليك تفك كده وتغرفش
بدل ما أنت مقفل كده

-طب جبت الحاجة ؟

ابتسم رامي نصف ابتسامة شبه ساخرة ، ثم
بنبرة مزحة أجابه بـ ..:

-أكيد طبعاً ، أو مال يعني جاي أشكيلك
همي وتشكيللي همك

ربت آياز على فخذ رامي لكي يحثه على
النهوض ، ثم بنبرة جادة تحدث بـ :

-طب تعالى نشوفها

نهض رامي من جوار ابن خالته ، ثم نظري
ساعة هاتفه المحمول قبل أن يوجه بصره
نحو آياز :

-لأ شوفها انت براحتك ، أنا يدوب ألحق أرجع

المعرض

-انت مش ناوي تساعدني ؟

عبس رامي بوجهه قليلاً ، ومط فمه في ضيق

:

-المساعد ربنا ، وبعدين كفاية اللي حصل

لحد كده ، أنا مش ناقص أتخايق تاني

، أثارت العبارة الأخيرة فضول آياز كثيراً ،

فسأله بإستغراب ب ..:

-تتخايق ؟ هو في حد كلمك على البوابة ؟

لم تتغير تعابير وجه رامي كثيراً ، ولكنه

تحدث بنبرة أقل إنزعاجاً :

-لأ .. ماتخدش في بالك .. سلام بقى يا إيزوو ،

والله يعينك على الوحوش اللي هنا

ابتسم له آياز مجاملاً ، ثم بنبرة رخيمة أردف

ب ..:

-ايوه ادعيلي

-سلام يا كوتش ، أشوفك آخر النهار

-أوكي See ya.. (أراك لاحقاً)

.....

بداخل غرفة الموسيقى ،،،

نظرت جانبيت إلى رانيا باستغراب شديد ،

خاصة وأن الأخيرة قد لجأت لتلك الغرفة

لتختبيء فيها ، وإدعت بالكذب أنها قادمة

لتساعدها في إنجاز عملها في وقت قصير ..

شردت رانيا بعقلها وأثارها الفضول لمعرفة

توابع فعلتها مع ريمان وآياز ، فهي متيقنة

أن الأمر لن يمر مدور الكرام ، خاصة وأن آياز

ليس من النوع الذي يقبل الإهانة بسهولة ،
وكذلك ريمان ..

تسأللت هي في نفسها بفضول زائد ب ..

-طب هايكونوا اتخنقوا مع بعض ولا قطعوا
هدوم بعض ولا عملوا ايه بالظبط؟؟ هاموت
و أعرف اللي حصل بينهم ، يوووه ، ماهو
الاتنين دماغهم جزم ، بس .. بس أنا ماليش
دعوة بالموضوع ، أنا هاعمل نفسي من بنها
، وكأن مافيش حاجة حصلت .. أيوه ، دي
أسلم طريقة عشان محدش يشك فيا .. ربنا
يعديها على خير

مطت جانيت شفتيها لأكثر من مرة ، ثم
تسأللت بجدية ب .. :

-انتي هاتفضلي أعدة كده كتير؟

نظرت لها رانيا ببرود ، ثم بكل فظاظة سألتها

:

-ليه في حاجة ؟

-أنا عاوزة أرتب الأوضة ، وانتي معطلاني ،
وواضح كده إنك هاتفضلي مبلطة في الخط
كتير

لوت رانيا ثغرها في استهزاء ، ثم زمت فمها
وهي تجيبها ب :

-طيب شوية وهاقوم

اغتاظت جانبيت من ردها المستفز ،
فتشذقت ب ... :

-انتني مش قولتي هتساعديني

ارتبكت هي ولم تعرف بماذا تجيبها ،
فحاولت البحث عن كذبة مقنعة ، فخرج
صوتها متلعثماً حينما ردت عليها ب :
-أها .. بس آآ.. أنا .. انا عندي حساسية من
التراب

-بجد ؟

قالتها جانيت وهي تحدجها بنظرات حادة
غير مقتنعة بما تقوله
تنحنت رانيا في حرج زائف، وتجنبت النظر
في عينيها وهي تجيبها بخفوت ب :
-إحم .. آآ.. أيوه

-طب بما إنك تعبانة ، فيا ريت تاخدي سكة
بقي عشان أخلص شغلي ، أنا مش عاوزه
أتأخر بعد مواعيد الدراسة

-طيب

لم تجد رانيا أي يدٍ من المكوث في الغرفة
بعد أن تلاشت كل الحجج ، لذاغ عضت
على شفتها السفلى ونهضت عن المقعد ،
ثم سارت في اتجاه باب الغرفة ولكن أوقفها
عن متابعة السير صوت جانيت الأمر بـ ..

-رجعي الكرسي اللي كنتي أعدة عليه مكانه
، معلش أنا مش بأحب أوضتي تبقى
مفركشة

زفرت رانيا في حنق بعد أن ضيقت عينيها
اللثيمتين قليلاً ، وردت على مضض بـ ..

-أووف ، ماشي

أعادت هي ترتيب المقعد في مكانه ، ثم
خرجت من الغرفة وهي تتمتم بكلمات

ساخطة ، ولكن لم تعبأ بها جانيت ، بل
إبتسمت في رضا وهي تحدث نفسها بـ ..
-بنت باردة ، مش ينفع معاها إلا الاسلوب
المستفزه ده ...!

.....

في غرفة المعلمات بمبنى الرياض ،،،،
تزاحمت الغرفة بالمعلمات اللاتي كن يتحدثن
عن طبيعة يومهن ، ولم تلاحظ إحداهن حالة
الضيق أو الشرود البادية على وجه عاليا ..
إكتفت عاليا بتصنع الابتسام حتى تتجنب
محاصرتها بالأسئلة ..
وفجأة ساد الصمت الرهيب الغرفة حينما
ولج إليها آياز .. حيث حدقن به وتسائلن
بتهامس بينهن عن هويته ..

ابتسم آياز ابتسامة مجاملة للجميع ، وبنبرة
هادئة بدأ حديثه بـ ..

Good afternoon Ladies (مساء الخير
سيداتي) ، أنا آياز الشناوي .. زميلكم الجديد
في الكي جي

تابع آياز ردود الفعل الصادمة على تعابير
أوجههن ، فبادرت حنان بـ :

-أهلا وسهلا بيك معنا ، وإن شاء الله تكون
سنة دراسية مثمرة

ابتسمت له ميادة ابتسامة مجاملة قبل أن
تنطق بـ ..

-إن شاء الله يعجبك الشغل في الكي جي

-ايوه ، هو في زي الكي جي وجماله

قالتها هبة وهي تنظر في اتجاه آياز بنظرات

مطولة

نظرت له ليلة بعينين متفحصتين قبل أن

ترد عليه بـ ..

-أهلا بيك معنا-

تحمست سارة كثيراً حينما أردفت جملتها

بـ ..

-بص إحنا كلنا هنا اخواتك ، ولو عوزت أي

حاجة إن شاء الله مش هنتأخر عليك

هز آياز رأسه موافقاً على ردودهن ، ولم

يعقب وبحث بعينه عن ريمان فوجدها

تتحاشى النظر إليه ، فلوى فمه في سخط ،

ونظر لها شزراً ، ثم اتجه صوب الصندوق

الكرتوني وجمع أشياءه ، وبكل برود تحدث بـ

١..

-شكراً على كلامكم ده ، وأتمنى إن يكون في
حدود للتعامل بينا ، لأن أنا مجرد زميل هنا
وبس ٢!

.....

واصل قراءة الجزء التالي

الفصل الحادي عشر

الفصل الحادي عشر:

لم يتوقف برنامج (الواتس آب) عن تلقي
إشعارات بوجود محادثات كثيرة ، وتعابير
رمزية بلا حصر ، فما قاله آياز اليوم في
المدرسة كان محور الإهتمام ..

تباينت ردود الأفعال حول رده الصادم
والصارم في آن واحد ...

-هنا : ((أنا ماشوفتش اللي حصل))

-جانيت : ((ما إنتي مكوتيش موجودة))

-سارة : ((المشكلة أنا اللي كنت بكلمه ،
والاحراج كله ليا))

-عاليا : ((أحسن حاجة نخليها في حالنا ،
ونبعد عنه وعن اللي زيه))

-هنا : ((اكيد هيحتاج لواحدة مننا ، وإحنا
هنوريه الوش الخشب))

-ميادة : ((فعلا ، ده هو وقع في إيد من لا
يرحم))

-منة : ((هو متنطط على إيه ، ده في زيه أد
كده))

-ميادة : ((بالظبط))

-سارة : ((أومال فين بقية البنات ؟ محدش
فيهم قال رأيه))

-جانيت : ((ممكن يكونوا مش موجودين))

-هناء : ((أما هيدخلوا على الواتس أكيد
هيقروا الشات))

-أية : ((أنا ماينفعش ماتعملش معاه ، هو
هيبقى في وشي كل يوم))

-منة : ((صدري بس الوش الجبس وهو
هيعرف إن الله حق))

-أية : ((إن شاء الله)) ٣

ظل الوضع هكذا في المحادثة الجماعية بين
الفتيات لبعض الوقت ، وانتقلوا لمواضيع
أخرى للحديث عنها ..

وعلى الجانب الآخر ، إتصلت ليلة بـ (ريمان
(لتطمئن على أحوالها و..

-بجد بنت مستفزة ، أنا مش طايقاها خالص

قالتها ريمان بنبرة منزعجة ، وهي تحاول
وضع الطلاء على أظافر قدمها ..

زمت ليلة شفيتها قليلاً ، وقالت بحماس :

-كبري دماغك منها ، وخلينا نشوف هنعمل
ايه مع فلاتينو الكي جي

-ده بني آدم قليل الذوق ، مفكر إن أنا اللي
بوظتله حاجته

-معلش ، أي حد كان في مكانه هيفكر كده
تركت ريمان فرشاة الطلاء ، وضيق عينيها ،
ثم قالت بإنفعال :

-إنتي معايا ولا معاه

-لا معاكي ولا معاه ، بس هو الموقف بيقول

إن آآآ...

-خلاص خلاص قفلي على السيرة دي ،

وخلينا نشوف هانلبس ايه بكرة

زفرت ليلة في ضيق ، ثم تشدقت بـ :

-أووف ، شوفتي أبلتك إعتمادهاتعمل فينا

ايه ؟

لوت هي شفيتها في امتعاض ، وتساءلت

بإحباط بـ :

-إيه تاني؟

أخذت ليلة نفساً مطولاً ، وزفرته على مهل ،

ثم أردفت بـ :

-هي عاوزانا نلبس شبه بتوع مصر سرفيس

(شركة النظافة)

ضيقت ريمان عينيها ، وعقدت ما بين
حاجبيها في استغراب ، وقالت بدهشة :

-نعم ، أنا مش فاهمة!

-يعني هي عاوزانا نلبس تي شيرت أورانج
خامته رديئة جداً ، ومعاها كاب كحلي باين

أخرجت ريمان لسانها في تأفف ، وإكفهر
وجهها بإشمئزاز واضح ، وتحدثت على
مضض بـ:

-إيه القرف ده

لوت ليلة فمها للجانب ، ثم قالت متهكمة :

-بتقولك نيو لوك

-ده نيو زفت على دماغها

قالتها ريمان بضيق جلي ، ثم نهضت عن
الفراش ، وإتجهت ناحية خزانة ملابسها
لتنتقي ما سترتيديه في الغد ..

في حين ضحكت ليلة لبعض الوقت ، ثم
تابعت بثقة بـ :

-أنا مش هالبس اللي هي بتقول عليه ده
-ولا أنا كمان

-أوكي ، هانشوف باقي البنات هايقولوا ايه
أسندت ريمان الفستان الأصفر ذي
الحمالات العريضة ، والتنورة المطبوع عليها
رسومات طفولية على المقعد المواجه
لمكتبها ، وأومات برأسها وهي تجيبها بـ :

-تمام .. بس احنا مش هنخليها هتهزقنا عل
آخر الزمن وتخلي منظرنا مش حلو قصاد
الأهالي ولا الأطفال

-متفقين

.....

في فيلا سرحان عليه ،،

في غرفة آياز ،،

إستند رامي بظهره على طرف الفراش ،
وأمسك بهاتفه المحمول بين يديه ، وظل
يمارس أحد تطبيقات الألعاب ..

في حين إستغرق آياز وقتاً طويلاً في الانتهاء
من إعداد خطة الدراسة ، وتحضير بعض
الدروس الخاصة بمنهجه الدراسي ...

شعر رامي بعد برهة بالملل ، فأغلق هاتفه ،
وألقاه إلى جواره ، ونظر في اتجاه إبن خالته
بإستغراب ..

كان الأخير يحاول تصميم برنامجاً ما
لتسهيل شرح بعض المفردات اللغوية
بطريقة مصورة ، وتناسى تماماً وجود رامي
.. فأمسك هو بالوسادة وألقاها على رأس
آياز ، فإنتبه له بعد ان تأوه من الألم ، وقال
بإندهاش :

-أوتش .. ايه يا بني ، في ايه ؟

ثم وضع يده على رأسه ليحكها ، في حين
نظر له رامي شزراً ، وقال بإمتعاض :

-هاتنجز اللي بتعمله ده امتى ، أنا زهقت !

-شوية

أشار له بيده ، ثم قال متهكماً وهو ينظر له :

-ده انت بقالك ساعة أعد على البتاع ده ، إيه
يا عم ، تكونش بتخترع الذرة وأنا معرفش

ابتسم آياز له إبتسامة مجاملة ، وأجابه بهدوء

:

-لأ ده شغلي

-طب يالا ، بدل ما أقوم وأسيبك

ضغط آياز على عدة أزرار ، ونهض عن
المقعد ، ثم تسائل وهو مسلط أنظاره على
شاشة حاسوبه المحمول بـ :

-إنت رايح فين أصلاً؟

-كان عندي (Race) ريس النهاردة ، وكنت
عاوزك معايا

قطب آياز ما بين حاجبيه ، ونظر إليه
باندهاش وهو يسأله بـ :

-انت لسه بتشارك في السباقات ؟

ابتسم له رامي بغرور ، ونفخ صدره في ثقة ،

ثم قال بكل فخر :

-هو أنا بطلت أصلاً

ثم أخفض نبرة صوته قليلاً ، وتابع بـ :

-بس محدش يعرف أي حاجة عن الموضوع

ده ، ده سر بيني وبينك

مط آياز شفتيه ، وعقد ساعديه أمام صدره ،

ثم تحدث بـ :

-مممممم ، اوكي

-إنت عارف خالتك مش هاتسيبني لو عرفت

باللي بأعمله ، ده غير أبويا ، الاسطوانة بتاعة

كل يوم ، وأنا مش ناقص وجع دماغ لو حد

عرف بده

-أها.. Don't worry3..

-المهم ، إنت جاي معايا ولا لأ ؟

-جاي ..

ظهرت إبتسامة عريضة من بين أسنانه ، ثم

قال بحماس جلي :

-اشطا عليك يا برنس ، أيوه بقى ، ده أنا

هابهرك

.....

أبعدت ورده أذنها عن الباب ، وعضت على

شفتها السفلى الغليظة ، وهزت رأسها عدة

مرات ، ثم قالت بمكر :

-يا وجعة سودة ، بيعمل حاجة اسمها أبصر

ايه (رست) (بست) والنبي ما أنا فاكرة ،

يا حظك الحلو يا ورده ، كده أنا أقدر أذله بيها

لو موجفش معايا وخلي سي إزاز يتعلج بيا

ع..

ثم برزت في عينيها لمحة شيطانية ، وتابعت

بتلهف بـ :

-بركاتك يا شيخ مبروووك ، البشائر هلت

أهي...!!!! ٣

.....

في منزل عاليا راشد ،،،

إنتهت عاليا من إرتداء فستان السواريه
الأسود - ذي الرقبة العالية ، والأكمام
الواسعة ، والذيل الطويل - ونظرت إلى
هيئتها في المرآة، وقامت بتثبيت حجابها
بدبابيس فضية لامعة ، وإنحنت بجسدها
للأمام قليلاً لترتدي حذائها ذي الكعب
العالى .. وقامت بوضع ملمع الشفاه ،
وعضت على شفثيها لتتأكد من إنتشاره
عليهما ...

رن هاتفها المحمول ، فأسرعت ناحية
الفراش ، وإلتقطته بأصابعها ، ووضعتة على
أذنها ، وابتعلت ريقها ، وأجابت بتلهف بـ :

-أيوه يا طنط ، أنا لبست خلاص

ثم حاولت أن تجمع أشياءها المتناثرة في
أرجاء غرفتها ، وتابعت بـ :

-أوكي ، هاخذ تاكسي وأحصلكم على هناك
، بس متتأخروش عليا المشوار بعيد وكده ..
ثم زمت شفيتها للأمام بعد أنعلقت حقيبة
يدها الصغيرة على كتفها ، وأكملت بجدية
بـ :

-مممم.. تمام ، يعني هي الكوافيرة خلصت
معها ، خلاص ماشي .. أنا على العموم نازلة
أهوو ، أوكي .. باي !

إنهت هي المكالمة معها ، ووضعت الهاتف
في حقيبتها بعد أن نظرت إلى شاشته ، ثم
قالت بتذمر :

-أوف نسيت أشحن موبايلي ، ربنا يستر
ومايفصلش مني

وإتجهت بعدها ناحية باب غرفتها ، وولجت
للخارج ...

.....

في كافييه ما بأحد المولات ،،،،

أمسكت رانيا بقائمة المشروبات لتنتقي ما
تريده منها ، فنظرت لها نشوى الجالسة إلى
جوارها بإندهاش ، وأسندت ذقنها على
مرفقها ، وتشدقت بـ :

-بجد إنتي جايبة البرود ده كله منين ، ده أنا
لو مكانك بعد اللي حصل ماوريش وشي
لحد

-عادي ، إنتي عارفة إنه مش بيفرق معايا
-ده أنا كنت هاموت في جلدي لما لاقيت
ريمان وشلتها جايين عليا وبيدوروا عليكي
مطت رانيا شفيتها في عدم إكتراث ، وقالت
بفتور :

-سيبك منهم ، دول شلة بايخة أصلاً ، وأنا
مش بأطيقهم

ضيقت نشوى عينيها ، وأردفت محذرة بـ :
-بس لو هما حطوكي في دماغهم مش
هتخلصي منهم

-أووف بقى ، أنا زهقت

-يا روني أنا خايفة عليكى

-إنسيهم ، وخلينا نشوف هانشرب ايه

لوت نشوى شفيتها في عدم إقتناع ، ونظرت

إلى قائمة المشروبات وقالت بفتور :

-ماشي

.....

بداخل إحدى سيارات الأجرة ،،،

نظرت عاليا إلى صورتها المنعكسة على

الكاميرا لتتأكد من هيئتها المرتبة ، ثم حولت

بصرها ناحية السائق وطلبت منه بتلهف :

-بسرعة يا أسطى الله يكرمك ، لأحسن أنا

متأخرة أوي

نظر لها السائق من طرف عينه عبر المرآة

الأمامية ، وأجابها بصوت أجش ب :

-ما إنتي شايفة يا مدام السكة عاملة إزاي
رمقته هي بنظرات محتقنة قبل أن تتابع
بغيط ب :

-مدام !!!!

تجاهلها السائق عن عمد وسلط بصره على
الطريق ، فغمغمت هي بخفوت لنفسها ب :

-سواقين آخر زمن ، أل مدام أل ...!

.....

بداخل سيارة رامي عليه ،،،،

أمسك رامي بالمقود بيد واحدة ، وباليد
الأخرى حاول تشغيل المسجل الموجود
على (تابلوه) السيارة

في حين كان آياز مشغول بإرسال رسائل
نصية إلى والدته بالخارج ، ثم نطق ب :

-رامي حبيبي ، معلش نزلني عند بنك (

.....) عاوز أسحب فلوس بالفيزا

-ماشي ، بس حاول تنجز عشان أنا كده

هتأخر على ال (Race) ، وإنت عارفني

مواعيدي (شارب) Sharp

ابتسم له آياز نصف إبتسامة ، وأضاف مازحاً

:

-ماشي يا عم شارب ، أوقف هنا ، في ركنة

أهي

-أوكي

وبالفعل صف رامي سيارته بالقرب من أحد

البنوك ، وترجل آياز منها ، وإتجه لماكيننة

الصراف الآلي ...

ظل رامي يطرق بأصابعه على المقود وهو

يوزع بصره ما بين الطريق وبين ابن خالته ..

عاد آياز بعد لحظات ووجهه شبه منزعج ،

وأطل برأسه من نافذة السيارة وأردف بـ :

-رامي معلش روح إنت السباق بتاعك لأن

الظاهر في مشكلة في كارت الفيزا ، وأنا كده

هأخرك معايا

نظر له رامي بإستغراب وهو يرفع أحد

حاجبيه ، وتسائل بجدية بـ :

-مشكلة إيه دي ؟

زفر آياز في ضيق ، ثم أجابه بـ :

-بيقولي العملية لا تصلح ،error. وكلام من

النوع ده

-ممممم

-فأنا داخل خدمة العملاء جوا ، هاشوف

هأعمل إيه معاهم

إزداد إنعقاد ما بين حاجبيه ، وأضاف بثقة :

-بس اللي أعرفه إن البنك مش شغال
بالليل

-لأ شغال ، موظف الSecurity قالي إن
موظفين خدمة العملاء موجودين

-ماشي براحتك

زم آياز شفتيه للأمام ، وقال بنبرة آسفة :

-سوري رامي ، كنت حابب أبقى معاك

-ولا يهمك يا معلم ، تتعوض إن شاء الله

-لو خلصت بدري هاجيلك

-ماتشغلش بالك إنت بيا ، خلص اللي وراك
وطمني

ابتسم له آياز بإمتنان ، ولوح له بيده قائلاً :

-تمام .. باي يا رامى

-سلام يا برنس

قالها رامى وهو يدير محرك السيارة لبدأ
التحرك بعيداً عن ابن خالته ...

كان الزحام شديداً ، فلجأ هو إلى طريق
جانبي مختصر ليصل إلى وجهته دون أي
تأخير ...

.....

بداخل سيارة الأجرة ،،،

قاد السائق بسرعة عالية على أحد الطرق
الفرعية والخالية كي يتمكن من إيصال
زبونه إلى وجهتها في الميعاد المناسب ...
ولكنه أثناء قيادته لها شعر بأن محركها به
خطب ما ، فهو يصدر زمجرة غريبة ، ولمح

بودار دخان أبيض ينبعث من أسفل الغطاء
الأمامي ، فأوقف السيارة بجوار أحد الأرصفة
، فإنتبهت عاليا لما يحدث ، وضيق عينيها
في حيرة ، ثم تسائلت بإستغراب بـ :

-إنت وقفت ليه يا أسطى ؟

-ثواني كده يا مُدام ، العربية باين فيها حاجة

-يعني هتتأخر ؟

-أشوف بس الكابوت الأول ، وبعدين نتكلم

زمت هي شفتيها ، وقالت على مضمض :

-ماشي .. أديني مستنية

ترجل السائق من السيارة ، وإتجه ناحية
غطائها ليكشف عن المحرك ، بينما أخرجت
عاليا المرأة الصغيرة من حقيبتها ، وأخذت

تعديل من وضعية الكحل بعينيها الواسعتين

..

تمتم السائق بكلمات غاضبة ، ووضع يده
على رأسه وحكها بقوة ، وظل ينظر حوله
بريبة ، ثم سار في اتجاه الباب الخلفي ،
ومال للأمام بجذعه ، وأسند كف يده على
النافذة الخلفية ، وأردف بنبرة منزعجة بـ :

-معلش بقى يا مدام ، حاولي تشوفي تاكسي
تاني لأحسن العربية خربت

لوت عاليا ثغرها ، ونظرت إليه بإندهاش
وهي تتسائل بضيق بـ :

-ايه ؟ تاكسي تاني ؟ ليه ؟؟ في ايه اللي
حصل ؟؟؟

هرش السائق في رأسه ، ونظر إلى الجانب ،
وتذمر قائلاً :

-الماتور سخن وباين عليها ليلة غبرة

لوحث عاليا بيدها ثم أضافت بإصرار :

-طب وأنا ذنبي ايه ، وصلني الأول وبعدين

شوف اللي حصل لعريبتك

حدجها السائق بنظرات مغتظة قبل أن

يصيح منفعلًا :

-يا مدام بأقولك الماتور متنيل على عينه ،

والعربية مش هاتدور في سنتها ، وإنتي

تقوليلي أوصلك

-الله مش أنا دفعالك فلوس ، ولا راكبة

ببلاش

إكفهر وجه السائق أكثر ، ورمقها بنظرات

شراسة قبل أن ينفعل وهو يشير بيده بـ :

-يا ستي خدي فلوسك ، العربية بركت
قدامك أهى

أخفضت عاليا رأسها ، وحدثت نفسها
بخفوت وهى تضع حقيبتها على كتفها ب :

-يادي القرف ، هو أنا ناقصة عطلة

ثم فتحت باب السيارة ، وترجلت هي الأخرى
منها ، ورفعت ذيل فستانها الذي إلتف حول
كعب حذاءها ، وسارت بضعة خطوات على
جانب الطريق باحثة عن سيارة أجرة

ولكن كان الطريق أمامها شبه خالي من
السيارات - سواء الملاكي أو الأجرة -
فجابت ببصرها المكان ، وقالت متبرمة :

-ده الشارع (خرمز) ((مظلم)) على الآخر ،
هلاقي مين بس اللي هايعبرني السعادي

.....

في نفس التوقيت مر رامي بسيارته في ذلك
الطريق الفرعي ، ولمح إحدى الفتيات من
على بعد - وذلك بسبب إنعكاس الإضاءة
على فصوص فستانها اللامع - وهي تحاول
الإشارة بذراعها لسيارة أجرة ، ولكن ما من
مجيب لها ..

فلم يكثرث بها ، وحدث نفسه بـ :

ده مين الأهل اللي هايقف لواحدة في
الشارع المقطوع ده

ثم مر على مقربة منها ، وتعمد تشغيل
إضاءة مصابيح السيارة الأمامية في وجهها ،
فغطت عينيها كي تتجنب الإضاءة الشديدة ،
وهدرت هي بصوت مرتفع بـ :

-خلاص يا عم إنت ، أنا إتعميت ، كانت
نقصاك إنت كمان

ساورت الشكوك رامي حول ماهية ذلك
الصوت المألوف بالنسبة له ، فأمعن النظر
في ملامحها من المرأة الأمامية ، وصاح
مشدوهاً بـ :

-مش معقول ، إنتي برضوه

!!

.....

واصل قراءة الجزء التالي

الفصل الثاني عشر

الفصل الثاني عشر :

لم يصدق رامى عينيه حينما رأى تلك
الشابة - الدائم الصدام معها - تقف على
جانب الطريق وتشير لسيارة الأجرة ..

أوقف هو سيارته ، وإلتفت برأسه للخلف
ليتأكد من صحة ما رآه ، وبالفعل كانت هي
بعنجهيتها وكبرياتها الزائد تقف مستقيمة
الجسد ، وتهز إحدى ساقها بعصبية ،
وعاقدة لساعديها أمام صدرها .. ويتدلى من
كتفها حقيبتها الصغيرة .. وعلى بعد عدة
أمتار منها ، كانت هناك سيارة أجرة ،
مفتوحة الغطاء الأمامي ، ومنحني عليها
سائقها ..

أدار هو محرك السيارة ، ثم عاود أدراجه بها
للخلف إلى أن وقف بجوار عالي ، ورسم على
وجهه إبتسامة بلهاء ، ثم أنزل زجاج النافذة
الأمامية ، ونظر لها متفحصاً إياها ، وأردف بـ :

-إمتى ربنا يتوب علينا من لسانك ده
إرتسمت علامات الدهشة على قسمت
وجهها ، وضيقت عينيها لتنظر إلى ذاك
الغريب الذي يحدثها بوقاحة ، وفغرت ثغرها
في ذهول حينما عرفته على الفور ..
استمر رامى في الإبتسام لها ، وتابع بسخرية
ب :

-إبقى قابلينى لو حد عبرك
إحتقن وجهها سريعاً بالدماء الغاضبة ،
وإزدادت حمرة وجنيها ، وصرت على أسنانها
وهي ترد عليه بإنفعال ب :

-وإنت مالك إنت ؟ حد طلب منك حاجة
ثم أشاحت بيدها في الهواء وهي تنذره
بعصبية ب :

- وإتفضل بقى من هنا بدل ما أطول لساني

أكثر عليك

- يعني أنا غلطان إني وقفلك أشوف مالك

!؟

حدجته هي بنظراتها الحادة ، وهي تجيبه

بصرامة ب :

-ميخصكش

-تصدقي بالله ، أحسن حاجة إن الواحد

يسيبك في الشارع المقطوع ده لوحده ،

سلام

لوت هي شفتيها في عدم إكتراث ، وأجابته

بنزق ب :

-ياللا بالسلامة

إغتاز رامي من ردها الفظ عليه ، فأدار
محرك سيارته ، وتحرك بها مبتعداً عدة
أمتار للأمام ، ولكنه شعر بتأنيب الضمير ،
وبالحيرة في أمره ، فهو عادة لا يتصرف بمثل
تلك الطريقة مع أي فتاة ، ولكن الحال مع
تلك الشابة مختلف تماماً ...

زفر هو في ضيق ، وحدث نفسه بعتاب د :

-حتى لو هي متنيلة على عين اللي جابوها ،
مايصحش برضوه أسيبها في الحتة دي ،
افرض حد طلع عليها ولا حصلها حاجة ،
اشيل أنا ذنبها

.....

كانت عاليا عابسة الوجه وهي تتابع إبتعاد
رامي عنها ، فزمت شفيتها في ضيق ،
وحدثت نفسها بنرفزة د :

-إنسان بارد معندوش دم ، جاي بس عشان
يتدريق عليا ويخرجني عن شعوري .. اليوم
قفل بوشه الصراحة !!!

أدارت رأسها للجانبين من أجل متابعة حركة
سير السيارات ، ولكن كان الطريق شبه خالي
من المارة وكذلك من سيارات الأجرة ..
فتنهدت في إرهاق ، وتابعت بحنق ب :

-أعوذو بالله ، مافيش بني آدم يوحد ربنا هنا

.....

تراجع رامي بالسيارة للخلف ، وأوقفها على
مقربة من عاليا ، ثم حدثها بصوت جاف ب :

-تعالى إركبى

زفرت هي بصوت مرتفع ، وأشاحت بوجهها
بعيداً عنه ، فضرب هو على بوق السيارة
لتنبيه له ، وأعاد تكرار جملته الأخيرة

بصرامة ، فرمقته هي بنظرات جادة قبل أن
تصيح بحزم :

-في ايه ؟ ما تمشي بقى ، هو إنت إيبىيه
لازقة ...!

-يا ستي لا لازقة ولا غيره ، أنا بس هاطلعك
على أول الشارع وبعد كده إنزلي
زمت شفتيها أكثر ، وقطبت جبينها ،
وإستدارت برأسها لجانب الطريق ، ونطقت
بجدية ب :

-متشكرة ، مش عاوزه منك حاجة
تنهدت رامي في إنهاك ، وأخفض رأسه في
يأس ، ثم حدث نفسه بخفوت ب :

-باين عليها مش هاتجيبها لبر ، دماغها
ناشفة طحن

أخذ هو نفساً مطولاً ، وزفره على مهل ،

وقال بهدوء حذر :

-ماينفعش تقفي في الحثة المقطوعة دي

لوحدك

-والله ده شيء يخصني

قالتها عاليا بحدة وهي تسير مبتعدة للخلف

، ولكنها تعثرت في ذيل فستانها ، فإلتفت

ساقياها على بعضهما البعض ، وسقطت

على وجهها وهي تحاول السير ..

-آآآآآه

إندفع رامي خارج سيارته حينما رآها تسقط

، وركض في اتجاهها ..

كانت هي مستندة بكفيها على الأرضية

الإسفلتية ، وتحاول حل ذيل الفستان من

كعب الحذاء ، فمد يده ناحيتها ليساعدها ،

ولكنها إنتفضت فزعة منه ، وأشارت بكفها
في وجهه ، ونهرته بحدة وهي تنظر له بحنق
ب :

-إياك تلمسني ، هاصوت وألم عليك الناس
-ألمسك ايه بس ، ده أنا جاي أساعدك بس
، مافيش في غرضي حاجة
لم تهتم هي بما قاله ، بل أضافت بنفس
النبرة الحانقة :

-كلكم ما بتصدقوا ، فرصة وتستغلوها
إستشاطر هو غيظاً ، ولوح بذراعيه في الهواء
أمامها ، وأردف بنبرة منزعجة ب :
-يا شيخة حرام عليكي ، أنا كل ما أنوي خير
معاكي تقلمي على طول

تمكنت عاليا من النهوض ، وضربت كفيها
ببعضهما البعض لتنظفهما ، ثم إنحنت
للأمام بجسدها لتنفض عن فستانها الغبار
العالق به ، وقالت له بإندفاع :

-عشان الرجالة اللي زيك كدايين

-استغفر الله العظيم ، برضوه بتغلطي فيا ،
وأنا ساكتلك أهوو

نظرت هي له بنظرات غير مبالية ، وقالت
بتحدي :

-ولا تقدر تعمل حاجة

أخذ هو نفساً عميقاً ، ونفخه بضيق جلي ،
ثم صر على أسنانه وهو يخبرها بسخط ب :

-لا هأعمل ولا أنيل ، تعالي أوصلك على أول
الشارع وبعد كده انتي من سكة وأنا من

سكة

وضعت هي يدها في منتصف خصرها ،
ونظرت له شزراً وهي تلوي فمها ثم هتفت
بغلظة :

-ليه إن شاء الله؟؟؟

حدثها رامي بإستياء وهو يضرب كفيه
ببعضهما البعض د :

-طب قوليلي أتصرف إزاي بالطريقة اللي
ترضيكي ، أنا جالي إحباط من إسلوبك ده
زفرت هي لأكثر من مرة ، ووضعت إصبعيها
على طرف ذقنها لتفكر فيما قاله لها..

بينما راقبها هو بنظرات متفرسة دارسة كل
تفصيلة فيها .. وحدث نفسه بخفوت شديد
د :

-معرفش إيه اللي فيكي غريب عن بقية
البنات العدلة !!

أدارت عاليا رأسها في اتجاهه ، ولاحظت تلك
النظرات الغريبة التي رمقها بها ، فتنحنت
بصوت قوي ، وحدجته بنظرات محذرة ، ثم
قالت بصوت جاد وهي تشير بيدها أمام
وجهه :

-إيبييه ، عينك !

إبتسم هو لها إبتسامة سخيفة ، وأخفض
عينيه عنها ، وقال بصوت خشن :

-إحم ، سوري .. ها قولتي إيه ؟

نفخت هي في ضيق ، ثم قالت بإستسلام :

-ماشى ، أنا موافقة

تنهد هو بصوت مسموع في إرتياح ، ثم أردف
متحمساً بـ :

-أخيراً .. الحمدلله يا رب

أشارت هي بإصبعها محذرة قبل أن تتحرك

في اتجاه السيارة بـ:

-بس تقعد محترم ، مش عاوزه قلة أدب ا

رمقها هو بنظرات مستغربة ، وقال مازحاً

وهو يضع كفيه على بطنه :

-يا ستي هاربط الحزام وأشده أوي على

بطني ..!

لوت هي ثغرها للجانب في إستهزاء منه ، ثم

أردفت ساخرة وهي ترمقه بنظرات جامدة

بـ:

-هه .. خفة !!!

تحرك كلاهما في إتجاه السيارة ، وأسرع رامي

بالإمساك بالمقبض ليفتح لها الباب ،

فنظرت هي له بنظرات مستفزة ، فبادلها هو

النظرات الدافئة ، وأشار لها بعينيه وهو
يتابع ب :

-أفضلي يا ست الكل ..!١

-طب بص على أدك !

قالتها عاليا محذرة بشراسة وهي تركب
السيارة وتجمع ذيل فستانها للداخل ..

أغلق رامي الباب خلفها ، ثم نطق متهكماً
بخفوت ب :

-أبص على أدي .. لا إله إلا الله ، أنا

ماشوفتش كده في حياتي ...!١

.....

بالقرب من الكافيه ،،،،

خرجت رانيا وبصحبتها نشوى من الكافيه
بعد أن إنتهيتا من تناول المشروبات بداخله ،

ولكن تسمرت الأولى في مكانها ، وأسرعت
بإمساك نشوى من مرفقها، وأردفت بتلهف

د :

-إستني يا نوشا ...!

إرتسمت علامات الحيرة على وجه نشوى ،
ونظرت إليها بتعجب ، ورفعت حاجبيها في
استغراب ، ثم تسائلت بجدية مفرطة د :

-في ايه يا رانيا ؟ خضتيني

أشارت رانيا بعينيها إلى مكان ما وهي تقول

بحماس جلي :

-بصي هناك كده ، شايفة اللي أنا شايفاه

-أنا مش شايفة حاجة

عضت رانيا على شفيتها من الغيظ ، ونظرت
إلى رفيقتها بسخط ، وأردفت بصوت شبه
منفعل بـ :

-يا بنتي إنتي اتعميتي ، مش ده آياز
جابت نشوى ببصرها المكان ، وحاولت أن
تبحث عنه وهي تنطق بجموح بـ :

-آياز !! فينه ؟

أشارت لها رانيا برأسها حيث يتواجد ،
وتشدقت بـ :

-هناك أهوو

نظرت نشوى حولها بحيرة ، وأردفت يائسة
بـ :

-أنا مش شايفة حاجة

أمسكت رانيا برأس رفيقتها ، ووجهتها حيث
تنظر ، ثم قالت بحسم :

-يا بت قدامك أهوو ، قاعد جوا البنك

حدقت نشوى في آياز الذي كان ممسكاً
بمجلة ما بيده ، ثم هتفت بنبرة والهة بـ :

-آآه صحيح

صمتت كلتاهما للحظات لتراقبا إياه ، ثم
إلتفت نشوى برأسها نحو رانيا ، ونظرت إليها
بتمعن ، وقالت بنبرة ماكرة :

-يخربيتك عينيكى ، انتى عرفتى تشوفيه
إزاي ؟

حدجتها رانيا بنظرات محتقنة ، ثم سلطت
عينها على آياز ، وقالت بسخط :

-الله أكبر عليكى

ثم ضيقت عينيها أكثر لتنبعث منهما

نظرات لثيمة ، وأضافت بمكر ووعيد :

-هو أنا هاسيبه يفلت من إيدي ، ده أنا وراه

والزمن طويل !!! ١

.....

واصل قراءة الجزء التالي

الفصل الثالث عشر

الفصل الثالث عشر:

هبت نسمة صيف هادئة لتلفح وجنتي رانيا

التي سريعاً ما إتهبتا لتحمسها لرؤية آياز ..

وتبدلت ملامح وجهها للإشراق والتفاؤل ،

وبدأت خيالات وردية تراودها عن حفل خطبة

قريب ، وإرتداء خاتم مميز في إصبع يدها
الأيمن ، فأطلقت تنهيدات حارة و خافتة ...

في حين نظرت نشوى إليها بإستغراب شديد
، ورفعت حاجبيها للأعلى ، واستمرت في
رمقها بتلك النظرات المطولة والمتعجبة ،
ثم زمت شفيتها للأمام وهتفت بجدية بـ :

-طب يالا بينا لأحسن الوقت إتأخر

نظرت رانيا إليها خافضة بصرها قليلاً ، ثم
إرتسم على وجهها تعابير مغترة وواثقة قبل
أن تجيبها ببرود مصطنع بـ :

-مش قبل ما أسلم عليه واعرفه إن أنا
شوفته

هزت نشوى رأسها رافضة ما قالته رفيقتها ،
ثم إندفعت قائلة بتخوف :

-يا بنتي إنتي مش ناوية تجيبها لبر

لوت شفيتها في كبرياء ، وأردفت بجموح :

-لأ يا نوشا ... مع المзде لأ طبعاً

ثم تحركت بكل ثقة في اتجاه البنك القابع
على الطريق المقابل ، وحاولت نشوى أن
تلحق بها وهي تهتف عالياً بـ :

-يا مجنونة استني ، يالهوي عليكى ، هتودينا
في داهية

لم تهتم رانيا بهاتفات نشوى لها ، فعقلها قد
أملى عليها ما ستفعله ، وبالفعل أخذت
نفساً طويلاً ، وزفرته في غرور زائد ، ثم حدثت
نفسها بنبرة واثقة للغاية بـ :

-ولو حتى مليون داهية ، مش هاسيبه يفلت
من إيدي ، ده لقطه

نظرت إلى جانبي الطريق وهي تعبره
بخطواتها الراكضة ، ولم تعبأ بأبواق

السيارات ولا بصيحات قائديها المتذمرين ،
ولا حتى بنعتها بالغباء والحمق .. بل
إستمريت في إختراق الشارع بإصرار .. ثم
توقفت لتلتقط أنفاسها على مقربة من
بوابة البنك ..

لحقت بها نشوى التي بدت علامات الذعر
جلية على وجهها ، ثم توقفت هي الأخرى
إلى جوارها ، وأسندت كف يدها على ظهرها ،
وقالت بصوت متقطع :

-منك لله يا شيخة ، قطعتي نفسي ،
وخليتنا ملطشة لكل السواقين

اعتدلت رانيا في وقفها بعد أن كانت منحنية
للأمام ، ثم أردفت بعزم واضح بـ :

-أوووف .. مش مهم !

راقبت هي إيماءاتها ، وحاولت أن تستشف
ما الذي تريد فعله ، ولكن لم يزد هذا إلا من
حيرتها ، فقد كانت نظرات رانيا تشير إلى
عقدها النية على فعل أمر ما ، فابتلعت
نشوى ريقها في توتر ، وتساءلت بتوجس بـ :

-ناوية تعلمي فينا إيه بعد كده ؟

ظهر شبح إبتسامة مراوغة من بين أسنان
رانيا ، وأردفت بهدوء يسبق العاصفة بـ :

-إصبري بس أما المز يخرج من جوا ، وبعد
كده هاشوف هاعمل ايه

هنا أدركت نشوى خطورة الموقف الذي
سيتوجب عليها مواجهته ، فنظرت حولها
بنظرات زائغة ، ثم أضافت بخفوت حرج :

-ربنا يستر وماتفضحيناش

.....

بداخل سيارة رامى ،،،

أمسك رامى بالمقود بيد واحدة ، وباليد
الأخرى ظل يعبث فى مشغل الموسيقى
محاوفاً إنتقاء (أغنية) مناسبة ، وفى نفس
الوقت كان يختلس النظرات إلى عاليا
المنكمشة فى مقعدها المجاور له ..

ظهر طيف إبتسامة عذبة ومغتررة من بين
أسنانه ، ثم أخذ يصفر بخفوت بلحن شهير ،
ويدندن بكلمات غير واضحة ..

كانت عاليا تحاول النظر إليه من طرف عينها
- بالرغم من تسليطها النظر لجانب الطريق
البارز من نافذتها المجاورة - فالفضول
يقتلها لمعرفة ما الذى يفعله ..

ظلت تفرك أصابع يدها المتشبثة بحقيبتها
فى توتر واضح .. وكانت بين الحين والأخر

تتنحى بصوت خافض محاولاً بل حلقها
الذي جف تماماً من الإرتباك ..

لقد خالفت عالياً أحد أهم مبادئها ، وهي
الوثوق بشخص لا تعرفه جيداً ، وإستقلالها
لسيارته دون وعي كاف لمدى خطورة هذا ..

حاولت أن تجد لنفسها المبررات الكافية
لتقنع نفسها بأن ما فعلته كان بدافع
الضرورة وليس تنازلاً عن مبادئها ..

لاحظ رامي حالة الشرود المصحوبة بالجمود
الظاهرة عليها ، فقرر أن يذيب حاجز الثلج
بينهما ، وتحدث بحماس زائد بـ :

-شكلك إندمجتي مع الView (المنظر)

لم تلفت هي إليه ، فرمقها بنظرات
إستغراب من عينيه العسليتين ، ثم وضع

إصبعيه على طرف ذقنه ، وسأل نفسه

بخفوت يحمل التعجب بـ:

-هي طارشة ولا إيه ؟ أعلى صوتي شوية

يمكن تسمع

وبالفعل تنحنح بصوت خشن ، ثم قال بنبرة

مرتفعة :

-إندمجتني مع الفيو

إلتفتت هي برأسها ناحيته ، وحدجته بنظرات

قوية ، ثم هتفت بعصبية وهي تلوح بيدها :

-إيبييه ، في ايه ، بتزقق كده ليه ؟

نظر هو لها بذهول قبل أن يجيبها بحرج بـ:

-إحم .. آآ... افتكرتك مش سمعاني

عقدت هي ساعديها أمام صدرها ، وظلت
تنظر إليه تلك النظرات القوية ، ثم تابعت
بنبرة جادة ب :

-لأ أنا بأسمع كويس-

ثم صمتت للحظة قبل أن تكمل بنبرة تحمل
السخط الواضح :

-ومش طارشة على فكرة-

تنحج رامي في حرج ، ثم رسم إبتسامة بلهاء
على ثغره ، وغمز لها وهو يحدثها بتحمس
ب :

-الله ! ما إنتي حلوة أهوو ومركزة !

أشارت هي له بإصبعها محذرة وهي تنطق
بصرامة ب :

-يا ريت تركز إنت كمان في السكة اللي
قدامك لأحسن أنا جبت أخري وعاوزه أنزل

مط هو شفتيه في إنزعاج ، وحاد ببصره
بعيداً عنها ليتجنب تلك النظرات البراقة
التي تصيبه بشيء لا يفهمه ، ثم حدث
نفسه بنبرة خافتة للغاية بـ :

-لو ممكنش خُلقك ضيق بس ، كان زمان ربنا
عدلهالك

رمقته عاليا بنظرات حادة ، فكلماته الهامسة
تلك تثير حنقها ، فهي واثقة بأنه يتعمد
السخرية منها كعادته ، لذا سألته بوجه
عابس بـ :

-بتقول ايه سمعني كده ؟

-لأ مافيش !

قالها رامي بصرامة زائفة وهو يتسم لها
إبتسامة سخيقة ، فإزداد غيظها ، ونفخت
أمامه .. ولكنه ظل صامت ، يرمقها تلك
النظرات المتفحصة لإيماءاتها وحركاتها
العجيبة..

ثم رن هاتفه المحمول ، فمد يده ليلتقطه
من على التابلوه ، ومن ثم ضغط على زر
الإيجاب ووضع الهاتف على أذنه ، وتحدث
بهدوء بـ :

-باشا ! إزيك .. مميم .. أها .. كله تمام

ثم تابع حديثه على الهاتف بكلمات موجزة
إلى أن أكمل بـ :

-تمام ، تمام ، والله ما إتأخرت ، دي بس
ظروف كده

هز هو رأسه عدة مرات ، ثم هتف بجدية بـ :

-ماشي .. ماشي ، أنا جاي على طول

في نفس التوقيت كانت عاليا تنظر إليه -
وهي مقطبة الجبين - بحيرة ، وإزداد توترها
المشحون حينما أدركت نيته بالذهاب إلى
مكان ما ، فتوجست خيفة ، وأثير في نفسها
عدة تساؤلات ، وكان عاصفة هوجاء قد
هبت في رأسها تواءً :

-هو في ايه ؟ جاي فين أصلاً ؟ يكونش
بيعمل نمرة عليا ؟ أووف ! ده أنا كده أبقى
وقعت في مصيبة ومحدث سمي عليا ، طب
أتصرف إزاي لو كان ناوي آآآ.. لألألاً .. مش
معقول ، يا ربي ، إيه الهبل اللي أنا عملته ده

!!!

أفاقت عاليا من شرودها على صوته وهو

يهتف بـ :

-خلاص ماشي .. استنوني أنا جاي أهوو ، يالا
سلام

أنهى رامي المكالمة ، ثم أسند هاتفه إلى
جوار ناقل الحركة الخاص بالسيارة ، في حين
إرجعت عاليا ظهرها للخلف بعد أن جلست
للجانب قليلاً ، وحدقت فيه بنظرات ضيقة ،
وسألته بجدية بالغة بـ :

-مش إنت قولت هتوصلني لأول الشارع ؟
أدار هو رأسه للجانب قليلاً لينظر لها بنظرات
عادية ، ثم أردف بدبلوماسية واضحة بـ :
-أيوه ، وأنا عند كلامي ، بس أنا اتأخرت على
أصحابي وآآآ..

قاطعته هي بنبرة محتدة ومرتفعة وهي
تشير بكف يدها أمام وجهه بـ :

-يعني انت كنت بتستغفني ؟

بالرغم من شكوكها حول نوايه إلا أنها
صرحت بما يجيش في صدرها دون تردد
لوى رامي فمه في إستنكار صريح ، ثم أجابها
بصوت شبه مصدوم ب :

-اييه ، أستغفلك؟؟

وظل يوزع أنظاره المنزعجة بينها وبين
الطريق محاولاً فهم الدافع الذي جعلها
تتفوه بمثل تلك الحماقات ..

لم تهتم هي بنظراته المتسائلة لها ، بل
أومات برأسها بقوة ، وهتفت بقسوة جلية
ب :

-أيوه ، كون إنك تقول لأصحابك إنك جاي
قبل ما توديني الحتة اللي عاوزاها يبقى انت
كداب وبتشتغلني

اتسعت عيناه في إندهاش غير مسبوق ، ثم
سريعاً ما رمقها بنظرات إستهجان ، وحاول
أن يسيطر على إنفعالاته ، فكور قبضتيه
على مقود السيارة ، وصر على أسنانه وهو
يهتف بنبرة حانقة :

-قولتلك أنا مش كداب ولا بأشتغلك

لم تمهله الفرصة لتبرير موقفه ، بل إندفعت
صارخة فيه بجنون غير معهود :

-لأ كداب ، ومليون كداب ، طول عمر صنف
الرجالة كده ، اللي تديهم بالجزمة يحفوا
وراها ويريلوا عليها ، واللي تعبرهم ما
يصدقوا يتنمردوا عليها ، ويشتغلوها

نظر هو إليها مشدوهاً بكلماتها اللاذعة ، ثم
رد بإنفعال غير مسبوق له :

-اييييه يا بنتي الكلام ده كله ، ده إنتي
تخلي الواحد يندم فعلاً إنه يعمل معروف
معاكي !

رمقته بنظرات إزدراء جعلته يستشيط غضباً
من إسلوبها الفظ معه ، ثم تابعت بوقاحة بـ :

-محدث جبرك على ده

ضرب هو بكف يده على المقود فألمه ،
ورغم هذا هتف بشراسة وهو يحدجها
بنظرات متوعدة بـ :

-تصدي ، أنا كنت ناوي أكمل معروف
معاكي للأخر ، بس الصراحة بقى أنا ناوي
أعمل معاكي السليمة ا

مع آخر كلمة نطقها ، تسللت قشعيرة إلى
خلايا جسدها ، فأصابتها بإرتجافة خفيفة ،
وضغطت على حقيبتها المسنودة على

حجرها بأصابعها المرتعشة ، وسألته بتوتر
شبه ملحوظ :

-أفندم؟؟ قصدك ايه ؟

نظر رامي لها بقسوة ، ثم أجابها بنبرة
شرسة وهو يضغط على شفثيه ، ناظراً
مباشرة في عينيها بعينيه المحتقتين بـ :

-هتعرفي يا عاليا

ثم ضغط بقوة على دواسة البنزين لتنتلق
السيارة بسرعة قصوى ،
و.....!!!

.....

واصل قراءة الجزء التالي

الفصل الرابع عشر

الفصل الرابع عشر :

تسمرت رانيا أمام واجهة البنك الزجاجية
منتظرة خروج آياز من الداخل ..

لم تهتم لتذمرات نشوى الواقفة بجوارها ،
فتفكيرها منصب حالياً على ذلك الوسيم
الذي حاز على تفكيرها ..

فمنذ وطأت قدماه مبنى رياض الأطفال ،
وهي تسعى للفت إنتباهه ، ولكنه للأسف
لم يعاملها إلا بفضافة ..

ولكنها عقدت العزم على ألا تستسلم ..
فمهما فعل معها أو مع غيرها ، فهي من
سيظفر به في النهاية ..

شعرت نشوى بالضجر من وقوفها على
قدميها لأكثر من نصف ساعة ، فتشدد
قائلة :

-يا بنتي إرحمني بقي ، ويالا بينا نروح
البيت ، أنا رجلي وجعتني من الوقفة
زمت رانيا شفتيها للجانب ، ورفعت حاجبها
للأعلى ، وهتفت على ممرض بـ :

-اصبري شوية

ردت عليها رفيقتها بتذمر قائلة وهي تنفخ
في ضيق:

-أصبر إيه بس ، ده شكله هيبات جوا
رمقتها رانيا بنظرات حادة ، ثم أردفت
بإصرار واضح :

-إن شاء الله يقعد سنة ، أنا مش هامشي
غير لما أشوفه وأتكلم معاه !

لوت نشوى شفتيها في إنزعاج ، ورمقتها
بنظرات مغناظة ، ثم قالت بسخط :

-ده إنتي رزلة

هزت رانيا كتفيها في عدم إكتراث ، ثم هتفت
بنبرة غير مبالية بعد أن عقدت ساعديها أمام
صدرها بـ :

-فيا كل العِبر ، بس مش ماشية برضوه !!!!

زفرت نشوى في ضيق ، وتلفتت حولها
وردت عليها بضجر قائلة :

-أوف ، أما أشوف آخرتها إيه

.....

مرت عدة دقائق ، والوضع كما هو عليه ..
حركة خفيفة داخل البنك للعملاء الجالسين
على مقربة من الحائط الزجاجي ..

تسليط آياز لأنظاره على لافتة إلكترونية
يظهر عليها أرقام ترتيب العملاء ..

تحديق رانيا بذلك الوسيم ، والإبتسامة
البلهاء مرسومة على ثغرها ..

زمت نشوى شفيتها في تذمر بعد أن إزداد
شعورها بالملل ، ثم رأت لافتة لأحد محال
البقالة ، فهتفت بحماس وهي تلكز رانيا في
ساعدها :

-روني ، أنا هاروح اجيب حاجة أشربها ،
أجييلك معايا ؟

هزت الأخيرة رأسها في إعتراض ، ثم هتفت
بجدية :

-لأ ، خليكى واقفة معايا

أشارت نشوى بيدها وهى تجيبها بإلحاح
واضح :

-يا بنتى أنا ريقى ناشف ، هاجيب ٢ سفن ،
ثواني مش هتأخر عليكى !

حاولت رانيا الإمساك بها من ذراعها ، وهى
تصر على أسنانها فى ضيق د :

-يا نوشا استنى

إنسلت نشوى من قبضة رانيا بخفة ، ثم
سارت بخطوات أقرب إلى الركض وهى
تصيح بسعادة د :

-أنا جاية على طول

.....

بداخل سيارة رامى ،،،

تشبثت عاليا بمقعدها وهي تنظر بذعر
أمامها غير مصدقة الجنون الذي إرتكبه
رامي للتو معها

لم تستطع أن تتبين ملامح الطريق بسبب
تلك السرعة المفرطة التي يقود بها سيارته ..
شعرت أنها على وشك الإغماء من شدة
الرعب ، فقد ظنت أنها قاب قوسين أو أدنى
من الموت ..

عادة هي تخشى أن تشارك رفيقاتها الألعاب
الخطيرة - كالقطار السريع ، والمغسلة ،
والساقية الدوارة - في الملاهي ، حتى لا
تصيبها نوبات الغثيان المصحوبة بالدوار ..
فتفسد عليهن الأجواء ..

واليوم هي تخوض ذلك الشعور ولكن رغماً
عنها..

أدارت عاليا رأسها للجانب في زعر ، وحدقت
في رامي بمقلتين متسعيتين من الخوف ، ثم
صرخت عالياً بـ :

-نزلنييييييي ... هاموت

نظر رامي لها بتحدي غير مكترثاً بها ، ورسم
على فمه إبتسامة قاسية ، وأكمل قيادته
للسيارة بسرعته الجنونية ...

أغمضت عاليا عينيها ، وضغطت عليهما
بقوة ، وأطرقت رأسها في خوف للأسفل ،
وقبضت على مقعدها بيدين مرتجفتين
وأكملت صراخها بـ :

-هاموت .. وقف العربية ، هاموت !!

إلتوى فمه بتلك الإبتسامة المستفزة ،
ورمقها بإستخفاف من زاوية عينه ، وأردف
ببرود وهو يدير عجلة القيادة :

-عشان تتعلمي إزاي تحترمي غيرك !

بدأ شعور الغثيان يستحوذ على تفكير عاليا
.. وشعرت بتقلصات معدتها ، وبقرقعات
قوية فيها ..

إهتز جسدها بقوة وهو يدير السيارة عكس
الإتجاه ، فتملكها إحساس الغثيان تماماً ..
أرخت عاليا قبضة يدها المجاورة لرامي ،
ولكزته في ذراعه متوسلة إياه بـ :

-وقف العربية ، هاستفرغ (تتقياً) !!!

هز رأسه نافياً ، وأجابها بعناد واضح في
صوته وهو يرمقها بنظراته المتشفية :

-لأ مش هاوقفها

إزداد اضطراب معدتها ، ولم يعد بإمكانها
التحمل أكثر من هذا ، فصاحت بصراخ :

-بأقولك وقفها بسرعة

نظر لها ببرود ، ثم أجابها بإيجاز وهو يوميء
برأسه رافضاً لطلبها :

-إنسي !

قبضت عالياً على ساعد رامي ، وغرست
فيه أظافرها ، فحدجها بنظرات نارية ، وكان
على وشك الصراخ فيها ، ولكنه رآها تضع
يدها الأخرى على فمها محاولة كتمه ..

ثم تفاجيء بها تميل برأسها عليه ، ثم
تجشأت بصوت مكتوم ، وباغته بحركة لا
إرادية مقززة حيث أفرغت ما في معدتها على
بنطاله :

-بؤؤؤؤؤؤ .. إيع .. بؤؤؤؤ

نظر له رامي مصدوماً من فعلتها ، وصاح
عالياً بإشمئزاز :

-يعجععع٥

.....

أحضرت نشوى علب العصائر المعدنية ،
ووقفت تلتقط أنفاسها بعد أن ركضت عائدة
إلى رفيقتها التي كانت تلوي شفتيها في
إنزعاج ..

مدت يدها إليها بالعلبة التي إشترتها لها .. ثم
أخذت نفساً عميقاً مجدداً ، ، وزفرته على
عجالة ، و سألتها بصوت لاهث وهو تحاول
فتح العلبة المعدنية الخاصة بها :

-ها ، خرج ؟

مطت رانيا شفتيها وأجابتها بسخط وهي
تشرأب برأسها للأعلى :

-لأ لسه

وضعت نشوى علبة المشروب المعدني على
فمها ، وإرتشفت منه القليل ، ثم تجشأت
وهي تنطق بـ :

-طب اشربي السفن قبل ما يسخن
نظرت لها رانيا بإشمئزاز ، وهتفت بضيق :

-ماشي

أمسكت هي بعلبتها المعدنية ، وحاولت
فتحها بهدوء ، ولكنها تفاجئت بمحتوياتها
تفور وتتناثر بغزارة على ملابسها مبللة إياهم
، فشهقت في زعر قائلة :

-يا لهوي !

نظرت لها نشوى بقلق ، وسألتها بإضطراب :

-أوبا ، في ايه ؟

نفضت رانيا يدها في الهواء محاولة إزاحة
المشروب العالق بأصابعها ، وصاحت
بغضب جلي :

-عاجبك كده ، السفن كله إتكب عليا !
هزت نشوى كتفيها في عدم مبالاة ، وردت
عليها بفتور :

-وأنا هاعرف منين إن العلبة هاتفور في
وشك ؟!

إغتازت رانيا مما حدث ، وتلونت وجنتيها
بحمرة غاضبة ، وقالت مزمجرة :

-إنتي السبب في البهدلة دي !
نظرت لها نشوى بإستغراب ، وسألتها بهدوء
حذر :

-أنا ؟

صرت رانيا على أسنانها وهي تجيبها بحنق :

-ايوه

ثم إنحنت بجسدها للأمام لتنظف ملابسها
التي تلتخت بالمشروب ، وإزداد حنقها أن
يدها باتت لزجة .. فظلت تتمتم بكلمات غير
مفهومة ..

أكملت نشوى تناول مشروبها ، وأردفت
مازحة بـ :

-دلق السفن خير

نظرت لها رانيا بغل ، وصاحت فيها بنبرة
محتدة بـ :

-إنتي هتهزري؟!!

وضعت نشوى يدها على كتف رفيقتها ،
وهتفت بهدوء :

-خلاص بقى يا روني ، متحبكيهاش

فغرت رانيا شفيتها في ضيق قائلة بحنق
وهي ترفع حاجبيها للأعلى :

-يا سلام ، عاوزه المزيطلع يشوفني بالشكل
ده ؟!!!

ألقت نشوى بالعلبة الفارغة بجوار الرصيف ،
ثم أمسكت بحقيبتها ، ودست فيها يدها ،
وقالت بجدية :

-طب اهدي بس عليا ، أنا هساعدك ، ثواني
أطلع الWipes(مناديل مبللة) من الشنطة
!

في نفس التوقيت خرج آياز من البنك وهو
يتنهد في إرهاق ، ثم توقف في مكانه ليضع
كارت الفيزا الخاص به بداخل حافظة نقوده ،
ولم ينتبه لوجود تلك الفتاتين ..

حدث نفسه بخفوت بعد أن نفخ في إنزعاج :

Finally-(أخيراً)

ثم أولاهما ظهره ، ودس محفظته في جيب
بنطاله الخلفي ، وتحرك في الإتجاه العكسي
بخطوات شبه سريعة

نظر آياز إلى التوقيت في شاشه هاتفه النقال
، وتابع بتوتر :

-أوبس ، أنا إنأخرت جداً ، يدوب ألحق أروح
لرامي !

.....

أوقف رامي سيارته مضطراً على قارعة
الطريق ، وترجل منها مسرعاً وهو يشعر
بالإشمئزاز والتقزز من حاله ، فقد أفرغت
عاليا ما في معدتها على بنطاله ..

ظل يصيح بإنفعال جلي ، وأطلق سباباً
رهيباً وهو محني للأمام محاولاً تنظيف
بنطاله بالمناشف الورقية ..

في حين أرجعت عالياً ظهرها للخلف ،
ونظرت له بنظرات متشفية ، وإعتلى ثغرها
إبتسامة شيطانية وهي تمسح بمنشفة
ورقية شفيتها ، ثم حدثت نفسها بنبرة خافتة
تحمل الشماتة في طياتها :

-أحسن ، تستاهل اللي حصلك

حاولت أن تخفي إبتسامتها العابثة حتى لا
تثير إنفعاله ، خاصة وأنه كان مهتاجاً بطريقة
مقلقة ..

ألقت بالمنشفة على التابلوه ، وسحبت
أخرى من العلبة ، وأكملت بخفوت :

-ما كان من الأول !

ركل رامي الأرض بقدمه ، واستشاطت عينيه

غضباً وهو يركز على أسنانه محدثاً نفسه بـ :

-أنا غلطان إني ركبتها من الأول معايا ، ما

كنت أسيبها تولع في الشارع ، جبت لنفسي

القرف !!!

إلتفت برأسه للخلف ليجدها تبتسم بسعادة

، فضاقت عينيه وإزداد إحتقانها .. وتابع

بغيط :

-وربنا شكلها قاصد ، طيب يا عاليا !!!!

عاد مجدداً للسيارة وهو مكفهر الوجه ،

ومقتطب الجبين ، ووقف أمام الباب

الملاصق لمقعده ، وإنحنى بجذعه للأمام ،

ثم أردف بصوت مهتاج وصارم :

-إنزلي من العربية !

هزت رأسها بالرفض وهي تجيبه بإيجاز :

-لأ

صر على أسنانه في غل ، وحدجها بنظرات
نارية وهو ممسك بباب سيارته :

-بأقولك إنزلي !

أسندت عاليا رأسها للخلف ، ووضعت
رسغها على جبينها لتضغط عليه ، ثم ردت
عليه بخفوت :

-مش قادرة

صاح فيها رامي بإنفعال وهو يلوح بيده في
وجهها :

-إنتي مش كنتي هاتموتي وتنزلي ، يالا برا
عربيتي وآآآ...

لم تستمع عاليا إلى ما يقوله رامي ، فقد
باغتها مجدداً ذلك الشعور المزعج بالغثيان

.. فأغمضت عينيها في إستسلام ، وأردفت

بضعف :

-بأقولك بطني قالبه عليا ، وحاسة إني آآ.. ه..

هاستفرغ تاني !

لوى رامى فمه في إشمئزاز ، ورمقها بنظرات

متأففة ، ثم صاح بفضافة :

-الله يخربيت قرفك

فتحت عاليها عينيها عقب عبارته الوقحة ،

وأنزلت ساعدها للأسفل ، ونظرت له بإحتقار

، ثم رفعت إصبعها في وجهه محذرة إياه

بحنق ب :

-احترم نفسك لو سمحت !

حدجها بنظراته القاتلة وهو يرد عليها بإهتياج

قائلاً :

-هو إنتي خليتي فيها إحترام

ثم أشار إلى بنطاله بكف يده وهو يتابع

بحنق بـ :

-شايفة منظري عامل إزاي ؟ إنتي كنتي

واكلة إيه فسيييخ !!! ٢

رمقته عاليا بنظرات إستعلاء وهي تجيبه

ساخرة بـ :

-لأ .. دي أحماض وعصارة صفراوية

لوى فمه للجانب وهو يرد عليها بسخط :

-والله !! كوميدي بقى وكده ، أصل أنا ناقص

عصارة وقرف

أشاحت بعينيها بعيداً عنه ، وزفرت قائلة :

-أووف .. استغفر الله !

إعتدل رامي في وقفته ، وظل يتأمل هيئة
بنطاله المزرية ، وحدث نفسه بامتعاض بـ :

-أل أنا كنت ناقص قرف على آخر الليل ،
هاروح الرالي الوقتي إزاي ، لا حول ولا قوة إلا
بالله ! طب هاعمل ايه الوقتي ؟ أتصرف
إزاي يعني !!!!

سلط أنظاره على علياء فوجدها مستكينة
في مقعدها ، فلوى ثغره متأففاً ، وقوس أنفه
بتقزز وهو يتابع قائلاً :

-أوووف ، هاضطر اخذ العربية المغسلة
ينضفوها ، ما أنا مش هاستنى أسمع تريقة
من حد !!!

إزداد شعور عاليًا بالغثيان ، وسيطر مجدداً
عليها ، ولكن تلك المرة مصحوباً بدوار رهيب

جاهدت نفسها لتقاومه ، ولكن كم
الأدرينالين المتدفق إلى جسدها أرهقها حقاً ،
وسبب لها تلك الحالة الغير متزنة ..

مال رامي على نافذة باب سيارته المجاور
للمقود ، وأمرها بجدية ب :

-يا لا حاجة !

تنهدت عالياً في إنهاك ، وقالت بصوت
ضعيف :

-تعبانة

نظر لها بسخط ، وأردف متهكماً وهو يشير
بكلتا يديه في الهواء ب :

-آه ، بدأنا ، تعبنا ودايخة ، ونفسي غامة عليا
، وجو الحوامل ده !

لم تجبه عاليا ، وأغمضت عينيها في ضعف ..
فإستشاط غضباً ، وقال بإصرار :

-مابدهاش بقى !

دار رامي حول السيارة ووجهه متجهم للغاية
، ثم قام بفتح الباب الملاصق لمقعدھا ،
وأشار لها بيده وهو يهتف بنبرة محتدة :

-إنتي هاتسوقي فيها ، أنا جبت أخري معاكي

!

نظرت له من طرف عینھا ، وردت علیه بوهن
واضح في نبرة صوتها :

-والله آآ...

قاطعها بصوته الصارم الذي يحمل التهديد
وهو يرمقها بنظرات جادة قائلاً :

-بأقولك إيه أنا مش فاضي للمناهدة ، يلا برا
، ولا تحبي أجرجرك أنا براها ؟!!!!

نظرت له عاليا شزرأ ، ولوت شفيتها في تأفف
من وقاحته ، ثم نظرت إلى حالها ، فلملمت
ذيل فستانها المتبعثر ، وأرجعت طرف
حجابها للخلف ، وأمسكت بحقيبتها في يدها
، ونهضت على مهل من المقعد لتترجل من
السيارة وهي تأمره بحنق :

-وسع !

تنحى هو جانباً ليفسح لها المجال لكي تمر
، وأخذ يراقبها بنظرات منزعجة ..

وما إن وقفت عاليا على قدميها حتى
إجتاحتها دوار رهيب ، فترنح جسدها للخلف ،
وشعرت أن الأرض تميد بها ، فأسندت رأسها

بكف يدها ، وأغمضت عينيها بقوة مقاومة

إياه ..

نظر له رامي بتوجس شديد ، وقطب جبينه

في قلق ، وسألها بتوتر :

-مالك ؟

حاولت أن تجيبه بصوتها المنهك قائلة :

-أنا .. آآ..

لم تكمل هي جملتها الأخيرة حيث تراخى

جسدها بالكامل لفقدانها الوعي .. فأسرع

رامي بتلقفها بين ذراعيه ، وأسند رأسها

بحذر على ذراعه ، وأحاطها جيداً بذراعه الآخر

حتى يحول دون سقوطها على الأرضية

الإسفلتية ..

ثم نظر لها بنظرات مضطربة للغاية ، ومسح
براحته على وجنتها محاولاً إفاقتها ، وهو
يقول لها بنبرة خائفة :

-عاليا ، عاليا!

.....

واصل قراءة الجزء التالي

الفصل الخامس عشر

الفصل الخامس عشر:

فقدت عاليا وعيها ، وحاول رامى إفاقتها
بعد أن أسندها بذراعه كي لا تسقط ..

إنتابته حالة من القلق الشديد حينما رآها لا
تستجيب له ،وتلفت حوله بريية وهو يحدث
نفسه بإضطراب :

-طب .. طب أتصرف إزاي الوقتي ؟

ثم إستدار برأسه نحو عاليا ، وهتف فيها
بصوت مرتبك :

-عاليا .. عاليا ! سمعاني؟ عاليا

وضرب على وجنتها برفق ، فلم تستجب له
.. فسحبها بحذر للخلف ، وجاهد كي لا
تسقط من يده ..

ثم قام بفتح باب السيارة على مصرعيه ،
وأمسك بها جيداً وهو يحاول وضعها
بالداخل ، ثم أسندها على المقعد ، وأمال
رأسها للجانب ، وإنحنى للأسفل ليعيد ضم

ساقِيها معاً ، ومن ثم عاود النظر إليها

ووجهه يكسوه القلق ..

مط فمه في خوف ، ووضع يده على رأسه

وحكها عدة مرات وهو يحدث نفسه قائلاً

بحيرة :

-أودِيها المستشفى ، ولا .. ولا آآ... أشوف

برفان أفوقها بيه ، ولا أعمل ايه !

اعتدل في وقفته ، وتلفت حوله من جديد ،

ثم تابع قائلاً بندم :

-ما هو أنا اللي غلطان .. مكانش لازم أسوق

فيها أوي معاها

زم فمه للجانب وهو ينظر إليها ، ثم أضاف

قائلاً بهمس :

-بس هي مستفزة ، وقالت كلام ينرفز ..

وأدي نتيجة العصبية ! أوووف !

حركت عاليا رأسها قليلاً ، وأصدرت أنيناً
مكتوماً ، فتهللت أسارير رامي وهو يراها
تفيق دون أن يحتاج لأي مساعدة ، فإنحنى
للأسفل ، وجثى على ركبته ، وأمسك بكف
يدها بين راحتيه ، وربت عليه بخفة ، ثم
حدق بها ، وهو يقول بصوت رخيم :

-عاليا .. عاليا ! إنتي كويسة ؟

تأوهت هي بصوت خافت وهي ترد عليه
هامسة :

-آآآه .. دماغي .. آآآه

ثم رفعت يدها المتحررة ، ووضعته على
جبينها ، وظلت مغمضة العينين وهي تتابع
قائلة :

-مش قادرة منها ، آآآه

نظر لها بإشفاق وهو يهتف بتوتر :

-عاليا ، في ايه ؟ مال دماغك ؟ لسه داخنة ؟
طيب آآ...

فتحت عينيها فجأة ، وأبعدت يدها عن
جبينها ، ثم أخفضت رأسها نحوه ، ونظرت له
بحدة ، وهي تقول بغیظ :

-إنت ؟

وقامت بسحب يدها الأخرى من بين راحتيه
، فنظر له بإستغراب وهو يسألها بـ :

-حاسة بحاجة تانية ؟

كورت عاليا قبضة يدها ، وتراجعت في
مقعدها ، وتحسست بيدها الأخرى فستانها
، وصاحت قائلة بصوت متحشرج وغاضب :

-إنت .. إنت السبب في اللي أنا فيه ؟

ابتسم لها إبتسامة مستفزة وهو يرد عليها

ب :

-كده أنا اطمنت إنك كويسة

ثم إعتدل في وقفته ، وأضاف بإرتياح :

-الحمد لله ، مكونتش هاقدر أنام وأنا

حاسس بالذنب

عبست بوجهها ، وقطبت جبينها ، ونظرت له

شزراً وهي تهتف بسخط :

-وسع كده

نظر لها بإندهاش وهو يقول بإيجاز :

-افندم ؟!

هتفت بحدة وهي تشير بيدها :

-إنت مش سامع ، حاسب خيليني أنزل

احتج قائلاً ، وهز رأسه رافضاً ، وهو يشير

بذراعه :

-لألاًلألاً .. أنا مش هاتحمل يجراك حاجة تاني

، أنا هاوصلك مطرح ما إنتي عاوزه

رفعت حاجبها للأعلى في إستهجان ، وقالت

بإستنكار :

-والله ! ده على أساس إن أنا ينفع أروح

الفرح بالمنظر ده ؟

-طيب خلاص ، هاوديكي عند بيتك ، وآآ...

قاطعته بصوت محتد وهي تشير بيدها :

-إنت بتقول إيه ؟ بيت ايه اللي توصلني

عنده ، من فضلك حاسب ، كفاية قلة قيمة

اعتدل في وقفته ، وأردف قائلاً بهدوء حذر :

-يا ستي ححك عليا ، بس والله ما ينفع

أسيبك وإنتي بالشكل ده

قالت معترضة ، وهي تنظر له بضيق :

-وأنا مش هاقبل إن راجل غريب يوصلني

فغر فمه مشدوهاً وهو يقول :

-هاه ، نعم !

ردت عليه بنبرة منزعة ، وهي تتفقد

فستانها :

-زي ما سمعت

نفخ في الهواء ، ووضع يديه على رأسه ،

وفركها للحظة ، ثم نظر إليها ، وقال بإصرار :

-ماشى ، وأنا برضوه مش هاينفع أسيبك في

الحتة المقطوعة دي لوحدك وبعد اللي

حصل مني !

رمقته بنظراتها الحادة وهي تجيبه بجدية :

-أنا هاتصرف ، كفاية البهدة اللي بهدلتها لي !

لوى رامى فمه معترضاً ، وفكر مع نفسه
للحظة فيما تقول ، فبديهيّاً هو من تصرف
برعونة معها ، وبالتالي ستكون تلك ردة
فعلها ، ولكنه في نفس الوقت يخشى أن
تتعرض لإغماءة أخرى إن تركها بمفردها ،
وخاصة أن الوقت بات متأخراً ، والطريق
شبه خالي من المارة أو السيارات ، وربما
تتعرض لمن يضايقها .. لذا عليه أن يصل
معها إلى حل سريع ومرضي ...

وضع يده على صدره ، وأردف قائلاً بصوت
خافت ونظرات أسفة :

-أنا محقوكلك

زفرت في ضيق وهي تجيبه بإمتعاض :

-أووف ، بعد اذنك ، اوعى

أشار بيده محاولاً إقناعها ، وقال بهدوء :

-يا عاليا آآآ....

نظرت له بصدمة وهي تنهره بحدة ب :

-إيه ده ؟ انت خدت عليا أوي ، ايه عاليا دي

كمان ؟!

رد عليها مازحاً وهو يبتسم لها قليلاً :

-خلاص .. خلاص ، يا أبله عاليا

إزداد اتساع حدقتها وهي تهتف محتجة ب :

-أبله !

كاد أن يضحك على تعبيرات وجهها الظريفة

، فقال متلهفاً :

-يا ست الأستاذة ، كده كويس ؟

رفعت حاجبيها للأعلى ، وصاحت بقوة وثقة

:

-لأ .. اسمي المُعلّمة عاليا

نظر لها ببلاهة وهو يقول ساخراً :

-مَعَلّمة !

ضيقت عينيها لترمقه بتلك النظرات

المحتقنة ، وقالت محذرة :

-بأقولك مُعلّمة ، هاتهزر؟!

تنحنح بصوت خشن ، وهو يجيبها بهدوء :

-احم .. لأ ، خلاص المُعلّمة عاليا ، تمام كده ؟

هزت رأسها وهي تجيبه بخفوت :

-أها

أخذ نفساً عميقاً ، وزفره في إرتياح .. ثم حك
طرف ذقنه ، ونظر لها مطولاً متأملاً تلك
القسمات الغاضبة المسيطرة على تعبيرات
وجهها ..

ولاحظ الإرهاق البادي على عينيها ، وراقبها
وهي تعيد تعديل هيئتها ..

أفاق سريعاً من شروده ، فقد ظل صامتاً
لبضعة لحظات دون أن يصغي لكلمة واحدة
مما قالتها ..

فحتى لا يبدو أمامها أنه كان شارداً فيها ،
فأردف قائلاً بجدية :

-أنا عندي إقتراح، إيه رأيك اوصلك لأقرب
مكان لبيتك ، ها مرضية ؟

ضيقته ما بين عينيها ، ومطت شفيتها
للجانب وهي تجيبه :

-ممممم ، توصلني ؟

تابع هو بجدية شديدة دون أن تطرف عينيه :

-واعتبريني يا ستي زي سواق أوبر ولا كريم

(سيارة أجرة) ، ماشي ؟ أنا عاوز والله

مصلحتك ، ومش في نيتي حاجة !

صمتت عاليا لتفكر فيما قاله ، فربما هو

محق في رغبته في إيصالها ، فهي ليست

بحالة جيدة ، وتخشى أن يتعرض لها

شخص ما في هذا المكان الـ " مقطوع " ،

ولكنها تخشى أن يظن بها أي أحد السوء ،

لذا عليها أن تكون شديدة الحذر معه ، لذا

أخذت نفساً مطولاً ، وزفرته بهدوء ، ثم أجابته

قائلة بتريث :

-اوكي

تنهد في إرتياح لقرارها ، ولكن قبل أن ينطق

قاطعته بصوت أمر :

-بس حاسب كده

نظر لها بإستغراب وهو يسألها متوجساً :

-ليه تاني ؟

ردت عليه بتهكم وهي تنظر مباشرة في

عينيه :

-أنا هاركب ورا ، مش بتقول سواق تاكسي

صر على أسنانه مغتاضاً ، وهو يجيبها بحذر

، ومشيراً بيده :

-ورا ، ماشي ! اتفضلي!

وبالفعل أفسح رامي المجال لعاليا لكي

تنهض من المقعد الأمامي ، ثم فتح لها

الباب الخلفي ، فنظرت له بطرف عينها ،
وإتجهت نحو المقعد ، وجلست عليه ..
أغلق الباب بحذر .. وغمغم قائلاً مع نفسه
متذمراً :

-على آخر الزمن بقيت سواق ، المفروض
يبقى لقبى بعدة كده الأسطى رامى !!!
رن هاتفه الموضوع على التابلوه ، فإلتقطه
وهو يعاود الجلوس خلف عجلة القيادة ،
ونظر إلى شاشته ، ثم ضغط على زر الإيجاب
قائلاً بإرهاق :١

-أيوه يا آياز

سلط عينيه على المرآة الأمامية ، ثم وضع
يده عليها ليعدل من وضعيتها بحيث يتمكن
من رؤية عاليا بوضوح ، وتابع قائلاً بهدوء :

-لأ مش هاروح ، حصل ظروف ، وشوية
وراجع على الفيلا .. أها .. تمام !

إلتقطت عينيه عينيها وهي تنظر له في المرأة
، فإلتوى فمه بإبتسامة باهتة ، بينما أشاحت
هي بوجهها ، للجانب ، فأضاف قائلاً بنبرة
عادية :

-هه .. لالا متقلقش ، حاجة لا تذكر يعني !
ضيق عينيه قليلاً ، وهو يكمل ب :

-اوكي .. أها .. متفقين ، يالا سلام !

تابع هو حركة شفيتها المتدمرة وهي تحدث
نفسها ، فأشرقت إبتسامته ، وقال مازحاً :
-ينفع نقف عند أي بنزينة أجيب فواحة
لأحسن ريحة الترجيع ، مش قادر أقولك ،
ولا في اعتراض !!؟

ردت عليه بجدية شديدة وهي تنظر نحو

النافذة الجانبية :

-ماشي ، بس أوام

أردف قائلاً بصوت مزاح :

-حاضر يا أبله !

إستدارت برأسها نحوه ، لتنظر له بنظرات

محتقنة ، وكانت على وشك الحديث ،

فهتف مسرعاً :

-خلاص ، المُعلمة عاليا !

عبست بوجهها ، وهي ترد عليه بصوت

صارم :

-ايوه كده

ابتسم إبتسامة هادئة وهو يسألها بجدية :

-طب على فين يا باشا ؟

أشارت بعينيها للأمام وهي تجيبه بصوت

رقيق :

-اطلع على آآآ (((...)))

رد عليها بنبرة جادة قائلاً:

-عُلم وينفذ يا ريس

إبتسم رامى لإبتسامتها الخفيفة التي

حاولت إخفائها ، وقاد السيارة نحو الوجهة

المطلوبة ...

.....

في منزل عاليا راشد ،،،،

أغمضت عاليا عينيها وهي تقف أسفل

صنبور الإستحمام لتترك المياه تنهمر كليا

على رأسها وجسدها لتخفف من التوتر

المشحون بها ، خاصة بعد هذا الموقف
الغريب مع رامي ..

هي لم تتعمد الإلتقاء به ، ولكن كثرت
الصدف معه ..

إبتسمت لنفسها وهي تتذكر كيف تقيأت
عليه ، ودفنت وجهها المبتل بين راحتها ،
وحدثت نفسها قائلة بتشفي :

-هو اللي مستفز ، ويستاهل ..

ثم مسحت السائل الرغوي من على فروة
رأسها ، وتابعت بإبتسامة :

-بس حقيقي كان جنتل معايا

تنهدت في إرهاق وهي تدلف خارج
المغطس الصغير ، ولفت جسدها بالمنشفة
، وكذلك شعرها ، ونظرت إلى وجهها المتعب

في المرأة ، وجحظت بعينيها ، وهتفت

مفزوعة :

-زمانته قال عني عفريته بعد شكل عيني

ده ، يالهوي !

أطرقت رأسها للأسفل في خزي ، وأكملت

قائلة :

-أهوو موقف وراح لحاله ، خليني أستعد

لبكرة ، ده يوم طويل ومهم ، وربنا المعين

فيه !

خرجت عاليا من المرحاض ، وفتحت هاتفها

المحمول لتتفاجيء بكم الرسائل الإلكترونية

على برنامج " الواتساب " ، والإشعارات

على الفيس بوك ..

فتفحصتها على عجالة ، ثم زفرت في ضيق

وهي تقول متذمرة :

-أوووف ، برضوه هانلبس التيشيرت ده ، بجد

حاجة تخنق !

ثم إتجهت إلى خزانة ملابسها ، وفتحت
الضلفة الصغيرة ، وظلت تعبت في الرف
السفلي قائلة بتبرم :

-بجد مالوش أي لازمة إننا نلبسه ، شكلنا
بيبقى بيئة ووحش ، والناس بتمسكنا تريقة
! ربنا يتوب علينا بقى !!!

وبالفعل وجدت ضالتها ، فأمسكت بتأفف "
التي شيرت " الخاص بالمدرسة ، ونظرت له
بإزدراء .. ثم تابعت قائلة :

-ده شكله زي ال " خرقة " ، هاللبسه إزاي ده

بكرة ؟

.....

في فيلا سرحان عليه ،،،،

عقد آياز ساعديه خلف رأسه ، وهو ممدد
على الفراش ، ونظر إلى رامي باهتمام وهو
يسأله بهدوء :

-بس ؟

أجابه رامي بخفوت وهو يبدل ملابسه بـ " تي
شيرت " رياضي :

-أها ، ده اللي حصل

سأله آياز مستفهماً وهو ينظر له بغرابة :

-ممم.. يعني العربية عطلت وإنت كنت
بتدور على ميكانيكي يصلحها ، تمام ؟

تنحنح رامي بصوت خشن ، وأولاه ظهره ،
وأجابه بإيجاز :

-ايوه

تابعه آياز متفرساً ملامحه المضطربة
بشكل فضولي ، ثم قال بهدوء :

-مش مصدق!

وقف رامي أمام المرأة ، ومشط شعره
للخلف ، وهتف محتجاً :

-إيزووو ، وأنا هاكذب عليك ليه ؟ العربية
بتعطل زي أي حاجة

أرخی آياز ساعديه ، ونهض عن الفراش ،
وداعب أرنية أنفه وهو يقول بنبرة عميقة :

-مش مرتحالك ، حاسس إنك مخبي حاجة
عني

ألقي رامي بجسده المنهك على الفراش ،
وعقد ساقيه معاً ، وشبك أصابع كفيه وظل
يحرك إبهاميه بحركة إهتزازية ثابتة ، ثم
تحاشى النظر في إتجاهه ، وأردف قائلاً بـ :

-ولا حاجة ولا غيره!

-ممممم...!

حاول رامي أن يغير الموضوع كي لا يستمر
آياز في إستجوابه ، فسأله بإهتمام زائف :

-المهم قولي إنت مستعد لبكرة ؟

أوماً الأخير برأسه ، ورد عليه بتنهيذة متفائلة

:

-أها ، Wish me luck (تمنى لي الحظ

(السعيد)

-ربنا معاك !

ثم صمت رامي لبرهة قبل أن يحدق في
الفراغ ، وتظهر إبتسامته من خلف أسنانه
وهو يحدث نفسه قائلاً :

-ما هو أنا .. أنا ناوي أجي أشوفك بكرة

وأطمئن عليك يا .. يا أبله

٢١.....

.....

واصل قراءة الجزء التالي

الفصل السادس عشر

الفصل السادس عشر:

في صباح اليوم التالي ،،،

في مدرسة اللافانيا الدولية ،،،

تزينت بوابة مبنى رياض الأطفال بالبلالين

البيضاء والصفراء ، والشعارات الملونة

إستعداداً لإستقبال الأطفال في أول يوم
دراسي لهم ..

ووضعت بعض النماذج لشخصيات كرتونية
شهيرة ليلتقط الأطفال صوراً تذكارية
بجوارها ..

وقبل أن يحين موعد فتح البوابة ، كان
الوضع بالداخل كخلية النحل ، والأعصاب
على أشدها من أجل التأكد من إنتهاء كل
شيء قبل الميعاد المنتظر ...

إرتدت معظم المتواجدين التي سيرت
الخاص بهذا اليوم المميز ..

ورغم عدم إقتناع أي من المدرسات به إلا
أنهن أجبرن على إرتدائه ..

تجمعت ثلاثة منهن في الردهة لترتب وضع
الحلوى ، وكذلك الممصقات ، على طاوولات
صغيرة لينتقي منها الأطفال ما يريدونه ..
نظرت سارة إلى سالي بتفحص ، وهمست
لها قائلة :

-شوفتيني وأنا شبه عم عويس الزبال

لوت سالي فمها قائلة بسخط :

-إياكش بعد ده كله تفرد بوزها وتقول كلمة
طيبة ، لكن مش بنسمع منها إلا الكلام اللي
ينرفز وبس

تنهدت سارة في ضيق وهي تضيف :

-مش بترتاح ولا بتريح حد معاها

قاطعتهما عاليا بنبرة حائرة وهي تضع يدها
على كتف سارة :

-إنتو بتكلموا عن مين ؟

نظرت لها سارة لتجيبها بإنهاك :

-تفتكري هايكون عن مين يعني ؟

هزت عاليا رأسها قائلة بثقة وهي تبتسم :

-من غير ما تقولي عرفتها !

هتفت ميادة بنبرة عالية وهي تلوح بيدها :

-بنات عاوزه حد ينفخ معايا البلاين دول ٢

نفخت سالي من الضيق ، ثم أجابتها متذمرة

:

-بجد أنا صدري تعب من كتر النفخ ، ما

يجيبوا مناخ للبلاين وأهوو كلنا نرتاح

زمت ميادة فمها وهي تجيبها بحذر :

-يجيبوا منفاخ ؟ هو إنتي عاوزاهم يصرفوا
ويكلفوا ، ده إنتي قلبك أبيض !

.....

على الجانب الآخر ، وقفت ريما على
مقعد خشبي ، بينما ظلت ليلة واقفة على
قدميها ، وتعاونت الإثنتين في تعليق الأشرطة
اللامعة على طول الممر المؤدي لداخل
المبنى ..

مسحت ليلة جبينها ، وهتفت قائلة بضجر :

-يا رب الهوا مش يطيرهم !

مدت ريما ذراعيها للأعلى لتتمكن من
تثبيت الأشرطة ، وأجابتها بتوتر :

-ربنا يستر ، أنا تعبت في تعليقهم !

نظرت ليلة إلى ريمان بتمعن ، فقط كانت
تجاهد لترفع جسدها من أجل الوصول إلى
المسمار الخاص بتثبيت الأشرطة ، فبدى
شكلها مضحكاً ، فحاولت أن تسيطر على
نفسها، وأردفت قائلة بنزق :

-ما إنتي اللي قصيرة

نظرت لها ريمان بضيق ، وأجابتها بصوت
حانق :

-قصيرة إيه يا بنتي ، مس إعتماذ عاوزاهم
كده

إلتوت شفتي ليلة بضيق بائن ، وردت عليها
بخفوت :

-أووف .. بجد متعبة ، مافيش حاجة بترضيها

أضافت ريمان قائلة وهي تزيح خصلات
شعرها للخلف :

-يا لولو دي لو تطول تجيبنا من الفجر

هاتعمل !

تلفتت ليلة حولها ، وتابعت قائلة بنبرة

ضجرة :

-لسه فاضل ساعتين على فتح الGate)

البوابة) واحنا خلاص هلكننا وجبنا أخرجنا !

ردت عليها ريمان بنبرة مرهقة :

-عندك حق ، أنا مش قادرة خلاص !

ثم أشارت بعينيها ، وهي تفرد إلتواء

الشريط الملون مضيئة بنبرة آمرة :

- روجي هاتي بس شرايط تانية لأحسن اللي

معايا مش هايكفي

-أوكي

.....

في نفس التوقيت ، صف رامي سيارته أمام
بوابة مبنى الرياض ، وإلتفت برأسه ناحية
آياز وتأمله قائلاً بمزاح :

-يا بني إنت متأكد إن البتاع ده لازم تلبسه

أوماً آياز برأسه قائلاً بإيجاز :

Yes- (نعم)

وضع رامي يده على رأسه وحكها قليلاً ، ثم

تابع بعدم إقتناع :

-أصل بصراحة شكله مش اوي عليك !

نظر آياز إلى نفسه ، وتأمل هيئته بدقة ،

فقد بدى التي شيرت ضيقاً عليه بصورة

ملفتة ، ومبرزاً لعضلات ذراعيه بطريقة

مستفزة .. فأصبح كما لو كان يستعرض

جسده ..

تنهد في إحباط وهو يجيبه بفتور :

-مس إعتماذ قالت ده المفروض يتلبس

النهاردة

لم يحيد رامى بعينه عنه ، وأكمل قائلاً

بسخرية :

-وانت ما بتصدق تنفذ الأوامر

رد عليه آياز بجدية :

-لأ .. بس ده System (نظام) هنا !

ثم ترجل من السيارة ، وأردف قائلاً بصوت

مرتفع :

-أشوفك بعدين

وقام بفتح الباب الخلفى ليشحب حقيبته ،

ومن ثم علقها على كتفه ..

تابعه رامى بنظراته ورد عليه بهدوء :

-ماشي يا عم الملتزم !

ثم هتف قائلاً بمزاح وهو يغمز له :

-طب مش هاتخذ أخوك معاك جوا ياخذ

لفة ، ويشوف النظام

حدجه آياز بنظرات قوية وهو يجيبه بجدية :

-لأ ، باي !

أخذ رامي نفساً عميقاً ، وزفره بحذر وهو

يحدث نفسه قائلاً بهدوء :

-ماشي .. الجايات أكثر من الرايحات !

ثم إبتسم لنفسه بغرور وهو يضيف :

-وأنا أعد هنا لحد ما تروح !

.....

مر آياز من البوابة بعد أن لوح للحارس
الأمني بيده ، ثم إتجه نحو الممر فوجد تلك
الفتاة - دائمة الصدام معه - تكافح لتثبيت
الأشرطة .. فأطرق رأسه للأسفل ، وظل
يفكر بحيرة مع نفسه ب :

-طب أساعدها ، ولا أكبر دماغي منها !

حك طرف ذقنه ثم حسم أمره قائلاً بهدوء :

(سوف أساعدها) I will help her-

تحرك آياز نحوها ، وتنحنح بصوت مرتفع
نسبياً ، فإنتبهت هي للصوت الرجولي الآتي
من خلفها ، وأدارت رأسها بحذر نحوه ، فرأته
واقفاً خلفها ، فعبست بلامحها ، وأشاحت
بوجهها بعيداً عنه ..

تعجب هو من أسلوبها ، وأردف قائلاً

ياستغراب :

-محتاجة مساعدة ؟ أنا مش جاي آآ...

قاطعته بصوت صارم دون أن تلتفت نحوه :

Thanks- (شكراً) ، ولو محتاجة

مساعدةSure (أكيد) مش هاطلبها منك !

إغتاظ هو من ردها الفج عليه ، وإحمر

وجهه قليلاً .. ثم تابع قائلاً بجدية :

As you like- (كما تريدن)

ثم تركها وإنصرف سريعاً وهو يغمغم مع

نفسه بإنزعاج ..

إرتسم على وجهها إبتسامة تشفي ، وهتفت

قائلة لنفسها بسعادة:

-مش ينفع معاك إلا كده ، ولا إنت مفكر

بس إنك تضايقني وأتعامل معاك عادي !

تابعتهما رانيا من على بعد ، وإحتقت
عينها بشرارات غاضبة وهي تراهما يتبادلان
الحديث المختصر ..

قبضت على كف يدها ، وصرت على أسنانها
قائلة بغل :

-يعني ملاقتش إلا راس القرد وتشمها ، جاي
عند الرخمة دي وتلذق فيها ٢!

ثم دبت على الأرضية الصلبة بقدمها ،
وتابعت قائلة بغیظ :

-ما أنا قصادك أهوو .. ولا إنت أعمى ومش
شايفني !

إكفهرت ملامح وجهها أكثر ، ورفعت حاجبها
للأعلى ، ووضعت يدها في منتصف خصرها ،
ونظرت أمامها بحدة وهي تشيف بتوعد :

-ماشي ، برضوه مش سيباك !

.....
في غرفة المعلمات ،،،

كانت الطاولة التي تتوسط الغرفة مليئة
بالكثير من الهدايا المغلفة ، وإلتفت حولها
معظم المعلمات واللاتي حرصن عن إنهاء
تغليف البقية في أسرع وقت ...

رصدت حنان الهدايا بطريقة منظمة في
صندوق صغير ، وناولته إلى جانبتي التي
كانت تدون في مفكرة صغيرة العدد الخاص
بكل فصل لتسلمه إلى المعلمة المسئولة
عنه ، ثم تضعه على الأريكة العريضة
الموجودة بالغرفة ..

هتفت هناء قائلة بضجر وهي تحاول عقد
الأنشطة :

-بجد أوفر ، أنا زهقت ، مش عارفة ألفها

كويس

تناولتها منها منة ، ونظرت لها بثقة ، وردت

عليها بمزاح :

-هو انتي بتعرفي عملي حاجة أصلاً ، شوفوا

رابطها إزاي !

عبست هناء بجبينها ، وهتفت معترضة :

-الله ، أنا تيتشر ، مش بتاعة هدايا !

لوت منة فمها ، ولكزتها في جانبها بكوعها ،

وتابعت بتحدي :

-روحي قوليلها الكلام ده

زمت هناء فمها لتجيبها بنبرة ساخطة :

-أل يعني لو قولتلها هتفرق معاها ، كل

اللي هاتعمله هاتكشر وتقولي آآ..

صمتت للحظة لتقف مشدودة الجسد ،
وعابسة الوجه أكثر ، ومتصلبة في تعابيرها
وجهها ، ورفعت حاجبيها للأعلى ، ثم عمدت
إلى تغيير نبرة صوتها ، لتقول بنبرة ساخرة
وهي تتعمد تقليد المديرية :

-جرى ايه يا مس سارة وإحنا من امتى
بنقول لأ للشغل ! فين روح المثابرة والكفاح
!؟

ضحكت الفتيات بصوت مرتفع على أسلوب
هنا المازح ، وتشدقت جانيت قائلة :

-طب يالا يا بنات ، أنا هوزع عليكم الإشراف !

هتفت منة محتجة بصوت مرتفع :

-أنا مش عاوزه أقف في بيبي كلاس ، العيال
بيبقوا زنانين بصورة بشعة ، وعياط وقرف

ردت عليها جانيت بهدوء :

-طب وأنا هاجيب مين ؟ ماهو لازم نتوزع
كلنا على الكلاسز ، وجزء هيبقى معايا
عشان ال (فان داي) بتاع الأطفال

نفخت منة قائلة بتذمر :

-يا ربي هو احنا مش هنرتاح أبداً

تدخلت نادية قائلة بصوت مرح :

-لأ .. شيلوا كلمة راحة من القاموس خالص ،

إحنا في زمن السخرة والعبيد !

دلف آياز إلى داخل الغرفة ، وتفاجيء

بعدد المعلمات المتواجדות بالداخل ،

فتجمدت تعابير وجهه ، وهتف قائلاً بإيجاز

وهو يتجه إلى زاوية الغرفة :

-هاي

إلتفتت المعلمات نحوه ، ورحبن به
بإختصار ، ثم عاودن إتمام عملهن وهن
يتهامسن بكلمات مبهمة ..
مالت هناء على منة ، وقالت بصوت خافت :

-أوبا ، شايفة شكله عامل ازاي
إختلست منة النظرات نحوه ، وتأملت جسده
الذي تبدو كمحترفي كمال الأجسام ، وردت
عليها بهمس :

-حاجة خطيرة على الآخر ، مش زي
الوشوش العكرة اللي بنشوفها على الصبح
تحمست هناء قائلة بخفوت :

-أنا عاوزه من ده يا حزومبل ٢
لوت منة شفتيها وهي تجيبها بسخط :
-ياختي اتنيلي ، إنتي أخرك واحد مقشف !

زمت هناء ثغرها للأمام قائلة بتذمر :

-ياباي يا منون ، دايمًا كده كسفاني

هزت الأخرة كتفيها في عدم إكتراث ، وردت

بفتور :

-مش بأقولك الحقيقة ، الأشكال دي ليها

ناسها

حاول آياز ألا يركز مع أحدهن ، فيكفيه

الموقف المحرج الذي تعرض له قبل

لحظات ..

وقام بفتح حقيبته لينظر إلى محتوياتها ،

ولكنه توقف عما يفعل حينما وقفت قبالاته

جانيت قائلة بصوت هاديء :

-سوري يا مستر ، هاعطلك شوية

قطب جبينه ، وسألها بإهتمام :

- في ايه ؟

إبتسمت له قائلة :

-أنا بأوزع إشراف الفصول النهاردة ، فهايكون
مع حضرتك ٢ teachers.. هيساعدوك في
تنظيم الكلاس ، والترحيب بالأطفال ، وبعدها
توزيع الهدايا عليهم ، وأخر نص ساعة
حضرتك هاتكون لوحدهم معاهم عشان
يتعرفوا عليك أكثر

هز رأسه موافقاً وهو يجيبها بإيجاز :

-اوكي

إبتسمت له مجاملة ، وردت بإختصار :

-تمام .. ولو في حاجة أنا موجودة هنا !

أوماً برأسه ولم يعقب ، وعاود النظر إلى
داخل حقيبته ..

..... ١

في ردهة مبنى الرياض ،،،

وضعت ليلة إصبعها على طرف أنفها لتمنع
نفسها من العطس، ثم تنهدت بتعب ..
وإتجهت إلى الطاولة المرابط أمامها عاليا ،
وسألته باهتمام :

-معدكيش شرايط بتلمع ؟

ضيققت عاليا عينيها ، وسألته بإندهاش
وهي تحدق بها :

-ايه ؟

أشارت ليلة بيديها وهي توضح لها قائلة :

-شرايط الزينة اللي بتتعلق

هزت عاليا رأسها قليلاً ، وأجابته بهدوء :

-أها.. لأ كلهم مع ريمان

أردفت ليلة قائلة بنبرة مهتمة وهي تشير

بكفيها :

-خلصوا ، واحنا محتاجين تاني

هزت عاليا كتفيها مجيبة إياها بإيجاز :

-مافيش

سألتها ليلة بصوت حائر وهي تحك طرف

ذقنها بإصبعيها :

-طب هانجيب منين ، ده ناقص نص الممر

ومش اتعمل !

أشارت عاليا بعينيها نحو غرفة مكتب

المديرة ، وردت عليها بجدية :

-بلغي أبلتك اعتماد وهي تتصرف

حدجتها ليلة بنظرات معاتبة ، وردت دون

تردد :

-إيوو .. ياباي ، ترضيها لي !

ضحكت عاليا على طريققتها .. ولم تعقب ..
في حين أكملت ليلة حديثها بجدية :

-بصي أنا هاقول لأية وهي تدخل المكتب
تبلغها ، مش ناقصة تقولي كلمة

لكزتها عاليا في كتفها ، وقالت بعدم إكتراث :

-يا بنتي قوليلها عادي !

ردت عليها ليلة على ممرض ب :

-انتي مش عارفاها ، هاتقولك أنا جايبة
الكمية بالعدد

نظرت لها عاليا بنظرات حائرة وسألته بجدية

:

-طب وهانعملها ايه ، ماهم خلصوا !؟

مطت ليلة فمها للأمام وردت عليها ب :

-خلاص هاتصرف-

أشارت لها عاليا بإبهامها ، وإبتسمت لها

قائلة :

-ربنا معاكي

.....

في المرحاض ،،،

ولجت رانيا إلى داخل المرحاض وهي

تجذب نشوى من ذراعها ، وأغلقت الباب

على كلتاهما فتذمرت الأخيرة قائلة :

-في ايه يا روني ، جرائي كده ليه للحمام ؟

كزت رانيا على أسنانها قائلة بحنق :

-شوفتي المز؟

سألتها نشوى بإهتمام بـ :

-ماله

ردت عليها بضيق وهي تعقد ساعديها أمام
صدرها :

-واقف بيرغي مع ريمان

هزت نشوى كتفيها في عدم مبالاة قائلة
بصوت فاتر وهي ترمقها بنظرات عادية :

-طب وفيها ايه ؟

أشارت بإصبعها وهي تضيق عينيها بشدة
ومجيبة إياها بغضب :

-ماهو كان أخذ منها موقف بعد مقلب
العصاير !

أضافت نشوى قائلة بنزق :

-اللي كنتي لبستهولها ده

ردت عليها رانيا بقوة :

-ايوه

.....

كانت هبة بداخل المرحاض معهما تعيد
ترتيب ثيابها بداخل المرحاض الداخلي ،
ولكن لم تنتبه لها أي منهما .. فأصغت هي
بإنتباه لما تقوله الإثنتين دون أن تصدر أي
صوت ..

ولكنها تسألت مع نفسها بفضول ب :

-هما بيتكلموا عن ايه بالظبط ؟

.....

هتفت نشوى قائلة بنبرة مهتمة وهي
تتفرس في ملامح وجهها ب :

-طب وانتي ايه اللي مضايقتك ؟

أجابتها رانيا بإصرار وهي تتطلع أمامها
بنظرات هائمة :

-أنا عاوزه أخذ فرصة معاه ، مش معقول
أضيع المзде من ايدي ، ولا أنا قرعتي بتقع
مع الهبل والأشكال المعفنة !

أسندت نشوى كفها على ذراع رانيا ،
وسلّطت أنظارها عليها لتقول بجدية :

-يا رانيا ، هو احنا لحقنا ، ده مش بقاله كام
يوم

زمت رانيا شفيتها للأمام ، وهتفت بإحتجاج
:

-بس الغربان كتير يا نوشة ، وزى ما إنتي
شايقة ، احنا هنا في الكي جي عوانس ، وده
الدكر الوحيد اللي وسطنا !

زادت إنعقاد ما بين حاجبي نشوى ، وهتفت

قائلة بإستغراب :

-يالهوري على كلامك ، ده اسلوب ! خدي

بالك لأحسن مس إعتماذ تسمعك

تنهدت قائلة بتذمر :

-أوف طيب ، هاخذ بالي !

ثم رفعت حاجبها للأعلى وتابعت قائلة

بصوت هامس :

-المهم أنا عاوزاكي تراقبيه وتنقليلي أخباره

نظرت لها نشوى بإستغراب ، فتصرفات رانيا

وطريقتها قد تؤدي لتعرضها لمشاكل جمة

.. فحاولت أن تثنيها عما تفعل ، فقالت لها :

-احنا هنبدأ الدراسة ، يعني محدش هايكون

فاضي لحد

هزت رانيا رأسها وقالت بإصرار مريب :

-معلش ، أهوو لما تشوفيه هنا ولا هنا ، أو
بيكلم حد بلغيني ، وأنا هاظبط أموري معاه !

تنهدت نشوى قائلة بإستسلام :

-ماشي ..!

إرتسم على ثغرها إبتسامة لثيمة وهي

تهتف بصوت جاد :

-متفقين ، يالا بينا

.....

إتسعت مقلتي هبة في زهول ، ورددت

قائلة لنفسها بصدمة :

-ايه ده ، دي عصابة ولا مدرسات كي جي ..!

ثم إستمعت إلى صوت غلق باب المرحاض

، فخرجت من الداخل، وإتجهت إلى الحوض ،

وفتحت الصنبور وهي تتابع حديث نفسها

بفضول د :

-بس مقلب عصاير ايه ده اللي بيتكلموا عنه

؟ وايه علاقته بريمان !

ثم حدقت في المرأة المثبتة على الحائط ،

وعدلت من وضعية حجابها ، وتابعت بنبرة

محتارة :

-أنا مش فاهمة حاجة خالص ، بس هسأل

البنات وأعرف !!

.....

واصل قراءة الجزء التالي

الفصل السابع عشر

الفصل السابع عشر :

في غرفة مكتب المديرية بمبنى الرياض ،،،

طلبت ليلة بإختصار من المديرية إعتقاد

إحضار بعض شرائط الزينة من مخزن

الأدوات المدرسية والمكتبية الخاص

بأعضاء التدريس ، ولكنها تفاجئت بها

تخبرها بجدية ب :

-للأسف مش متوافر هناك

رمشت ليلة بعينيها مصدومة ، وتسائلت

بتوتر بادي على تعبيرات وجهها :

-طب وهنتصرف إزاي ؟ ده لسه ناقص نص

المدخل !

مطت إعتقاد فمها للأمام ، وتسائلت بنبرة

رسمية :

-ممم.. مافيش أي زيادات مع البنات ؟

هزت ليلة رأسها نافية وهي تجيبها بضيق :

-لأ ، أنا سألتهم وقالولي خلصوا !

صممت المديرة إعتماذ للحظات لتفكر في
حل سريع ، ثم شرعت حديثها قائلة بهدوء

نسبي :

-طيب ، في مكتبة قريبة من هنا بتفتح من
بدري ، هاعملك مأمورية وتروحي تجيبي
على أد الكمية اللي ناقصة !

تنهدت ليلة في إرتياح عقب سماعها هذا
الإقتراح ، ومن ثم تسائلت بحماس :

-طب ينفع أخذ حد من البنات معايا ؟

أومأت برأسها موافقة وهي تجيبها بصوت
جاد وحازم :

-اوكي ، بس بسرعة يا مس ليلة ، احنا مش
عندنا وقت كتير ، خلي مس أية السكرتيرة
تعملك المأمورية ، وهاتالي أوقعها !

هزت رأسها عدة مرات قائلة :

-على طول يا مس اعتماد

ثم أولتها ظهرها ، وإنصرفت إلى خارج غرفة
المكتب ..

.....

في غرفة المعلمات ،،،،

إنتهت حنان من رص جميع الهدايا في
الصناديق الكرتونية الخاصة بكل فصل
دراسي ، ثم ناولتها إلى جانبتي التي قامت
بوضعها على الطاولة ، ونظرت إلى تلك
الورقة المطوية في يدها ، وأردفت قائلة بهدوء
وهي تشير بيدها :

-تمام ، كل الهدايا جاهزة ، ودول بتوع البيبي

كلاس !

نظرت إليها هناء بنظرات سعيدة ، وردت

عليها بحماس :

-اشطا ، أنا هاخذ بتوعي

عبست منة بوجهها ، وصاحت محتجة :

-لأ يا هناء، دول بتوعي أصلاً ، أنا بأحب اللون

البينك أوي !

هزت هناء كتفيها معترضة وهي تقول :

-يووه يا منة ، أنا بأحبه أكثر منك

في نفس الوقت ، دلفت هبة إلى داخل

الغرفة، ولم تلاحظ وجود آياز بسبب

إخفائه وراء الصناديق الكرتونية ، فهتفت

قائلة بصوت مرتفع :

-بنات !

سلطت هناء أنظارها عليها ، وسألتها

بإستغراب :

-خير يا هبة ؟

أردفت هبة قائلة دون إكتراث وهي تلوح

بيديها :

-سمعتوا عن موضوع مقلب العصير !

إنتبه آياز للحديث الدائر ، ورفع رأسه للأعلى

لينظر نحو صاحبة الصوت ، ولكنه لم يتمكن

من رؤيتها بوضوح ، فقد كانت الصناديق

تحجب الرؤية عنه

ضيققت منة عينيها في إندهاش ، وفغرت

شفتيها بـ:

-مقلب !

إستدارت جانيت برأسها نحوها متسائلة

بهدوء :

-ده عبارة عن ايه ده ؟

ردت هبة على تساؤلاتهم بحيرة ب :

-أنا اللي بسألکم ؟

هزت هناء كتفيها ، وزمت شفتيها لتجييها

بفتور :

-لأ مش عارفة الصراحة

هتفت منى قائلة بصوت شبه محتد وهي

تشير بكف يدها :

-ما تقولي يا بنتي في ايه ؟

أخذت هبة نفساً عميقاً ، وزفرته على عجالة

، ثم ردت عليهن قائلة بنبرة غير مبالية :

-وأنا في التويلت سمعت رانيا بتكلم عن
مقلب عصير عملته في المز الأمريكاني
ولبسته لريمو٢

إرتسم على أوجه المعلمات علامات الذهول
الممزوجة بالصدمة ، فقد كان آياز يجلس
معهن في الغرفة ، وحديث هبة غير المكتثر
عنه يضعهن في موقف حرج معه ..

بينما أصيب هو بصدمة بعد تلك العبارات
القوية عنه .. وفغر فمه مندهشاً ، ولكنه لم
يعقب .. اكتفى بالتحديق أمامه بذهول٢
شهقت هناء قائلة وهي تضع يديها على
ثغرها ، ونظرت إلى رفيقتها منة بتوتر :

-أوبا-

بينما تابعت هبة حديثها بحماس وهي تلوح
بيديها في الهواء ، وعينيها تلمعان بشدة :

-حتى الباسكويتة ده ليهم حق يتشاكلوا عليه

، ده لسه بسلوفانتته !ه

فغرت حنان ثغرها مشدوهة بكلمات هبة

الصريحة .. وهمست هناء قائلة يارتباك :

-أوبا ، كده كملت وش ٢

ركضت منة في إتجاه هبة ، ثم أمسكت بها

من ذراعها ، ودفعتها جبراً للخلف وهي

تهتف بجدية واضحة :

-تعالى برا يا هبة !

إستغربت هبة مما تفعله معها زميلتها ،

وسألتها مندهشة :

-فى ايه ؟

مالت عليها برأسها ، وأجابتها بخفوت جاد :

-المز اللي بتكلمي عنه موجود هنا معنا !

إتسعت مقلتي هبة في حرج شديد ،
ورفعت حاجبيها للأعلى ، وصاحت معاتبة :
-مش تقولولي أسكت بدل ما أنا عمالة أكر
كل حاجة كده !!!!

ردت عليها منة بصوت شبه محتد :

-هو حد لحق يوقفك !

حركت هبة فمها للجانبين ، وأردفت قائلة
بتوتر واضح في تعابير وجهها وتصرفاتها :

-ربنا يستر

ثم إبتلعت ريقها وتساءلت بإضطراب :

-هو بي فهم عربي ؟

لوت منة فمها للجانب وأجابتها بثقة وهي
ترمقها بنظرات إستنكار :

-أكيد طبعاً !

.....

حك آياز رأسه قليلاً ، وظل يعبث بقلمه
الحبر في حيرة بائنة على قسماته .. بينما
ساد صمت حرج في الأجواء ..

إختلس هو النظرات نحو المعلمات
المتواجداات بالرفة ، فلاحظ التوتر البادي
عليهن ، فضغط على شفثيه ، وحدث نفسه
مستفهما :

-عصير ، رانيا ، مز .. مميمم.. ريمو ! هما
بيتكلموا عن موضوع الjuiceاللي كان على
الStuffبتاعي !

أجفل عينيه قليلاً ، وحاول ربط ما حدث في
السابق بما قيل قبل لحظات ، وتهد بعرق
وهو يتابع حديث نفسه ب :

-واضح كده أني ظلمت حد في الموضوع ده !

فرك آياز وجهه بكفيه بعد أن ترك القلم
الحبر على سطح الطاولة ، ثم أرجع رأسه
للخلف ، وتساءل بفضول :

-بس ليه هي عملت كده ؟

.....

في ردهة الإستقبال بمبنى الرياض ،،
سارت ليلة في إتجاه عاليها وهي تحمل ورقة
صغيرة مطوية في يدها ، ثم هتفت بصوت
شبه مرتفع :

-تعالى معايا يا عالي !

رمقتها عاليها بنظرات إستغراب ، وسألتها
بهدوء :

-على فين ؟

أجابتها ليلة وهي تشير بكف يدها :

-أنا خدت مأمورية وهانطلع نجيب شرايط

الزينة من برا

إستدارت عاليا برأسها للخلف ، وتابعت قائلة

بصوت جاد :

-أوبس ، بس أنا عندي لسه آآآ...

قاطعته ليلة بنبرة إستعطاف وهي تسبل

عينها :

-بليز عاليا ، أنا مش هاعرف أروح لوحدي ،

بليز .. بليز !

إبتسمت لها عاليا برقة ، ثم أومأت برسها

قائلة :

-اوكي .. يالا !

إحتضنتها ليلة على الفور ، وضمتها بقوة إلى

صدرها قائلة بإمتنان :

-حبيبتى .. حبيبتى !

ثم قبلتها من وجنتها ، فتشدقت الأخيرة
قائلة بنبرة مرحة :

-قلبي يا لولو ، هاجيب بس الbagبتاعتي

-اوكي

.....

خارج مبنى الرياض ،،،

نفخ رامى من الضيق بعد أن مل من كثرة
الإنتظار .. ثم تنهد قائلاً بإنزعاج :

-واضح إن ماليش نصيب أشوفها ، تتعوض

بقى !

فرك عينيه قليلاً ، ثم وضع نظارته
الشمسية على وجهه ، ومن ثم أدار محرك
سيارته ، ولف عجلة القيادة ، وكان على

وشك الإنصراف حينما استشعر قلبه
حضورها ، فإلتفت برأسه عفويّاً نحو البوابة
الرئيسية فأراها تخرج من البوابة وإبتسامة
مشرقة مرتسمة على ثغرها وهي تحدث
رفيقتها ..

فإعتلى ثغره إبتسامة عريضة ، وهتف
محدثاً نفسه بحماس :

-ده أنا حظي من السما !

ثم حرك السيارة في إتجاههما ، فسد عليهما
الطريق بها ، وسلط أنظاره عليها ، وإبتسم
لها ببلاهة ..

إنتفضت عليا مذعورة في مكانها ، ولم تنتبه
إليه ، بل إكتفت بالنظر شزراً ، وصاحت
قائلة بغضب وهي تضرب بكفها مقدمة
السيارة :

-مش تفتح ، ولا احنا هوا قداكم ؟!!!

ترجل رامي من السيارة ، وإبتسم قائلاً ببرود

:

-برضوه لسانك الفلة ده !

إتسعت عينيها مصدومة ، وهتفت قائلة

بذهول :

-إنت !!!

تسمرت ليلة في مكانها مشدوهة بما يحدث ،

ثم أدارت رأسها في إتجاه عالي ، ورمقتها

بنظرات فضولية متسائلة بإستغراب وهي

تشير بإصبعها نحوه :

-هو انتي تعرفيه يا عالي ؟

عقدت عاليًا ساعديها أمام صدرها ، وردت

عليها بضجر وهي تلوي شفيتها :

-معرفة القرف !

أغلق رامي باب سيارته ، ودار حولها ليقف
قبالة عاليا ، ثم رفع نظارته الشمسية أعلى
جبهته ، وحدق بها بنظرات مطولة ، وسألها
بهدهوء :

-عاملة ايه النهاردة ؟ وأخبار الدوخة والترجيع
معاكي ايه ؟

إرتمت علامات التقزز على وجه ليلة وهي
تتسائل بإشمئزاز :

-دوخة وترجيع ، هو في ايه ؟

نفخت عاليا بغضب ، وأجابتها بصوت محدد
وهي ترمقه بنظرات ساخطة :

-واحد ثقيل ورزل بيطاردني في كل مكان !

رفع رامي كفه في وجهها ، وهتف قائلاً
بإحتجاج :

-لأ عندك ، انتي اللي بتيجي في سكتي !
أرخت ساعديها ، وكورت قبضتها ، وأسندتها
عند منتصف خصرها لتصيح بتذمر :

-يا سلام ، طب وحضرتك ايه اللي جايبك
عند مدرستي ؟

تنح رامي بصوت خافت ، ووضع إصبعه
على مقدمة أنفه ليداعبه قليلاً ، ثم أجفل
عينيه ، وأجابها بتلعثم :

-أنا .. آآ.. أنا جاي هنا آآ...

قاطعته بصوت غاضب وهي تشير بيدها :

-طبعاً مش عندك حاجة تقولها

هتف رامى بثقة زائفة بعد أن إنتصب فى

وقفته :

-لأ ، أنا جاي بصفتي ولى أمر

ضيقف ليلة عينيها فى عدم إقتناع ، وسألته

باهتمام :

-إنتParentعندنا ؟

نظر إليها رامى وأجابها بإيجاز :

-أيوه !

سألته ليلة بفضول أكبر وهى تتفرس

ملامحه :

-والد مين بالظبط ؟

لوت عاليا فمها بسخط وهى تضيف

بإستخفاف :

-ها قول ؟

حاول رامى أن يرسم ملامح الجدية على
تعبيرات وجهه التي تفضحه ، فتشدد قائلاً
بصوت أجش ومحتج :

-أكيد يعني مش واقف هنا هزار !
سلطت عاليا أنظارها على السيارة ، وسألته
بضيق :

-وفين ابنك ولا بنتك ؟
أشار رامى بعينه للأمام قائلاً بحماس :

-موجود جوا
إلتفتت عاليا برأسها للخلف ، وسألته
باعتراض وهي ترمقه بنظراتها الحادة :
-جوا إزاي والبوابة أصلاً مش فتحت لحد ؟!!!!
إبتسم لها رامى بإستفزاز ، ثم غمزها وهو
يتابع قائلاً :

-هو موجود ، بس إنتي اللي مش واخدة

بالك ، ومركزة معايا !

نفخت عاليا في وجهه بضيق واضح ، ثم
وضعت قبضتها على ذراع ليلة ، ودفعتها
وهي تقول بإنزعاج :

-يووووه ، يالا يا بنتي ، ده فاضي ، وهيعلنا ،
واحنا مش عندنا وقت

تحركت الإثنتين للأمام متجاهلين وجوده ،
فلحق هو بهما متسائلاً بفضول

-رايحين فين ؟

توقفت عاليا عن السير ، وأدارت رأسها في
إتجاهه ، ونظرت له بحدة ، ثم أشارت
بإصبعها محذرة وهي تنهره :

-لو سمحت متعطلناش !

إبتسم لها ببلاهة قائلاً :

-قوليلي بس يا أبله ، وانا أساعدك

نظرت له بإزدراء ، ثم تأبطت ذراع ليلة ،

وردت عليه بغضب واضح في نبرتها :

-المساعد ربنا

تابعهما رامى بنظراته ، وأعاد وضع نظارته

على عينيه وهو يهمس لنفسه ب :

-وراكى .. هانروح من بعض فين !!

.....

عند غرفة المعلمات ،،،

قامت جانبيت بتوزيع صناديق هدايا الأطفال

المغلقة على جميع المعلمات ، وتهامسن

فيما بينهن على ما قالت هبة .. ولم تسلم

هي من عتابهن اللاذع نتيجة تصرفها

الطائش وتسرعها في التفوه بأي شيء دون
أن تأخذ حذرها ...

نفضت ريمان يديها من التراب العالق بهما
، وسارت في إتجاه غرفة المعلمات لتجدهن
واقفات بالخارج ، فقطبت جبينها ، ونظرت
لهن مندهشة ، ثم أكملت سيرها نحوهن ،
ومن ثم تسائلت بنبرة عادية وهي توزع
أنظارها بينهن :

-في ايه يا بنات واقفين كده ليه برا ؟

أجابتها هناء بتنهيدة إنزعاج :

-أصل هبة عملت كارثة جوا

إزداد إنعقاد ما بين حاجبيها ، وسألتها

ياستفهام أكبر :

-كارثة ايه ؟

أضافت جانبيت قائلة بضيق :

-أووف ، دي كانت حاجة رهيبة !

أشارت منة لريمان بكفها ، فانحنت عليها

الأخيرة ، فهمست لها في أذنها قائلة :

-أصلها قالت قصاد آياز انه المز اللي

بيتخانقوا عليه

فغرت ريمان شفتيها مصدومة ، ورمشت

بعينيها في عدم تصديق .. ثم هتفت بحرج :

-انتي بتكلمي جد ؟

مطت منة شفتيها في ضيق وهي تجيبها :

-اه ، وهو كان أعد وسمع ده كله عنه

وضعت ريمان يدها على فمها ، وتابعت

قائلة بخجل :

-أووف ، يادي الفضايح !

لوحث منة بكفيها لتضيف قائلة بمزاح :

-هي فضايح بعقل ، كده الراجل خد فكرة
لوز اللوز عننا !

إبتسمت جانيت برقة لتضيف بصوت
هاديء وهي مسلطة أنظارها على ريمان :
-خدي المفجأة ، إن إنتي إشرافك معاه !

شهقت ريمان بصدمة وهي جاحظة
العينين :

-اييييه !!!

ظلت لبرهة في حالة ذهول بعد ما سمعته
.. هي وهو في فصل واحد .. وهي لا تطيق
البقاء معه للحظة ، وهو على نفس الحال ،
فيجمعهما الإشراف سوياً ..

أضافت جانيت قائلة وهي تشير بإصبعها
لتننتبه هي لها بعد شرودها :

-ورانيا كمان !ع

إزدادت حالة الصدمة ليها ، فالوضع بات
مأساوياً بالنسبة لها ، لذا هتفت محتجة
وهي عابسة الوجه :

-لأ بتهزي !!!

هزت جانيت رأسها بهدوء وهي تكمل بـ :

-هو التوزيع كده !

زمت ريمان شفيتها وصاحت بإعتراض :

-لأ يا جانيت ، أنا مش موافقة

ردت عليها جانيت بهدوئها المعتاد :

-طب أجيب مين مكانك ، وكل واحدة ليها

دورها !!

نفخت ريمان بضيق وأصافت قائلة بتذمر :

-أوف ، أنا مش عاوزة أكون معاه

إبتسمت لها جانيت ، ووضعت يدها على

كتفها ، وربت عليها قائلة بصوت رقيق :

-معلش ، هي ساعة بالكثير وخلص

ضربت ريمان الأرض بقدمها بعصبية ،

وتابعت بإنفعال :

-يابابي يا جانيت ، كنتي حطي أي حد تاني

رمشت جانيت بعينيها وهي تضيف ببراءة :

-ما إنتي معاكي رانيا

إغتاظت ريمان من ردها ، وصاحت بضجر :

-أنا أصلاً مش بأطيقها

ثم أولتها ظهرها ، وظلت تنفخ بعصبية ..

تنهدت جانيت بتعب ، وتابعت قائلة بتوسل

:

-معلش استحملوا بعض يا ريمو ، هي
ساعة وخلص بقى ، بليز.. أنا عندي لسه
شغل أد كده

صرت ريمان على أسنانها لتضيف بحق :

-بجد اليوم قفل معايا ، إن كانت هي ولا
اللي اسمه آياز ده !

ثم إلتفتت بجسدها كلياً لتنظر إلى جانيت ،
فتفاجئت بآياز يقف على عتبة الغرفة
ومحدقاً بها بنظرات حانقة .. فإبتلعت ريقها
بصعوبة .. وتوردت وجنتيها .. وأجفلت عينيها
سريعاً في حرج شديد منه

!!!

.....

واصل قراءة الجزء التالي

الفصل الثامن عشر

الفصل الثامن عشر :

حاولت ريمان أن تتصرف بصورة طبيعية
وكانها لم تتفوه بأي حماقات أمام آياز الذي
لم يكف عن رمقها بنظرات إستهجان
لإسلوبها الفظ معه ..

إبتلعت ريقها بهدوء ، ورفعت رأسها في
شموخ .. ونظرت بكبرياء للجانب ..

أخذ آياز نفساً عميقاً ، وحبسه في صدره
ليحافظ على هدوئه .. ثم أردف قائلاً ببرود
جاد :

-يا ريت مس جانيت تبلغي الteachers اللي
معايا يستعدوا ، أنا رايح الClass!

ثم رمق ريمان بنظرات قوية ، وسار
مبتعداً عنها ..

حاولت هي ألا تتبعه بعينيها وهو ينصرف ،
فقاطعت جانيت نظراتها المختلصة بصوت
معاتب :

-مش تاخدي بالك يا ريمان ، هايقول عنك
ايه الوقتي ؟

مطت شفتيها لتجيبيها بتنهيذة مطولة :

-يقول اللي عاوزه ، I don't care (أنا لا أهتم

(

.....

في المكتبة القربية ،،،

توفقت كلاً من عاليا وليلة أمام إحدى
المكتبات ، وتبادلت كلتاهما حديثاً خافتاً ، ثم
بدأت ليلة حديثها بجدية وبصوت مرتفع بـ :

-لو سمحت عاوزين شرايط زينة !

إلتفت البائع نحوها ، ورمقها بنظرات حادة
متسائلاً بإستغراب :

-اللي هي ازاي ؟

ردت عليه ليلة وهي تشير بيدها :

-اللي بتتعلق في العيد ميلاد وبتلمع !

هز رأسه عدة مرات ، وأجابها بجمود :

-أها ، لأ مش عندي !

زفرت ليلة في ضيق ، ونظرت إلى عاليا

وسألتها بإنزعاج :

-أوف ، طب وهانجيبها منين الوقتي ؟

هزت عاليا كتفيها قائلة بحيرة :

-مش عارفة

إستدارت ليلة برأسها ناحية البائع وسألته

بجدية وهي ترفع حاجبيها للأعلى :

-طب مافيش مكتبة تانية قريبة من هنا

بتبيع الشرايط دول ؟

لوى فمه ليحيبها بجموده المستفز :

-لأ مافيش

نفخت هي من الضيق ، فأشارت لها عاليا

بعينيها لتتحرك كلتاهما بعيداً عنه ،

وأضافت قائلة بحنق :

-بياع مستفز ، كأنه بيقول شكل للبيع

ضغطت ليلة على شفيتها في ضيق وهي

تقول :

-سيبك منه ، احنا هانعمل ايه ؟

-أنا أعرف مكتبة فيها كل اللي انتو عاوزينه

!!!

قالها رامى بصوت مرتفع وهو يرسم على وجهه ابتسامة سخيفة .. فحدقت به كلاتهما بإندهاش واضح ، ثم رمقته عاليا بنظرات ساخطة ، وتجاهلته تماماً ، وسلطت أنظارها على ليلة وهتفت قائلة بحنق :

-ياللا يا ليلة ، الجو كتم فجأة !

تحرك نحوهما وهو يتابع بهدوء :

-أنا غرضي أساعد

وضعت ليلة كفها على ذراع رفيقتها ، وضغطت عليه قليلاً وهمست لها وهي محدقة بها :

-استني يا عاليا ، مش يمكن يعرف آآ...

قاطعتها عاليا بنبرة صارمة وهي ترمقها

بنظرات حادة:

-ياللا يا بنتي ، ولو عاوزة تروحي معاه

اتفضلي !

أومات ليلة برأسها نافية ، وردت بخفوت :

-لأ خلاص !

ثم تحركت كلتاهما بعيداً عنه .. فتنهد هو

بيأس قائلاً :

-والله أمل تعبت من كتر المناهدة !

ثم إبتسم لنفسه بغرور مضيئاً :

-بس انا مكمل إن شاء الله !!

رن هاتفه الموضوع في جيبه ، فدس يده

ليخرجه ، ونظر إلى شاشته ، ثم لوى فمه في

إمتعاض ، وأخذ نفساً عميقاً ، وزفره مرة
واحدة .. وضغط على زر الإيجاب ، ومن ثمّ
وضع الهاتف على أذنه ليهتف بحماس
زائف :

-باشمهندس !

صاح والده سرحان بصوت جهوري متسائلاً
:

-انت فين يا رامي ؟

رد عليه بهدوء حذر وهو مسبل عينيه :

-مع آياز يا بابا

أردف والده قائلاً بصوت شبه حاد :

-وهافضل وياه كتير ، مش في شغل ورانا ؟!

أجابه على مضض قائلاً :

-ايوه ، بس أنا آآ....

قاطعه بنبرة صارمة بـ:

-عاوزك تيجي المعرض على طول ، في
حاجات عاوز أتكلم فيها معاك ، وإنت مكبر

دماغك

هز رأسه بخفه وهو يجيبه بإمتعاض:

-حاضر يا بابا ، أنا جاي !

-ماشي ، مستنيك !

-أوكي ، سلام !

ثم نفخ رامي بضيق بائن وهو يعيد وضع
الهاتف في جيبه محدثاً نفسه بإنزعاج :

-صعب إن الواحد يتفاهم مع عقلية زي

البشمةهندس سرحان عليه !

.....

في ردهة الإستقبال ،،،

كانت ريمان في طريقها إلى قاعة الدراسة
الخاصة بـ (بيبي كلاس) وهي تغمغم مع
نفسها بضيق :

-عادي يا ريمو ، مافيش حاجة حصلت ،
اهدي واتصرفي على طبيعتك ، مش نهاية
العالم يعني إنه يعرف إني مش طايقاه !
ماهو ده الطبيعي بعد اسلوبه المستفز
معايا !

رأتها هبة على حالتها تلك ، فضيقت ما بين
حاجبيها ، وسألتها بإستغراب :

-ايه يا بنتي ؟ إنتي ماشية تكلمي نفسك ولا
ايه ؟

تنحنحت بخفوت ، وإبتسمت لها قائلة :

-ماتخديش في بالك

بادلتها الإبتسام وهي تقول :

-ماشي يا ريمو !

ثم عبست ملامح وجهها قليلاً لتضيف

بجدية :

-المهم أنا كنت عاوزه أقولك عن حاجة كده

قطبت جبينها بشدة بعد أن رأت تبدل

ملامح هبة ، وتوجست خيفة من أن يكون

هناك أمراً ما طارئاً قد حدث ، فسألتها

بفضول عجيب :

-حاجة ايه ؟

.....

في قاعة الدراسة الخاصة بمرحلة (بيبي

كلاس) ،

وضع آياز يديه في خصره ، وجاب بعينيه

مساحة القاعة .. ثم مط فمه قليلاً ، وسلط

أنظاره على الطاولات الدائرية الصغيرة
المتراصة على مقربة من بعضها البعض ..
وحدث نفسه قائلاً :

-تمام ، أنا أقدر أستغل المساحة الفاضية
اللي في الCorner دي وأعمل فيها Fun Club
for the kids ..ممم.. وممكن كمان أزود آآ..

قاطع تفكيره المتقطع صوت أنثوي
متحمس بلكنة عجيبة :

-Any help (أي مساعدة)

إستدار آياز برأسه ناحية صاحبتة ، ورمقها
بنظرات متفحصة ، ثم أجابها بإيجاز :

-No (لا)

اقتربت منه رانيا ، وتابعت حديثها بصوت
أكثر حماسة وهي ترمش بعينيها بطريقة
بلهاء :

-ليه بس كده ؟ ده أنا بأفهم والله ، مايعركش

إني شكلي كده !

ثم أشارت إلى نفسها بإصبعها ، وأضافت

بتفاخر :

-أنا أستاذة لغة عربية أد الدنيا ، بس دماغي

لاسعة شوية

لم يجبها آياز ، وأشاح بوجهه بعيداً عنها ..٢

وقفت هي إلى جواره ، ونظرت حولها وهي

تقول :

-ماشاء الله ، الكلاس بتاعك واسع ، يعني

هاتقدر تاخذ راحتك فيه ، عارف بقية (

الكلاسات) ضيقة وآآ..

ضيق آياز عينيه ليرمقها بنظرات إستهجان ،

فإبتسمت له إبتسامة عريضة قائلة :

-تلاقيك بتقول كلاسات دي ايه ؟ يعني
فصل ، بس أنا بأجمعها جمع مؤنث سالم
ههههههههه ..!

ثم تنهدت بحرارة وهي مسبلة عينيها عليه ..
فقد لعب الحظ لعبته أخيراً معها ، وأصبحت
مساعدته لبعض الوقت .. لذا قررت أن
تستغل الفرصة التي جاءت على طبق من
ذهب ، وتتقرب منه .. لعلها تظفر به في
النهاية ...

أغمض آياز عينيه للحظة ، ونفخ في ضيق
محدثاً نفسه بضجر :

-واضح إنهاCase(حالة) !

وصلت ريمان هي الأخرى إلى القاعة
الدراسية ، وحاولت أن تبدو هادئة في
تصرفاتها مع آياز كي يمر اليوم بسلام ...

ولكنها إستشاطت غضباً حينما رأت رانيا
أمامها .. خاصة بعدما عرفت من هبة عن "
المقلب " المدبر لها .. فكزت على أسنانها
بغل ، وإحتقنت عينيها بصورة واضحة ،
و.....!!!!

.....
واصل قراءة الجزء التالي

الفصل التاسع عشر

الفصل التاسع عشر :

في القاعة الدراسية الخاصة بمرحلة (بيبي

كلاس) ،،،

تشنجت تعابير وجه ريمان بصورة واضحة ،
وعضت على شفيتها من الغيظ ، ثم
صاحت بصوت شبه محتد :

-رانيا !

إلتفتت هي نحوها ، وكذلك آياز .. ثم
ضيقت عينيها في إستغراب وهي تتسائل
بتعجب :

-في حاجة يا ريمان ؟

وقفت ريمان قبالتها ، وهتفت بحنق وهي
محدقة بها :

-اه في !

استغرب آياز من الحالة العصبية البادية
على ملامحها ، ولكن لم يهتم للأمر ، و أثر
عدم التدخل في حوارهما .. وتراجع في إتجاه
مكتبه الموضوع في زاوية القاعة ..

حدجت رانيا ريمان بنظرات متحدية ،
ووضعت يدها في منتصف خاصرتها، وسألتها
وهي تلوي شفيتها :

-خير .. عاوزه ايه ؟

صرت الأخيرة على أسنانها بغل وهي تصيح
بضيق :

-ايه اللي عملتية فيا ده ؟

رفع آياز وجهه للأعلى لينظر إلى ريمان
بغموض .. ولعب الفضول دوره معه في
إثارته لمعرفة ما يحدث بينهما ..

سألتها رانيا ببرود :

-عملت ايه ؟

قبضت ريمان على ذراعها ، وكزت على
أسنانها قائلة /

-اعملي نفسك مش عارفة !

أزاحت رانيا يدها من عليها ، وسألتها بعدم
فهم :

-انتي بتكلمي عن ايه ؟

همست قائلة بعد أن لاحظت متابعة آياز
لهما :

-العصير ، وآياز ، ولا عاملة نفسك نسيتي؟!

قرأ آياز اسمه من على شفتي ريمان ، وبدأ
يربط خيوط المسألة معاً ... وخبّن أن يكون
خلافهما له علاقة بموضوع المقلب .. فهو
القاسم المشترك بينهما ..

هزت رانيا رأسها بطريقة غير مبالية ،
وأجابتها بفتور :

-أها .. وأنا مالي بالموضوع ده

إتسعت مقلتيها بشدة وهي تتابع بغيظ :

-هبة قالتلي على كل حاجة

قطبت رانيا جبينها بإندهاش مرددة :

-هبة !

أومأت ريمان برأسها بقوة ، وهتفت بصوت

شبه منفعل :

-ايوه هي سمعتك بتتكلمي عن ده ، إنكري

!

ردت عليها رانيا بنبرة حادة ب :

-ايه الهبل اللي بتقوليه ، انا معملتش حاجة

!

حدجتها ريمان بنظرات متوعدة وهي تضيف

:

-عامّة ، أنا مش هاسيب حقي معاكي وآآ...

-خلصتوا إنتو الاتنين !

انتبهت الإثنيتين إلى صوت آياز شبه المنزعج
الذي قاطعهما ، ونظرتا نحوه ، بينما تابع هو
بصوته الآجش :

-مشاكلكم الشخصية تحلوها برا ، لكن
)you have to stick to the rules
عليكما الإلتزام بالقوانين (

أطرقت رانيا رأسها للأسفل ، وتقوس فمها
للجانب.. بينما حدجته ريمان بنظراتها
المحتقنة ، ولم تتفوه بكلمة ، وغمغمت مع
نفسها بغضب :

-مش هاعدي اللي حصل ده !

نظرت رانيا إلى ريمان من طرف عينها ،
وحدثت نفسها بتشفي :

-ماهو المثل بيقول اعرف عدوك وعلم عليه
، وأنا هاعمل كده معاكي ! أل أسيبلك المز
أل .. دي فيها رقاب !

أشار آياز بيده قائلاً بجدية :

-عاوزين نتفق على اللي هيتم داخل
الكلاس

هتفت رانيا دون تردد وهي ترسم على ثغرها
إبتسامة بلهاء :

-أنا موجودة عشان أساعدك ، شوف إنت
عاوز ايه مني

هز رأسه بخفة ليقول بهدوء حذر :

-تمام يا مس آآ...

هتفت بحماس أشد وقد إتسعت إبتسامتها :

-رانيا ، ومافيش داعي للتكليف ، إحنا زملا
مع بعض

رمقها هو بنظرات شبه ساخطة ، ولم يعقب
.. ثم بهدوء سلط أنظاره على ريمان ، وسألها
ياقتضاب :

-وحضرتك يا مسReady (مستعدة) ؟

ردت عليه ريمان بإيجاز وهي تبادلته نظرات
فاترة :

-yes(نعم)

-اوكي .. !

.....

عند مدخل مبنى الرياض ،،،،

كان الصمت هو سيد الموقف طوال طريق
العودة بين عاليا وليلة .. إلى أن قطعته
الأخيرة قائلة بجدية :

-طب هانقول لمس إعتماا ايه ؟

ردت عليها عاليا بإختصار وهي محدقة
أمامها :

-معرفش !

سألها ليلة مجدداً ب :

-يعني الممر هيتساب كده ؟

تنهدت بإنهاك وهي ترد قائلة :

-اسألها

وقفت ليلة في مواجهة رفيقتها ، ونظرت لها
بتمعن وهي تسألها بإهتمام :

-في ايه يا عاليا ؟ مالك ؟

أشاحت بوجهها للجانب وهي تجيبها بضجر

بائن:

-ماليش ، أنا كويسة

هزت ليلة رأسها معترضة وهي تضيف :

-كويسة إزاي بس ، انتي أحوالك متغيرة من

ساعة ما آآ...

قاطعتها عاليا وهي تشير بإصبعها محذرة :

-لو هاتكلمي عن سيرة الشاب إياه يبقى

بناقص

زمت ليلة شفيتها لتقول بجدية :

-ماهو مش طبيعي اللي بيحصل بينكم

صاحت بها عاليا بنفاذ صبر :

-مافيش بينا حاجة

تسائلت ليلة بإستفهام وهي محدقة بها

بتفرس :

-أومال آآآ..

قاطعتها عاليا بصرامة وهي ترمقها بنظرات

قوية وثابتة :

-شوفي يا ليلة ، من الآخر كده ده واحد

حصل بيني وبينه كام موقف كده صدفة ،

وانتهوا ، مش حكاية عشان أعيد وأزيد فيها

رفعت ليلة كفيها أمامها وابتلعت ريقها

وهي تقول بتوجس :

-أوكي .. خلاص ، بلاش بس تقفشي !

تقوس فم عاليا وهي تتابع ب :

-لا بأقفش ولا غيره ، أنا عاوزة أركز في الشغل

-تمام .. تمام

ثم أضافت بجدية وهي تشير بعينيها :

-طب يالا نشوف هانعمل ايه في بقية

الديكور

إبتسمت ليلة إبتسامة باهتة وهي تضيف :

-نسأل سحر ممكن يكون عندها فكرة

-اوكي .. وأنا برضوه هسأل فريال هي

ساعات بتعين حاجات تنفع كـDicoration في

وقت الزنقة

-حلو أوي !

.....

في ردهة الإستقبال ،،،

وقفت ناظرة الرياض الأستاذة إعتماذ في

وسط الردهة وهي ممسكة بمفكرة ما في

يدها ، وبيدها الأخرى كانت تشير إلى إحدى

الزوايا قائلة بجدية :

-البانر ده معوج ، محتاج يجي يمين شوية

أومأت السكرتيرة أية برأسها وهي تجيبها

بخفوت :

-اوكي ، هاخلي الدادة تعدله

ثم تلفتت الناظرة حولها وهي تتسأل

بصوت متصلب :

-فين الهدايا بتاعة الأطفال ؟

ردت عليها أية بهدوء تام :

-محطوپين هناك

مطت شفيتها قائلة بصوت جامد :

-اوكي ، يبقى فاضل أشوف الكلاسز وأتأكد

إن كل حاجة تمام

-أها

تحركت الإثنتين في إتجاه القاعات الدراسية
للتأكد من إنتهاء تجهيزها ..

.....

بعد برهة ، كان كل شيء قد أصبح جاهزاً
من أجل إستقبال الأطفال ..

واستعد حارس البوابة الرئيسية لمبنى
الرياض " سيد " لفتحها من أجل مرور
الصغار للداخل ، والترحيب بهم في أول
أيامهم الدراسية ..

دلف الصغار ومعهم أولياء أمورهم لداخل
المدرسة ، ومروا عبر الممر الذي تم تزيينه
بالبالونات والشرائط اللامعة .. ووقفت بعض
المعلمات على الجانبين لتقدم الحلوى
والسكاكر لهم ..

كانت الإبتسامات السعيدة والممزوجة
بضحكات أسرة للأطفال تخطف قلوب
الجميع ..

وتم إلتقاط العديد من الصور التذكارية لهم
في أول لحظاتهم الدراسية ..

كذلك تعالت أصوات الموسيقى الحماسية
الخاصة بالأطفال بتضفي المزيد من
السعادة والبهجة على الجميع ..

.....

أخذ آياز نفساً عميقاً ، وزفره على عجالة ،
وبدى متوتراً للغاية وهو يتقرب وصول أول
الأطفال للقاعة .. ورغم مهارته وخبرته
وحرفيته مع الصغار بالخارج ، إلا أنه مازال
يرتبك ويتوتر بشدة مع أول يوم دراسي ..

فمع مطلع كل عام ، يختبر قدراته مع
الصغار ، ويحقق متعته برؤيتهم يكبرون
نصب عينيه ..

راقبته رانيا بنظرات والهة ، وظلت تطلق
تنهيدات خافتة ، وتمت مع نفسها قائلة :

-يا لهوي عليك وإن تقييل وراسي .. آآآخ
منك ، يا سلام لو تديني ريق حلو ، هناخذ
وندي سوا ، ونبقى حاجة !

تابعتها ريمان بنظرات متأففة ، ولوت
شفتيها وهي تغمغم بخفوت :

-أبرد بني آدمة قبلتها في حياتي ، تعمل
كوارث وتدعي البراءة ، معندهاش إحساس !
نظرت لها رانيا بغموض متسائلة بإندهاش :

-بتقولي حاجة يا ريمان

أشاحت بوجهها بعيداً عنها بعد أن رمقتها
بنظراتها المحتدة ، ثم أجابتها بإيجاز :

No- (لأ) !

لمح آياز جموع الأطفال وبصحتهم ذويهم
وهم يقتربون من قاعته ، فأخذ نفساً عميقاً
وحبسه في صدره لوهلة .. ثم زفره على مهل
.. ورسم على ثغره إبتسامة عريضة ..

إنتصبت رانيا في وقفها ، واقتربت من آياز ،
و صاحت بحماس ساخر :

-نستعد بقى للتتار اللي جاي

نظر لها آياز بإستغراب ، وردد عفويّاً :

-تتار !

رفعت حاجبيها للأعلى وهي تجيبه مازحة :

-أقصد الهكسوس يعني ، ده احنا هانشوف

أيام عجب !

عبس وجهه وهو يسألها بحيرة :

-نعم ؟

مطت شفيتها هامسة :

-أصل انت متعرفش ، ده أوحش يوم في

السنة كلها

نظر لها بإستغراب قائلاً :

-مش فاهمك

غمزت له وهي تقول بخفوت :

-هاتعرف دلوقتي يا مستر !

نظرت ريمان إلى كليهما بضيق ، وعقدت

ساعديها أمام صدرها ، وظلت تهز ساقها

بعصبية .. فالحوار الخافت بينهما يزعجها

بشدة .. فشیطان نفسها وسوس لها بأنهما

يعقدان اتفاقاً ما حولها ..

لذا سلطت أنظارها الحادة عليهما أكثر ،

وضغطت على أسنانها وهي تحدث نفسها

قائلة :

-يا ويلكم إنتو الاتنين لو عاملين رباطية عليا

!

ولج أول الصغار إلى داخل القاعة ومعه

والديه ، فهتفت الأم بعاطفة واضحة وهي

تضع يدها على كتف ابنها :

-يالاي بودي ، ده الكلاس بتاعك

أردف آياز قائلاً بإبتسامة خفيفة وهو محقق

بالصغير :

Welcome to school- (أهلاً بك في المدرسة

(

نظر له الأب بإستغراب ، ولم يهتم به .. ثم
أشار لصغيره بيده ليجلس على إحدى
الطاولات ..

اقتربت ريمان من الصغير وبدأت في
مداعبته والترحيب به بأريحية واضحة ..
واستجاب الصغير لها وتعالى ضحكته
البريئة ..

حدق آياز في الأبوين بضيق ، ولكنه عاود
النظر إلى باب القاعة ليستقبل البقية ..
دلفت عائلة أخرى للداخل ، ومعها توأم من
الذكور .. فإنحنى آياز بجسده للأمام ومد يده
لمصافحة أحدهما قائلاً بإبتسامة :

-هاي !

رمقه الصغير بنظرات مذعورة ثم صرخ بحدة
وقد إلتصق بوالدته التي ضمته إلى صدرها ،
وقالت بهدوء :

-اهدى يا سو .. متخافش يا قلبي ، عمو
بيسلم عليك بس

بكى الصغير بصراخ جلي ، فقبلته والدته
من جبينه ، وظلت تربت على ظهره محاولة
تهدئته ...

أشار الأب بيده لآياز قائلاً بجدية وناظراً إليه
بجمود :

-معلش ممكن ترجع لورا شوية ، ابني
خايف منك

ضيق آياز عينيه الحانقتين بشدة ، ورمق
الأب بنظرات قوية قائلاً :

Excuse me (معذرة) ، بتكلمني أنا ؟

امتعض وجه الأب قائلاً بتذمر :

-في إيه يا كابتن ، بأقولك ابعده شوية ، انت
مش شايف ياسين مرعوب إزاي منك

قطب آياز ما بين حاجبيه ، وأردف قائلاً
بثبات

-بس آآ...

قاطعته رانيا قائلة بصوت حاني :

-هاي سو .. !

نظر لها آياز بغل ، بينما تجاهلته هي دون
قصد ، فقد

تداركت الأمر سريعاً بحكم درايتها بنوعية
الأباء هنا، وخمنت عدم معرفة الوالد بأنه
يتحدث مع المعلم الخاص بإبنه .. وخشيت
من عدم تقبله للأمر لذا جئت على ركبتيها

أمام الصغير، ومدت يدها تصافحه قائلة
بصوت طفولي :

-إزيك يا سو ؟ مش ده اسمك برضوه ؟
هز الصغير رأسه إيجابياً .. بينما هتف أخيه
التوأم قائلاً :

-وأنا اسمي يوسف

صافحته بقوة وهي تهتف بثقة :

-هاي يوسف ، وأنا مس رانيا !

تابعها آياز بإنزعاج ولم يتفوه بكلمة ..
وترقب وصول البقية ..

وبالفعل دخل للقاعة مجموعة من العائلات
وبصحتها الصغار .. وبدأوا في الإنتشار في
أرجائها ...

بدى آياز كالتائه وسط ما يحدث ..

فلا أحد يعيره الإنتباه ، وغالبية الموجودين
يتعاملون مع ريمان ورائيا فقط .. وهو
كالغريب بينهم ..

حك طرف ذقنه بضيق .. ثم إعتدل في
وقفته ، وبدأ يتجول بين طاولات الصغار
مقدماً نفسه للجميع قائلاً بإبتسامة
مصطنعة :

-هاي ، أنا مستر آياز ، How are you (كيف
حالك ؟)

استجاب عدد محدود من الأطفال لحديثه ،
وتجاهله الأكثرية إلى أن حانت لحظة
إنصراف أولياء الأمور ..

فقد ولجت ناظرة الرياض للداخل ، وصاحت
بصوت مرتفع ورسمي :

-بعد إذنكم ، الوقت المخصص للجلوس مع
أطفالكم انتهى ، وده ميعاد مستر آياز
عشان يتعرف اكثر على الأطفال ويتعامل
معاهم !

بدى الإندهاش واضحاً على أوجه الحاضرين
، وصاح أحدهم بقوة :

-مين ه؟

وأضاف آخر بإستغراب :

-إيبيه ؟

زمت إحدى الأمهات فمها بإمتعاض قائلة :

-مستر !!

وتابعت أخرى بضجر :

-مدرس راجل ؟

تسائلت أخرى بتذمر :

-طب ازاى ؟

هتفت الأستاذة إعتماذ بثبات وهي ترفع
حاجبيها للأعلى :

-اتفضلوا يا حضرات .. !

إعترض أحد الأباء بقوة قائلاً :

-مش ممكن

بينما تسائل آخر بصوت مصدوم :

-انتو إزاى تعملوا كده فى أولادنا ؟

هتف والد آخر متسائلاً بحنق

-خدتوا رأينا قبل ما تجيبوا مدرس راجل

لعيالنا ؟

لم يتوقع آياز أن يتلقى هذا القدر من
الهجوم الشرس على شخصه وهو لم يبدأ
بعد ..

ولكن تلك هي طبيعة الشعب المصري
الذي عهد أن تكون المسئولة عن تلك
المرحلة الحرجة والهامة في حياة الطفل
معلمة متخصصة .. وليس رجلاً! ٣

صاحت الأستاذة إعتماذ بإصرار وقد بدى
التجهم على وجهها بـ :

-لو سمحتم أي نقاش او اعتراض هنتكلم
عنه برا ، اتفضلوا !

صرخ والد ما بصوت محتج :

-دي مهزلة !

في حين أضافت والدة ما قائلة بسخط :

-أنا مش عارفة نوعية الإدارة اللي بنتعامل
معاها ، بجد قلة ذوق !

إستدارت الأستاذة إعتماذ برأسها للجانب ،

وهتفت قائلة بصوت رسمي :

-مستر آياز تعامل مع أطفالك !

رد عليها بخفوت وهو يبتلع ريقه :

-أوكي مس اعتماد

وبصعوبة بالغة بدأ أولياء الأمور في

الإنصراف واحداً تلو الآخر خارج القاعة ،

وتعلی مع إنصرافهم صوت صراخ الأطفال

وصياحهم ..

ومنهم من نهض من مقعده الضئيل

ليركض خلف والدته ، فمنعته ريمان من

الذهاب .. ومنهم من بكى بصوت مرتفع

يضم الآذان فأسرعت رانيا بتهدئته وإلهائه ..

أخذ آياز نفساً أكثر عمقاً وتأمل المشهد

الفوضوي من حوله برعب واضح .. فما هو

مقبل عليه هو أهم لحظات حياته المهنية

!!!

.....

واصل قراءة الجزء التالي

الفصل العشرون

الفصل العشرون :

ابتلع آياز ريقه ، ورسم على وجهه ابتسامة
بلهاء وعقد العزم على التصرف بحكمة مع
هؤلاء الصغار ..

اقترب من أحدهم ، والذي كان يبكي بغزارة ،
ومد يده ليصافحه قائلاً بخفوت :

-هاي ، أنا مستر آياز ، بلاش تعيط !

نظر له آياز بإندهاش وكان على وشك الرد ،
ولكنه أطلق صرخة مكتومة حينما ضربه
صغير ثالث بقوة برأسه في ظهره .. فتأوه وهو
يستدير نحوه قائلاً بصوت متشنج :

-مين عمل كده ؟

ركله الصغير بقوة في ساقه وهو يصرخ فيه :

-عالم ، مامي .. مامي

تأوه آياز من الألم وتراجع مبتعداً عنه قائلاً
بضيق :

-آآي .. في ايه ؟

ضيق الصغير عينيه ورمقه بنظرات حادة ،
وهتف قائلاً بصوته الغاضب :

-هات مامي وإلا هاضربك !ع

فغر آياز فمه مشدوهاً ب :

-نعم !

صاح الصغير بصوت باكي :

-مامي .. مامي !

خطت صغيرة فوق البقايا الملاقة على
الأرضية ، ونظرت إلى آياز بنظرات بريئة ،
وهتفت بصوت شبه مسموع :

-عاوزه أعمل تويلت !

أفرغ الصغير عمر ما في معدته مجدداً ،
ولكن تلك المرة على الطفلة الصغيرة ..
والتي بكت بصوت منزعج وهي تقول :

-مامي ، البوي (ولد) ده رجّع عليا !

رأى آياز المنظر فشعر بالغيثان يجتاحه ،
وأنه على حافة الإنهيار العصبي .. فلم يتخيل
أن يكون المشهد بالداخل هكذا .. ١

صاحت الصغيرة مرة أخرى :

-عاوذة أعمل Pee-

وظلت تتلوى بجسدها أمامه لتشير إلى
حاجتها الملحة للدخول إلى المرحاض ...

رمقته ريمان بنظرات متشفية ، فقد كان
متعالياً بدرجة كبيرة ، وها قد لقي ما
يستحقه على يد هؤلاء الأطفال ، ولم تحاول
التدخل ، وتقوس فمها بإبتسامة ماکرة ،
وإكتفت فقط بتهدئة من معها من صغار
بمهارة ..

لوت رانيا شفتيها مشمئزة ، وأدارت ظهرها
له ، وتحدثت مع بعض الصغيرات
الجالسات إلى جوارها ...

.....

في ردهة الإستقبال ،،،،

تزاحم أولياء الأمور حول الناظرة ، وتشاحنوا
معها بسبب تعيين معلم ذكر لأطفالهم
الصغار ..

حافظت الأستاذة إعتماذ على هدوئها ، وردت
على جميع أسئلته الغاضبة ببرود تام ..

وفي النهاية صاحت بصرامة :

-أظن إننا كإدارة قادرين على توفير أمهر
وأكفأ المعلمين هنا .. ومش هانعرض
مصلحة أطفالنا للخطر !

هتف أب ما قائلاً بحنق :

-بس محدش خد رأينا ، كان لازم على الأقل
تخطرنا بده !

ردت عليه الأستاذة إعتماذ بجمود :

-مرحلة البيبي كلاس هي مرحلة تمهيدية
للقادم ، ووجود مستر آياز فيها هايضيف
للأطفال مش هايققل

أردفت والدة ما قائلة بإحتجاج :

-لأ .. أنا مش مقتنعة بالكلام ده!!!

إلتفتت ناحيتها الناظرة ، وحدقت بها لتتابع

بهدهوء :

-حضرتك يا فندم لازم تكوني واثقة فينا

هتفت الوالدة بضيق وهي تشير بكف يدها :

-إزاي هو هيتعامل مع بنتي ؟ هو عنده صبر

؟ احنا أكثر ناس عارفين إن الرجالة مش

بتطبيق الأطفال ولا عندهم صبر عشان

يتعاملوا معاهم !

أجابتها بنبرة واثقة وهي ترفع حاجبيها

للأعلى :

-مستر آياز مدرب تماماً على التعامل مع

الأطفال

هزت الوالدة كتفيها في عدم مبالة وهي

تقول :

-مش مصدقة !

تابعت الناظرة بجدية :

-حضرتك هاتشوفي ده على مدار الأيام الجاية

سألتها والدة طفل آخر بحزم :

-ولو جرى حاجة لأولادنا ؟ هاتتصرفوا ازاي ؟

سلطت الأستاذة إعتماذ أنظارها عليها ،

وردت بهدوء :

-أنا المسئولة عن كلامي

.....

في الباحة الخلفية لمبنى الرياض ،،،

أشرفت جانبيت على تجهيز تلك المنطقة
وإعدادها لتستقبل الأطفال من أجل إكمال
الإحتفال بأول يوم دراسي ..

حيث أسندت سماعات كبيرة وطاولات
مختلفة ، وكذلك ألعاب للصغار في كافة
الزوايا ..

ووقف بعض الأشخاص يرتدون ملابساً
تنكرية في أحد الأركان منتظرين دورهم في
إسعاد الأطفال والرقص معهم

تطلعت جانبيت إلى الورقة التي بحوزتها ،
وتأكدت من وجود كل شيء ..

ثم رفعت رأسها للأعلى وصاحت بصوت
شبه مرتفع :

-استعدوا ، شوية والأطفال هايطلعوا
رد عليها أحد الأشخاص وهو يرفع إبهامه
للأعلى :

-احنا جاهزين يا مس
أومأت برأسها وهي تجيبه :
-تمام !

ثم أولته ظهرها ، وتحركت عدة خطوات
للأمام ، وحدثت نفسها بـ :

-ناقص المصور ، يا رب يكون جه !

.....

دلفت ليلة خارج المرحاض بعد أن غسلت
كفيها ، ثم سارت في إتجاه غرفة المعلمات ،
ولكن أوقفها صوت رجولي من خلفها قائلاً
بجدية :

-لو سمحتي يا مس

إستدارت ليلة برأسها للخلف لتجد شاباً
طويلاً - ذو ذقن خفيفة وبشرة سمراء
يرتدي قميصاً كحلياً ، وبنطالاً من الجينز
الرمادي - يقترب منها ..

توقفت في مكانها ، ورفعت حاجبها للأعلى
لتسأله بجمود :

-إنت عاوز مين ؟

-حضرتك أنا المصور اللي جاي عشان حفلة
الكي جي

هزت رأسها لتجيبه بهدوء :

-أها

بينما تابع هو حديثه بجدية :

-ممكن تدليني على مكان الأطفال لأن
بصراحة أنا تايه هنا ومش عارف أوصل
لحاجة !

هزت رأسها مواقف ، وأشارت بعينيها وهي
تقول بخفوت:

-اوكي .. تعالى معايا !

إبتسم لها مجاملاً وهو يرد :

-شكراً ليكي

ردت عليه بإيجاز وهي تتحرك للأمام :

-العفو

ظل هذا الشاب يعبث بعدسة الكاميرا
الخاصة به وهو يسير إلى جوارها ، بينما
إختلست ليلة النظرات إليه من طرف عينها ..

ولفت أنظارها ماركة الكاميرا ، فرددت دون

وعى :

-واو .. كانون !

أدار الشاب رأسه في إتجاهها فوجدها محدقة

به ، ونظر لها بإستغراب قائلاً :

-نعم !

تنحنت بخفوت ثم أجفلت عينيها قائلة

بإحراج :

-احم .. آآ.. مافيش !

شعرت ليلة بالحرع منه ..وتوردت وجنتيها

قليلاً خاصة وأنها شعرت بأنظاره عليها ..

ما لفت أنظارها هو نوعية الكاميرا التي

يستخدمها .. وخشيت أن يكون قد أساء

الظن بها ، واعتقد أنها تنظر إليه ..

ساد الصمت بينهما طوال الطريق ، فقطعه

الشاب قائلاً بنبرة شبه متحمسة :

-على فكرة أنا اسمي أيمن رشوان ،

وفوتجرافر على أدي يعني !

هزت رأسها و ردت عليه بإيجاز دون أن تنظر

نحوه :

-أها

سلط أنظاره عليها وهو يتابع بفضول :

-أنا أول مرة أشوفك هنا ، أنا على طول

باجي حفلات السكول بس ماشوفتكيش

هناك !

تنهدت بخفوت وهي تجيبه :

-أنا شغالة من زمان هنا

مط فمه للأمام قائلاً :

-ممم .. جايز!

ثم إبتسم لها وهو يتابع :

-يمكن عشان دي أول مرة بأصور حفلات

الكي جي !

إزداد تورد وجنتيها وهي تقول :

-احتمال

رفع أيمن الكاميرا في إتجاه ليلة ، وبدأ في
ضبط عدساتها نحوها ، وأكمل قائلاً بتحمس

:

-على العموم هي فرصة اني شوفت حضرتك

يا مس آآ...

نظرت هي نحوه لتتفاجيء به يلتقط لها
صورة فوتغرافية ، فعبست بوجهها قائلة :

-مس ليلة

إبتسم لها قائلاً بنبرة هادئة :

-واو.. Nice name by the way (اسم حلو

بالمناسبة) زي صورتك

ثم أدار الكاميرا في إتجاهها لتنظر إلى صورتها

التي بدت جميلة للغاية ... فإرتسمت

إبتسامة رضا على وجهها ، وهمست له :

-ثانكس !

رسم على ثغره إبتسامة بلهاء ، ورفع يده

ليحك رأسه قائلاً بعث :

-سوري إن كنت صورتك كده ، أنا بأجرب

العدسة والفلاش ، ولو حابة أمسحها عادي

بالنسبالي !

ردت عليه ليلة بجمود :

-مافيش مشكلة ، بس بليز أنا مش حابة حد

يشوفها

مط فمه بإستغراب ، ورمقها بنظرات

متعمقة وهو يردد لنفسه :

-ممم.. غريبة !

أضافت ليلة قائلة بتوتر شبه ملحوظ في

نبرتها :

-يعني مافيش داعي إن صورتي تكون مع

حضرتك بدون سبب

أوماً برأسه وهو يرد عليها بجدية :

-أوكي..As you like (كما تحبين) .. أنا

هامسحها !

هزت رأسها قائلة بإمتنان :

-Thanks again (شكراً مرة ثانية)

دار الإثنين من رواق جانبي ، ومن ثم إلى ممر
طويل .. ولم تنبس ليلة خلال سيرهما بكلمة
إضافية ..

ربما كانت تجيبه تلك المعلمة بردود
مقتضبة إلا أنها كانت شخصية مثيرة
للإهتمام من وجهة نظر المصور أيمن ..

فعادة هو يقابل فتيات وشابات أقل تحفظاً
معه .. وأكثر أريحية في الحديث .. ويحاولن
دفعه لإلتقاط صور مميزة لهن ، والتواصل
معه .. ولكنها على العكس كانت عابسة
الوجه ، مقتطبة الجبين ..

لم تنكر ليلة أن سيرها مع هذا الشاب
الغريب أزعجها إلى حد ما ووترها دون أن
تعرف السبب .. فمن يراها معاً ربما يظن
أنهما على معرفة وثيقة ، خصوصاً أنه يعتمد

الحديث بأريحية شديدة مع غيره .. ويتصرف

بطريقة تربكها .. وتسبب لها الخجل ..

كذلك تورد وجنتيها وشعورها بحرارة تنبعث

منهما يزعجها أكثر .. فهي عادة ما تكون

هادئة حينما تتحدث مع الغرباء .. لكنها على

العكس معه .. متوترة ومرتبكة ..٢

فرك أيمن طرف ذقنه ، وتسائل بإهتمام

محاولاً كسر الحاجز الجليدي مع تلك

المعلمة - غريبة الأطوار- قائلاً:

-انتي بتحبي التصوير على كده ؟

ردت عليه ليلة بجمود :

-يعني

أردف أيمن قائلاً بحماس :

-على فكرة مش لازم تكوني دارسة تصوير
عشان تبقي فوتجرافر ، أنا خريج تجارة
انجليش ، بس التصوير هوايتي المفضلة !

نظرت له بحذر وهي تضيف :

-بجد ؟

هز رأسه بتفاخر قائلاً :

-Yes .. Sure (طبعاً) .. دي أكثر حاجة
بأحب أعمالها ، أكيد سمعتي عن ستوديو "
كيرياتف " ؟

لوت فمها قائلة بفتور :

-يعني مش أوي !

هز رأسه عدة مرات ليتابع بحماس أقل :

-ممم .. اوكي .. هو بتاعي ، أنا عملته
بجهودي الذاتية ،(From scratch) من الصفر

!

-أها ..

دس أيمن يده في جيبه ، ثم أخرج ورقة ما
منه ، ومد يده بها نحوها وهو يقول بإهتمام :

-بصي ده الكارت اللي فيه العنوان بتاعه،
ومكتوب لينك البيدج ، خشي عليه وشوفيه

!

تناولته منه بحذر وهي تجيب بإيجاز :

-اوكي

أردف أيمن قائلاً بنبرة واثقة :

-هايعجبك الشغل فيه أوي

طوت هي الكارت في يدها ، وتوقفت عن
الحركة ثم أشارت بعينيها للأمام وهي تقول
بجمود :

-طيب احنا وصلنا .. فرصة سعيدة يا مستر
أيمن !

عقد أيمن ما بين حاجبيه في تعجب منها ..
فهي لم تعطيه الفرصة للحديث أكثر معها ،
فأجابها بهدوء :

-أنا الأسعد يا مس ليلة !

أولته ظهرها وهي تتابع بجدية أشد :

-عن اذنك

حك رأسه من الخلف وهو يرد عليها :

-اتفضلي ..!

تابعها بنظرات مراقبة إلى أن اختفت عن
أنظاره ، فحدث نفسه قائلاً :

-غريبة المس دي ! ماشوفتش زيها ، عادي
مممكن تكون نمرة بتعملها زي أي واحدة أما
تحب تعمل مكسوفة !!

هزت ليلة رأسها وهي تسير عائدة لغرفة
المعلمات قائلة بإمتعاض :

-انسان عجيب ، بيقولي انجازاته وهو مش
عارفني أصلاً !!

.....

واصل قراءة الجزء التالي

الفصل الحادي والعشرون

الفصل الحادي والعشرون :

قارب اليوم الدراسي الأول على الإنتهاء ،
والجميع يبدو عليه الإرهاق جلياً ..

ولكن أكثرهم سخطاً وضيقاً كان آياز .. فقد
خالف الوضع توقعاته بالمرة ، وقابل أسوأ
مجموعة من الصغار الذين لم يكفوا عن
البكاء أو الصراخ أو إحداث الفوضى ..

ولم تعاونه أي من ريمان أو رانيا بشكل تام
.. فقد أرادت كلتاهما أن يخوض بنفسه
التجربة ليدرك حقيقة الأمر ..

ضغط آياز على رأسه بكفيه ، وزفر بقوة
وهو يصيح بصوت مرتفع :

Shsh-كفاية !..

رفعت رانيا حاجبها للأعلى ولوت فمها وهي
تضيف بخفوت :

-بالراحة يا مستر ، الأطفال كده هاتعيط اكثر

كز على أسنانه قائلاً بصوت محتد :

-اتخنقت !

زدات عينيها ضيقاً وهي تتابع بإندهاش :

-بالسرعة دي ، ده لسه أول يوم !

ثم حركت شفيتها للجانبين لتضيف بتعجب

:

-أومال هاتعمل ايه بعد كده لما تبقى

لوحدك معاهم ؟!

وزع آياز أنظاره على الصغار ، وهتف بصوت

ساخط مشيراً بيده :

-هما دول اطفال !

وضعت رانيا يدها في منتصف خصرها ،

ووقفت بشموخ قائلة بمزاح :

-لألاً .. متقولش كده دول شياطين في هيئة

أطفال !

ابتسم لها إبتسامة خفيفة وهو يقول :

-عندك حق

تنهدت رانيا بحرارة وهي تراه يتطلع لها ،
ويبادلها الحديث بأريحية ، فأدارت وجهها في
إتجاه ريمان ، وأرسلت لها نظرات متباهية
فزاد وجه الأخيرة إحتقاناً .. وبدت على وشك
الإنفجار من الغيظ ..

فبعد كل شيء .. هي لم تأخذ حقها بعد
منها .. ورانيا تتعمد إستفزازها بصورة مبالغ
فيها ..

تحرك طفل صغير بالقرب من آياز ومد يده

ببيضة مسلوقة وقال ببراءة :

-آمو (عمو) قشربي دي

رد عليه آياز بنفاذ صبر وهو يتفحص الطفل

الصغير :

-اسمي مستر آياز يا حبيبي

هز الصغير رأسه ، وقرب البيضة من فمه

ليقوا :

-ماسي (ماشي) ، هام يالا

ضيق آياز عينيه في إستغراب واضح ،

وتعجب مما يفعله الصغير ، وسأله بفضول

:

-انت بتعمل ايه ؟

رد عليه الطفل ببراءة :

-عاوز أكل E .. egg)) بيضة .. !

سألته رانيا بغرابة وهي تدعك فروة الصغير

بكفها :

-انت بتسمع اللي حفظته ؟

ابتسم لها الصغير قائلاً بصوت طفولي :

-أنا خدتها برا في الدرس مع مس هالة ، هي

بتحفظهاالي كده

أرجعت رانيا رأسها للخلف ، وغمغمت

بخفوت :

-أها .. قولتلي درس بقى ، انت بدأت من

بدري

هز آياز رأسه بحيرة ، وتسائل بنزق :

-أنا مش فاهم بتقول ايه ، يعني انت عاوز

تاكل الEggدي ؟

أجابه الصغير بوضوح :

-أه ..

مالت رانيا على آياز ، ووضعت يدها بالقرب
من فمها لتهمس له بجدية :

-بلاش تقشرله البيضة ، صدقني هاتقلب
بزفارة والكلاس ريحته هتبقى وحشة ،
وحاجة تجيب اللي في بطنك

إمتعض وجه آياز ، وبدى على تعبيرات
وجهه علامات الإشمئزاز .. فيكفيه ما لاقاه
من فوضى في اليوم الأول ..

لذا دون تردد ابتسم للصغير ، وحاول أن
يقنعه بالعدول عن تلك الفكرة قائلاً بهدوء :

-بس ماينفعش ، دي ريحتها مش حلوة ،
وهتخلي ايدك كمان ريحتها مش ظريفة

لوى الصغير فمه بضيق ، وضرب الأرض
بقدمه قائلاً بإصرار وهو عابس الوجه :

-أنا بأحبها ، أقشرهالي بقى !

أدرك آياز أنه لن يتمكن من إقناع الصغير بسهولة ، لذا حاول البحث عن بديل آخر ،
فسأله بتلهف :

-طب معاك ايه تاني ؟

رد الطفل قائلاً ببراءة :

-معايا بطاطس محمرة

إلتوى فم رانيا لتتمتم بهمس :

-كمان ، يعني زيت وتلزيق وعكة ولبصة !

ضغط آياز على شفثيه .. ولم يعقب ، بينما

أكمل الصغير حديثه قائلاً :

-أها ، بس مس آرف أمسكها بالسوكة)

مش عارف أمسكها بالشوكة) فمسكتها

بأيدي دي !

ثم مد الصغير يده ، ومسحها على بنطال
أياز الذي تسمر في مكانه مصدوماً مما
فعله .. ٣

وإتسعت مقلتيه بغضب بعد تلك الحركة
العفوية من الطفل الذي أكمل :

-ساييف (شايف) ملزقة إزاي !!

إحتقنت مقلتيه بنيران متأججة .. وحدث
نفسه بغل ب :

-الظاهر إن الماستر اللي أخذتها مش هاتنفع
هنا أبدا ، آآآه .. كان عندك حق يا رامي !

.....

في غرفة المعلمات ،،،،،

مدت سالي ساقيتها للأمام بعد أن ألقنت
بجسدها المنهك على الأريكة ، ثم تأوهت
بصوت شبه مرتفع قائلة :

-مش قادرة ، ماعدتش لحظة واحدة من
ساعة ما العيال جوم

جلست سارة إلى جوارها ، وقالت بنزق :
-هو في حد هنا بيرتاح !

أومأت سالي برأسها موافقة ، وأضافت قائلة
:

-على رأيك .. ماتخليكي جدعة وتعمليلي
نسكافيه !

ردت عليها سارة وهي تتمطع بذراعيها في
الهواء :

-أنا عاوزه اللي يشلني للبيت ، أه يا ضهري !

أكلمت سالي حديثها بجدية :

-تحسي إن احنا عجزنا قبل أوانا

مالت سارة على جانبها لتسند وجهها على

مرفقها وهي تقول :

-أه والله ، بقينا لا نصلح لأي شيء !

زمت سالي فمها لتقول بضيق :

-ما هي المدرسة دي مش بترحم حد

تدخلت نادبة في الحوار قائلة بحماس غريب :

-يا أنسات ، احنا هنا زاهدات في العلم

والعمل

أشارت لها سالي بيدها لتتهتف بإنزعاج :

-أبوس أيديك يا نادبة مش وقت خطبك

العصماء دي ، احنا عاوزين نرتاح شوية قبل

ما ريا تهجم علينا !

ضيقنا نادية عينها بحدة ، وأردفت قائلة
باهتمام :

-قصدك آآ...

هزت سالي رأسها لتقول بضجر :

-اه هي .. وبلاش نرغي كتير لأحسن بتيجي
على السيرة

.....

في مكتب السكرتارية ،،،

نفخت ليلة بضيق واضح وهي تنظر إلى أية
التي حدثتها بهدوئها المعتاد :

-مش ذنبي والله يا ليلة ، مس اعتماد هي
اللي عاوزه كده

أردفت ليلة قائلة بتذمر واضح :

-يعني كل الناس هتاخذ بريك وترجع بيتها ،
وأنا اللي المفروض أروح المالتيميديا أشوف
الصور ، دي مش شغلتي

مطت أية فمها قليلاً لتبرر :

-بس هي عارفة إنك بتعملي شغل حلو مع
الفوتوشوب

فركت ليلة جبينها برفق وهي تقول :

-ماشي ، بس كهواية في وقت فراغي ، مش
احتراف يعني !

رمشت أية بعينيتها وهي تضيف بهدوء :

-هي عاوزه تتأكد إن الأطفال كلهم متصورين
قبل ما ننزل الألبوم على الصفحة ، كمان
الصور اللي مش مناسبة تتحذف ،
والتعليقات والوصف يتكتب صح مش
يكون فيه أخطاء

زمت ليلة شفيتها لتهتف بضجر :

-طيب ما تأجلها لبكرة !

هزت أية رأسها نافية مبررة :

-مش هاينفع ، لأن بكرة في تصوير للميني
فان داي

ركلت ليلة الأرضية بقدمها وهي تزفر بصوت
مرتفع :

-يووه ، برضوه !

دلفت عاليا إلى داخل غرفة المكتب لتجد
الاثنتين تتجادلان ، فتسائلت بفضول :

-في ايه يا بنات ؟

تنهدت ليلة بإنهاك لتجيبها :

-مس إعتماء عاوزانى أقعد فى المالتيميءيا
أظبط صور النهارءة مع بتوع الـIT، وءى ءاآة
مءصنئش

إلئوى فم عاليا بصورة واضحة لئردف بصوت
ساآط :

-هى الست ءى مش بئرتاآ ، بئءور على أى
آاآة ئشغلنا بئها وآلاص !!!!

أشارت لئلة إلى أية بئءها وهى ئقول بئبرة
شبه منفعلة :

-أهوو شوئئى ، عاليا زئى

رفعت أية كئئها للأعلى وهى ئكمل بهءوء
نسبئ :

-أنا مائش ءعوءة ، آلاص آشئى قولئلها
الكلام ءه

أردفت ليلة قائلة بضيق :

-هي بتدي فرصة لحد يتكلم معاها

ربتت عاليا على ظهر رفيقتها ، وإبتسمت لها

بخفوت قائلة :

-معلش يا لولو ، حاولي تنجزي وأنا

هستناكي نروح سوا !

نظرت لها ليلة بنظرات عادية وهي ترد عليها

بإرهاق :

-لأ يا بنتي ، متعطليش نفسك ، أنا هاروح ،

وربنا يعيني بقى

ضغطت عاليا على كف رفيقتها لتردف

بحماس زائف :

-أدها وأدود يا لولو

-أها

رفعت عاليا حاجبيها للأعلى ، وتابعت بجدية

:

-هاسيبك بقى وأروح أشوف بقية الشلة

ردت عليها ليلة بجمود: ١

-اوكي

أشارت عاليا بيدها وهي تتجه خارج الغرفة

:

-نتكلم واتس بقى

-تمام ، باي !

-سلام

ثم عاودت ليلة النظر إلى أية بعتاب قبل أن

تسحب حقيبتها وتعلقها على كتفها لتتجه

هي الأخرى إلى الخارج

.....

مدت نشوى يدها بعلبة عصير إلى رفيقتها
المقربة رانيا ، وسألتها بفضول :

-ها وبعدين ؟

ارتشفت رانيا أكثر من منتصف العلبة مرة
واحدة ، وتجشأت قائلة :

-بس يا نوشا ، كلمة من هنا ، وغمزة من هنا
وفرستلك البت ريمان

حركت نشوى حاجبيها في إعجاب مضيئة :

-جبارة ، مالكيش حل !

إنتصب رانيا في جلستها لتكمل بزهو :

-أومال ايه ، ده أنا رانيا !

ثم رفعت كفها للأعلى ، وأشارت إلى أصبعها
قائلة :

-وقريب أوي هتلاقي الخاتم بتاعه في ايدي

-يا مسهل يا رب

.....

من ناحية أخرى ، جمع آياز متعلقاته الشخصية ، ورفض بنطاله من بقايا الصغار عليه ، ثم وضع الهاتف على أذنه بعد أن اتصل بإبن خالته رامي ، وانتظر للحظات قبل أن يجيبه الأخير ، فهتف بتعب :

-انت فين ؟

رد عليه رامي بنبرة ضجرة :

-أنا في المعرض

فرك آياز رأسه عدة مرات متسائلاً بضيق :

-ايه ده يعني مش هاتعدي عليا ؟!

رد عليه رامي بتنهيذة مطولة :

-لأ للأسف مش هاينفع .. عندي شغل أد
كده ، والحاج سرحان مش بيرحم
هز آياز رأسه بخفة مكملأ بفتور:

-أها .. ولا يهملك ، أنا هاخذ " أوبر " وهارجع
على الفيلا

-معلش يا إيزووو .. المهم انت الشغل تمام
معاك ؟

صر آياز على أسنانه قائلاً بحنق :

-مش قادر أقولك على اللي شوفته

أردف رامي ساخراً :

-واضح إنك شوفت العجب ، أما ارجع على
الغدى احكيلى

-أوكي .. مش هاعطلك ، سلام

-سلام !

أنهى آياز المكالمة ووضع الهاتف في جيبه ،
ثم سحب حقيبته الشخصية خلف ظهره ،
وإتجه نحو بوابة مبنى الرياض وهو يستعيد
في ذاكرته أحداث أول تجاربه مع الأطفال

.....

في غرفة الوسائط المتعددة (المالتيميديا)

““

طرقت ليلة باب الغرفة قبل أن تدلف
للدخل ، ثم جابت بعينيها المكان بحثاً عن
أي شخص بها ، فوجدت الغرفة خالية ،
فتدلى كتفيها في تعب .. وزفرت بإنزعاج ،
وهي تحدث نفسها متذمرة :

-يعني مش في حد هنا ، طب أعمل ايه ،

أمشي ولا أقعد شوية ؟!

نظرت إلى ساعة هاتفها المحمول ، وأكملت

بضجر :

-طيب هاستنى ٥ دقائق ولو مافيش حد

هاكلم مس اعتماد وأبلغها وهي تتصرف !

أسندت حقيبتها على الطاولة ، وسحبت

مقعداً وجلست بالقرب من الحاسوب

الرئيسي بالغرفة .. ووضعت ساقها فوق

الأخرى وظلت تهزها بعصبية .. ثم أمسكت

بهاتفها المحمول وظلت تعبث به ...

بعد لحظات سمعت صوتاً ذكورياً مألوفاً يأتي

من الخلف قائلاً بحماس :

-سوري ، أنا كنت بأجيب الفلاشة من الـ آآآ...

قاطعته ليلة بجدية وهي تضع هاتفها داخل

حقيبتها :

-طب بسرعة يا مستر عاوزين نخلص صور

الكي جي عشان مش حابة أتأخر

ثم أدارت رأسها ببطء ناحية صاحبه ، وفغرت

شفتيها مصدومة حينما رأت أن المتحدث

هو المصور أيمن الذي ابتسم لها قائلاً

بسعادة :

-واضح إن حظي حلو النهاردة ، وهانشتغل

سوا

لم تفق ليلة من حالة الذهول المسيطرة

عليها ، وغمغمت بتلعثم :

-هاه ، آآ.. إنت!!!!

.....

واصل قراءة الجزء التالي

الفصل الثاني والعشرون

الفصل الثاني والعشرون :

في غرفة الوسائط المتعددة ،،،

أفاقت ليلة من حالة الصدمة التي إنتابتها
سريعاً ، وإعتدلت في جلستها على المقعد ،
وتشنج كتفيها وهي تتسائل بضيق :

-حضرتك بتعمل ايه هنا ؟

ابتسم لها أيمن وهو يغلق باب الغرفة
مجيئاً إياها :

-أنا شغال Part-timer (دوام جزئي) هنا

عقدت ما بين حاجبيها ، وهتفت مندهشة :

-مش فهماك بصراحة !

لوح بيده في الهواء وهو يفسر لها بهدوء :

-يعني لما الإدارة هنا بتحتاجني بأجي

-مممم...

ثم إزدادت إبتسامته الواثقة إتساعاً وهو

يضيف :

-عامه هي فرصة حلوة إني أشوفك تاني في

نفس اليوم

عبست بوجهها أكثر متممة بهمس :

-بالنسبالي لأ !

قطب جبينه وهو يسألها مستفهماً :

-بتقولي حاجة ؟

نظرت له بحدة ، ثم أجابته بنفاذ صبر :

-عاوزه أنجز الصور بتوعنا

حك أيمن جبينه بإصبعيه ، وتحرك نحوها

قائلاً :

-بس دول قدامهم وقت

زفرت من الضيق وهي تتسائل ب :

-أد ايه يعني ؟

فرك طرف ذقنه بكفه ليحيبها بغموض :

-ممم.. يعني نقول ساعة اتنين !

إتسعت مقلتيها في صدمة واضحة ، وهتفت

بسخرية :

-اييييه ؟ ليه هاتحمضهم وتطبعهم !

ابتسم لها قائلاً :

-مش كده ، بس هاعمل فلترة للصور وآآ...

قاطعته بصوت شبه منفعل :

-لألاًلألاً .. أنا مش فاضية للحوار ده كله ، انت

نزلهم زي ما هما وخلص

استغرب أيمن من حدثها في التعامل معه ،

فحاول أن يكون هادئاً بقدر المستطاع وهو

يتابع بجدية :

-مش هاينفع ، كده يبقى آآ....

قاطعته مجدداً بصوت محتد وهي تشير

بإصبعها :

-شوف يا كابتن أناalready (تقريباً) متأخرة

، ومش عاوزه أضيع وقت أكثر من كده

اقترب منها أيمن ، ورمقها بنظرات شبه

معاتبه قائلاً :

-كابتن ! لحقتي تنسي اسمي يا مس ليلة ،

شوفتي أنا فاكر اسمك ازاي !

توردت وجنتيها قليلاً وهو ينطق بإسمها على
شفتيه ، وحاولت أن تخفي إرتباكها بالصياح
بحدة :

-هو احنا جايين نتعرف ؟ ده شغل ، ولولا
الحظ مكونتش شوفتني

أشار لها أيمن بكفيه قائلاً بحذر :

-تمام .. تمام .. مافيش داعي للنرفزة ، انا
هاعمل كل حاجة وتقدرني تمشي

هزت رأسها نافية وهي تلوي شفتيها لتجيبه
بإصرار :

-لأ ، هاستنى لحد ما أشوف الصور

مط فمه في حيرة ، ثم أخذ نفساً عميقاً
وزفره على مهل ، وتابع بصوته الرخيم :

-طيب ، أنا هحاول أخلص بدري

-طب يالا

-أوكي .. ممكن بس آآ..

ثم أشار لها بعينيه ، فقد كانت ليلة تسد
عليه المدخل إلى الحاسوب ، فضيقت
عينها أكثر لتسأله بإستغراب :

-ممكن ايه ؟

ضغط على شفتيه قائلاً بصوت أجش :

-حضرتك ممكن تديني Space (مساحة)
أقعد فيها ، لأني مش عارف أعدي

إزدادت حمرة وجنتيها ، وتحركت بالمقعد
للخلف وهي تقول بحرج :

-احم .. أها .. اتفضل

نظر لها بإمتنان قائلاً بإيجاز :

-شكراً

فتح أيمن جهاز الحاسوب ، وقام بإيصال " ذاكرة الكاميرا " عن طريق الوصلة الخاصة بها ، ثم نقل الصور التي إلتقطها بمهارة وحرفية إلى ملف خاص بالجهاز ..

إستدار هو برأسه ناحيتها ليتأمل وجهها عن كئيب .. فرمقها بنظرات إعجاب لهيئتها المنمقة رغم بساطتها ، ثم أدرك أنه قد خرج عن سياق مهامه الوظيفية ، وكذلك خشي أن توبخه بحدة إن رأته ينظر لها بتفحص .. فهتف بجمود :

-حضرتك بصي على الصور ، وقوليلي رأيك في اللي يتحط ، وأنا هافلترهم براحتي بعد كده

لم تنظر ليلة نحوه ، واجابته بإقتضاب :

-اوكي

تفقدت هي الصور الفوتوغرافية على عجالة ،
خاصة وأنها كانت تشعر بالحرج الشديد
بسبب قرب مقعدها من مقعده وإحتمالية
تلامس ذراعيهما إذا ما مال هو عليها- أو
حدث العكس - دون قصد ..

جاهدت لتبقى دون أي إرتباك بادي عليها ،
ثم تنحنت بخفوت وهي تتشدد بـ :

-تمام ، مافيش حاجة وحشة

ابتسم لها بغرور وهو يجيبها بنبرة متفاخرة :

-ده شغلي يا مس ليلة

وظل محققاً بها لعلها تنظر إليه ، لكنها لم
تلتفت ولو لثانية ، وظلت أنظارها مسلطة
على شاشة الحاسوب ..

وفجأة هبت واقفة من مقعدها لتقول

بجدية :

-أوكي يا مستر ، أنا مش هاعطلك أكثر من

كده

نهض أيمن هو الآخر ليردف قائلاً بإستغراب

أعجب :

-ولا عطلة ولا حاجة ، بالعكس آآ...

لم تمهله هي الفرصة لإتمام جملته ، حيث

قاطعته ببرود :

-سلامو عليكم

هز كتفيه في تعجب من حالها الغريب ، ورد

عليها بهدوئه المعتاد :

-وعليكم السلام !

وتابعها بأنظاره إلى أن أغلقت الباب خلفها ،

فوضع يده على رأسه ، وفركها وهو يحدث

نفسه مبتسماً :

-حقيقي نرفوزه وروحها في مناخيرها بس

يجي منها !

.....

في فيلا سرحان عليه ،،،

دفع آياز الأجرة للسائق الذي أوقف سيارته

أمام البوابة الخارجية للفيلا ، ثم توجه

للداخل بخطوات مرهقة ..

كما كان يبدو على وجهه التعب والإرهاك ..

وما إن رأته وردة وهو مقبل عليها بحالته

تلك حتى انتفضت من مكانها فزعة ،

وصاحت بقلق :

-يا حوستي ، سي إزاز ؟ مالك ياخويا ؟

نفخ من الضيق ، ثم أشار بكفه قائلاً :

-بليز فلاور، Leave me alone (دعيني لشأني

(

فغرت فمها في حيرة متسائلة بفضول :

-ليفة !!! هو إنت عاوز تستحمى ؟

زفر بإنزعاج بائن قائلاً :

-أووف، لأ أنا مش ناقصك

تنهدت وردة بحرارة ، ثم أسبلت عينيها ،
ورمقتها بنظرات عاشقة ، وهتفت بنزق :

-ماتقولي على اللي تعبك وأنا أريحك

لوى فمه قائلاً بسخط :

-No, thanks (لا .. شكراً)

هتفت بحماس بادي في كل تفصييلة من
وجهها :

-طب أنا عندي اللي يهدي بالك ويهديك
العاصي

تنهد بإنهاك قائلاً:

-فلاور ، نتكلم بعدين

أسبلت عينيها بغرابة لتقول بتلهف :

-يا سي إزاز ، أصل انت حليوة وألاجة ،
وتلاقي حد عينه الله أكبر تفلق الحجر رشقك
عين من إياهم .. !

عقد حاجبيه في عدم فهم وتساؤل بنفاذ صبر

:

؟What-

لوت ثغرها لتجيبه بجدية :

-العالم السّو مش ساين حد في حاله ، أنا
هاقولك على الوصفة اللي تحميك من
عينهم السوداء

سألها آياز بنبرة مستفهمة وهو محقق بها :

-وصفة ؟ ده حاجة تبع الأكل ؟

لوحث بيدها أمام وجهه موضحة بإهتمام :

-أكل ايه بس يا سي إزاز ، ده حجاب بيعمله
الشيخ مبروك ، حاجة تكفيك شر
المستخبي ، وتصد عنك آذاهم

بدى على وجهه الإندهاش ، فسألها بفضول :

-آذى ! مين دول ؟

أمسكت بياقة عباءتها البسيطة وهزتها في
الهواء وهي تهتف بخوف :

-حابس حابس يجعل كلامنا خفيف عليهم

٢!

ثم مالت بجسدها للأمام قليلاً ، وهمست

بحذر :

-دول أسيادنا اللي تحت الأرض ، حوش يا

اللي بتحوش !

رد عليه ببرود وهو يرفع حاجبه للأعلى :

-عفاريت يعني

ضربت على فمها بكف يدها وهي تتوسله

بذعر :

-ششششش .. لأحسن يؤذوك

إمتعض وجهه أكثر ، وزاد عبوساً ، ثم صاح

بضيق :

-فلاور .. وسعي ، أنا مش ناقص stupidity)

غباء) على آخر اليوم

حاولت هي أن تتلفظ ما قاله ، فقالت

بتلعثم :

-س..آآ.. هاه

أشار لها بيده وهو يتحرك مبتعداً :

-روحي لحالك

تنهدت بعمق وهي محدقة بنظرات عاشقة ،

ثم غمغمت مع نفسها قائلة :

-حالي هو إنت يا سي إزاز ، ياخواتي ليه

حجاب الشيخ مبروك مجبش نتيجة معاك ،

لأحسن يكون ضحك عليا واستغلني ولطش

المعلوم ! نهاره طين !!!!

.....

قابل آياز خالته السيدة سوزان أثناء صعوده
على الدرج، فسألته الأخيرة بإهتمام واضح :

-إيه الأخبار معاك يا حبيبي ؟

رد عليها بتعب وهو يحاول الإبتسام :

good-

حدقت هي فيه بنظرات متفرسة ، ثم أردفت
قائلة بإهتمام :

-مش باين عليك

أخذ آياز نفساً عميقاً ، وأجابها بحزن :

-بصراحة مكونتش أتوقع الوضع في مصر
بالشكل ده

ردت عليه خالته بصوت هاديء وهي تربت
على ذراعه :

-كان لازم تجرب عشان تصدقنا يا آياز!

-اها

أكملت حديثها قائلة بجدية :

-لو مش عاوز تكمل ، سيب الشغل فوراً ،
واشتغل مع عمك سرحان، هو هيفرح بده
أوي

هز رأسه نافياً وهو يرمش بعينيه :

-لأ ، أنا مش من النوع اللي بأستسلم
بسهولة

-ربنا معاك

Thanks-

ابتسمت له سوزان قائلة :

-طب إرتاح إنت ، وهابعتلك وردة بالغدى
هتف آياز بتوسل وهو يكمل صعوده على
الدرج :

-لأ ، بليز بلاش فلاور ، أنا هرتاح من غير

حاجة

إزدادات ابتسامتها المشرقة وضوحاً مضيئة :

-دي بنت لذيدة

رد عليها بجدية :

-هي حلوة وكيوت وnice بس أنا مش آآ...

في نفس التوقيت كانت وردة في طريقها
للمطبخ حينما استمعت مصادفة إلى حديثه
الأخير عنها ، فرقص قلبها طرباً لكلماته ،
وتسارعت دقاته فرحة ، وتهللت أساريرها
وهي تحدث نفسها بسعادة :

-هاه ، سي إزاز بيقول عني حلوة ، بركاتك

يا شيخ مبروووك ، ده أني لازم أروحله
أشكرله بنفسي ، الحجاب اشتغل يا ناس

ثم أسرعت بالركض في إتجاه المطبخ .. بينما
تابعت سوزان حديثها بنبرة هادئة :
-أوكي يا حبيبي ، أنا موجودة لو عوزت حاجة

-تمام

أخرجت وردة الحجاب من أحد الأدراج ، ثم
قبلته بعمق ، وضمته بكفيها إلى صدرها ،
وأغمضت عينيها ، وتنهدت بحرارة لتتمتم
مع نفسها بـ :

-هاح .. ميتا (إمتى) تيجي البلد وتطلبني
من أهلي يا سي إزاز ، وتتجوز ونجيب أورطة
عيال من عينتك دي يا قمر !ع

.....

في المساء ،،،،

اشتعل موقع " الواتساب " برسائل
المعلمات حول ما دار اليوم والضغط
الشديدة في أول أيام الدراسة ، وتشعب
الحوار الرئيسي إلى حوارات خاصة ثنائية عن
بعض المواقف الشخصية

عقدت عاليا ساقها معاً ، وتنهدت بتعب
وهي تعيد وضع الوسادة خلف رأسها، ثم
طبعت على لوحة المفاتيح الخاصة بهاتفها
المحمول بعض الكلمات الخاصة بحوارها
التالي ..

-عاليا : ((لا بجد أوفر))

-ريمان : ((أنا كنت هاتفرس ، ده زي ما

يكونوا قاصدين يغيظوني))

-عاليا : ((متكبريش الموضوع ، هما مش

يستهلوا منك تضيعي وقتك في التفكير))

-ريمان : ((مضايقة يا عاليا ، انتي مش

شوفتي شكلهم سوا))

-عاليا : ((ما إنتي عارفة رانيا ، هاتجيبه من

برا ، هو ده طبعها ، بتدрил على أي واحد))

-ريمان : ((حلوة الكلمة دي))

-عاليا : ((فكك إنتي منها ، وركزي في

شغلك ، بكرة يومك))

-ريمان : ((أيوه ، أنا متفائلة خير))

-عاليا : ((إنتي جايلك حبة اطفال سكر

أصلاً ، كلهم ممتازين وشاطرين))

-ريمان : ((طبعاً ، دول معروفين من السنة

اللي فاتت))

.....

على الجانب الآخر ، سردت ليلة لسارة
موقفها الغريب مع المصور أيمن ، فكتبت
لها الأخيرة ،،،،

-سارة : ((ماتحطيش في بالك ، كله عادي
((

-ليلة : ((أنا خايفة بس يفكرني بنت من
إياهم ، من اللي بيتمحكوا في أي واحد
والسلام))

-سارة : ((ليه إن شاء الله ؟ موقف وعدى ،
انسيه ، وبعدين هاتشوفيه تاني فين ؟ هو
خلاص يوم في الكي جي وانتهى))

-ليلة : ((على رأيك !))

.....

في إحدى المناطق الصحراوية المخصصة
لسباقات السيارات ،،،

جلس رامي على مقدمة سيارته ، ورفع
العلبة المعدنية للمشروب البارد على فمه
ليرتشف منها القليل قبل أن يكمل حديثه
الجاد مع آياز ب :

-ما أنا من الأول قايلك ، شغل الحضانات ده
أخره تنضيف ودادة

لوى آياز فمه ، وعقد ساعديه أمام صدره
وهو مستند على مقدمة السيارة إلى جواره ،
وظل محققاً في الفراغ أمامه مجيباً إياه بفتور
:

-افتكرت إنك بتشتغلني !

لكزه رامي في كتفه بخفة ، وبرر قائلاً

-أنا حذرتك ، وإنك مصدقتنيش

تنهد بإحباط ليضيف بعد أن أرخى مرفقيه ،
ودس كفيه في جيبي بنطاله :

-حاسس إن المحصلة في النهاية زيرو !

-معلش

أخرج آياز كفيه من جيبه ، ثم فرك وجهه

بتعب ، وهتف قائلاً بتقزز :

-إنت .. إنت لو تشوف شكل الولد وهو

بيمسح فيا إيده الملزقة ولا الحاجات الخضرا

الغريبة اللي نازلة من مناخيره٩

نهره رامي قائلاً بإشمئزاز :

-كفاية يا عم ، مش عاوز أشوف ولا أتخيل !

نفخ آياز ، وتابع قائلاً بتأفف :

-ده مشهد تعذيبي نفسي بحت من تنفيذ

حت أطفال مش واصلين لركبتك !ع

أضاف رامي قائلاً بمزاح :

-ماهو الطفل عبارة عن كائن طفيلي لزج

يعيش ويتعايش على الآخرين ٣

-ده الوصف السليم ليه

ربت رامي على كتف آياز قائلاً:

-الله يعينك ، هما المدرسات بيتهبلوا من

قليل

استدار آياز برأسه لينظر إلى ابن خالته قائلاً

بسخت :

-أنا محتاج أتعقم كل يوم قبل وبعد السكول

ابتسم له رامي وهو يرد عليه مازحاً :

-خلي في جيبيك ديتول ..أو أقولك هات

فينيك بيحيب نتيجة حلوة !

احتقنت عينيه بغیظ وهو يوبخه :

-انت هتهزر

قفز رامي من على السيارة ، ولحق بإبن

خالته ، وأمسك بذراعه متوسلاً :

-استنى يا إيزو .. هاسكت والله !

زفر آياز مجدداً ، وجاب بعينيه المكان

ليتأمل ساحة السباق ..

في حين عض رامي على شفثيه ، وتردد في
الإستفسار منه عن عاليا التي تشغل تفكيره
مؤخراً ، فهو لا يحب أن يفصح عما يخصه ..

ولكنه حسم أمره بالسؤال عنها ، لذا أخذ
نفساً عميقاً ، وأخرجه على عجاله ، وتنحنح
قائلاً بخفوت :

-احم .. آآ.. أنا كنت عاوز أسألك عن حاجة

كده

إلتفت آياز نحوه ، وسلط نظراته الغامضة

عليه متسائلاً بـ :

-حاجة ايه ؟

ابتسم رامي ببلاهة ليردف قائلاً :

-الأبلوات معاك اخبارهم ايه ؟

-مش فاهمك

أوضح رامي أكثر سؤاله الغامض بـ :

-الميس ، المدرسة يعني !

هز آياز كتفيه في عدم مبالة ، واجابه بفتور :

-عادي

سأله رامي بفضول أكثر وهو يرمقه

بنظرات مترقبة :

-طب اتعرفت على حد فيهم ؟

-مش أوي ، هما أصلاً مش الاستايل بتاعي

-تمام

أدرك رامى أنه لن يتمكن من معرفة ما يريد

ما لم يسأله مباشرة ، لذا سأله بنزق :

-طب ..آآ.. طب شوفت مدرسة هناك اسمها

عاليا ؟!

أجابه آياز باستغراب بائن على وجهه :

-عاليا !

-اها

ثم عاود سؤاله بفضول :

-بتسأل ليه ؟

تحاشى رامى النظر إليه حتى لا يفتضح أمره

، ثم رد عليه مدعيًا عدم المبالاة :

-عادي يعني ، أصلها معرفة لحد عندي في

المعرض

غمز له آياز بنظرات ذات مغزى قائلاً :

-مممم .. عليا!؟

رسم رامى على وجهه علامات عدم الإكتراث
، ودافع بنبرة شبه فائرة :

-لا عليا ولا عليك ، ده السؤال لله يعنى ،
مش حاجة ، فمتخدش في بالك !

أجابه آياز بهدوء رغم عدم إقتناعه بما قاله
الأخير :

-بص هو اللي اعرفه ان في واحدة اسمها رانيا
، بس راغية بشكل رهيب !

هتف رامى بتهلّف وقد لمعت عينيه :

-لأ هي اسمها عاليًا مش رانيا

هز آياز كتفيه في حيرة قائلاً :

-مش عارف بصراحة ، ممكن أكون شوفتها

بس معرفش اسمها

أراد رامى أن ينهى الحوار سريعاً حتى لا
يشك ابن خالته فيه ، لذا اتجه نحو سيارته ،
وقال ببرود :

-بأقولك ايه ، كبر دماغك !

ثم وقف إلى جوار باب السيارة ، وتساءل
بحماس :

-هاتركب معايا فى الـRace (السباق) اللي
جاي

أجابه آياز بجدية :

-No (لآ) ، ماليش مزاج ، أنا مش فى المود

-اوكي ، براحتك ادعيلي

-معاك ربنا !

ثم ركب هو داخل سيارته ، وربط حزام
الأمان ، وأمسك بقبضتيه بالمقود ، وتنفس
بعمق محدثاً نفسه بـ :

-يا مسهل ، يا ريت كل حاجة تكون زي
سباق العربيات ، كان الواحد وصل للي
عاوزه بسرعة ، بدل ماهو دايس فرامل على
طول .. !

.....

في منزل ما ،،،

جلس غالبية العائلة على الأريكة الواسعة
في غرفة المعيشة ، وأمسك الجد
بالمصحف الشريف ليقرأ فيه ، وتفقد الزوج
الرسائل الإلكترونية على هاتفه ، في حين
أشارت الأستاذة حنان بيدها لابنها الأصغر
قائلة بهدوء :

-خلص الهوم ورك بسرعة

رد عليها الصغير ببراءة :

-اوكي يا مامي

ثم ابتسمت لإبنتها الكبرى وهي تربت على

ظهرها :

-برافو عليكي ، كده صح ، كملي ده كمان

-حاضر

إلتفتت حنان إلى والدها الرجل الوقور ،

وتابعت قائلة :

-ها ، ايه رأيك يا بابا ؟

أجابها والدها بنبرة متريثة :

-والله أخوكي المفروض اللي يقول رأييه في

الموضوع ده

هزت رأسها موافقة إياه وهي تضيف :

-عندك حق يا بابا ، بس أنا بأخذ رأي

حضرتك الأول

تابع هو قائلاً بجدية :

-ممم .. والله لو البنت مناسبة ، مافيش

مانع عندي !

هتفت حنان بحماس :

-هي محترمة وأخلاق وبنت ناس ومن أصل

طيب !

أشار لها بإصبعه مكملاً بصوته الآجش :

-الرك في النهاية على أخوكي

-ده صحيح ، وأما يرجع بكرة من السفر إن

شاء الله هافتحه ، واللي فيه الخير يقدمه

ربنا

سألها والدها بإهتمام :

-إن شاء الله ، هي اسمها ايه البنت دي ؟

ردت عليه بهدوء وهي تبتسم له :

-سارة يا بابا ، اسمها سارة

.....!!!

.....

.....

واصل قراءة الجزء التالي

الفصل الثالث والعشرون

الفصل الثالث والعشرون :

انتظرت المعلمة حنان حضور أخيها لتبلغه
بشأن عثورها على عروس مناسبة له ،
ولكن تعذر عليه الحضور ، فقررت أن تؤجل
مفاتيحه لحين عودته سالماً ، وخلال هذا
الوقت ستستغل الفرصة في التقرب أكثر إلى
سارة ، وتوطيد العلاقات الطيبة معها ، ومن
ثم سؤالها عما يخصها حتى تعطي صورة
واضحة وشبه مكتملة لأخيها عنها ...

.....

ولجت وردة من إحدى البنيات القديمة
وعلى ثغرها ابتسامة عريضة ، ثم دست في
حافضة نقودها السوداء شيئاً ما ، وقبضت
عليها بشدة ، وغمغمت مع نفسها بثقة بـ :
-الشيخ مبروك قالي ده هايحيب نتيجة أكثر
معاه ، هاحطله منه في الأكل والمياه ، وبعد
سبوعين بالكثير هاشوف البشاير .. !

تنهدت بحرارة لتكمل قائلة :

-الحب بهدلة يا سي إزاز ..

ثم تحركت في إتجاه الطريق الرئيسي ،
وصاحت بنزق وهي تشير بيدها لأحد
سائقي (التوك توك):

-فاضي يا اسطى ولا أشوف غيرك !

رد عليها السائق بصوت متحشرج بعد أن
رمقها بنظرات شبه متفحصة :

-ايوه .. اركبي يا ست !

ثم ألقى ببقايا سيجارته على الأرضية
الإسفلتية ، بينما تابعت هي بصوت جاد :

-اطلع يا اسطى على ((.....))

.....

انشغل رامى بالترويج الدعائى للتوكيل
الجديد الخاص بماركة إحدى السيارات
بمعرضه ، وانبهر والده بما حققه من إنجاز
مقبول في وقت قصير .. وأبدى سعادته به ..
ورغم هذا ، واطب هو على متابعة جديد
سباقات السيارات ، وشارك في إثنين منهما ..
وفاز بالمركز الثاني في الأخير .. فزادت ثقته
بنفسه ..

كما لم يغبُ عن باله مقتطفات من لقاءاته
المتكررة مع عاليا .. وحاول جاهداً أن يصرفها
عن ذهنه .. لكنه صُدم حينما رآها في أحد
أحلامه تجلس معه في غرفته ، وتتمدد إلى
جواره على الفراش مرتدية إحدى قمصان
النوم الحديدية الطويلة ، وتبتسم له إبتسامة
ساحرة جعلت قلبه يخفق بشدة .. ثم رآها

تمد يدها نحوه ذقنه ، وتتحسسها برقة وهي

تهمس له بنعومة :

-وحشتني !

إنتفض مذعوراً من نومته ، وتلاحقت
أنفاسه ، وظل يرمش بعينه ليتأكد أنه عاد
للواقع ، ثم إلتفت بحذر لجانب الفراش ،
وتأكد من خلوه من وجودها .. فأخذ نفساً
عميقاً ، وزفره على مهل .. وحدث نفسه
بذهول وهو يفرك وجهه غير مصدقاً ما رآه :

-حتى أحلامي مش سيباني فيها !

تمدد على فراشه مجدداً ، وعقد ساعديه
خلف رأسه ، وحقق بالسقف ، وأغمض
عينيه وهو يفكر في ذلك الحلم الغريب ..

.....

مر الأسبوع الأول والثاني من العام
الدراسي وهما مليئان بالكثير من الجهد
والإرهاق على الجميع من أجل تعويد
الصغار على النظام المتبع في مدرسة
اللافانيا الدولية ..

وكان جميع العاملين في مبنى الرياض
يبدلون أقصى ما في وسعهم لإحتضان هؤلاء
الصغار وطمأنتهم ..

واستجاب الغالبية منهم ، وإعتادوا رويداً
رويداً على المكان ..

عاني آياز كثيراً في البداية ، ولكنه نوعاً ما
إعتاد على تصرفات الأطفال المفاجئة
والصادمة له دون أن يبدي تقززه أو حتى
إشمئزازه .. وإجتهد لحثهم على اتباع
تعليماته بشأن قواعد تناول الطعام
والتحرك داخل قاعة الدراسة ..

كذلك أرهق بدنياً بسبب وسائل المواصلات ،
فكان يضطر للجوء إلى رامي لإيصاله يوماً
بعد يوم .. وفكر في شراء سيارة ما مناسبة له
حتى يريح الأخير من عناء إيصاله خاصة
أثناء أوقات الذروة ..

.....

كما انشغل كل فرد بما يخص أمور فصله
وتلاميذه الصغار حتى طلبت الناظرة عقد
إجتماع لفريق العمل بعد إنتهاء اليوم
الدراسي ، فبدى التذمر جلياً على معظمهم

..

تشكلت مجموعات من المعلمات في ردهة
الإستقبال ، وتبادلن الحوار الجاد ..
نفخت سالي من الضيق ، وعلقت حقيبة
يدها على كتفها ، وهتفت بتذمر :

-أل هي ناقصة اجتماعات واحنا طالع عينا
طول اليوم

ردت عليها سارة بتنهيده مرهقة :

-معلش يا سالوكة

تدخلت مياده في الحوار قائلة بجديه وهي
تشير بيدها :

-المشكلة بس إنها بتطلب حاجات غريبة في
أوقات أغرب

أضافت هبة وهي تتشاءب :

-المهم احنا عاوزين نخلص في الإنجاز ، مش
لازم فتي ورغي على الفاضي

اقتربت فريال منهن ، وابتسمت قائلة :

-ايه الأخبار معاكو ؟

ردت سارة بإنهاك :

-زي ما إنتي شايفة ، طالع عين أبونا من
الصبح !

ربتت على ظهرها ، وردت بنعومة :

-ربنا يعينكم

سألتها هبة بإهتمام يحمل المزاح وهي تلوح
بيديها في الهواء :

-ايه أخبار الArt؟ والتفنن بتاع العباقرة اللي
عندنا !

تنحنت بخفوت ، وأطرقت رأسها للأسفل
قليلاً لتجيبها بحذر :

-ماهو أنا جاية أقولكم على حاجة ، مش
عارفة بقى إن كانت هتزعلكم ولا لأ

سألتها سالي بنبرة جادة وهي مقطبة الجبين

:

-حاجة ايه دي ؟

انضمت إليهن عاليا ، وأسندت ذراعيها على
كتفي كلاً من سارة وسالي ، وابتسمت قائلة

بمرح :

-متجمعين في الخير دائماً

تنهدت سالي بإنهاك وهي ترمقها بنظرات

متعبة :

-شيلك إيدك يا عاليا ، مش قادرة من كتفي

خالص

غمزت لها عاليا قائلة بحماس :

-يا سالوكتي أنا بأحب أهزر معاكي ، ده انتي

الحتة الطرية

ردت عليها سالي بضجر :

-بعدين ابقى هزري ، بس نخلص بس من

اللي ورانا

ضغطت عاليا على كتفها قليلاً ، ومالت

برأسها عليها لتهمس لها برقة :

-اها ، عشان خاطرک بس !

ابتسمت لها سالي بامتنان وهي تقول :

-تسلمي يا حبيبتي !

سألت هبة بفضول فريال الواقفة إلى

جوارها ب :

-مقولتيش يا فيرو ، ايه الخبر اللي هيزعلنا

!؟

أخذت فريال نفساً عميقاً ، وزفرته على

مهل لتجيبها بصوت شبه حزين :

-انا .. أنا هاقدام استقالتني وأمشي !

شهق الجميع بصدمة ب :

-اااااااااااااااااااا !!

.....

في الحديقة الخارجية ،،،

هز آياز رأسه وهو يسير في إتجاه غرفة
المعلمات متحدثاً بهدوء في هاتفه المحمول

:

-خليها عليا المرادي ، بس ماتتأخرش

تعالت منه ضحكة متحمسة وهو يضيف :

-قريب هاجيب واحدة ، ماهو مش معقول

أفضل مبهدلك معايا كده كتير

مط فمه للأمام ، ومرر أصابعه في فروة

رأسه بعد أن وضع يده عليها ليقول

ياستغراب :

-ادبحلها حاجة؟! ايه التخاريف دي ؟ انت

هاتعملي زي فلاور؟!!!

ثم وضع إصبعيه عند مقدمة أنفه ، وضغط

عليه قليلاً ، وأكمل بصوت شبه مرهق :

-تتكلم في ده بعدين ، أنا هاخلص

الMeeting على ٣٠:٢Maximum) على

أقصى تقدير) .. هاتكون إنت وصلت ؟

إلتوى فمه قليلاً وهو يتابع بـ:

-تمام .. منتظرك يا رامي !

ثم أبعد الهاتف عن أذنه ، وضغط على زر

إنهاء المكالمة ، وأكمل سيره في اتجاه غرفة

المعلمات ..

.....

في غرفة المعلمات ،،،

نذعت ليلة إسدال الصلاة عنها ، ووقفت
تعديل من حجاب رأسها ، ثم جلست على
الأريكة لترتدي حذائها ..

إلتفتت برأسها ناحية رفيقتها ريمان التي
كانت مندمجة في تحضير دروس الغد على
جهاز الحاسوب .. ولكن الأخيرة رمقتها
بنظرات حانية وهي تتشوق بهدوء :

-تقبل الله يا لولو !

ردت عليها ليلة بإبتسامة :

-منا ومنك يا ريمو .. هاتصلي ؟ أسيبلك
السجادة والإسدال ؟

هزت رأسها نافية وهي تجيبها بإيجاز :

-لأ .. أنا Off (أجازة)

انحنى ليلة لتزيح (المصلية) عن الأرضية
اللامعة ، وطوتها وهي تقول بصوت جاد :

-طب يالا عشان نلحق الاجتماع

هتفت ريمان بصوت هاديء وهي محدقة
في شاشة الحاسوب :

-على طول ، أنا بس هاخلص ده ، وأجي
وراكى

-اوكى .. وأنا هاظبط بس الطرحة لأحسن
معوجة

-تمام

ظلت ريمان مشغولة بكتابة الدرس
التفاعلي بطريقة مبتكرة في وقت فراغها
المتاح ، ولم تنتبه إلى دخول آياز إلى الغرفة

وما إن رآها حتى تنهد بخفوت ، وتقوس
فمه مبدياً ضيقه من وجودها بالغرفة .. فقد
إعتقد أنها خاوية ، فهو لم يرد أن يتبادل أي
حديث معها أو مع غيرها ..

لذا اكتفى بالدخول في صمت .. وجلس على
أحد المقاعد الشاغرة حول الطاولة ، وبدأ في
تفقد محتويات حقيبته ..

غرست ريمان أصابع يديها في شعرها ،
وصاحت فجأة بصدمة :

-لألاً .. مش بعد ده كله !

انتبه هو إلى صوتها الغاضب ، ونظر نحوها
بفضول .. بينما تابعت هي بضجر :

-حرام والله ، ده أنا من الصبح شغالة فيه

(It's unfair) (هذا غير عادل)

إحتقن وجهها بشدة ، وإصطبغت وجنتيها
باللون الأحمر ، وبدى صوتها مختنقاً وهي
تكمل بـ :

-مش معقول هاعيد ده كله تاني ، I am so
stupid (أنا غبية جدا)

تردد آياز في مساعدة ريمان ، خاصة أنه
يعرف طريقة استعادة البيانات الضائعة في
حالة فقدانها ..

وقرر أن يتجاهلها .. ولكن شيئاً ما داخله
دفعه للعدول عن هذا القرار..

صر على أسنانه بقوة ، وقاوم تلك الفكرة
محدثاً نفسه بـ :

-ملكش دعوة ، it's not your business
أمر لا يخصك)

إستندت ريمان برأسها على كفيها ،
وأغمضت عينيها وهي تقول بحزن :

-يا ريتني جبت اللاب توب بتاعي ، كان
هيبقى عنديcopy (نسخة) من الData)
البيانات) اللي راحت دي !

أشفق آياز على حالها .. فقد بدت على
وشك البكاء ، فنفخ من الضيق ، وتشدق
قائلاً بصوت مرتفع :

-أنا أقدر أساعدك يا مس

رفعت ريمان رأسها فجأة ، واتسعت
عينيها بصدمة كبيرة حينما سمعت صوته
يأتي من خلفها ..

أدارت رأسها للخلف وهي فاغرة شفيتها ..
وظلت على وضعيته المذهولة لعدة ثوانٍ ..
فهي لم تتوقع وجود أي أحد بالغرفة معها ..

وعابتت نفسها أنها لم تنتبه إلى حضوره ..

نهض آياز من على المقعد ، ودار حول
الطاولة ليتحرك نحوها .. ثم سلط أنظاره
عليها ، وتابع قائلاً بجدية :

-أنا أعرف إزاي أرجع الData (البيانات)

كانت على وشك الرد عليه بإعتراض ، ولكنه
وقف قبالتها ، فرفعت رأسها عفويًا للأعلى
لتحديق به .. فإبتسم لها إبتسامة باهتة وهو
يقول بثقة محدجاً إياها بنظرات مغترة :

Trust me , I can do it as a piece of -

cake (ثقي بي ، فأنا أستطيع فعل هذا

بسهولة)

ثم انحنى بجسده نحوها لتشهق هي

مصدومة ، وتراجع للخلف في مقعدها ..

ومد ذراعه ليمسك بالفأرة ، وأدار رأسه لها
لينظر إليها عن قرب وهو يقول بخفوت :
-أنا شاطر في استخدام البرنامج ده !

إزداد توترها ، وشعرت بسخونة ما تبعث من
وجهها ، وكذلك تلونت وجنتيها أكثر بحمرة
خجلة .. وابتلعت ريقها بصعوبة .. فقد باغتها
هو بتصرفه هذا والذي لم تعتد عليه مع أي
رجل من قبل

حدق بها آياز بنظرات متأملة لملامحها ..
هو لم يرها عن قرب من قبل ، فلم يتبين
لون عينيها الخضراوتين ومدى عمق نظراتها
، فتقوس فمه قليلاً مبدئياً إعجابه بهما .. ولم
ينكر أنها كانت جميلة الملامح رغم فظاظتها
معه ..

كما كانت تلك هي المرة الأولى لها والتي تراه
فيها عن كثب .. فحدقت هي الأخرى في
عينيهِ الزرقاوتين ، وشردت فيهما للحظات ..
فقد كان لونهما مميّزاً وأسراً بدرجة عجيبة ..
في نفس التوقيت دلفت رانيا إلى الغرفة بعد
أن ظلت تبحث عن آياز بالخارج ...
وتسمرت في مكانها مذهولة ، وجمحت
عينيها بغل حينما رأتهما على تلك الوضعية
.. عبست أكثر ، وإكفهرت تعابير وجهها ،
وحل الغضب عليها ، وحدتتهما بنظرات
محتقنة ... ثم شهقت بصوت مرتفع وهي
تضع يديها في منتصف خصرها ، وصاحت
بسخط جلي :ع

-الله الله .. وده نسميه إيه إن شاء الله

!!!

.....

واصل قراءة الجزء التالي

الفصل الرابع والعشرون

الفصل الرابع والعشرون :

تراجع آياز للخلف ، وإعتدل في وقفته ، في
حين زاد إرتباك ريمان وخرجها الواضح بعد
أن رأتها رانيا في تلك الوضعية ..

تجهم وجه رانيا بشدة ، واقتربت منهما
وأكملت قائلة بغضب :

-انتو بتعملوا ايه هنا ؟

نظر لها آياز ببرود ، ووضع يده في جيب
بنطاله ، وسألها بجمود :

-ايه مشكلتك ؟

ردت عليه بحدة وهي ترمق ريمان بنظرات
مشتعلة :

-مشكلتي انك واقف مع دي !

صاحت بها ريمان بضيق بادي في وجهها
وهي تشير بإصبعها محذرة :

-اتكلمي كويس عني ، وإياكي تغلطي فيا !!!

لوت فمها لتجيبها بسخط :

-الغلط ليه ناسه ! واللي زيك آآ...

صاح آياز مقاطعاً بغلظة وهو يشير بذراعيه
في الهواء :

-اسكتوا انتو الاتنين

نفخت رانيا بغل ، وعقدت ساعديها أمام
صدرها ، وظلت تهز ساقها اليمنى بعصبية ..

لوح آياز بإصبعه في وجه رانياً قائلاً بتهديد :

-يا ريت قبل ما تتكلمي تفهمي في ايه الأول

ردت عليه رانيا بصوت محتقن وهي تهز

حاجبيها :

-أفهم ايه بس ، ده أنا شوفت بعيني محدش

قالي .. واحد مايل على واحدة ، ولازق فيها

أوي ، وهما الاتنين أعدين لوحدهم ومتنحين

لبعض ، والشيطان ثالثهما !

هتف آياز بنبرة ساخطة وهو يرمقها بنظرات

منزعجة :

-انتي تفكيرك عقيم

أرخت ساعديها ، ولوحت بذراعها أمام وجهه

قائلة بحدة :

-نعم ! انت شايف كده ؟

هز رأسه ليضيف بقوة :

-اه طبعاً ، زميلة ومحتاجة مساعدة ، وده
اللي عملته ، كون إنك شايفاه بشكل تاني
تبقى مشكلتك مش مشكلتنا

أشارت بيدها للخلف وهي تجادله بعناد :

-ده عندك في بلاد برا ، لكن هنا بيتسمى
مسخرة وقلة أدب

لامست رانيا بحديثها اللاذع وترأ حساساً لدى
ريمان ، فما فعلته كان خطأً حتى وإن كانت
نواياه بريئة ، ولكنها فتحت الباب عليها ((
للقييل والقال)) .. لذا ابتلعت غصة مريرة ،
وأخذت نفساً عميقاً لتصيح بصوت شبه
مختنق وهي تحاول كبح عباراتها :

-هي بتتكلم صح ، كان لازم اخد بالي أكثر!

ثم سحبت حقيبة يدها ، وركضت مسرعة
للخارج وهي مطأطأة الرأس و دون أن
تضيف كلمة أخرى ..

صُدم آياز من ردة فعلها ، وحاول اللحاق بها
صائحاً :

-مس ريمان ،Wait (انتظري)

إبتسمت رانيا بسعادة ، وأضافت قائلة
بسخط جلي :

-إياكش تحس على دمهها ، وماتكونش دموع
تماسيح

احتقنت عيني آياز ، وإرتفعت الدماء
الساخنة في عروقه ، وصاح بها بغل وهو
مكور قبضة يده :

-انتي ايه بالظبط ؟

ردت عليه بثقة مفرطة وهي تتغنج بجسدها

:

-أنا رانيا ، معلمة اللغة العربية !

كز على أسنانه ليقول بحنق وهو يرمقها
بنظرات شرسة :

-بجد مش لاقى كلام أقوله ليكي

ابتسمت له ببرود لتستفزه أكثر ، وأضافت :

-مش هتلاقي عشان أنا بأتكلم في الأصول

حدجها بنظرات منزعجة ، واتجه نحو الطاولة
ليجمع متعلقاته ، وغمغم بعصبية :

-أنا ماشي

ثم اتجه إلى الخارج ووجهه يعلوه الضيق ..

بينما تنهدت بإرتياح ، واعتلى ثغرها

ابتسامة إنتصار ، وحدثت نفسها قائلة :

-كده أحسن ، خليها تتلم ، وتعرف حدودها ..
المز بتاعي وبس !

.....

في غرفة مكتب الناظرة ،،،

تزاحمت المعلمات بداخل الغرفة وجلسن
ملتصقات على الآرائك من أجل حضور
ذلك الإجتماع المفاجيء ..

دلفت ريمان إلى الداخل وعينيها حمراوتان
بشدة ، ووجهها محتقن للغاية ..

نظر لها الجميع بإندهاش ، وبادرت سارة
بسؤالها بإهتمام قائلة :

-مالك يا ريمو ، وشك جاي ألوان كده ليه
ردت عليها ريمان بإيجاز دون أن تنظر نحوها
:

-مافيش

أردفت سالي قائلة بمزاح :

-تلاقي هتلر سمعتها كلمتين بايخين

همست سارة وهي تغمز لسالي ب :

-قصدك آآ...

قاطعتها محذرة متابعة بخفوت :

-ششش .. الحيطان ليها ودان ، واحنا هنا في

عرين الأسد

ابتسمت سارة قائلة :

-على رأيك ، ممكن نلاقيها فجأة فوق

دماغنا !

لم تعقب ريمان بأي كلمة ، فلم تكن في

حالة مزاجية تسمح معتدلة .. فيكفيها ما

تعرضت له من الإحراج والإهانة على يد رانيا

، وذن السوء بها .. وما قد يحدث لاحقاً من

إطلاق شائعات مغلوبة بحقها ..

ضربت منة فريال على فخذها وهي تسألها

بإهتمام :

-حقة الكلام اللي سمعته ده ؟

هزت رأسها موافقة وهي تجيبها :

-أها-

عبست منة بوجهها متسائلة :

-طب ليه يا بنتي ؟ ما انتي مبسوفة معانا

هنا !

تنهدت بصوت شبه مختنق بـ :

-والله أنا صعبان عليا المكان عشان الناس

، اللي فيه ، حقيقي مش هلاقي جروب زيكم ،

بس الظروف !!!

سألتها هناء بجديّة وهي محدّقة بها :

-هو مصمم برضوه ؟

هزت رأسها بخفوت لتجيبها :

-ايوه ، جوزي مآخر السفر عشاني ،
ومعدّتش ينفع أكثر من كده تأجيل ، الشقة
خلصت ، والعفش اتنقل ، وهو المفروض
يستلم من أول الشهر الجاي في البحر الأحمر

مطت هناء ثغرها لتضيف بهمس :

-ربنا معاكي

سألتها منة مجدداً بجديّة :

-على كده انتي ناوية تشتغلي ؟

ردت عليها فريال وهي تشير بكفها :

-والله على حسب .. لو لاقيت المناسب

هاشتغل

أكملت منة بصوتها الجاد :

-متتعديش في البيت ، واكيد في مدارس
هناك ، مش معقول يعني هتبقى ساكنة في
صحراء

-على رأيك

فُتح الباب ليدلف آياز إلى الغرفة ، وأردف
قائلاً بخفوت :

Hi, ladies- (مرحباً سيداتي)

ابتسمت له جانيت ، وأشارت بيدها نحو
المقعد الشاغر :

-اتفضل يا مستر آياز

بادلها ابتسامة باهتة وهو يرد :

-ثانكس

ثم بادلته المعلمات التحية ، وتابعن حديثهن
النسائي عن مشكلات الأطفال معهن .. ولم
يشارك هو في الحديث ، ومع هذا حاول أن
يختلس النظرات إلى ريمان الجالسة في
مواجهته ، وشعر بضيق في صدره بعد أن
رأى علامات التجهم والعبوس واضحة عليها

..

زفر في ضيق ، وحدث نفسه بضجر :

-لولا الغيبة دي مكانش حصل أي حاجة ! أنا
دايما موعود بالأشكال دي !

حضرت رانيا هي الأخرى إلى الغرفة وهي
تتأبط في ذراع رفيقتها نشوى ، ولوت فمها
في إستهزاء وهي ترمق ريمان بنظرات ذات
مغزى فهمتها الأخيرة على التو ، وأجفلت
عينها في ضيق وحزن ..

لم يكنُ هناك أي مقاعد أخرى شاغرة سوى
مقعد الناظرة ، فإبتسمت رانيا بسعادة ،
فهنالك مسند الأريكة المقارب لمقعد آياز ،
وهي ستجلس عليه لتكون إلى جواره ..

لذا مالت على نشوى برأسها ، وهمست لها
وهي تضع يدها أمام فمها :

-اتحشري انتي مع أي حد ، وأنا هاروح هناك

غمزت لها نشوى قائلة بمزاح خافت :

-بيضالك في القفص يا حلوة

ردت عليها رانيا بإيجاز :

-طبعاً

ثم تمتمت مع نفسها بفرحة غامرة :

-عقبال ما نقعد سوا في الكوشة يا مز!

أسرعت بالذهاب إلى هناك ، وألقت بجسدها
على المسند ، وإنتصبت بكتفيها في زهو
وإنتصار ..

نفخ آياز بصوت مسموع لعل الجالسة
بجواره تفهم ، ولكنها على العكس كانت
تبتسم له ببرود أكثر ..

فأشاح بوجهه بعيداً عنها ..

وبعد لحظات انضمت الناظرة إعتماذ إلى
الجميع ، ورسمت على ثغرها ابتسامة
سخيفة :

-مش هاعطلكم كتير .. احنا هنتكلم في كام
جزئية كده على عجاله تخص الفنان داي
للأطفال ، ومس Art (الرسم) الجديدة لأن
اكيد سمعتوا ان مس فريال هاتسينا
وتمشي

ساد حزن واضح على وجه المعلمات اللاتي
قضين عدة سنوات معها ، وصدرت
همهمات خافتة بينهم ..

رفعت الناظرة إعتماذ نبرة صوتها قليلاً
لتقول :

-طبعاً يعز علينا إن مس مجتهدة زي مس
فريال تسيينا ، بس دي طبيعة الحياة ، واحنا
بنتمناها التوفيق في أي مكان ، وهاتفصل
دايماً ليها مكاتها عندنا وفي قلوبنا

لمعت عيني فريال بشدة ، وقالت يامتنان :

-شكراً مس إعتماذ على كلامك ده ، فعلا
انتو أكثر من عيلتي !

أكملت الناظرة بهدوء جاد :

-كمان حابة أشكركم على تعبكُم في
الأسبوعين اللي فاتوا في الدراسة ، كنتم على
قدر المسئولية و..آآ...

لم يهتم آياز بالإصاغ إلى حديثها ، فشاغله
الأكبر حالياً هو ريمان ..

ورغم أنه عاهد نفسه على ألا يعير أي
معلمة الإنتباه من أي نوع ، ولكنه حنث
بوعده فقط من أجلها ..

فقد آلمه أن يظن بها أي أحد السوء ، وهو
من تصرف معها بعفوية .. ولم يكن ذنبها ..

ظل يفكر ملياً في طريقة ما يتحدث بها إليها
، ويزيل أي سوء فهم قد حدث .. ولكن قطع
تفكيره صوت الناظرة وهي تقول :

-وعاوزه أخص كمان بالذكر مستر آياز اللي
احتضن الأطفال وتفاعل معاهم بحرفية

ابتسم لها مجاملاً ، وعقب بإيجاز :

It's my job- (دي وظيفتي)

ردت عليه بجدية وهي محدقة به :

-كلنا عارفين انها مهمتك ، بس إنت كنت

على أد ثقة الإدارة فيك ، واتمى تستمر

على هذا المنوال

تابع بفتور :

hope so- (أرجو هذا)

تنحنحت الناظرة بصوت خافت ، وهتفت

قائلة بنبرة متحمسة :

-دلوقتي نتكلم عن خطة الفان داي اللي

مس جانيت اقترحتها السنادي ، وأنا حابة

أخذ رأيكم فيها سريعاً ، وبرضوه هديكوا

فرصة نفكروا في أي إضافات وتكتبوها على

الصفحة بتاعتنا

.....

انفض الإجتماع بعد ربع ساعة من
المناقشة المثمرة ، وذهب الكل إلى طريقه ..

تلوت عاليا بجسدها قليلاً ، وهتفت قائلة

بضجر :

-مش قادرة ، هاخش التويلت وأحصلكم

أردفت سارة قائلة بجدية وهي تنظر إلى

ساعة هاتفها المحمول :

-أنا مش هاينفع أستنى حد ، يدوب ألحق

أخذ أي مواصلة وأروح البيت

: بينما أضافت سالي :

-استني يا سارة أنا هاركب معاكي

هزت عاليا رأسها وهي تقول ياقتضاب :

-اوكي يا بنات ، أشوفكم بقى بكرة

ابتسمت لها سارة ، واحتضنتها لتقبلها وهي

تقول :

-ماشي يا عاليا ، سلام يا حبيبتي

ردت عليها بإبتسامة عادية :

-باي يا قمر

رفعت ميادة يدها للأعلى ، وهتفت بحماس :

-حد عاوز يجي معايا أوصله ، أنا فاضية !

قبضت منة على ذراعها ، وقالت بسعادة :

-أنا يا ميادة

مطت هناء شفيتها لتقول برقة مصطنعة :

-دودو حبيبتي خديني في سكتك !

وتسائلت نادية هي الأخرى بنبرة هادئة

ورزينة :

-وأنا يا أخت ميادة ، في مساحة لي ؟

هزت ميادة رأسها لتقول مجاملة :

-طبعاً يا نادية .. ده العربية كلها ليكي

ابتسمت لها نادية هاتفة بإمتنان :

-شكراً على ذوقك

ثم أضافت ميادة بجدية وهي تتجه صوب

الممر :

-تمام ، أنا هاسخن العربية ، وحصلوني

قابلتها هبة في طريقها ، وقالت بمزاح وهي

تضع يدها على كتفها :

-ما تحتضنيني أنا كمان يا ميدو !

نظرت لها ميادة من طرف عينها قائلة بهدوء

:

-تعالى يا هبة ، العربية بتشيل من الحبايب

ألف !

-حبيبتى .. حبيبتى !

.....

أسرع آياز خلف ريمان ، وصاح بصوت

مرتفع ليلفت إنتباهها :

-مس ريمان ، بليز

لم تستجب له ، بل تابعت سيرها وهي

مكفهرة للغاية .. أسرع هو فى خطاه ،

وتجاوزها ليقف أمامها ويسد عليها الطريق ..

ثم رفع كفه أمام وجهها ، وهتف بصوت

لاهث :

-سوري يا مس ، أنا مش هاعطلك كتير ،

بس كنت عاوز أقولك

رمقته بنظرات قوية غاضبة ، وردت عليه

بحسم :

-بليز مستر آياز ، كفاية اللي حصل ، مش

حابة ان حد يتكلم تاني عن وحش

-ده سوء تفاهم ، وآآ...

قاطعته بجمود شرس :

-It's over (الموضوع انتهى) ، عن اذنك !

ثم تحركت للجانب ، وأسرعت أكثر في خطاها

.. فزفر بغضب ، ومرر أصابع يده في رأسه ،

وغمغم بضجر وهو يتلفت حوله بحيرة :

-أعمل ايه معاها !؟

.....

راقبته رانيا بنظرات مشتعلة ، وكزت على

أسنانها قائلة بصوت محدد :

-شايفة بيجري وراها ازاي ؟

ردت عليها نشوى بعدم اكتراث :

-اهدي يا رووني ، عادي يعني بيلطف الجو

معاها

-لا يلف ولا يشطف ، أنا عاوزة أقطع عرق

وأسيح دمه معاها

-ناوية على ايه يعني ؟

حدقت أمامها في الفراغ ، وأجابتها بمكر :

-هامخمش على رواقه وأقولك

دفعتها نشوى للأمام قائلة بجدية :

-طيب ، يلا بقى عشان اتأخرنا ، لأحسن

مش هنلاقي مواصلات هنا بالساهل !!!

.....

وصل رامي عند البوابة الرئيسية لمبنى
الرياض ، وانتظر أمام مقدمة السيارة ، وظل
يتحدث في الهاتف مع والده لينجز بعد
الأعمال العالقة ..

تابع بعدم اهتمام خروج المعلمات من مبنى
الرياض ، وحاول أن يلتقط بنظراته الثاقبة
معلمته المنشودة ، ولكنها لم تكن بين
المتواجدات ، فظن أنها لم تحضر اليوم ..

في نفس التوقيت ، اقترب من البوابة بعض
الكلاب الضالة ، وظلت تحوم حول المنطقة
محدثه أصواتاً مزعجة .. فقام العم سيد
حارس البوابة بإبعادهم بحذر ، ونبه على
المعلمات قائلاً :

-امشوا جنب الرصيف يا ميسات ، أنا
واقفلكم

ردت عليه ميادة بهدوء :

-ماشي يا عم سيد

هتفت هناء بنبرة قلقة :

-المفروض نبليج البلدية تتخلص منهم

ردت عليها منة بنبرة حاسمة :

-بكرة نبليج الإدارة وهما يتصرفوا

أضافت هبة قائلة بإنزعاج :

-بالظبط ، مش معقول هانفضل في القلق

ده واحنا خارجين كل يوم من الكي جي

هزت هناء رأسها قائلة بخوف :

-ايوه ، وممكن واحد من الكلاب دي يعضنا

وتتبهدل ا

ابتلعت هبة ريقها وهي تقول :

-ربنا يستر

أشارت لهن ميادة بيدها قائلة بصوت جاد :

-طب يالا أوام اركبوا العربية !!

وما إن تأكد العم سيد من إنصراف
المعلمات حتى عاد للدخل ، وكان على
وشك إغلاق البوابة ، ولكن صاح به آياز

بصوت مرتفع :

-استنى يا عم سيد

لوح له الحارس بيده قائلاً :

-اتفضل يا مستر

-شكراً

-مع السلامة

ثم قام بإغلاقها ، وتوجه ناحية غرفته الأمنية

.....

انتهت عاليا من قضاء حاجتها ، وتوضأت ،
ثم أكملت إرتداء حاجبها ، وتأملت هيئتها في
المرآة ، وحدثت نفسها بقلق وهي ترى
التوقيت في هاتفها :

-أووف ، ده أنا محستش بالوقت خالص ، يا
ربي !

سحبت حقيبتها ، وعلقتها على كتفها ،
وركضت بخطوات مسرعة في إتجاه البوابة ،
ولكنها تسمرت في مكانها مصدومة حينما
وجدت البوابة مغلقة ..

نفخت من الضيق ، وقالت بتذمر :

-كده مضطرية ألف من الباب الوراني ، وأنا
مش بأحب المنطقة دي !

.....

جلس آياز في المقعد الأمامي في السيارة ،
وظل صامتاً ، فنظر له رامي بإستغراب ،
وسأله :

-مالك ؟

أجابه بإيجاز وهو يسند رأسه للخلف :

-مافيش

-أوبا ، شكل اليوم قافش معاك

إستدار آياز برأسه للجانب ، ورد عليه بضيق

بادي في نبرته :

-رامي ، أنا على أخري ومش عاوز أتكلم

-أوكي براحتك ، أنا كنت بأطمئن عليك

-شكراً ، بس أنا مرهق ، واليوم مش ظابط

معايا

-أها

أدار رامي المقود ، وانطلق بالسيارة في
الطريق الجانبي ، ورأى من المرأة تجمع
الكلاب الضالة عنده .. فلوى فمه قليلاً ،
ولكن إتسعت عينيه مصدوماً حينما لمح
عاليا تخرج من البوابة الصغيرة – والجانبية
- لمبنى الرياض .. فخفق قلبه برعب
حقيقي عليها ، و

.....

.....

واصل قراءة الجزء التالي

الفصل الخامس والعشرون

الفصل الخامس والعشرون :

ضغط رامى فجأة على مكابح السيارة
ليوقفها ، فإندesh آياز مما فعله ، وقطب
جبينه وهو يسأله مستفهماً :

-وقفت العربية ليه ؟

-لحظة بس

قالها رامى وهو يترجل من السيارة ليتحرك
نحو غطائها الخلفى ، ويسحب منه آلة حادة
.. ثم ركض فى إتجاه عاليا ..

تعجب آياز من تصرفه الغير مفهوم ، وهتف

:

-يا رامى استنى ، انت راىح فىن طيب

فهمنى ، وأخذ معاك دى ليه ؟؟؟ !!!

ترجل آياز هو الآخر من السيارة بعد أن رأى
ذلك المنظر المروع .. وحاول التدخل
لإنقاذها ...

ركض حارس البوابة (العم سيد) في إتجاه
مصدر الصراخ وهو يحمل في يده عصا
غليظة .. وصاح بحدة :

-خلي بالك يا مس عاليا

ركلت عاليا الكلب بساقها بقوة شديدة رغم
خوفها .. وأسرع رامي نحوه ليبعده عنها
صارخاً بـ :

-سيبها يا كلب يا ابن ال ***ع

سمع الكلب أصوات أقدام تقترب منه ،
ورأى بعينه الثاقبتين تلك العصا التي
وجهها الرجل نحوه ، فحرر ساق عاليا ، وظل
ينبح بصورة قوية فيه ...

هدده العم سيد بضربه بالعصا ، وظل يلوح
بها في الهواء وعلى مقربة منه ، فتراجع
للخلف ولم يكف عن النباح .. بينما قذفه
آياز ببضع حصوات إتقطها من الأرضية ..
ليتلفت الكلب برأسه نحوه ، ثم يركض
مبتعداً عن الجميع ..

لوت عاليا ساقها ، وبكت بصوت متشنج
قائلة :

-أنا اتعضيت ، رجلي مش قادرة منها ، آآآه

جنى رامي على ركبته أمامها ، وحاول أن
يتفحص ساقها ، وتشدق قائلاً :

-اهدي ..ان شاء الله خير !

هتف الحارس عم سيد وهو يشير بيده :

-هاطلبلك الاسعاف يا مس عاليا ، لأحسن
دي عضه كلب ، يعني آآ...

قاطعته عاليا بصراخ متشنج :

-عا .. دي آخرتها ، يعضني كلب ، كنت فين
قبلها يا عم سيد ؟

رد عليها بصوت أسف :

-والله بلغنا البلدية ، بس محدش عبرنا

أردفت عاليا قائلة بسخرية وهي تبكي :

-دلوقتي هايجوا رمح بعد اللي جوالي ، إهيء

..

أضاف رامي قائلًا بمزاح :

-وده وقت تنكيت يا عاليا

نظرت له شزراً من عينيها الباكيتين ،

وصاحت فيه بصوت منتحب :

-انت ! جاي ليه ؟ طبعاً تلاقيك اللي بعته ليا

!

فغر فمه مدهوشاً من إتهامها الباطل ،
ودافع عن نفسه قائلاً بنبرة شبه منفعة :

-أنا ! يا شيخة حرام عليكى ، ده أنا كنت
هاجيبه من ديله وآآ...

قاطعہ آیاز متسائلاً بجديۃ وهو ينفذ يديه
:

-مس عالیا ؟ حاسۃ بإیہ الوقتی ؟

أجابته بصوت مختنق :

-مش قادرة من رجلی

هتف رامی قائلاً بتوسل :

-طب عشان خطري متعيطيش ، اهدي
وهانتصرف

أخذت عالياً أنفاساً عميقة متواصلة حتى
تسيطر على نوبة البكاء ..

بينما حك آياز رأسه ونظر حوله بفضول ،
ثم تحرك عائداً إلى السيارة دون أن ينبس
بكلمة إضافية ..

أشار رامي بيده للحارس سيد هاتفياً بضيق
بعد أن وجدته يقف في مكانه دون تقديم أي
مساعدة مجدية :

-هات كرسي يا عم الحاج ، مش هاتفضل
الأبلة كده ممددة على الأرض
تنحج بحرج ، ورسم ابتسامة صفراء على
وجهه وهو يجيبه :

-أيوه صح .. ثواني

ثم تحرك في إتجاه بوابة مبنى الرياض
ليختفي داخله ..

نظرت عاليا بحنق لرامي فهو دوماً يردد على
مسامعها تلك الكلمة المستفزة (أبلة) ..

وحاولت الإعتدال في جلستها ، ولكنها
صرخت متأوهة من الألم وهي تحرك ساقها

..

دقق الأخير النظر في القطع البادي في بنطالها
ليتأمل هيئة الجرح الأولية ، فإنزعجت هي
من نظراته ، وسألته بحدة :

-انت بتعمل ايه ؟

رد عليها بهدوء حذر:

-بأشوف العضة

عبس وجهها بشدة ، وهتفت بنزق :

-نعم !!

تابع قائلاً بإهتمام ظاهر على تعابير وجهه :

-مش يمكن تكون حاجة خطيرة

اتسعت مقلتيها اللامعتين بشدة ، وأجابته

بنبرة فزعة :

-هو .. هو أنا هايجيلي داء الكلب من العضة

دي ؟

هز رأسه إيجاباً ليقول :

-جايـزـو. ويمكن تاخـدي ٢١ حقنة !

حركت رأسها مستنكرة ، وهتفت محتجة

بصراخ :

-لألاً ، مش عاوزه حقن ، مش عاوزه

أشفق رامي على حالتها البائسة ، وحاول

أن يهون عليها قليلاً من خطورة الأمر ،

فأردف قائلاً بإبتسامة عادية وهو يشير لها

بيده :

-اهدي ، الكلام ده قديم ، مش بيحصل
دلوقتي

حدقت هي فيه بنفس النظرات الخائفة ،
وزاد نحيبها .. فخفق قلبه أكثر على حالها ،
وتابع قائلاً ياهتمام :

-بس لازم نزوح على مستشفى الكلب
عشان يكشفوا عليكى ونظمن

هزت رأسها موافقة ولم تعقب .. فحديثه
صائب .. وليست بحاجة للجدال معه في تلك
المسألة الخطيرة ..

ورغم أنها كانت لا تحبذ رؤيته إلا أنها حمدت
الله في نفسها أنه كان متواجداً من أجلها ،
وأنقذها من أنياب الكلب المسعور ..

وراقبت بحذر نظراته المهمة بها ، وإنشغاله
بسلامتها ..

أردف هو قائلاً بحذر :

-متحركيش رجلك كتير عشان الوجع ..
خليها ثابتة على أد ما تقدرى

لم تشعر عاليا بنفسها وهي تطالع رامى
بنظرات غريبة عما مضى ، فرغم عدائها
الدائم معه ، وصداماتهما المتكررة ، إلا أنه
دائماً يقدم لها يد العون ، ويكن متواجداً في
الوقت المناسب .. ولم تنتبه لحديثه لها ..
إلتقطتها عينيه وهي تنظر إليه بغرابة ..
فتعجب منها وسألها مازحاً :

-شكلي حلو من قريب ، فوتوجونيك صح ؟

توردت وجنتيها بشدة ، وأطرقت رأسها
محرجة منه ..

ابتسم رامى لخلجها ، وغمغم مع نفسه
بسعادة :

-حقي أشكر الكلب اللي قرب المسافات

بيننا ٢!

قاد آياز السيارة ، ثم تحرك بها للخلف
ليوقفها على مقربة من عاليا ، وأخرج رأسه
من السيارة ليهتف بقوة :

-تعالى يا مس ، هانوصلك للمستشفى

أشار له رامى بإصبعه محيياً إياه ، وأضاف
بحماس :

-عندك حق يا إيزو .. هو ده الكلام ! احنا
هنوصلها ونظمن عليها بنفسنا .. الأقربون
أولى !

ارتبكت عاليا ، وهزت رأسها معترضة :

-لأ .. عم .. عم سيد هايطلب الإسعاف وآآآ...

قاطعها بصوت شبه مازح وهو مسلط
أنظاره عليها :

-هو في اسعاف في مصر يبجي في ميعاده !
ده مش بعيد يوصل على الترم الثاني

-هاه

تابع قائلاً بمرح في محاولة منه للتخفيف من
صعوبة الموقف :

-هو إنتي مش عايشة في مصر وعارفة ؟
الحسنة الوحيدة اللي بناخذها من الإسعاف
لما نكون وراه ويفتحلنا سكة وسط الإشارة !
ساعتها بنحس بقيمته أوي ٢

لوت شفيتها ، وتنهدت متألّمة .. وتمتمت
بحزن :

-يا منظري وسط الناس لما تعرف إن
عضني كلب ٢

تابع هو قائلاً بسخرية :

-ها .. هينزل بوست اكيد على مواقع
التواصل ، ومش بعيد تلاقي عم الحاج اللي
تلاشى جواد ده هو اللي عامل شير للخبرا
وضعت يدها على فمها ، وهتفت بحرج :
-يادي الفضايح ، هاوري وشي ازاي للناس ا
رفع حاجبه للأعلى قائلاً بجدية :

-ما اللي يعرف يعرف ، هو انتي اللي
اتعضيتي ولا هما ، المهم في الآخر سلامتك
شعر آياز بالضجر لتجاهله ، فصاح بنبرة
مرتفعة وهو يضغط على بوق السيارة :
-يالا يا رامي ، مش هانفضل كثير كده ،
الدقيقة ممكن تفرق معاها
تسائلت عاليا بهلع بعد عبارته الأخيرة :

-هي العضة مسمومة ؟

هز كتفيه في حيرة وهو يجيبها :

-مش عارف ، بس ده مش بيتبول (نوع
كلب) يعني ، ده كلب متشرد بياكل من
الزبالة ، وبيرمرم وآآ...

قاطعته بنبرة متأففة وهي تغمض عينيها
قسراً :

-بس .. بس .. مش عاوزة أسمع

أشار لها رامي بكفه قائلاً وإبتسامة سعيدة
تعلو ثغره :

-طب يالا ، هاتي ايدك ، أنا هساعدك تقفي
ضيققت هي عينيها بشدة لتنظر له بحدة ،
وكزت على أسنانها محدثة نفسها بإنزعاج :

-جياالك على الطبطاب !

ظلت ابتسامة رامي ظاهرة على وجهه ،
وعينيه ترقصان طرباً من الفرحة لوجوده
بقربها .. ولكن عبوس وجهها وتجهمه أصابه
بالإستغراب ..

ضغطت عاليا على شفيتها بقوة لتتابع
حديث نفسها بعناد :

-بس أنا مش هنولهاالك

رفعت رأسها للأعلى في كبرياء زائف ، وردت
معترضة :

-لأ شكراً ، أنا هاقوم لوحدي

أصر على أسنانه قائلاً :

-مش هاتعرفي تقفي

ردت بنبرة معاندة وهي تستند بمرفقيها
للخلف :

-لأها عرف .. امسك بس شنطتي !

تناولها منها وهو ينفخ من الضيق :

-هاتي

لم يرد رامى أن يتجادل معها ، وتركها تحاول
لتعرف أنه على صواب ..

وبالفعل ما إن حركت ساقها حتى صرخت :

-آآ.. آآآآآآآآه

رمقها بنظرات محتدة ، وعاتبها بـ :

-مش قولتلك !

ثم مد يده بحقيبتها قائلاً بصوت شبه مازح :

-خدي شنطتك ، وأنا هاتصرف ، هي أول مرة

يعني !

إنعقد ما بين حاجبيها بشدة بعد جملته

الأخيرة ، وهتفت بنزق :

-نعم ؟ قصدك ايه ؟

لف رامي ذراعه بحذر حول ظهرها ليسندها

، ووضع الأخر أسفل ركبتيها ، ثم استجمع

قوته ليحملها ، ومن ثم نهض بحذر عن

الأرضيةع

شهقت مصدومة من فعله ، ولم يكن

بإمكانها الاعتراض .. ولكن وجهه كان كافياً

للتعبير عن خجلها الشديد من فعلته ..

فهي محمولة أمام مرآى العامة ، وعند مقر

عملها ..

ترجل آياز من السيارة ، وقام بفتح باب

المقعد الخلفي ، وأفسح المجال لرامي

ليتمكن من وضع عاليًا عليه ، وعاونها حتى

تفرد ساقها المصابة .. ثم تراجع بجسده

للخلف ، وسألها :

-مرتاحة كده ؟

ردت عليه بصوت متحشرج وهي تتحاشى

النظر إليه :

-أها ..

وضع رامي يده على كتف آياز ، وسأله

بهدوء :

-يالآ آياز ، هاتسوق ولا أنا أسوق ؟

رد عليه الأخير بجدية :

-اركب انت الناحية الثانية ، أنا هاسوق

-اوكي

شعرت عاليا بحرارة وجنتيها .. وبالتعرق

الشديد يصيب جسدها من فرط التوتر ...

ركب رامي في المقعد الأمامي ، وإستدار
برأسه ليتأملها ، ثم ابتسم لها قائلاً بخفوت
وهو يغمز لها :

-أظن العربية دي شاهدة على آآآ... انتي
فاهمة بقى !

احتقنت عينيها من تلميحه المزعج عن
موقفها السابق داخل سيارته .. وضغطت
على شفيتها بشدة ..

تحرك آياز بسلاسة بالسيارة في إتجاه
المشفى .. واستمر رامي في الإبتسام ببلاهة
لعاليا ، ليغيظها ب :

-وحياتك نصفت العربية بجركن ديتول !
الريحة كانت ايه ! مقولكيش

نفخت في وجهه بغضب .. ورمقته بنظرات
نارية .. وكزت على أسنانها لتقول بغل :

-مش انت السبب ولا أنا اللي آآآ....

تابعهما آياز بفضول .. ورمق الاثنين بنظرات
غريبة .. فقد كان معظم حديثهما غامضاً
بالنسبة له .. فتسائل بإستغراب :

-هو ايه اللي حصل ؟

اعتدل رامى في مقعده ، وأجابه بمكر :

-مافيش .. دي حكاية وراحت لحالها !

أوما آياز برأسه قائلاً بهدوء :

-مممم .. اوكي ..

.....

بعد لحظات ، خرج الحارس سيد من البوابة
وهو يحمل مقعداً خشبياً ، وتلفت حوله
متسائلاً بإستغراب :

-الله ! هي مس عاليا راحت فين ؟

هز كتفيه في عدم اكتراث ، واضاف ببرود :
-وأنا مالي ، طالما الحادثة برا المدرسة يبقى
انا في السليم ٢!!!

.....

واصل قراءة الجزء التالي
الفصل السادس والعشرون

الفصل السادس والعشرون :
صف آياز السيارة عند أقرب مشفى ، بينما
ترجل رامي منها ، وإستدار ناحية باب
المقعد الخلفي ليفتح الباب لعاليا التي
تحركت بحذر للخارج ...

كان رامى على وشك الانحناء وحمل عالياً
مجدداً ولكنها أوقفته برفع كفها في وجهه ،
وهتفت بجديّة :

-مش عاوزه مساعدة ، أنا أقدر أمشي
لوحدى

نفخ رامى بضيق وهو يجيبها متسائلاً:
-أنا بأسهل عليكى الموضوع ، ليه بتعقدي
الدنيا ؟

رفعت حاجبها للأعلى ، ونظرت له
بإستخفاف وهي ترد بجمود :

-أنا حرة !

ثم رمقته بنظرات أكثر حدة لتضيف
بإستنكار :

-ولا تكونش إنت مسئول عني وأنا مش
واحدة بالي ، ده انت لا قديبي ولا زميلي ولا
خطيبي ولا حتى ابن خالتي !!

أثارت كلماتها الأخيرة حنقه ، وزفر بصوت
مسوع ليرد عليها ساخراً :

-انتي عارفة المثل اللي بيقول أخرت
المعروف الضرب بالكفوف ، أهوو ده ينطبق
عليكي

لوت شفيتها ، وإعتدلت في وقفها ، وعلقت
حقيبتها على كتفها ، وأمرته بصوت جاد
يحمل المزاح :

-وسع شوية خليني أعرج لجوا !
أشار بيده للأمام وهو يتحرك للجانب ،
وأردف ساخراً :

-اتفضلي يا أبلة اعرجي براحتك !

راقبهما آياز من داخل السيارة ، وتسائل مع

نفسه بإستغراب :

-لأ واضح من طريقة الكلام بينهم إن

الموضوع كبير!

أراح ساعديه على مقود السيارة ، وتابع

بتوعد :

-اوكي يا رامي ، هاعرف منك كل حاجة على

رواقه !

.....

دلفت عاليا إلى داخل المشفى ، وتم

إسعافها من أثر العضة بحرفية ..

خشيت أن تكون المسألة خطيرة ، ولكن

طمأنتها الطبيبة قائلة :

-مافيش قلق إن شاء الله ، هما بس ٣ حقن
، كل يومين هتاخديها ، وبعد كده هنعمل
فحص تاني !

سألها رامي بجدية زائفة وهو يفرك طرف
ذقنه :

-يعني مش هاجيلها سعار ولا شحار؟
فغرت عاليا فمها مصدومة ، ورمقته بنظرات
نارية ، ثم هتفت بغیظ :

-افندم؟!!!

سألته الطيبة بإستغراب وهي قاطبة جبينها
:

-مين حضرتك؟

أشار رامي بيده لعاليا ، وأجابها مازحاً :

-أنا جاي مع العضة ، قصدي معاها

رمقته بنظرات محتدة ، وصاحت فيه وهي

تصر على أسنانها بغضب :

-انت جاي تهزر هنا ؟

أضافت الطيبة قائلة بهدوء :

-يا أستاذ خد بالك من المدام وآآآ...

قاطعته بحدة وهي تصح لها :

-آنسة من فضلك ، هو أنا مش باين عليا ولا

ايه ؟!

حاول رامى إخفاء ابتسامته ، وهمس بحذر :

-باين كده ، مستقليتك !

.....

انتشر خبر إصابة عليا على صفحة معلمي

المدرسة الرسمية ، فتسابقت صديقاتها

المقربات في الإتصال بها للإطمئنان عليها ،

ومعرفة تفاصيل الحادث .. ولكن تعذر
عليهن الوصول إليها بسبب إنتهاء شحن
هاتفها المحمول ، ولم ترغب إحداهن في إثارة
قلق والدتها دون داعي ...

لاحقاً عادت عاليا إلى منزلها بعد أن أوصلها
آياز ورامي ، ولم تسلم هي من تعليقات
الأخير الساخرة منها ..

ترجلت من السيارة ، وسارت بحذر نحو بهو
البناية التي تقطن بها ..

ظل رامي متابعاً إياها بنظراته حتى اختفت
بالداخل .. فأدار رأسه في اتجاه آياز ، وأردف
قائلاً :

-ياللا بينا يا إيزوو-

علق آياز على أسلوب ابن خالته قائلاً بجدية

:

-ايه حكايتك معاها ؟

رد عليه بفتور وهو يحك رأسه :

-ولا حكاية ولا رواية

أضاف آياز قائلاً بنبرة رزينة :

-ماتقنعنيش ان مافيش حاجة بينكم ، انت

مش شايف نفسك يا بني معاها ؟!

تنحنح بصوت خشن ليجيبه :

-احم .. متحطش في بالك

مط آياز فمه ، وأكمل بإستسلام

-ممم.. ماشي .. براحتك !

ثم مال برأسه عليه ليقول بجدية :

-بس أنا مش مصدقك ، وهاعرف بطريقتي

نفخ رامي بنفاذ صبر وهو يتابع قائلاً :

-لو في حاجة هاقول أكيد

سأله آياز بخبث وهو محقق به :

-انت ولا هي ؟

رد عليه رامي متسائلاً بغموض :

-قصدك ايه ؟

لوى ثغره ليضيف بإبتسامة مأكرة :

-يعني أنا ممكن أسألها عنك

اتسعت حدقتي رامي بصدمة ، وهتف

بتلهف :

-بجد !! انت هاتعمل كده ؟

قهقه آياز عالياً ، فقد إستطاع خداعه

بسهولة ، وأكمل بعبث :

-مش بأقولك في حاجة بينكم

نظر له رامى بإعجاب من طريقته ، وهتف

بحماس :

-مش سهل يضحك عليك !

رد عليه بنظرات متسلية وقد أشعل محرك

السيارة :

-طبعاً

.....

في المساء ،،،

في منزل عاليا ،،،

اجتمعت بعض المعلمات حول فراش عاليا

في منزلها ، وتوسطتهم الناظرة إعتماذ والتي

أكملت حديثها بهدوء :

-ألف سلامة عليكي مس عاليا ، إن شاء الله

ترجعيلنا تاني

ابتسمت لها عاليا ابتسامة مجاملة ، وردت

بإمتنان :

-الله يسلمك يا مس إعتماذ

أكلمت الناظرة بجدية وهي ترفع حاجبيها

للأعلى :

-أحنا أخطرنا مديرية الطب البيطري ،

والمحافظة وإن شاء الله يتعاملوا مع الكلاب

دول !

هتفت سالي قائلة بجدية واضحة :

-يا ريت ، بذل ما كلب منهم يعرض طفل من

عندنا

أومأت الناظرة برأسها ايجاباً ، ورددت بهدوء

حذر :

-بالظبط ، وقبلهم سلامتكم عندي !

ثم هبت واقفة لتكمل بجدية :

-هستأذن أنا

قطبت عاليا جبينها ، وهتفت معترضة :

-لسه بدري يا مس إعتماذ

إبتسمت لها إبتسامة باهتة وهي تبرر قائلة :

-معلش يا مس عاليا عشان تاخدي راحتك ،
وأشوفك قريب على خير

رمشت عاليا بعينيتها ، وهمست :

-الله يخليكي يا مس اعتماذ .. !

ثم غمزت لهناء الواقفة إلى جوار فراشها ،
وضغطت على شفيتها لتقول بخفوت :

-روحي وصليتها يا هناء

رفعت هناء إبهامها للأعلى لتقول بإيجاز :

-اوكي

وبالفعل اصطحبت هناء الناظرة إعتماذ إلى
الخارج ...

جلست سارة على الفراش ، وعقدت ساقها
معاً ، ثم ضمت كفيها على حجرها وهتفت
بحماس :

-ياللا يا لولو ، متطوليش علينا بقى

ربتت عاليا على فخذ رفيقتها قائلة :

-إن شاء الله ، ربنا يهون بالأيام الجاية

أضافت سالي قائلة بمزاح وهي ترتشف
العصير :

-هي حابة تدلع علينا وتشوف غلاوتها

تسائلت منة بجدية وهي عابسة الوجه :

-على كده مين هايشيل حصصك ؟

ردت عليها عاليا وهي تهز كتفيها :

-اسألني أية يا منون ؟

تابعت منة قائلة بإنزعاج وهي تشير بكفها :

-أنا جدولي مليون خلفة مش ناقص

ابتسمت لها أية مبية إياها بنبرة رقيقة :

-مس اعتماد هتظبط معايا الجدول بكرة

هتفت سارة بلؤم وهي تغمز لأية :

-أنا رأيي تشيلي البت رانيا الجدول كله

قهقهت عاليا بصوت مرتفع ، وهتفت قائلة :

-مش قادرة منك ، ده كده هاتتنفخ !

ردت أية بنبرتها الهادئة وهي تهز رأسها :

-هو في الغالب فعلا يا رانيا يا نشوى

هيشيلوا مكانك

ابتسمت سالي قائلة بنبرة ثابتة :

-أحسن ، خلي عضمهم ينشف شوية !

تسائلت عاليا بنبرة جادة :

-أومال فين ريمان وليلة ؟

أجابتها سارة وهي تتنهد بعمق :

-ريمان قافلة موبايلها من الصبح والفيش

والواتس وكل حاجة ، واحنا مش عارفين

نكلمها

عبست عاليا بوجهها وهي تسألها بإستغراب

:

-طب ليه ؟

هزت سارة كتفيها بعدم مبالاة لتجييبها :

-مش عارفة ..

ردت سالي بهدوء :

-هي لما بتضايق مش بتكلم حد

مطت عاليا شفيتها ، ثم تسائلت بإقتضاب :

-وليلة ؟

أجابتها سارة دون تأخير :

-عندها فرح ومعرفتش تخلع ، بس بعثالك

السلام !

هزت رأسها قليلاً وهي تضيف :

-أها .. الله يسلمها

نهضت سالي من على المقعد ، وأشارت

بيدها قائلة :

-يالاً بينا يا بنات عشان لولو ترتاح

ردت عليها عاليا بتذمر :

-خليكوا أعيدين معايا شوية !

هتفت منة قائلة بضجر :

-يا بنتي اتني هتنامي ، لكن احنا وانا شغل

متلتل بكرة

هزت رأسها متفهمة ، ثم تشدقت قائلة :

-ربنا معاكو ويعينكم !

هتفت هناء بنبرة مرتفعة وهي تقف على

عتبة الباب :

-مس اعتماد مشت

أشارت لها سالي بيدها وهي تقول :

-احنا هنحصلها الوقتي

أومأت هناء برأسها ، وأضافت بنبرة ناعمة :

-اوكي ، باقي البنات هايعدوا عليكى بكرة بعد
المدرسة

ابتسمت لها عاليا وهي تجيبها :

-تشرفوا في أي وقت ده بيتكم يا حبايبي !

وقفت المعلمات خلف بعضهن لتقبلن عاليا
وتحتضنها ، فشكرتهن بإمتنان حقيقي ،
وانصرفن جميعاً تاركين إياها تفكر فيما
حدث لها ، وخاصة مع رامى ...

.....

في صباح اليوم التالي ،،،

في مبنى رياض الأطفال ،،،

بدى على وجه رانيا الحنق ، وتلونت وجنتيها
بحمرة غاضبة بعد أن أوكلت إليها الناظرة
بغالبية حصص عاليا ...

ظلت تسب بخفوت ، وتلعن الدراسة
والجدول الدراسي المزدحم .. وغمغمت
بضجر:

-ناس تتعض وتاخذ أجازة ، وناس تلبس في
جدول ابن تيببت !

دلفت إلى داخل قاعة الدراسة ، ونظرت إلى
الأطفال بضيق ، ولوت فمها وهي تصيح
بصوت محتد :

-الكل (يجلس) في مكانه ، محدش يقف
ردد طفل ما بإستغراب :

-يجلس !

نظرت له من طرف عينها ، وبررت قائلة :

-ايوه .. يعني يقعد بالفصحي

-ماشي يا مس

أخذت رانيا نفساً مطولاً ، وزفرته بصوت

مسموع ، ثم تشدقت قائلة :

-عاوزة كلمة تبدأ بحرف العين !

رفعت الأطفال الصغار أذرعهم عالياً ،

فإختارت أحدهم ليجيبها بثقة :

-عييب يا مس ٩

فغرت فمها مدهوشة لتقول :

-نعم ! عيب

أضاف طفل آخر قائلاً بحماس :

-عشان خاطري بتبدأ بالعين يا مس ٣

لوت فمها بإندهاش أكبر مرددة :

-نعم ، عشان خاطري !

نهض طفل ثالث من مقعده ، وصاح
بصوت مرتفع :

-مس .. مس .. عمليات خاصة بتبدأ بالعين ٣

كزت رانيا على أسنانها بشدة ، ووضعت
يديها على رأسها ، وهتفت بصوت محتد :

-صبرني يا رب !

وقف قبالتها أحد الصغار ، وعبس بوجهه
الطفولي البريء ، وصاح بجدية :

-مس صبرني بتبدأ بحرف ال (صاد) مش
العين ، كده Wrong (خطأ) ٣

دفنت رانيا وجهها في راحتها ، وضغطت
على شفيتها لتقول في نفسها بنبرة مغتازة

:

-يالهوي ، و لسه ياما هاشوف ، هو
الضغط بيجيلي من قليل!!

.....

واصل قراءة الجزء التالي
الفصل السابع والعشرون

الفصل السابع والعشرون :

في مبنى الرياض ،،،

اضطرت غالبية المعلمات إلى تولى جدول
حصص عالية المثلث بالكثير لتعويض
غيابها والتأكد من عدم تأثر الأطفال بهذا ..

كما إنعكس غيابها على آياز حيث تم ضغط
جدوله هو الآخر بسبب الإستعانة بمعلمات

الأنشطة .. فأرهقته ثرثرة الأطفال اللامتناهية

..

بذل هو مجهوداً مضمناً لتعويد الصغار على
التحدث بطلاقة باللغة الإنجليزية ، ولكنهم
أجبروه على النطق بالعربية .. فأصابته تلك
المسألة بالضجر والإحباط ..

اقتربت منه إحدى الصغيرات ، وجذبه من
بنطاله لتقول ببراءة :

-مستر .. مستر

نظر ناحيتها ورد بإيجاز :

-ييس !

أشارت بإصبعها وهي تدير رأسها للخلف
لتجيبه بحزن :

-عمورة بيدليني ، وبيقولي يا توتا !

فغر فمه قائلاً بإندهاش ، وتعبيرات الصدمة
تكسو وجهه :

-نعم !

أضافت الصغيرة قائلة ببراءة :

-أنا قولتله لأ يا عمورة ، مش تدليني ، انت

ناديني بإسمي على طول !٦

ضغط آياز على شفتيه ليهمس بغيط :

-كمان ! ومن السن ده !!

إعتدل في وقفته ، وهتف بصرامة :

-عمر! Come here (تعالی هنا) !

نهض الصغير من على مقعده ، واتجه نحوه

، ونظر له بنظرات بريئة وهو يرمش بعينيه ،

فرق قلب آياز له ، وسأله بهدوء :

-انت بتدلح صاحبتك ؟

أوما الصغير برأسه ليحييه بصوت طفولي :

اه- .. بأحبها أوي٧

لوى آياز فمه ليردد بتهكم :

-بتحبها ؟

ارتسم على ثغر الصغير عمر إبتسامة
سعيدة وهو يهتف بحماس ، ومشيراً بكفيه :

-ايوه ، وبكرة هانروح النادي سوا ، وهنركب

مع بعض المرجيحة٦

مط آياز فمه ، وحك طرف ذقنه قائلاً بإيجاز :

-واو !

تابع الصغير قائلاً بفرحة :

-عارف يا مستر أنا هاجيبيلها Pencil Case)

مقلمة) عليها كيتي٢

سأله آياز بفضول :

-دي هدية ؟

أشار الصغير على فمه وهو يهمس محذراً :

-اه .. بس ماتقولهاش

ربت آياز على كتف الصغير ، وتشدق قائلاً :

-حاضر ، روح يا بني اقعد في مكانك !

.....

في غرفة المعلمات ،،،

-آه ياني يا نافوخي ! هاتنفجر !

قالتها رانيا وهي تدلف إلى داخل الغرفة ، ثم

ألقت بكتبها على الطاولة ، وسحبت مقعداً

لتجلس عليه ، ثم أضافت بسخط :

-دول مش عيال ، دول شوية قرود !

أدارت رأسها للجانب لتجد ريمان جالسة في
صمت ، وتدون شيئاً ما في مفكرتها متجاهلة
إياها بشدة ..

إزدردت ريقها في عدم الاكتراث ، وقررت أن
تستفزها قليلاً ، لذا تراجعت بمقعدها وهي
جالسة عليه للخلف لتأرجحه .. وددت مع
نفسها بتلميحات مستفزة :

-أكذب عليك ، أها ، أكذب عليك !

رمقتها ريمان بنظرات حادة ، وكزت على
أسنانها بضيق ..

ولجت ميادة إلى داخل الغرفة وهي تحمل
في يدها كوباً من مشروب (الينسون)
الساخن ، وأردفت قائلة بإبتسامة باهتة :

-صباح الخير

ردت عليها رانيا بحماس :

-صباحك فل يا ميادة

بينما تمتت ريمان بإيجاز :

-هاي ميدو

سألتهما ميادة بفضول وهي تجلس على

الأريكة :

-انتو فاضيين ولا ايه ؟

ردت عليها ريمان بضجر وهي ترمق رانيا

بنظرات حادة :

-لأ ، أنا عندي Session (حصة) كمان عشر

دقايق !!!

تقوس فم رانيا وهي تجيبها بإمتعاض :

-أنا لابسة في جدول عاليا طول اليوم

أضافت ميادة بجدية :

-كلنا يا بنتي لابسين ، كمان غياب هبة

النهاردة عامل أزمة !

هتفت رانيا قائلة بتذمر :

-أنا معرفش ليه مش بيحبوا حد زيادة

يشيل معانا

ضغطت ميادة على شفيتها وهي تقول

بنزق :

-يجيبوا ليه واحنا موجودين ؟

وقفت السكرتيرة أية على باب الغرفة ،

وتسائلت برقة :

-بنات محدش شاف فيكم ههنا ؟

ردت ميادة متسائلة بهدوء وهي تدير رأسها

في إتجاهها :

-لأ .. بتسألني ليه ؟

أجابتها أية بنعومة :

-عندها اشرف ساعة التسليم مكان هبة

مطت ميادة ثغرها لتقول بتنهيده منهكة :

-يا عيني عليها ، دي طول اليوم مطلعتش

برا الكلاس بتاعها

ضحكت رانيا وهي تضيف بمزاح :

-بيتهيا لي لو بلغناها هتهب في وشنا !

عبست أية قليلاً بوجهها ، وأشارت إلى نفسها

بكفها وهي تبرر موقفها بـ :

-هاعمل ايه بس ، انتو بتكلموني ليه ؟ أنا

ماليش دعوة

هتفت رانيا بجدية وهي تهز حاجبها :

-مش إنتي الإدارة ؟!

إحتجت أية بنبرة رقيقة :

-لأ .. أنا يدوب سكرتيرة ، لكن اللي عنده
اعتراض يتكلم مع مس إعتماذ !

نفخت مياذة بضجر وهي تقول :

-أووف ، ربنا يعينا

رسمت أية ابتسامة باهتة على وجهها وهي
تتابع :

-بليز لو شوفتها قولولها

ردت رانيا بإيجاز :

-ماشى !

أردفت ريمان قائلة بجدية وهي تجمع
أشياؤها من على الطاولة :

-أنا رايحة ناحية الكلاس بتاعها ، لو لاقيتها
هناك هابلغها

رفعت لها أية إبهامها ، وهتفت ممتنة :

-تمام !

تسائلت ميادة بإستغراب وهي محدقة في

ريمان :

-انتي يا بنتي مش لسه عندك وقت ؟

سلطت ريمان أنظارها على رانيا ، وتقوست

شفتيها مجيبة إياها بحنق :

-الجوهنا كتيب وخانقة ، وأنا مش ناقصة

طاقة سلبية !

إلتوى فم رانيا بصورة واضحة وهي تردد

بهمس :

-طاقة سلبية ، قصدها ايه دي ؟

أرجحت رانيا المقعد للخلف دون أن تنتبه

لعدم إتزانه ، فسقط بها فوراً على الأرضية ..

وبدت مضحكة للغاية وهي منكبة على

وجهها ..

تعالّت ضحكات ريمان الساخرة منها ،

ورمقتها بنظرات متشفية منها ، وكأنها نالت

بتلك السقطة ما تسحقه ..

-قومي يا رانيا ! مايقوع إلا الشاطر !

قالتها ميادة بصعوبة وهي تحاول السيطرة

على قهقهاتها ..

إحتقن وجه رانيا بشدة ، وكزت على أسنانها

بغیظ وهي تنهض من على الأرضية ..

نفضت يديها ، وعدلت من حجابها وغمغمت

بتذمر :

-ماشي .. ماشي ، بكرة نشوف مين

هاتضحك في الآخر ..

.....
في قاعة الدراسة الخاصة بالمعلمة حنان ،،،

انتهت حنان من توزيع كتب الأطفال
والواجبات المنزلية عليهم جميعاً ، ثم
هاتفت أخيها قائلة بحماس :

-زي ما اتفقنا يا أحمد ، هاتي جي على
التسليم تشوفها ا

أناها رده من الجانب الآخر :

-حاضر ، أنا تقريباً ٥ دقائق وهاكون عند
البوابة ، وهاستنى جمبها ، هو فاضل كتير
على التسليم ؟

أجابته بهدوء :

-ربع ساعة

تابع قائلاً بهدوء حذر :

-تمام .. هاكون موجود قبلها

-إن شاء الله

قالتها حنان وهي تشير للصغار بيدها
ليعاودوا الجلوس في أماكنهم .. ثم أنهت
المكالمة معه وبدأت تعيد ترتيب هندام
الأطفال قبل إرسالهم إلى ذويهم ...

.....

في منزل عاليا ،،،

تململت عاليا في فراشها ، وإستدارت لتنام
على جانبها ، ثم وضعت الوسادة على رأسها
لتكمل نومها .. ولكنها سمعت صوت دقات
خافتة على باب غرفتها ، فرفعت الوسادة ،
وإلتفتت برأسها نحوه لتتهتف بصوت ناعس :

-ايوه

دلفت والدتها إلى الداخل ، ورسمت على
ثغرها إبتسامة حنونة ، وأجابتها بنعومة:

-لولو .. الورد والديدوب ده عشانك

حدقت عاليا بإندهاش في باقة الورد الحمراء ،
وذلك (الديدوب) ذو الحجم الكبير ، وتلك
العلبة الصغيرة المغلفة معها .. وتساءلت
بنزق :

-من مين دول ؟

أسندت والدتها الهدايا على طرف الفراش ،
وأجابتها بهدوء :

-مش عارفة ، بس هما لسه جاينين من
شوية

فحصت عاليا الهدايا بدقة ، وضافت عينيها
بغموض وهي تحاول تخمين من أرسلهم
إليها

قطعت والدتها تفكيرها المتحير وهي تردد

برقة :

-ممکن يكونوا أصحابك

ردت عليها عالیا بسخرية وهي تهز كتفيها :

-هو أنا لحقت أوحشهم عشان يجيبوا ده ،

دول آخرهم معايا عزومة على أي مطعم

تيك أوأي

أشارت لها والدتها بكفها وهي تتجه نحو

باب الغرفة :

-طيب هاروح أنا أحضر الغدا ، وانتي لازم

تشكري اللي بعنتلك الحاجة

حكّت عالیا جبينها ، وغمغمت مع نفسها :

-مين بس اللي باعتهم ، ده مافيش ولا كارت

ولا اسم ولا أي حاجة !!

فتحت بيدها الأخرى العلبة الصغيرة ،
وشهقت مصدومة حينما وجدتها مليئة
بأفخم أنواع الشيكولاته ..

.....

في سيارة رامي ،،،

هز رامي رأسه ممتناً وهو يتسم بسعادة
بعد أن أشار له العامل - والذي استأجره
لإرسال الهدايا إلى عاليا - بإبهامه معلناً
إنتهائه من مهمته العاجلة ..

ثم رفع هو بصره للأعلى ، وهمس بصوت
متحمس :

-ياما كان نفسي أشوف ردة فعلك وانتي
بتفتحي الهدايا ! يا رب بس تعجبك !

طرق بأطراف أصابعه على المقود وتابع
بتوجس :

-أنا عارف إن البنات الطبيعية بتموت في
الشيكولاته ، والورد وجو الدباديب والحركات
دي ، يا ترى انتي زيهم ولا هلاقيهم
محدوفين من البلكونة؟! ١

.....

في الإستقبال الملحق بمبنى الرياض ،،
زفرت هناء بضيق لأكثر من مرة وهي تهتف
بصوت شبه منفعل في وجه منة :
-بجد ده ظلم ، إزاي كل ده يبقى عليا
لوحدي
رتت منة على كتفها ، وأردفت قائلة بحذر :

-اهدي بس

لوحت بذراعها وهي تهتف بغل :

-اهدى ليه ومحدش حاسس بيا !

اقترحت منة بجدية :

-اتكلمي مع مس اعتماد

لوت هناء فمها لتضيف بسخط وهي ترمش

بعينيها :

-هي بتسمع حد أصلاً

أخفضت منة نبرة صوتها وهي تقول :

-بيني وبينك هي مابتصدق تلاقي حد

يشتغل وما يعترضش وتشيله

تنهدت هناء بإنهاك مرددة بغيظ :

-حرام والله ، أنا خلاص هاطق ، وبعدين أنا

معرفش حد في كلاس هبة عشان أسلمه !!

قطبت منة جبينها ، وتشدقت قائلة بجدية :

-بصي ماتديش أي طفل لأهله إلا بكار

التسليم ، ويبقى انتي كده في التسليم

نفخت هناء مجدداً وهي تعقد ذراعيها أمام

صدرها :

-اووف

تابعت منة قائلة بإحتراز :

-ماشي ، صدقيني كده أريحلك ! وبعد كده

تتكلم معاها

-اوكي

احتضنتها بحنو ، وربتت على ظهرها ،

وأضافت قائلة بحنو :

-روقي بقى يا هنووءة

ردت عليها بإقتضاب :

-ربنا يسهل

.....

وما هي إلا لحظات حتى عجز الإستقبال
بأولياء أمور الأطفال الصغار ..

كانت الأمور تسير بسلاسةٍ حتى حضر
أحدهم لإستلام طفل ما .. ولكن لم يكن
بحوزته بطاقة التسليم .. فرفضت هباء
إعطائه إياه دون التحقق من هويته ، فصاح
بها بغلظة :

-بأقولك أنا خاله

ردت عليه بضيق وهي ترمقه بنظرات حادة :

-وأنا هاعرف منين إنك خاله ! في كارت
معاك ؟

أجابها بصوت محتد وهو يرمقها بنظرات
قوية :

-لأ .. هي أمه قالتلي خده من المدرسة

انزعجت هناء من أسلوبه الفظ في الحديث ،

وهتفت بإصرار :

-ماليش دعوة ، الأم تكلمني بنفسها وآآ..

قاطعتها بصوت هادر متعمداً إهانتها :

-انتي مابتفهميش !

احتقنت عينيها بشدة ، ولمعت بعبرات

رقيقة ، وهتفت بصوت شبه مختنق :

-اتكلم كويس معايا ، أنا مش بأشتغل

عندك

صاح بها بصوت جهوري محدجاً إياها

بنظرات مهينة :

-انتي اللي مش عارفة شغلك ولا آآآ....

قاطعته الناظرة إعتماد بصوت صارم بعدما

جاءت على إثر صوته المرتفع :

-في ايه يا استاذ ، تعالي نتكلم على جنب !
تحرك الشخص الفظ مع الناظرة بعيداً عن
الحضور ، وتابع قائلاً بإحتقار وهو يشير
بإصبعه على هناء :

-الأخت مش عاوزه تديني ابن اختي

رفعت الناظرة حاجبيها ، وردت عليه بصوت
صارم وهي عابسة الوجه :

-أولاً هي مش أخت ، هي مس محترمة هنا
في المدرسة ، ثانياً ، مع احترامي ليك ده
مش اسلوب تتكلم بيه معنا ، وثالثاً وده
الأهم .. ابن أختك أو أي طفل هنا ملزوم مننا
لحد ما يستلمه أهله اللي احنا عارفينهم ، أي
حد غريب بيجي يستلمه غير أهله لازم نكون
متبلغين بده ، وإلا هانرفض نسلمه !

تجهم وجهه من أسلوبها الجاد معه ، وهتف

بنزق :

-بس أنا مش غريب وآآ...

قاطعته بصوت أكثر جدية وهي تشير بكف

يدها في وجهه :

-حضرتك احنا منعرفش سيادتك ولا آآ..

قاطعها بغرور وهو معتد بنفسه :

-أنا الرائد محمد من قوات الصاعقة ، وجاي

أخذ آآ..

قاطعته تلك المرة بنبرة غير مكترثة :

-وإن يكن ، برضوه ده مش يديك الحق

تتكلم مع أي حد هنا ، وخصوصا لو هي

التي تشر بتاعة طفلك ..!

.....

في قاعة الدراسة الخاصة بالمعلمة حنان ،،،

رتبت سارة بعض الأوراق المطبوعة في
حافظة ما وهي تولي ظهرها لحنان ، ورددت
بصوت خافت :

-أنا هاحطهولك يا مس حنان في الرف اللي
تحت

في نفس التوقيت ، دلف أحمد للقاعة بعد أن
استأذن من الإدارة للدخول لأخته لإحضار
شيء ما منها ..

لم تنتبه سارة لحضوره ، وظلت جاثية على
ركبتيها وهي ترص الحافظات المختلفة في
المكتبة الصغيرة ..

همست حنان لأخيها بحماس :

-بص كده وقولي ايه رأيك

رد عليها متهكماً :

-هو أنا شايف منها حاجة غير قفاها

حذرته بخفوت وهي توميء بعينيها :

-ششش .. طب اصبر !

نهضت سارة من على الأرضية ، وإستدارت

في اتجاه حنان ، فتفاجئت بذلك الرجل

المحدق بها ، فتلونت وجنتيها بحمرة باهتة ،

وتنحنت بحرج :

-احم .. انت مين ؟

هتفت حنان بحماس بادي في نبرتها وتعابير

وجهها :

-ماتقليش يا سارة ، ده أحمد أخويا

ابتسمت ابتسامة باهتة وهي تقول :

-أها .. اهلا !

أردف أحمد قائلاً بهدوء :

-ازيك يا مس ؟

ردت عليه بإقتضاب :

-الحمد لله

أضافت حنان قائلة بجدية وهي تربت على
كتف أخيها :

-هو كان جاي ياخذ مني آآ..

قاطعتها سارة بصوت جاد :

-أنا مسألتهش يا مس حنان ، خدوا راحتكم ،
وأنا هاجي في وقت تاني ، عن اذنكم

تابعها الاثنين وهي تنصرف من القاعة حتى
توارت عن أنظارهما ، فتسألت حنان بتلهف

:

-ايه رأيك فيها ؟

رد عليها أحمد بفتور :

-مش بطالة !

أضافت قائلة بعتاب :

-دي زي القمر يا حمادة

هتف أحمد بعدم مبالاة وهو يدس يديه في

جيبي بنطاله الجينز :

-أنا مقولتش وحشة ، بس بردك أنا

معرفهاش

سألته بمكر وهي تبتسم له :

-المهم شكلها عجبك ؟

لوى فمه مجيباً إياها بإيجاز :

-يعني !

أكملت حنان حديثها بتنهيدة سعيدة :

-ربنا يعملك اللي فيه الخير يا حمادة !

.....

عند سيارة ريمان ،،،

أسندت ريمان متعلقاتها الشخصية على
مقدمة سيارتها ، ومدت يدها نحو المقبض
لتفتح الباب ، ولكنه سمعت صوتاً رجولياً
مألوفاً يأتي من خلفها مردداً :

-مس ريمان بليز

إلتفتت برأسها نحو صاحبه ، وتبدلت تعابير
وجهها للضجر حينما رأت آياز أمامها ..
تنهدت بإحباط وهي عابسة الوجه ، بينما
تابع متسائلاً بهدوء حذر :

-مممكن أخذ من وقتك ٥ دقائق ؟

سألته بإقتضاب وهي تعقد ساعديها أمام

صدرها :

-ليه ؟

-أنا مش عاوز يكون في بينا سوء تفاهم أو

آآ...

قاطعته بصوت شبه محتد وهو مقتطبة

الجبين :

-مستر آياز من فضلك ، أنا مش حابة أحكي

في أي حاجة حصلت قبل كده

أصر آياز على الحديث معها ، وتابع بنبرة

هادئة :

-أنا شايف انه مش هاينفع نتكلم هنا ،

وبأقترح تتقابل برا بعيد عن جو الضغط

و..آآ...

قاطعته برفض تام :

-مافيش داعي

أردف آياز قائلاً بنبرة مُصرّة :

-لأ .. بس أنا أفضل نسوي أي خلافات بينا ،
مهما كان إحنا زمايل ، وماينفعش نكون
مضايقين من بعض

ردت عليه ريمان بإمتعاض :

-مافيش خلاف ، ده سوء فهم وآآ...

-الله ! الله ! الله ! هو أنا كل ما أغيب شوية
أرجع ألاقيكم مع بعض !

قالتها رانيا بصوت محتقن وهي تشير
بإصبعها ، ورافعة لحاجبها للأعلى مستنكرة
رؤيتهما معاً ...

رمقتها ريمان بنظرات مشتعلة قبل أن

تهتف بحدة :

-من فضلك حاسب ، أنا مش ناقصة حرقه

دم مع الأشكال دي

تقوس فم رانيا بإستنكار جلي ، وهتفت

بتهكم :

-أشكال ، لألاً .. انتي كده بتغلطي فيا ! وأنا

ماسمحش ، ده كله إلا كده

حدجها آياز بنظرات إحتقارية ، وغمغم

بخفوت :

-لوكال !

هتفت ريمان بإنفعال :

-حقيقي اللي جابك المدرسة هنا غلط

ردت عليها رانيا بثقة مغترة :

-أنا جيت بمجهودي الذاتي ، يعني لا كوسة

ولا واسطة ولا بعوجة بؤ..!

إغتازت ريمان من أسلوبها المستفز في

الحوار ، ولم تمهل نفسها فرصة للتفكير ،

حيث إلتفتت إلى آياز ، وتسائلت بنبرة جادة

:

-قولتلي هنتقابل الساعة كام ؟

ثم عاودت النظر إلى رانيا ورمقتها بنظرات

متحدية ..

اندهش آياز من التغيير المفاجيء الذي

أصابها ، وأجابها بلا تردد :

-المكان اللي تحدديه ، أنا معاكي

أشارت بأصابع يدها وهي تتعمد التحدث

بنبرة ناعمة :

-طب هات رقمك ، وانا هاكلمك يا مستر؟

مد يده بهاتفه المحمول إليها وهو يجيبها

بإبتسامة خفيفة :

-اوكي

شهقت رانيا مصدومة وهي جاحظة العينين

:

-ايه ده .. عيني عينك كده !

رمقتها ريمان بنظرات أكثر تحدياً ، وردت

عليها بقوة :

-ايوه ، وإن كان عاجبك ..!

احتدت عيني رانيا ، وتلون وجهها بحمرة

غاضبة ، وكزت على أسنانها لتقول بشراسة

:

-يا جبروتك

فتحت ريمان باب سيارتها بعد أن أعادت

الهاتف لآياز ، وتابعت بنعومة غريبة :

-اوكي يا مستر ، على تليفون

بادلها آياز ابتسامة عذبة وهو يرد عليها :

sure- (طبعاً)

لوحت له بأصابعها وهي تصفق الباب :

-باي

أشار لها بكفه ، وإستدار مبتعداً .. بينما

هزت رانيا جسدها بعصبية واضحة وهي

تضيف بحنق :

-إلهي كاوتش العربية يفرقع وماتلحقيش

تقابليه ٢!!

.....

واصل قراءة الجزء التالي

الفصل الثامن والعشرون

الفصل الثامن والعشرون :

في فيلا سرحان عليه ،،،

إستندت وردة برأسها على كف يدها ،
وتنهدت لأكثر من مرة بحرارة وهي تطالع
بعينيها صورة آياز التي سرقتها خلسة من
غرفته..

تمت مع نفسها بضيق :

-لا حجاب نافع معاك ، ولا عمل جايب

نتيجة ، طب هاتحس بيا امتى !

عبست بوجهها وهي تضيف بحنق :

-منك لله يا شيخ مبروك ، ضحكت عليا
ولهفت القرشونات !

استمعت هي إلى صوت السيدة سوزان
وهي تناديها بنبرة مرتفعة :

-وردة ، تعالي بسرعة !

ردت عليها بإمتعاض :

-جاية يا ست سوزان !

ثم نهضت بتثاقل من مكانها ، ودست
الصورة الفوتغرافية في صدرها ، وعدلت من
عباءتها ، وخرجت لمقابلتها ..

-ايوه يا ستي !

ردت عليها سوزان بجدية :

-عاوزاكي تسمعيني كويس يا وردة ، البيه
سرحان هيسافر البلد كام يوم على الأسبوع
الجاي ، واحتمال أروح معاه وانتي كمان
عبست وردة بوجهها أكثر ، وهتفت بضيق
واضح :

-ايبيه ؟ طب ليه يا ستي ؟

ردت عليها بتنهيذة مطولة :

-شوية مشاكل هناك ، ومش هاینفع نسيبه
لوحده

لوت وردت فمها ، وتسائلت بتلهف :

-طب وسي إزاز ، قصدي رامى بيه وآآ...

قاطعتها بجدية وهي تشير بيدها :

-هما شباب يتصرفوا مع نفسهم ، لكن إنتي
محتجاكي معايا

حركت فمها للجانبين ، وغمغمت بصوت

خفيض :

-يادي الهم ، أل جت الحزينة تفرح

مالقتلهاش مطرح !

تابعت سوزان قائلة بنبرة جادة :

-أنا بأقولك يا وردة عشان تعملي حسابك ،

فجهزي نفسك ، تمام ؟!

ردت عليها بحزن :

-حاضر يا ستي !

.....

في منزل عاليا ،،،

قطمت سارة قطعة من ثمرة التفاح ،

وظلت تلوكلها في فمها بإستمتاع ، فرمقتها

عاليا بنظرات حادة وهي تسألها بغیظ :

-يا بنتي سيبك من الأكل وردي عليا ، مين

فيكم اللي بعث الحاجات دي ؟

ابتلعت سارة قطعة التفاح ، وردت عليها

بهدوء :

-هو احنا لاقين ناكل أما هانجيب بوكس

شيكولاته ودباديبء

فركت طرف ذقنها بكفها ، وتسائلت بحيرة :

-أومال مين بس ؟

غمزت لها سارة وهي تقول بمكر :

-تلاقي معجب سري !

قطبت عاليًا جبينها ، ورددت بإندهاش :

-هاه ، معجب

أثارت تلك الكلمات المختصرة حفيظتها ،
وأضاء عقلها بصورة رامي .. فشردت تفكر
فيه وفي مواقفه معها ..

لاحظت سارة صمتها المريب ، فسألتها
بفضول :

-قوليلي بقى مين ، ها مين ؟

زفرت عاليا بضيق زائف ، وردت قائلة :

-بس يا سارة أنا مش فيقالك

أدركت سارة أن رفيقتها لا ترغب في الحديث،
لذا حركت رأسها بإيماءة خفيفة وهي تقول :

-ماشي يا لولو ، قوليلي ، أخبار الأجازة

الإجباري معاكي ايه ؟ أكيد مرتاحة

ردت عليها بتذمر من وضعها :

-والله زهقت ، عاوزه أنزل

نظرت لها سارة بإندهاش ، وتابعت بإمتعاض

واضح :

-ده انتي في راحة ، احنا منفوخين على الآخر

أضافت عاليًا بجدية وهي ترفع حاجبيها

للأعلى :

-على فكرة أنا مش بتأعب من الشغل ، بس

بأضايق من الاسلوب الوحش في التعامل

هزت سارة رأسها عدة مرات ، وردت عليها

بصوت خفيض :

-أها ، على رأيك !

تمطعت عاليًا بذراعيها ، وأكملت بعتاب

زائف :

-والبنات الأندال دول محدش فيهم جالي تاني

-اعذريهم ، الكل طالع عينه

-ربنا معاهم

أضافت سارة قائلة بجدية :

-اسكتي ، مش البت هناء حصل معاها

موقف زبالة النهاردة

عقدت عاليا ما بين حاجبيها بشدة ،

وتسائلت بإهتمام :

-موقف ايه ده ؟

أجابتها الأخيرة قائلة :

-في كلاس هبة ، مع حد من الParents)

أولياء الأمور)

حركت عاليا ساقها بحذر وهي تقول :

-طب استني أما أتعدلك واحكي لي

-اوكي !

.....
في أحد المقاهي الحديثة ،،

جلس آياز على أحد الطاولات القريبة من
الحوائط الزجاجية ، وظل يطالع الطريق
بنظرات مترقبة ..

حدق في ساعة هاتفه المحمول لأكثر من مرة
، وتمتم مع نفسه بصوت خافت :

-دي ممكن ماتجيش !

ولكن سريعاً تلاشت مخاوفه حينما رأى
ريمان مقبلة عليه ..

إرتسمت إبتسامة ودودة على وجهه ، ونهض
من مقعده ليستقبلها ..

تنحنحت هي بحرج قبل أن تستطرد حديثها
قائلة بإبتسامة :

-هاي ، إتأخرت عليك ؟

رد عليها بإيجاز:

-لأ !

ثم تحرك ناحيتها ، وأزاح المقعد قليلاً
لتمكن هي من الجلوس عليه ، وتابع قائلاً

بهدوء :

-أفضلي

رمقته بنظرات خجلة وهي ترد بإمتنان :

-ميرسي

سألها آياز بإهتمام وهو محقق بها :

-تحبي تشربي ايه ؟

ردت عليه بحرج وهي تهز كتفيها :

-أي حاجة

أصر آياز قائلاً :

-لأ قولي ، أنا عازمك ، اوعي تكوني مفكراني

بخيل

ابتسمت له وهي ترد بحياء :

-لأ .. بس أنا مش في بالي حاجة معينة !

زادت إبتسامته إشراقاً وهو يضيف :

-خلاص هاجيبلك حاجة على ذوقك ا

.....

في معرض السيارات ،،،،

عقد رامي ساعديه خلف رأسه وظل يهز

المقعد الجالس عليه بحركة شبه دائرية

ثابتة ، وحدث في الفراغ بنظرات شاردة ..

لم ينتبه هو إلى قدوم والده المهندس

سرحان .. وظل في عالمه الخاص ..

جلس أبيه على المقعد ، وأمسك
بالتالوجات الخاصة بأحدث الكماليات
للسيارات ، وأردف قائلاً بصوت رخيم :
-في حاجات حلوة هنا ، وشغلها عالي !
لاحظ أبيه صمته وعدم تركيزه معه ، فرفع
من نبرة صوته متسائلاً بجدية :

-رامي ، انت معايا ؟

تنحنح بصوت خشن ، وتوقف عن إدارة
مقعده ، وأجابه :

-ايوه يا بابا

سأله والده بإستغراب وهو يتفرس ملامحه :

-ايه يا بني ، مخك راح فين ، عمال اكلمك
من الصبح ، وإنت ولا هنا !

فرك رأسه بكفه ، ورد عليه بحذر :

-دماغي مشغولة شوية

ضاقت عيني والده وهو يسأله بهدوء :

-في ايه ؟

إرتبك رامي قليلاً وتردد في إخباره ، وتملكه

شعوراً بالخجل من نفسه .. فهو يفكر في

فتاة أحلامه في حضرة أبيه ..

تنحج مجدداً، وتلعثم وهو يجيبه :

-آآ... يعني حاجات كده !

حدق فيه والده بنظرات مطولة ، وهتف

بهدوء :

-خليك صريح معايا يا رامي ، أنا أبوك ،

ويهمني مصلحتك

فرك رامي أصابع يده بتوتر ، ثم استطرد

حديثه قائلاً :

-بصراحة يا بابا ، أنا بأفكر في الإرتباط وكده

رد عليه سرحان وهو يهز رأسه :

-وماله يا بني ، مش عيب ، الجواز سنة

الحياة !

قطب رامى جبينه ، وهتف محتدأً :

يا بابا بأقولك بأفكر ، قلبت الموضوع لجواز

!؟

رد عليه أبيه متسائلاً بإستغراب :

-طالما الموضوع في دماغك ايه المانع ؟!

ابتلع ريقه ، وأضاف بإقتضاب :

-ربنا يسهل

تسائل والده مجدداً بفضول وهو يغمز له :

-طب قولي ، البننت كويسة ؟ حد نعرفه

هز رأسه نافياً :

-لأ !

همس له سرحان متسائلاً بإقتضاب :

-حلوة ؟

رد عليه بفتور :

-شغالة

أردف والده قائلاً بعتاب :

-هي عربية يا بني ! دي إنسانة !

تابع رامى بإبتسامة باهتة وهو ينتصب في

جلسته :

-أقصد يعني روحها حلوة ، وعجباني

مط سرحان فمه للأمام ، وتسائل بجدية :

-ممممم .. تمام ، اتكلمت معاها ؟

هز رأسه نافياً :

-لأ لسه

-طب هاتفتحها امتي ؟

تعجب رامي من طريقة والده في الحوار ،
والتي تحولت إلى تحقيق .. فهتف محتجاً :

-ايه يا بابا كمية الأسئلة دي كلها ، ده أنا
بأقولك بأفكر فقلبتها سين وجيم !

تنهد سرحان بصوت مسموع ، وأكمل
بجدية :

-ربنا يعملك اللي فيه الخير ، المهم كام يوم
، و هسافر أنا وأمك يومين البلد وبعدين
نرجع !

سأله بفضول وهو عاقد حاجبيه :

-خير ؟

أجابه بغموض :

-موضوع كده عاوز اخلصه هناك

سأله رامى باهتمام :

-موضوع ايه ده ؟

أخذ أبيه نفساً مطولاً ، وزفره على مهل وهو

يرد :

-بعدين هاتعرف

أوما رامى برأسه قائلاً :

-طيب ربنا معاكو

تابع سرحان قائلاً وهو يشير بيده :

-أنا هاخذ وردة معايا

ابتسم رامى ابتسامة عريضة وهو يقول

وملوحاً بذراعه :

-خير ما عملت ، يا ريت تسيبها هناك
تعجب والده من رده اللفظ ، وهتف معترضاً :

-يا بني دي غلبانة !

غمغم رامي مع نفسه بصوت خفيض :

-وربنا انت اللي غلبان يا حاج سرحان ، دي
بت حقنة !

سأله والده بجدية وهو عابس الوجه

-بتقول ايه مش سامعك ؟

رسم على وجهه إبتسامة مصطنعة ، وردد
قائلاً :

-مافيش يا بابا

أمسك والده بالكتالوجات ، وناولها إياه وهو
يقول بجدية :

-طيب خد بص في الكتالوجات دي وقولي

رأيك

رد عليه رامي بإيجاز وهو يضعها على سطح

مكتبه :

-ماشي

.....

على الجانب الآخر ،،،

إشتعل موقع (الواتس آب) بالحوارات

الساخنة حول ما دار اليوم ، وكان أبرزها

مشاجرة هناء

-ليلة : ((دي زمانت مس إعتماذ روقت

عليه))

-ميادة : ((بالظبط))

-هبة : ((زمانته اتنفخ))

-منة : ((الناس دي مابتقدرش تعابنا أبداً ،
مافيش شكراً خالص منهم ، والواحد
بيستنى يسمع الكلمة الحلوة))

-هناء : ((ده معندوش ذوق ولا أخلاق ،
بيتكلم معايا بقلة أدب ، فاكربي شغالة عنده
((

-منة : ((فوكك منه ، مس إعتماذ في
الحاجات دي هاتعرف تتعامل))

-أية : ((عرفتي يا هنا إنه ظابط في الجيش
((

-هناء : ((يا شيخة !))

-أية : ((مس إعتماذ قالت كده))

-ميادة : ((وهو يعني عشانه في الجيش
بيبرله أسلوبه الجلياط مع الناس ؟))

-هناء : ((عندك حق ، الحمد لله إنه مش في
كلاسي))

-هبة : ((سوري يا هنوء ، جت فيكي يا قمر
، أنا الكلاس بتاعي معروف عنه إنه حمم
بركانية))

-هناء : ((حصل خير يا بوب))

-أية : ((بكرة يا بنات هاتي جي مس الأرت
الجديدة))

-ميادة : ((الله يعينها ، ده احنا داخلين على
مشاريع وشغل أد كده))

-منة : ((والله مس فريال كانت ممتازة ،
محدث زيها))

-هبة : ((ايدها تتلف في حرير ، بتخلص كل
حاجة بنطلبها منها بسرعة))

-هناء : ((أما نشوفها هاتعمل ايه))

-ميادة : ((شوفتوا البوست المكتوب على

صفحة المدرسة ؟))

-منة : ((بوست إيه ده ؟))

-ميادة : ((كاتبين إنهم عاوزين مشرفين

لرحلة الانترنتناشونال لتركيا))

-منة : ((بجد ، طب أنا هاشوفه ، أصل

نفسى أطلع أوي رحلة أغير جو))

-هناء : ((لأ مش هاینفع معايا رحلات ، أنا

مفلسة على الآخر))

-هبة : ((أنا داخلة في كام جمعية ، فأنا-out-

مش معاكو - اوكي))

-ميادة : ((يا جماعة ده اشراف ، مش

فسحة))

-سالي : ((انتو بترغوا في ايه يا بنات من

الصبح ، مش ملاحقة على الواٲس))

-منة : ((ياه يا سالي ، إنتي لسه عايشة ؟))

-سالي : ((بلاش إنتي يا سنوفة ، أنا جهزالك

((

-منة : ((انا مش أدك يا كاييرة))

.....

في المقهى الحديث ،،،

ارتشفت ريٲان بحذر القليل من مشروبها

الساخن ، وضغطت على شفٲتها بتوتر وهي

تتابع بقلق :

-أنا مش عاوزاك تفكر آآ...

قاطعها بهدوء جاد وهو يطالعها بنظرات

متفحصة :

-ماتقوليش حاجة يا ريمان ، انا فاهم ،
المقابلة دي عشان نصفي النفوس بينا ،
صح كده ؟

كانت تلك هي المرة الأولى التي يذكر فيها
إسمها دون لقب قبلها ، فتوردت وجنتيها إلى
حد ما ، وردت عليه بحرج :

-تمام .. !

ثم أضافت بنبرة جادة ، وهي ترمش بعينيها
:

-يا ريت يكون كده وبس

أردف هو قائلاً بإمتعاض :

-على فكرة إنتو هنا في مصر بتكبروا
المواضيع أوي ، العلاقات أبسط من كده برا
حركت رأسها بإيماءة خفيفة وهي تقول :

know- (أنا عارفة) ، بس احنا في مجتمع شرقي ، والأفكار هنا غير ، ومحدث بيسيب حد في حاله ، وأكد إنت شوفت بنفسك

-أها .. عندك حق

نهضت ريمان فجأة من مقعدها، وهتفت
بجدية :

-طيب هستأذن أنا وآآ...

تعجب من تصرفها المفاجيء ، وقاطعها
بضيق :

-انتي لحقتي

رسمت إبتسامة مصطنعة على ثغرها وهي
تجيبه :

-معلش ، مرهقة من شغل السكول

ابتسم لها بود ، ورد قائلاً :

-حاسس بيكي ، ما أنا The same (زيك)

زادت إبتسامتها إشراقاً وهي تردد بخفوت :

See you-مستر آياز

حك طرف ذقنه بإصبعه ، وهمس لنفسه :

-مستر آياز ! ممم .. اوكي !

ثم أردف متسائلاً بإهتمام :

-طب مش هاوصلك ؟

ردت عليه بهدوء :

-لأ معايا الcar (السيارة) بتاعتي !

-أوكي ، خلي بالك من نفسك

-حاضر ، باي !

-باي !

.....
في منزل رانيا ،،،،،

دارت رانيا في غرفة نومها ذهاباً وإياباً وهي
تضع هاتفها المحمول على أذنها ، وكزت
على أسنانها بغلظة وهي تردد بغیظ :

-هاطق يا نوشة ، زمانتهم الوقتي بيحبوا في
بعض

هاتفتها نشوى قائلة بنبرة شبه باردة :

-يا بنتي اهدي ، أعصابك

كورت رانيا قبضتها ، وتابعت بحنق :

-مش قادرة ، خلاص ، ده أنا هاموت عليه

أضافت نشوى قائلة بعدم اكتراث :

-أنا مش عارفة إنتي عاجبك ايه فيه ؟ ده

بارد وغلس ، ودمه واقف !

احتجت رانيا بنبرة عالية :

-لالالا .. متقوليش بارد ، ده مز السنين !

هتفت نشوى بجدية :

-يا روني ، العالم دي مش استايلنا ، احنا اللي
ياكل معانا حاجة تانية خالص ، حاجة شرقي ،
من مستوانا !

صاحت رانيا بغل وقد تحولت عينيها للحنق
الشديدين :

-انتي بتغيظيني ؟ بأقولك عاوزاه ! وانتي
تقوليلي شرقي وغربي ؟!

نفخت نشوى بصوت شبه مسموع ، وردت
عليها بفتور :

-ده انتي التفاهم معاكي مستحيل ،
هسيبك تهدي واكلمك وقت تاني

ردت عليها بصوت شبه محتد :

-يكون احسن برضوه !

ثم أنهت معها المكالمة وجلست على طرف
الفراش، وظلت تهز ساقيها بعصبية وهي
تتمتم مع نفسها :

-طب اوقعه ازاي وهو مش طايقني أصلاً ؟

.....

مرت عدة أيام ، والوضع على أشده في
مبنى الرياض ، فالجميع في قمة إنشغالهم
بالإنتهاء من المقررات الدراسية قبل أجازة
نصف العام ..

انضمت المعلمة دينا – والتي تدرس مادة
الرسم – لفريق العمل في المدرسة ، ورحب
الزملاء والزميلات بها .. وانتقلت لمبنى
الرياض لتتولى مهامها هناك ..

إستقبلتها المعلمات بسعادة ، وإجتهدت
هي في إثبات مهاراتها الفنية خاصة في
الأعمال اليدوية ..

كذلك تحسنت العلاقات كثيراً بين ريمان
وآياز .. وصار بينهما حوارات جانبية تعدت
الحديث عن الدراسة .. ولكنها لم تتجاوز
اللقاء خارج مبنى الرياض ..

وبالطبع لم يسلم كليهما من تعليقات رانيا
السخيفة ..

بينما سئمت نشوى من محاولاتها الفاشلة
في إقناع رفيقتها بالعدول عن التفكير في آياز
كعريس ..

كما اجتمعت كلاً من هناء وميادة مع الناظرة
إعتماد في إجتماع صغير للتخطيط لعدة
أنشطة نهائية للترفيه عن الأطفال ، وأعجبت

الأخيرة بأفكارهما .. وتم وضع الخطة
الأسبوعية الخاصة بجميع مراحل الرياض ..

عاونت سارة رفيقتها سالي في تجهيز
اللوحات الخاصة بالمعرض الخيري التابع
لمشروع أطفالها ، وساعدتهما معلمة الرسم
دينا .. وصممت لهما الغلاف الإعلاني .. والذي
كان ملفتاً للأنظار وحاز على إعجاب كل من
شاهده ..

ذهبت ليلة إلى غرفة الوسائط لتنتهي أعمالها
هناك وهي في حالة سعيدة ، ولكنها تفاجئت
بحصول أيمن على أجازة لعدة أيام ووجود
معلمة أخرى كبديل مؤقت عنه ، فتملكها
الضيق ، وتلاشت إبتسامتها .. واضطرت أن
تنهي كل شيء بنفسها دون اللجوء
لمساعدتها ..

عادت عاليا إلى العمل بعد أن تماثلت
للشفاء ، وتلهف الجميع للترحيب بها فور
رؤيتهم إياها ، واستعادت بحماس روح
التحدي والمثابرة ، واستقبلها الأطفال بفرحة
بريئة على وجوههم ..

كذلك تقدمت منة بطلب للإدارة للإشتراك
في الإشراف على الرحلة الترفيهية المتجهة
إلى تركيا خلال أجازة نصف العام ، وتم
الموافقة على طلبها ، فتملكتها السعادة
الغامرة ، وقررت أن تستعد لها بروح
حماسية مرتفعة

خطت المعلمة حنان لترتيب لقاء آخر
مدبر لأخيها مع سارة حتى تقرب بينهما ،
ووافق هو على إقترحها ، وحدد اليوم
المناسب لفعل هذا دون أن يثير أي منهما
الشكوك

تغيبت المعلمة جانيت عن المدرسة ليومين
، فتسائل الجميع بقلق عن سبب غيابها ،
ولكن تفاجئوا بزوجها يبلغهم بخبر مؤسف
أحدث جلبه وحزناً كبيراً ، ألا وهو ((وفاتها
((..... ٨

.....

واصل قراءة الجزء التالي

الفصل التاسع والعشرون

الفصل التاسع والعشرون :

في مبنى الرياض ،،

أجهشت المعلمات بالبكاء الشديد بعد

تلقينهم خبر وفاة رفيقتهم جانيت ..

لم يستوعب الأمر في البداية ، فقد كانت
الصدمة كبيرة عليهن .. فهي كانت معهن
حتى الأمس القريب ، يتشاركن في كل شيء
.. ويخططن للأعمال القادمة ، وفجأة
تتركهن وترحل للأبد عن هذا العالم ..
صرخات وشهقات مكتومة صدرت عنهن ،
وعبوس جلي كان السمة المشتركة على
أوجه الجميع ..

خيم الحزن على ذلك المكان الذي كان
ينبض بالضحكات والمزاح ..

وإجتهدت الإدارة في تصريف الأمور بحكمة
وروية للتعامل مع تلك الفاجعة ..

كما تعطلت الدراسة في هذا اليوم ، وتم
صرف جميع الأطفال مبكراً ..

.....

في معرض السيارات ،،،

حاول رامى الإتصال بإبن خالته منذ وقت
مبكر ليبلغه بسفر والديه ، ولكن لم يجب
الأخير على اتصالاته المتكررة ، فإمتعض
وجهه ، وحدث نفسه بضيق :

-مش بيرد ده ليه ؟

زفر بصوت مسموع ، ثم أضاف :

-طب هاعرف إن كان في المدرسة ولا مشى ،
ماهو مافيش غدى في البيت النهاردة ولا
عشا ، ولا أي حاجة !

مرر أصابعه في فروة رأسه ، وأكمل بمكر :

-خلاص هاعدي عليه بنفسى ، وبالمرة

أشوف عاليا

تنهد بحرارة وهو يردد إسمها بين شفتيه ..

ثم إلتقط سلسلة مفاتيحه ، وهاتفه
المحمول ، وتحرك إلى خارج مكتبه ..

.....

في مبنى الرياض بمدرسة اللافانيا الدولية ،،
اجتمع فريق العمل في غرفة المعلمات ،
وظل الجميع يواسي بعضه البعض ..

أردف آياز قائلاً بنبرة حزينة :

-للأسف أنا تعاملي معها كان قليل ، بس
حقيقي كانت انسانة محترمة

هتفت ريمان بحزن وهي تمسح عبراتها :

-أنا لحد دلوقتي مش قادرة أستوعب إنها

ماتت ؟!

بكت عاليا بحرقة وهي تردد :

-يا حبيبتي يا جيبي ، كنتي أكثر من اختي ،

ازاي مش هاشوفك بعد كده

أضافت منة قائلة بصوت آسف :

-ازاي تموت ؟ طب .. طب هي كانت كويسة

ومش بتشتكي من حاجة

ردت سارة قائلة بنشيح :

-أنا كلمتها امبارح وصوتها كان تعبان ، بس

مكونتش أتخيل إنها آخر مكالمة بينا !

أكملت سالي قائلة بحزن :

-هما الكويسين كده ، بيتاخدوا مننا

تسائلت ميادة بصوت خفيض :

-طب احنا المفروض نعمل ايه ؟ المفروض

نكون مع جوزها نعزيه ولا آآ...

قاطععتها هناء بنبرة حزينة :

-أنا كلمته ، هو موجود في البيت ومنتظر

اهلها يجوا من اسكندرية

هتفت ليلة بصوت مختنق وهي تشير

بإصبعها :

-اه يا عيني ، كانت أعدة معاه هنا، ومالهاش

قرايب

إنتحبت عاليا وهي تقول :

-أنا مش مصدقة إن احنا مش هانشوفها

تاني ، آآآه ، قلبي موجوع عليها أوي

ردت عليها سارة بنبرة آسفة :

-صعب تتعوض أو نلاقي حد زيها

استطردت هبة حديثها بجدية :

-كانت انسانة محترمة وأخلاق ومش بتتأخر

عن أي حد

أضافت منة بنبرة بكاء عالية :

-هانعمل ايه من بعدك يا جيبي ، كانت
بتساعدني دايمًا ، وعمرها ما إتأخرت عني ،
أنا هفتقدها أوي !

ردت عليها سالي بتنهيده حزينة :

-اللي زيها قليل في الزمان ده

أضافت ميادة وهي تهز رأسها :

-عندها طاقة وعطاء مالوش حدود

ضغط آياز على شفتيه ، وتأثر بكلماتهن

المعبرة عن إحساسهن نحو رفيقتهن

وزميلتهن في العمل ، فهتف بحذر :

-الواحد ملحقش يعرفها أوي ، بس وجودها

فرق معايا

ثم انضمت إليهم الناظرة إعتماذ ووجهها به
إنكساره عجبية ..

انتحبت بصوت خفيف وهي تردد :

-أنا كلمت زوجها ، وهو منتظرنا في بيته ،
ننتهي بس من اليوم الدراسي وتتحرك

أردف آياز قائلاً بهذوء :

-أنا معايا العربية ، مين يحب يركب معايا ؟

أضافت مياده بإستياء :

-للأسف مش معايا بتاعتي ، بتتصلح !

ردت عليهما الناظرة إعتماذ بحزن :

-قسموا نفسكم على العربيات الموجودة ،

وأنا عندي عربيتي فاضية للي حابب يجي

معايا ، وتتقابل كلنا هناك ، ومتقلقوش

الإدارة في المواقف اللي زي دي بتتصرف

وبسحاء !

وجلت معلمة الرسم دينا إلى الداخل ،

وهتفت بصوت أسف :

-البقاء لله يا جماعة ، أنا مش عارفة أقول

ايه ، ملحقتش أتعامل معاها ، لكن من

كلامكم عليها حبيتها ..!

هتفت الناظرة إعتماد بهدوء حذر :

-شكراً مس دينا على شعورك الطيب ، وربنا

يصبرنا على فراقها

.....

في الحديقة الملحقة بالمبنى ،،،

جلست كلاً من رانيا ونشوى على المقاعد

الخشبية الموضوعة بالحديقة ، ومسحت

نشوى على ظهر رفيقتها بحنو وهي
تواسيها قائلة بخفوت :

-خلاص يا بنتي ، ماتعيطيش ، احنا كلنا
زعلانين عليها

كفكفت راينا عبراتها بالمنشفة الورقية ، ثم
ردت عليها بحرقة :

-أنا مقهورة يا نشوى ، كانت بتظبطني في كل
حاجة

مطت نشوى شفتيها ، وأكملت بإستغراب :

-وأنا والله مضايقة للي حصل ، بس مش
بالشكل ده

أشارت لها بكفها وهي تقول بضيق :

-اسكتي ، ده أنا نحس ، حتى الحفلة اللي
كنت هاقولها تخليني فيها اشراف مع المز
مش هاتتعمل

عاتبتها نشوى قائلة بسخط وهي عاقدة ما
بين حاجبيها:

-وده وقته ، احنا في ايه وانتي بتتكلمي عن
ايه

بكت بصوت مسموع وهي تقول بتحسر:

-ما هو نحس من كله ، إهيء !

تنهدت نشوى بإستياء ، فهي متيقنة من
فشل تلك العلاقة بينهما ، لذا تشدقت قائلة
بضجر:

-لا حول ولا قوة إلا بالله ، يا بنتي إنتي
مالكيش نصيب معاه ، افهمي ده بقى !

أجهشت رانيا ببكاء أشد وهي تضيف بتذمر :

-بأحبه يا نوسة ، بأحبه ٣

ثم على صوت نحيبها وهي تدفن وجهها بين

راحتها

ردت عليها نشوى بنبرة متريثة وقد تهدل

كتفيها :

-ده مش حب ، ده اسمه تعلق ، انتي عشان

حطاه في دماغك وبتفكري فيه عمال على

بطل فمفكرة إنه حب ، لكن هو لا بيعبرك

ولا حتى بببصلك ، ومالكوش كلام مع بعض

، يبقى منين ده حب ؟!

رمقتها رانيا بنظرات حادة وهي تصيح بتهكم

:

-عا ، انتي بتبكتيني ، ده بدل ما تقفي

جمبي ؟!

ردت عليها نشوى بهدوء وهي ترفع حاجبها
للأعلى :

-أنا بانصحك لأني شايفة الوضع عامل ازاي

ضاقت عيني رانيا ، وظهر منهما لمعان
غريب ، وهمست بصوت متحشرج :

-انا بس لو خدت فرصة معاه هـ آآآ...

قاطعتها نشوى ببرود :

-صدقني برضوه مش هاتجيب نتيجة

-كمان

بررت نشوى حديثها بـ :

-بصراحة كده هو .. هو حاطط عينيه على

اللي شبهه

اتسعت مقلتي رانيا في صدمة ، وهتفت

بنزق :

-قصدك آآ...

هزت نشوى رأسها بإيماءة مجيبة إياها :

-ايوه هي ! ففرصتك معدومة قصادها

لمعت عيني رانيا بشراسة ، وضغطت على
شفتيها بقسوة وهي تردد بصوت شبه حانق

:

-يا بنت المحظوظة يا ريمان ، جياالك على
الطبطاب في كل حاجة

نهرتها نشوى بسخط :

-يا بنتي ارحمي نفسك ، والله انتي
الخسرانة في الآخر ، ومحدثش هايعبرك ولا
حتى بواب في مدرسة

لكزتها رانيا في كتفها بعنف وهي تصيح بنبرة
شبه غاضبة :

-قومي يا نشوى من جمبي ، سبيني أهري
وأنتك في نفسي لوحدي !

.....
خارج مبنى الرياض ،،،

صف رامي سيارته بجوار الرصيف ، ثم ترجل
منها ، وتحرك صوب بوابة المدرسة الخلفية

..

إشرأب بعنقه ليبحث عن فرد الأمن ، فلم
يجده ، ولكنه لاحظ وجود شيء مريب ..

فهنالك تجمعات كثيرة للمعلمين ، ووجوه
عابسة ..

هز كتفيه في عدم إكتراث ، ثم تحرك للدخل
دون أن يوقفه أحد ..

استمع هو إلى صوت نحيب خافت ، فأدار
رأسه ناحيته فوجد عاليا وهي مستندة
برأسها على كتف ليلة ..

انقبض قلبه ، وركض ناحيتها ، ثم وقف
خلفها ، وسألها بتلهف :

-مالك يا عاليا ؟ حصل حاجة ؟

رفعت رأسها لتنظر نحوه بإندهاش ، ثم
مسحت عبراتها بكفها ، وردت عليه بصوت
مختنق :

-انت بتعمل هنا إيه ؟

راقبتهما ليلة بنظرات متمعنة ، ولم تقاطع
حديثهما ..

رد عليها رامي بصوت لاهث :

-أنا جاي لابن خالتي ، بس شوفتك بتعيطي

فإتخضيت وآآ...

قاطعته عاليا ببيكاء :

-مس جانيت ماتت

سألها بعدم فهم وهو قاطب جبينه :

-مين دي ؟

أجابته بحزن واضح في نبرتها ، وقد بدأت

تترقق العبرات مجدداً في عينيها :

-مس الميوزيك

سألها بإهتمام وهو يتابعها بنظرات قلقة :

-هي كانت تعبانة ؟

هزت رأسها نافية وهي تجيبه :

-لأ

-مس ليلة !

قالها أيمن بصوت شبه مرتفع وهو يتجه
نحوهم

تنحنحت هي بخفوت وهي تقول :

-احم ، ثواني بس يا عاليا هاشوف مستر
أيمن !

قاوم رامى ظهور شبح إبتسامة سعيدة
على ثغره لحصوله على فرصة للحديث مع
عاليا على إنفراد ، فهتف بنزق :

-خدي راحتك ، أنا موجود معاها

رمقته عاليا بنظرات حادة .. بينما تحركت
ليلة نحو أيمن الذي استطرد حديثه قائلاً:

-البقاء لله يا مس ليلة ، أنا عرفت الخبر من
شوية ، وجيت بنفسى أعزي

ردت عليه بحزن وهي ترمش بعينيها :

-شكراً يا مستر

سألها بإهتمام واضح في نبرته ونظراته :

-انتي عاملة ايه ؟ وبقية الناس هنا ؟

تنهدت بعمق وهي تجيبه :

-والله حالتنا النفسية وحشة أوي

تابع قائلاً بهدوء :

-أنا اسمع انها كانت انسانة محبوبة بين

الكل

أضافت ليلة قائلة بأسى :

-دي اتربي على ايدها أجيال من المدرسة

هز رأسه بإيماءة خفيفة ،وأكمل بهدوء :

-أها .. ربنا يصبركم ويصبر أهلها

-يا رب

سألها بجدية وهو محقق بها :

-طيب هاتعملوا ايه ؟

ضغطت على شفيتها قليلاً ، وأجابته بنبرة

رقيقة :

-إحنا المفروض هانروحلها الوقتي

استطرد حديثه متابعاً :

-طب تحبي أوصلك ، قصدي أوصلكم يعني

؟

هزت رأسها نافية وهي تجيبه :

-لأ مافيش داعي ، إحنا هنتصرف

أردف أيمن قائلاً بإصرار :

-أنا موجود وفاضي ، أرجوكي ماترفضيش

هزت كتفيها في حيرة قائلة :

-مش عارفة

تابع أيمن بجدية وهو يشير بيده :

-بصي في الظروف دي لازم كلنا نقف جنب

بعض ، وبعدين دي زميلتنا ، يعني واجب

علينا نكون معاكو

ابتسمت له إبتسامة باهتة وهي تقول :

-ميرسي على ذوقك

فرك أيمن فروة رأسه بأصابعه قائلاً :

-متقوليش كده

.....

تابع رامي متسائلاً بهدوء :

-ازي رجلك الوقتي ؟

عبست عاليا بوجهها ، ورفعت حاجبيها

مستنكرة ، وردت بنبرة حادة :

-وده وقته ؟ بأقولك صاحبتى ماتت وانتي

تقولي رجلك

أشار لها بكفيها ، وبرر قائلاً :

-مقصدش والله ، أنا بس بأطمئن عليكي ، ده

غرضي !

تنهدت بإرهاق ، واعتذرت بهدوء حذر :

-معلش سامحني ، أنا روعي في مناخيري ،

ومش عاوزة أتكلم مع حد

إبتسم لها قليلاً وهو يقول :

-أكيد مسامحك ، وعاذرك

هتف آياز بصوت مسموع من على مسافة

قريبة :

-رامي ، إنت بتعمل ايه هنا ؟

إستدار رامي برأسه للخلف ، ولوح له بذراعه
وهو يجيبه :

-أنا كنت جايلك ،بأطلبك من بدري مش بترد
وآآ...

قاطععه آياز بجدية :

-أها ، حصل ظروف هنا وآآ..

قاطععه رامي تلك المرة بهدوء :

-ما أنا عرفت خلاص ، ومقدر الوضع

إلتفت آياز برأسه نحو عاليا ، وسألها بنبرة
جادة :

-طب هاتعملوا ايه يا مس عاليا ؟

مط شفتيها وهي ترد عليه :

-هاشوف بقية البنات

أشار بإصبعه للخلف مكماً بهدوء :

-عموما أنا منتظر برا ، ومعاكو في أي حاجة

أومات عاليا برأسها وردت عليه :

-اوكي ، وأنا هابلغهم

تدخل رامى في الحوار قائلاً بحماس :

-أنا موجود برضوه لو عوزتوني

رمقته بنظرات حادة ، وهتفت بإقتضاب :

-شكراً

ثم تحرك رامى مع آياز نحو البوابة ، وتبادل

الاثنين حديثاً خافتاً بينهما حول سفر أبويه

للبلدة الريفية ..

.....

لاحقاً أوقف آياز سيارته أمام بوابة المدرسة ،
وانتظر قدوم المعلمات لإيصالهن إلى منزل ،
زميلتهم الراحلة جانباً ..

أصر رامى هو الآخر على البقاء معه ،
ومساعدته في هذا الواجب .. فتعجب ابن
خالته من تصرفه الغريب هذا ، وتأكد أن
وراءه غرض آخر .. ولكنه لم يجادله أو يطلب
منه أي تفسير ، فالظرف غير مناسب
للمناقشة ..

أحضر كذلك أيمن سيارته عند البوابة ، ثم
ترجل منها ، وذهب لمصافحة آياز وتعزيته ..
تبادل الإثنين حديثاً مقتضباً ، ثم إستأذن
أيمن بالإنصراف ليستعد أمام سيارته ..
خرجت المعلمات من البوابة على هيئة
مجموعات ، واحترن في اختيار من يوصلهن ..

أسرعت منة وهناء في خطواتهما نحو سيارة
ريمان للركوب معها ، ولحقت بهما سالي ..

تعطلت سيارة ريمان ، فلم تتمكن من
استخدامها ، وزمت شفيتها قائلة بسخط
وهي تضرب المقود :

-أوووف ، ده وقتك !

تسائلت منة بضيق :

-في ايه يا ريمو ؟

ردت عليها ريمان بتبرم :

-العربية مش شغالة

هتفت منة بإنزعاج :

-أوبا

تسائلت هناء بحيرة وهي تتلفت حولها:

-طب هانعمل ايه ؟

تهدل كتفي ريمان للأسفل ، وأجابتها بضجر

:

-مش عارفة

صاحت سالي بصوت جاد وهي تعلق حقيبة

يدها على ذراعها :

-خلاص يا بنات ، تعالوا نشوف هانركب مع

مين الوقتي

عضت ريمان على شفتها السفلى ، وهتفت

معتذرة :

-بجد I'm so sorry (أسفة جداً) ، مش

بايدي !

هزت هناء رأسها متفهمة ، وردت عليها

بفتور :

-احنا عارفين

لوحث منة بذراعها في الهواء ، وهتفت قائلة :

-ياللا يا جماعة

اقترب آياز من سيارة ريمان ، وتساءل

باهتمام وأنظاره معلقة بها :

-ايه المشكلة يا مس ريمان ؟

ردت عليه بتنهيذة منزعجة وهي تغلق باب

سيارتها :

-العربية فيها حاجة ، مش راضية تشتغل

أشار للجميع بكف يده وهو يقول بنبرة

مرتفعة :

-أها ، طب تعالوا معايا أوصلكم

إعترضت ريمان قائلة وهي عابسة الوجه :

-بس عربيتك مش هاتقضي

رد عليها آياز بهدوء :

-أنا معايا ابن خالتي ، هيوصلكم هو كمان

هتفت منة بإمتنان :

-بجد احنا مش عارفين نقولك ايه

بينما أضافت هناء برقة :

-انت انسان ذوق ومحترم

رد عليهما آياز بهدوء :

-احنا كلنا زمايل وعيلة واحدة

هتفت منة بإختصار وهي تغلق حقيبة يدها

:

-أكيد

تسائلت سالي بجدية وهي تتلفت حولها :

-بنات حد هاي ركب مع مس اعتماد ؟

ردت عليها هناء وهي توميء بعينيها :

-اه ، هبة وحنان ونادية ا

زمت سالي فمها وهي تتمتم بايجاز :

-تمام

هتف آياز بنبرة شبه آمرة وهو يتحرك

صوب سيارته :

-طب يالا يا جماعة

.....

وبالفعل قسمت المعلمات أنفسهن على

السيارات المتاحة ، فركبت ريمان مع آياز ،

وانضم لهما سالي ، ومنة وهناء

بينما ركبت عاليا سيارة رامي بعد إلحاح

شديد منه ، ولحق بهما نشوى ورانيا وسارة

بينما ركبت ليلة مع أيمن ومعهما ميادة
ودينا وأية ..

.....

في سيارة آياز،،

حدقت ريمان في الطريق أمامها ، وتحاشت
النظر تماماً نحو آياز ، خاصة بعد أن جلست
على المقعد المجاور له ..

بينما اختلس هو النظرات نحوها ، ورسم
إبتسامة هادئة على ثغره ..

فبرغم مآساة اليوم المؤلمة ، إلا أنه ظفر
بشيء بسيط أسعده وهو اصطحاب ريمان
في سيارته ..

قطعت سالي الصمت السائد قائلة بجدية :

-مش عاوزين نطول هناك ، هنعمل الواجب

ونتوكل على الله

ردت عليها منة بصوت شبه محتد :

-ما احنا أكيد مش هنبات ، بس ماينفعش

نجي ونمشي في ساعتها ، المفروض نقعد

شوية

أضافت هناء قائلة وهي تشير بيدها :

-هي تقصد يا منون نسيبهم على راحتهم ،

مانبقاش كابسين على عيلتها

تسائلت منة بإهتمام :

-هما على كده هايعملوا ليها قداس هنا ولا

في اسكندرية ؟

ردت عليها سالي بإقتضاب وهي تنفخ في

ضيق :

-معرفة لسه

مال آياز بجسده ناحية ريمان ، وسألها

: بهمس :

-انتي مش بتشتركي في الحوار ليه معاهم ؟

أجابته بخفوت حرج :

-يعني ، مش حابة أتكلم

هز رأسه متفهماً :

-أها .. تمام

.....

في سيارة الناظرة إعتماذ ،،،

سلطت الناظرة إعتماذ أنظارها على الطريق ،

وراقبت الإشارات المرورية بحرص ، ثم

تسائلت بجديفة :

-الطريق كده صح ؟

ردت عليها حنان بصوت خافت :

-ايوه يا مس اعتماد ، احنا ماشيين صح

أردفت أية قائلة بنبرة رقيقة :

-أنا بأتكلم مع البنات ، وهما قالولي إن بيتها

مش بعيد

هزت رأسها بحركة خفيفة وهي تقول :

-اوكي !

أخرجت حنان هاتفها المحمول من حقيبتها

، ثم عبثت به لتهاanf أخيها .. ووضعتة على

أذنها ، وهمست بحذر :

-ايوه يا أحمد ، احنا توكلنا على الله ورايحين

عند بيت مس جانيت ، تعاللي على هناك ،

هستناك !

صمتت للحظة قبل أن تكمل بصوت

خفيض :

-هي ساكنة جمب ((...)) عارفه ؟ الطريق

مايتوهش !

ساد صمت حذر لثوانٍ ، ثم تابعت :

-اوكي يا أحمد ، في رعاية الله ، مع السلامة !

ثم أنهت المكالمة معه ، ووضعت هاتفها

بداخل حقيبتها ..

تسائلت ميادة بهمس وهي تميل برأسها

على أية :

-انتي هاتعملي ايه بعد كده ؟

ردت عليها أية بصوت خفيض :

-أكيد هاروح البيت ، أنا مش قادرة أعمل

حاجة

أكملت ميادة بصوتها الهامس :

-تمام ، أصلاً محدش فينا ليه مزاج لحاجة

-بالظبط

.....

في سيارة رامى ”

لاح شبح إبتسامه راضيه على ثغر رامى
بعد أن وافقت عاليا على أن تستقل سيارته

..

ما أزعجها هو ركوب رانيا ونشوى معها ،
فهي لا تحبذ التواجد معهما في أي مكان ..
وخاصة رانيا بسبب مواقفها وردودها الوقحة

..

تحركت سارة في المقعد الخلفى ، وهتفت

بتذمر :

-حاسبي شوية يا رانيا ، أخدة المكان كله !
لوت رانيا فمها ، ورمقتها بنظرات حادة ، ثم
هتفت بسخط :

-يعني أروح فين ؟ ما هو المكان ضيق
صاحت نشوى بنبرة شبه مرتفعة :

-ضمي عليا شوية يا روني !

إستدارت عاليا برأسها للخلف ، ورمقتهن
بنظرات حادة ، وصرت على أسنانها قائلة :

-عيب يا بنات ، دي مش عربيتنا عشان
تتخانق هنا قصاد العُرب

عاتبها رامي قائلاً بحزن مصطنع :

-هو أنا غريب يا أبلة عاليا ؟

ضيقت رانيا عينيها ، وحدجت عاليا بنظرات
غامضة ، ثم إستندت بإصبعيها على طرف
ذقنها ، وغمغت بخفوت مع نفسها :

-هو الحكاية فيها أبله كمان ؟ ده الموضوع
باينه كبير ، وأنا مش واخدة بالي !

ضغطت عاليا على شفتيها ، وحذرتة بجدية :

-مستر رامي ، خلي بالك من الطريق أحسن
!

هز رأسه بحركة خفيفة وهو يقول بإيجاز :

-حاضر !

ثم تمتت عاليا مع نفسها بضجر :

-إنت لازم تتسحب من لسانك وتكلم قصاد

دي ، هو أنا ناقصة لسانها !

نفخت سارة بضيق ، ثم حدقت في النافذة

الملاصقة لها ، وهمست :

-ربنا يهون بالأعدة دي ، بنت ماتطقاش ،

يتفاتلها بلاد !

.....

في سيارة أيمن ،،،،

مد أيمن يده ليعدل من وضعية المرآة

الأمامية ، ثم حدق في إنعكاس صورة دينا ،

وتسائل بإهتمام :

-هو حضرتك مدرسة جديدة ؟

أجابتها بنبرة خجولة :

-ايوه ، أنا مس دينا ، مس الأرت ، ومبقاليش

يومين هنا

رد عليها مجاملاً :

-أها ، حضرتك نورتي المدرسة ، وإن شاء الله
تتبسطي معنا

ابتسمت له إبتسامة ممتنة وهي تقول
بإيجاز :

-ميرسي

سألها مجدداً بفضول :

-وعلى كده حضرتك إشتغلتني في مدارس
قبل اللافانيا ؟

أجابته بصوت رقيق :

-ايوه ، بس مش هنا

سألها بإهتمام أكبر :

-حاجة برا القاهرة ؟

ردت عليه بنبرة مثرية :

-ايوه ، في دولة الإمارات

أوماً برأسه بحركة خفيفة وهو يقول :

-أها .. ده النظام أكيد مختلف عن هنا تماما

تابعت دينا موضحة :

-يعني مش أوي ، كل مدرسة وليها

السيستم بتاعها

-عندك حق

شعرت ليلة بضيق قليل لم تستطع تبريره ،

ولكن أزعجها حديثه المسترسل مع غيرها ..

فعبست بوجهها ، وظلت تفرك كفي يديها

بعصبية ..

إلتفت أيمن برأسه نحوها ، ورمقها بنظرات

متعجبة ، وسألها بإهتمام :

-انتي كويسة ؟

ردت عليه بحنق موجز :

-ايوه

-أنا مقدر الوضع ، المدرسة كلها بتتكلم عن
مس جانيت وآآ..

قاطعته بنبرة غليظة :

-والله فراقها هياثر معانا إحنا مش معاك
إنت !

قطب أيمن جبينه متعجباً من أسلوبها الفظ
معه .. وعاتبها بهدوء :

-لأ هيفرق يا مس ، أنا كنت متعود أسلم
عليها وأقابلها واحنا داخلين المدرسة ، أو
واحنا خارجين ، فعلى الأقل هافتقد
إبتسامتها الرقيقة ، وأسلوبها اللطيف في
التعامل

أطرقت رأسها ، وضغطت على شفيتها قليلاً ،
، وأخذت نفساً عميقاً لتضبط به إنفعالاتها ..

.....

أدى الجميع واجب العزاء في منزل المعلمة
جانيت ، وحاولوا التهوين على زوجها الذي
كان متأثراً للغاية لرحيلها المفاجيء ،
وتحدثوا عن روحها المرحية وحماسها الدائم
للعمل ، كذلك أشادوا بتفانيها وإخلاصها في
كل ما له علاقة بالأطفال ..

ساعدت تلك الكلمات الصادقة زوجها في
الشعور بمدى أهمية زوجته ، وتعلق الجميع
بها .. فشكر بإمتنان حقيقي المتواجدين ..
وأثنى على وقوفهم إلى جواره ..

بعد برهة إستأذنت الناظرة إعتماد بالإنصراف
، ولحق بها فريق العمل ..

.....

تشكلت مجموعات صغيرة من المعلمات
أسفل البناية التي تقطن بها الراحلة جانيت ،
وتحدثن بينهم عن مصير الأنشطة بدونها ..
راقبت المعلمة حنان الطريق بتمعن ، فقد
كانت في إنتظار وصول أخيها .. وإرتسم على
ثغرها إبتسامة ماكرة وهي تراه يقترب من
على بعد ..

خطت بخطوات سريعة نحوه ، وهتفت
بصوت لاهث :

-كويس إنك جيت ، احنا كنا ماشين دلوقتي
سألها أحمد بنبرة جافة وهو يشرأب بعنقه
للأعلى :

-هي واقفة فين ؟

أدارت رأسها للجانب قليلاً ، وأجابته :

-هناك

سألها مجدداً بجدية :

-طيب ، أنا المفروض أعمل ايه ؟

ردت عليه بنبرة متريثة :

-بص أنا هاكلمها على جنب ، وانت تجي

علينا ، وتعرض توصلها ، وأهي فرصة

تدردش معاها شوية ، تمام ؟

هز راسه إيجاباً وهو يردد بإختصار :

-ماشي

تحرك حنان عائدة إلى المجموعة المتواجدة

بها سارة ، ثم وضعت يدها على كتفها ،

فإنتبهت الأخيرة لها ، وضغطت عليه قليلاً

وهي تقول :

-معلش يا مس سارة ممكن أقولك حاجة
التفتت سارة بجسدها كلياً نحوها ، ورددت
بهدهوء :

-اتفضلي يا مس حنان

رمشت لها بعينيها وهي تهمس بجدية :

-لأ لوحدنا

تحركت سارة معها قائلة بنبرة ناعمة :

-أوكي يا مس حنان ، تعالي نقف هنا !

.....

أصدر رامي على الحديث مع عاليا للحظات
بعيداً عن رفيقاتها فقد خشي أن تضيع
الفرصة عليه دون أن يفتحها في مسألة
الإرتباط بها .. ولكنها رفضت طلبه ، وتعللت
قائلة :

-مستر رامي مافيش بينا كلام

زفر رامي قائلاً بضجر :

-يا أبله عاليا أنا مش هاعطلك ، ده بس كلام

على السريع

عقدت ساعديها أمام صدرها ، وسألته

بإختصار وهي ترفع حاجبها للأعلى :

-خير

إرتبك للحظة ، وبدى متوتراً وهو يرد عليها

بتلعثم :

-هو مش ينفع أقوله هنا

ضاقت نظراته وهي تسأله :

-ليه ؟

ألح رامي قائلاً بتوسل :

-معلش ، خديني على أد عقلي

نفخت بنفاذ صبر وهي ترد عليه بإمتعاض :

-أووف ، طيب ، اتفضل

ابتسم لها قائلاً :

-ماشي

وقفت عاليا إلى جوار سيارته ، وإستند بكفها

على بابها ، وسألته على مضض

-ايه الموضوع المهم اللي عاوزني فيه ؟

تنحنح بصوت خشن ، وحرك ساقه بعصبية

، وركل الأرض قليلاً ، ورد عليها بتوتر :

-هو .. هو أنا كنت بأفكر في آآآ..

قاطعته بنبرة شبه حادة وهي تشير بيدها :

-قول يا مستر رامى ، أنا مش قدامى اليوم
كله ، واطن إنت شايف الجو عامل ازاي ،
واحنا كلنا فى حالة صعب

رد عليها بحذر :

-أنا فاهم ده كله ، بس بأحاول أشوف هافتح
معاكى الموضوع إزاي

رمقته بنظرات مطولة محاولة سبر أغوار
عقله ، وسألته بإندهاش :

-للدرجادي هو صعب ؟

تنحنح مرة أخرى ، وأجابها بتلعثم :

-لأ .. بس .. بس أنا متوتر شوية

زفرت عاليا بإرهاق ، وهتفت بتبرم :

-مستر رامى ، بليز

لم يجد رامي بدأً من الدخول مباشرة في
صلب الموضوع معها ، فقد إستشعر ضيقها
، لذا هتف بنزق :

-أبلة عاليا ، أنا .. أنا بأفكر أرتبط بيكي
فغرت عاليا شفيتها مصدومة من عبارته
الأخيرة ، ورمشت بعينيها عدة مرات ،
ورددت بلا وعي :

-نعم ؟!

إزدرد ريقه ، وتابع بحذر :

-أنا مقصدش حاجة وحشة ، أنا غرضي
شريف ، يعني .. عاوز أتعرف عليك أكثر ،
ونقرب من بعض وآآآ..

قاطعته بلهجة حادة وهي ترمقه بنظرات
قوية :

-ده لا وقته ولا الظروف تسمح بالكلام اللي
بتقوله ده

رد عليها بإبتسامة باهتة :

-أنا فاهم ، بس محتاج أعرف رأيك على
الأقل

زاد عبوس وجهها ، وأجابته بصوت حاد :

-وأنا معنديش حاجة أقولها الوقتي

سألها وهو محقق مباشرة في عينيها :

-يعني موافقة ترتبط ولا لأ ؟

كزت على أسنانها قائلة بحقنق :

-أقول ايه بس ؟

توسلها بإصرار وهو يرمقها بنظرات متعشمة

:

-ريحيني ، أنا مش عاوز أكثر من كده

هتفت بإقتضاب :

-هارد عليك بعدين

دنا رامى منها قليلاً ، وتابع برجاء وقد لمعت

عينيه :

-أرجوكي ، مش هاقدر اصبر ، هي كلمة بس

، متبخلش عليا بيها٢

شعرت عاليًا بالحرج من اقترابه منها ،

وخشيت أن يظن بها أي أحد السوء ، فهتفت

على عجالة :

-ماشي

انفرج فمه غير مصداً ما قالته توأ ، وسألها

بتلهف :

-يعني إنتي موافقة ترتبط ؟

أشارت بإصبعها محذرة وهي تنهره بخفوت :

-ششش .. وطى صوتك

بدت السعادة واضحة على محياه ، وإعتذر

قائلاً بحماس جلي :

-سوري ، مخذتش بالي ، بس الفرحة مش

سيعاني

ابتلعت ريقها فقد استشعر قلبها صدق

نواياه ، ولكن أربكها نظرات المارة بالطريق

عبثت هي بطرف حجابها ، وأضافت قائلة

بجدية مصطنعة :

-طب خلاص ، تتكلم بعدين يا مستر

عبس بوجهه عبوس زائف ، وأردف قائلاً

بمزاح وهو يشير بيديه :

-ما بلاها كلمة مستر دي ، إنتي شيفاني

ماسك تباشيرة وبشاوره١

رمقته بنظرات غريبة ، وردت عليه بضيق :

-إيه الجو القديم اللي انت فيه ده ، اسمه

ماركر !

ابتسم لها قائلاً وهو يحرك رأسه للجانب :

-ماشى اللي انتي شايفاه ، ماركر .. ماركر ،

بس قوليلي رامى من غير تحابيش !

غمزت له بعينها وهي تعترض :

-لأ .. وعن اذنك خلىني أشوف أصحابي

دس رامى يديه فى جيبى بنطاله ، وتابعها

بنظراته وهي تبتعد عنه ، وهمس لنفسه :

-طيب ، اللي يريحك يا أبله !

راقبت رانيا بنظرات متربصة ما يحدث من
على بعد ، وأثارها الفضول لمعرفة ما الذي
يدور بينهما ..

لكزت هي كتف رفيقتها نشوى ، وكزت على
أسنانها بقوة وهي تقول :

-خدتي بالك يا نوشة من اللي حاصل هناك
!!

تلفتت نشوى حولها بنظرات حائرة ،
وتسائلت قائلة :

-هو في ايه ؟

أردفت قائلة بحنق :

-انتي مش مركزة

هزت رأسها نافية ، وتمتمت بعدم إكتراث:

-لأ ، هو في ايه ؟

أجابتها بنبرة لثيمة وهي تهز حاجبها الأيمن :

-عاليا والراجل اللي معاها

-مالهم ؟

أضافت قائلة بخبث :

-عمالين يتودودا من الصبح ، وفي الآخر قالها

هنرتبط

شهقت نشوى مصدومة ، وهتفت بعدم

تصديق :

-هاه ، هنا ؟ والوقتي ؟!

مطت رانيا شفيتها ، وضيق عينيها لترمق

عاليا بنظرات مغلولة ، ثم نفخت بصوت

مسموع ، وضغطت على أسنانها ، وأكملت

قائلة بغیظ :ع

-أرزاق ، كل واحدة عمالة تظبط في الثاني ،
وأنا واقفة محلك سر .. ماهو ناس ليها
جوازات ، وناس آخرها تمشي في جنازات
!!

.....
واصل قراءة الجزء التالي

الفصل الثلاثون

الفصل الثلاثون :

في سيارة المعلمة حنان ،،،

أصرت حنان على إيصال سارة في طريق
عودتها للمنزل بعد أن انتهى الجميع من
واجب العزاء في منزل الراحلة جانب ...

شعرت سارة بالحرج من وجود ذلك الشاب
الذي إلتقته من قبل في السيارة معها ،
وحدقت في النافذة الملاصقة لها ، وبدى على
وجهها القليل من الضيق ، فهي قد اضطرت
أسفة أن تستقل معهما السيارة لعدم توفر
أي وسائل مواصلات خاصة بعد إنصراف
الجميع وبقائها بمفردها أسفل البناية ..

قاد أحمد السيارة بسرعة هادئة ، وحدث في
المرآة الأمامية ليتمعن أكثر في تفاصيل
وجهها ..

تنحنح هو بصوت خشن ، وأردف قائلاً بجدية

:

-أخبار الدراسة معاكي ايه يا مس آآ...

ثم توقف لثانية عن الحديث قبل أن يتابع

بمكر :

-مس سارة صح ؟

ردت عليه بإقتضاب :

-تمام

أضافت حنان قائلة بحماس :

-مس سارة من الناس المجتهدين جداً
عندنا في الكي جي ، وبالعكس أي حاجة

تكلفها بيها بتنجزها على طول

مط فمه في إعجاب وهو يقول :

-ماشاء الله

ثم تسائل بفضول :

-وعلى كده يا مس سارة بتحبي الكي جي ،

ولا كنتي تفضلي تدي لمراحل أعلى ؟

ردت عليه بنبرة شبه جافة :

-أنا بأحب التعامل مع الأطفال

تدخلت حنان في الحوار قائلة :

-عارف يا أحمد ، مس سارة رقيقة جدا مع
الأطفال وبتحبهم أوي ، وهما متعلقين بيها
جداً

غمغمت سارة مع نفسها بضيق :

-هو الحكاية بالظبط ؟ الاتنين عمالين يغنوا
ويردوا على بعض ، وأنا في النص ما بينهم ،
الموضوع ده شكله مش طبيعي ، في حاجة
غلط فيه !!

بعد برهة وصل أحمد عند البناية التي
تقطن بها سارة ، فترجلت هي على الفور
من السيارة ، لحقت بها حنان ، وودعتها
بحرارة .. وترجل أحمد هو الآخر، وتابع قائلاً
بإبتسامة هادئة :

-أتمنى أشوفك ثاني يا مس سارة

ردت عليه بإبتسامة باهتة :

-إن شاء الله

تابعت حنان قائلة بنبرة رزينة :

-مس سارة لو عوزتي أي حاجة أنا موجودة ،
كلمني في أي وقت ، احنا مش بس زمايل ، لأ
انا بأعتبرك اختي الصغيرة وآآ...

قاطعتها سارة بإيجاز :

-حاضر ربنا يسهل ، عن اذنكو

ثم قبلتها من وجنتيها ، وودعتها مرة أخرى ..

راقبها الاثنين وهي تلج إلى مدخل البناية ،
فأكمل أحمد قائلاً :

-شكلها بنت محترمة ، تتوكل على الله

معاها

ردت عليه بحماس كبير :

-جدا يا أحمد ، ربنا يجعلها من نصيبك ٣

.....

تبادلت المعلمات على موقع الواتس آب
حديثاً ساخناً حول رحيل زميلتهن وما حدث
طوال اليوم ...

-ميادة : ((ربنا يعين جوزها ، شكله مصدوم
يا عيني))

-منة : ((مش مصدوم ، ده مقهور))

-سالي : ((يا بنتي كان بيحبها أوي))

-هناء : ((والله واحنا كمان))

-منة : ((أنا مش عارفة هادخل المبنى ازاي
تاني من غير ما أعدي عليها وأشوفها))

-هبة : ((ربنا يصبرنا ، الأيام الجاية هاتكون

صعبة علينا كلنا))

-ميادة : ((تفتكروا هاي جيبيوا حد جديد ، ولا

هيكملوا بقية الترم عادي ؟))

-سالي : ((معتقدتش هاي سيبيوا الميوزيك

من غير أي مدرس ، دي كانت بتدي الكي

جي كله))

-منة : ((هو في حد هايكون أصلاً في مهارتها ،

كله اللي هايجي قلبه مش هايكون على

الشغل ولا العيال ولا أي نيلة))

-هناء : ((يا بنتي الجداد كلهم كده))

-ليلة : ((الكل بيدور على الفلوس وبس ،

معدتش حد عنده ضمير في شغله))

-عاليا : ((مساء الخير يا بنات ، معلش أنا

مش قادرة أعلق مخنوقة من اللي حاصل))

-سالي : ((كلنا زيك يا عاليا))

-ميادة : ((ومين ليه نفس يعمل حاجة))

-ريمان : ((هاي يا بنات ، أنا بس عاوزة
أقول حاجة ، مس جانيت مش هاتتعوض ،
بس أكيد الإدارة هاتجيب بديل ، مش
هاتسيب مكانها فاضي ، المشكلة بقى إن
اللي جاي هايكون كفاءة وقادر على الشغل
ولا هايطلع أي كلام))

-عاليا : ((هيبان))

-هبة : ((عاوزين نعمل حاجة تكريم لذكراها
((

-ميادة : ((أنا لسه برضوه كنت بأفكر في
حاجة زي كده))

-ريمان : ((خلاص نتفق يا جماعة ونجيب
حاجة مميزة))

-سالي : ((تمام ، وأنا معاكو في الموضوع ده

((

-منة : ((كلنا أكيد مشتركين فيه))

-ليلة : ((شوفوا هاتعملوا ايه وقولولي))

-سالي : ((أوكي ، ونبليخ الباقي ونشوف

هايعملوا ايه))

.....

وبالفعل اتفقت المعلمات سوياً على
تصميم ألبوم صور باهظ الثمن يضم
مقتطفات مختلفة ومميزة للراحلة جانيت ...
وتولت ليلة جمع الصور وطبعها ..

فكرت هي في أن تستعين بستوديو
(Creative) التابع لزميلهم أيمن رشوان
 لتنفيذ الفكرة ...

.....
بعد مرور يومين ،،،

في بلدة ما ريفية ،،،

أُسِنِدَت الصواني المليئة بأشهى وأطيب
الأطعمة على موائد خشبية عريضة
موضوعة على الأرضية المفروشة بالحصير
والسجاد اليدوي ، وجلس المهندس سرحان
القرفصاء ، ثم ربت على فخذ الشيخ
الجالس إلى جواره ، واستطرد حديثه قائلاً
بحماس :

-تسلم ايدك يا شيخ عبدالله ، مكنش ليه
لازمة التعب ده كله

قطب الشيخ عبدالله جبينه ، ورد عليه
معتاباً :

-واه يا بشمهندس ، هو احنا عملنا حاجة ، ده

فضلت خيرك حاجة على ما قُسم !

نظر له قائلاً بامتنان :

-يدوم العز يا رب

تسائل الشيخ عبدالله باهتمام :

-المهم يا بشمهندس ، قولتلي رأيك ايه في

الموضوع اللي كلمتك فيه ؟

رد عليه سرحان بهدوء :

-أنا معنديش مانع ، المهم رأي العروسة

تابع الشيخ عبد الله قائلاً بجدية :

-برضك إنت ولي أمرها ، وفي مقام أبوها

ابتسم له سرحان وهو يرد :

-الله يكرمك يا رب ، وردة دي زي بنتي ،
ومعزهاش عليكؑ
أضاف الشيخ عبدالله قائلاً بنبرة فرحة :
-يباركلك يا بشمهندس ، خلاص ناخد برأيها ،
ونشوف هاتقول ايه
هز المهندس سرحان رأسه بإيماءة خفيفة
وهو يقول :

-صح كده ، واللي فيه الخير يقدمه ربنا

.....

في غرفة أخرى بالمبنى الريفي ،،
اتسعت خدقتي وردة في صدمة كبيرة ،
وإرتفع حاجبها للأعلى بعد أن أخبرتها
السيدة سوزان بمسألة تقدم أحد الشباب
لخطبتها ..

شهقت بذهول وهي تلطم على صدرها :

-أني أتجوز؟ ليه؟

رمقتها سوزان بنظرات دافئة ، وردت قائلة

بحنو :

-دي سنة الحياة يا وردة

احتجت وردة قائلة بعد أن زاد عبوس وجهها

:

-يا ست سوزان أني مبسوفة معاكو ، وآآ...

قاطعتها سوزان بهدوء :

-كل بنت أخرها الجواز ، والشيخ عبدالله

طلبك لابنه

تجهمت ملامح وجهها أكثر ، وغمغمت

بصدمة :

-يوه ، لابنه !

تابعت سوزان قائلة بنبرة رقيقة :

-هو انسان كويس ومجتهد ، وعاوز يكمل

نص دينه

اعترضت وردة قائلة بإصرار :

-بس أني مش عاوزة أتجوز ابنه ، أني

معرفوش

ردت عليها بنبرة هادئة محاولة إقناعها :

-ما هو في فترة خطوبة ، وإنتي هاتعرفيه !

تمتت وردة مع نفسها بتحسر وقد حل

الضيق على تعابيرها ونظراتها :

-يا سنة سوخة يا ولاد ، هاتجوز حد تاني غير

سي إزاز ، اه يا حوستي يامه

-ها قولتي ايه يا وردة ؟

لوت فمها قائلة بإزدراء :

-بندب حظي يا ستي

وضعت سوزان يدها على وجنتها ، ومسحت
عليها برفق ، وتابعت بهدوء :

-بصي يا وردة محدش هايغصبك على حاجة
، بس اعرفي إنه شاب كويس ومن أصل
طيب ، والأهم إنه قادر يفتح بيت ويصرف
عليكي ، وده صعب في الوقتي اللي احنا فيه
أدركت وردة أنه لا مفر من تلك الخطبة ،
وأن أحلامها بالزواج من فارس أحلامها قد
ذهبت أدراج الريح ، وربما لن يعود لها وجود
أبداً .. لذا تسائلت بقلق :

-طب .. طب أي لو وافقت ، هايحصل ايه
بعد كده ؟

ردت عليها بإبتسامة ناعمة وهي ترمقها
بنظرات مطمئنة :

-مافيش هنرتب أمور الخطوبة ، وماتشليش
هم ، عمك سرحان متكفل بكل حاجة
تخصك

نفخت وردة بحزن وهي تتمتم بخفوت :

-بقى دي أخرتها ، يا خسارتي في الجواز ، مين
بعذك يا سي إزاز هايقولي فلور، آآآه يامه !ع

.....

في منزل عاليا ،،،

رغم حالة الحزن السائدة على الجميع ، إلا
أن عقل عاليا لم يتوقف للحظة عن التفكير
فيما قاله رامى لها ، وإبدائه لرغبته في
الإرتباط بها في أقرب وقت ..

تقلبت على جانبها على الفراش ، وحدثت
أمامها في الفراغ ، وتشكل على ثغرها
إبتسامة صافية .. وتنهدت بعمق وهي تتذكر

مواقفهما سوياً .. منذ أول لقاء جمعهما عند
بوابة المدرسة ، وإصراره على دفع أجرة
السائق ، ثم رؤيته عند المطعم ، ودفعه
للفاتورة ، وما تلاها من رؤيته مصادفة على
الطريق ، وغيرها من المواقف المختلفة ..
تنهدت مجدداً ، وغمغت مع نفسها قائلة :

-يعني هو بيحبني ؟

مطت شفيتها ، وأمسكت بخصلات شعرها
لتعبت بهم ، وتابعت بنبرة حائرة :

-مممم.. طب حصل امتى وازاي ؟ واحنا كل
اللي كان بينا مجرد مواقف !

قطبت جبينها ، وضيقت نظراتها ، وتساءلت
بقلة حيلة :

-لأ .. جايز اعجاب لكن حب معتقدش ،
يووووه ، أنا محتارة ، طب أقول للبنات ولا
أخبي عليهم؟!

زفرت بصوت منزعج ، وأكملت بإستياء :
-أوووف ، محتارة أوي ، مش عارفة أعمل ايه
!

نهضت عن فراشها ، ولفت ذراعيها خلف
ظهرها ، وإستأنفت قائلة :

-طب هاقول لماما ولا أستنى شوية لحد ما
أعرف التفاصيل ، طب أنا أصلاً معرفش
هاشوفه امتى تاني؟!

.....

في مطعم ما ،،،،

انتهى النادل من وضع صحون الطعام على
الطاولة ، ثم بدأ رامى فى تناول قطع اللحم
المشوية الخاصة به بشراهة ، وظل آياز
محدقاً به فى ذهول خاصة بعد أن أخبره ابن
خالته بنيته للإرتباط من عالياً ..

فسأله بعدم تصديق :

-إنت بتكلم جد يا رامى ؟

أوماً برأسه إيجاباً وهو يرد عليه :

-جد الجد طبعاً

سأله آياز مرة أخرى بإهتمام :

-طب امتى ده حصل ؟

هز رامى كتفيه فى عدم إكتراث ، وأجابه وهو

يبتلع قطعة أخرى من اللحم :

-مش عارف ، بس أنا دماغي مش بتبطل
تفكير فيها ، عاملة زي العفريت ، بتطلعلي
في كل حنة

رفع آياز حاجبه في إعجاب ، وسأله بفضول :

-أها ، وايه كمان ؟

مد رامي يده ليمسك بكوب الماء ،
وإرتشف منه القليل ، ثم تجشأ قائلاً :

-بصراحة كده أنا متعلق بيها أوي

ضيق آياز نظراته ، وسأله بجدية وهو يحك
طرف ذقنه

-وناوي على ايه ؟

رد عليه بإبتسامة عريضة :

-هاقري فاتحة وتخطب ونقرب من بعض
أكثر

هز آياز رأسه متعجباً ، وتابع قائلاً بجديّة :

-طب افرض طلعتوا مش بتحبوا بعض ،
أقصد هي مش بتحبك وآآ....

قاطععه رامى قائلاً بصوت شبه حاد :

-بعد الشر

بادلله آياز ابتسامّة هادئة وهو يقول :

-عموما مبروك مقدماً

تنهد رامى بحرارة وهو يرد عليه :

-الله يبارك فيك

غمز له آياز بمكر :

-عارف أنا كنت متوقع ده

سأله رامى بفضول :

-وايه اللي خلاك تقول كده ؟

أجابه بإبتسامة عادية :

-اصلك مكونتش شايف نفسك وانت

بتتعامل معاها

حك رامي طرف أنفه بإصبعه ، وتابع بحرج :

-هو أنا مكشوف أوي كده

ثم ضيق نظراته ، وسأل ابن خالته بفضول :

-طب انت معندكش حاجة كده ولا كده ؟

إرتسمت علامات الجدية على وجه آياز وهو

يرد عليه بتساؤل :

-قصدك ايه ؟

أجابه بإبتسامة عابثة :

-يعني مزة شاغلة بالك ، واحدة بتفكر فيها

-ممم..

حرك رامي رأسه قائلاً بتسلية :

-باين فيه وأنا مش واخد بالي منك !

أخذ آياز نفساً عميقاً ، وزفره ببطء ، ثم

أجابه بتديث :

-بص ، مخبيش عليك هو مش إعجاب زيك

، بس في توافق فكري بينا

غمز له رامي مرة أخرى ، وتابع بحماس :

-هي بتبدأ بكده في الأول ، وبعد كده ربنا

بيسهلها

أشار له بكفه قائلاً بهدوء حذر :

-ماتستعجلش الأمور ، أما يحصل حاجة

هاقولك

.....

عند ستوديو (Creative) للتصوير

الفوتوغرافي ،،،،

ترددت ليلة في الدخول وهي تطالع بعينين
متوترتين لافتة المكان .. ولكنها حسمت
أمرها بالولوج ، فهي من تولت مسألة تجهيز
الألبوم ، وهي من عليها إنهائه ..

ابتلعت ريقها بتوتر ، ثم دفعت الباب بيدها ،
وجابت بأنظارها المكان ..

كان الوضع هادئاً بالداخل .. نهض أحد
الأشخاص من مقعده ، وسألها بنبرة رسمية
وهو يتجه نحوها :

-أي خدمة ؟

إرتبكت ، وتوردت وجنتيها وهي تجيبه
بتلعثم :

-من فضلك .. أنا .. أنا كنت عاوز أقابل مستر

أيمن

سألها بهدوء وهو يضيق نظراته :

-جلسة تصوير ولا آآ...

قاطعته بنبرة متوترة :

-لأ ، هو الموضوع مش كده ، أنا عاوزة اتفق

معاه على ألبوم معين

هز رأسه متفهماً ، وتابع بجدية :

-طب لحظة ، هناديك عليه من جوا

.....

في محل ما للثياب الجاهزة ،،،،

وضعت ريمان الهاتف على أذنها ، وعبث

بيدها الأخرى بقطع من الثياب النسائية

الفاخرة ، واستطردت حديثها بخفوت :

-مش عارفة ، بس هو بيتعامل معايا كويس

جدا

ردت عليها سالي قائلة :

-يا بنتي يمكن يكون معجب؟!!

ضغطت على شفيتها وهي تجيبها بصوت

خفيض :

-لا هو مقالش حاجة

تابعت سالي بصوت جاد :

-عامه خلي بالك ، النوعية دي من

الشخصيات لو حد بيعجبها هاتقول على

طول ، مش هتلف وتدور

-أها ..

سألته سالي مجدداً بإهتمام :

-بس إنتي مرتاحة معاه؟

أجابتها ريمان بثقة :

-ايوه ، طلع عكس ما كنت مفكراه

-أها ..

ثم تابعت قائلة بحماس :

-عارفة يا سالي في الأول قولت عليه ده تنك ،
وشايف نفسه ، ومرسوم على الفاضي ، لكن
طلعت ظلما ، هو بيحب شغله ومجتهد
فيه .. !

ردت عليها سالي قائلة بنبرة محذرة :

-ربنا يكرمك يا ريمو ، بس متحاوليش
تحكي كتير في الموضوع ده قصاد أي حد
طالما مافيش حاجة حصلت !
هزت رأسها متفهمة وهي تقول :

-اه ما أنا عارفة ، أنا بس بأفضفض معاكي
في الكلام
-اوكي

.....

في ستوديو (Creative) للتصوير الفوتوغرافي

“““

خرج أيمن مسرعاً من الداخل ، وعلى ثغره
إبتسامة سعيدة، وهتف بحماس وهو يشير
بيده :

-مس ليلة ، أهلا وسهلاً ، اتفضلي ، شرفتي
الاستديو المتواضع بتاعي

ابتسمت له بخجل وهي ترد عليه :

-ميرسي ، سوري إن كنت هاعطلك وآآ...

قاطعها بعتاب زائف :

-لالالا ، متقوليش كده !

ثم أشار بيده وهو يتابع بحماس :

-اتفضلي تتكلم جوا

تنحنحت بخفوت وهي تقول :

-هنا كويس

لم تتلاشى ابتسامته العريضة وهو يردد :

-اوكي اللي يريحك

إتجهت ليلة للجلوس على أقرب مقعد ،
وجلس هو على المقعد المجاور لها ، ثم
فركت أصابع كفها بتوتر ، وأكملت قائلة
بتلعثم قليل وهي تتحاشى النظر إليه :

-بص أنا .. انا وصحابي في الكي جي قررنا

نعمل ألبوم لمس جانيت

هز رأسه بحركة خفيفة وهو يتمتم بجدية :

-تمام

إستأنفت حديثها بهدوء حذر :

-فطبعاً اخترت شوية صور ، بس محتاجة
أنفذها بطريقة مختلفة ومميزة عشان نديها
إهداء لجوزها

أردف هو قائلاً بحماس :

-أوكي ، وأنا معاكي في الحوار ده

تابعت هي قائلة بجدية بالغة وقد إستدارت
برأسها نحوه :

-احنا هنتحمل التكاليف كلها

أشار لها بكفه معترضاً ، ورد عليها بإصرار :

-لالالا ، مش هانتكلم في فلوس دلوقتي ،
إنتي بس قوليلي دماغك فيها ايه ، وأنا
معاكي !

تشكلت إبتسامة رقيقة على وجهها وهي

تقول بصوت خفيض :

-اوكي

أخذ أيمن نفساً مطولاً ، وزفره على مهل ،
وأكمل بنبرة متحمسة وهو يرمقها بنظرات

ناعمة :

-عارفة يا مس ليلة ، أنا فرحان أوي إنك يوم

ما فكرتي عملي حاجة جيتي عندي

توردت وجنتيها أكثر ، وبدى الإرتباك واضحاً

على محياها ، وردت عليه بخجل :

-ميرسي

نهض عن المقعد ، وأشار بيده متابعاً :

-تعالى معايا أوريكي شوية ألبومات تنقي

منهم المناسب

هزت رأسها موافقة ، وعلقت حقيبة يدها
على كتفها ، وهمست :

-اوكي

سيطرت سعادة خفية على المصور أيمن
لأن ليلة أثرت التعامل معه في ذلك
الموضوع الهام ، وبالتالي ستتوطد العلاقات
بينهما كثيراً ، لأنهما سيتواصلان بصورة
مباشرة دون حرج أو تكليف ..

.....

على مدار الأيام التالية ،،،

تلقى رامى خبر خطبة وردة بسعادة غامرة ،
فقد كان يريد التخلص منها في أقرب وقت ،
وها قد حصل ما تمناه ..

وظلت الأخيرة في بلدتها الريفية لتستعد
لترتيبات الخطبة .. وتدمرت آمالها تماماً في
الزواج من آياز ..

لم يتأثر آياز بغيابها ، فلم يشكل وجودها
فارقاً معه .. ولكن على الجانب الآخر تعمقت
الصلات مع ريمان ، ونما بينهما حديثاً من
نوع آخر .. حديثاً يكتشف جوانبهما الخاصة

...

عاد كل شيء إلى طبيعته في مبنى رياض
الأطفال ، ومع هذا ظل هناك شيئاً ناقصاً ..

كذلك أهدت المعلمات زوج الراحلة جانيت
الألبوم الذي تفنن المصور أيمن في إخراجه
بصورة مميزة مما جعله يبكي فرحاً وتأثراً
بما فعلوه من أجلها ، وشكر الجميع ممتناً ..

أرسلت إدارة مدارس الالافانيا في طلب معلمة
موسيقى جديدة تكون على قدر من الكفاءة
والخبرة بالإضافة لوجود الروح الإبتكارية
وحب العمل الجماعي ، وبالفعل تم العثور
على واحدة تنطبق عليها الشروط الموضوعه
.. ووقعت العقد مع مديرة المدارس ..

حركت ريمان قلمها الحبر بحركة ثابتة
بإصبعيها وهي تحرق في آياز بعد أن جلس
الإثنين سوياً في غرفة المعلمات ، ثم سأله
بإستغراب :١

-بتصلي كده ليه ؟

ضيق نظراته ليطالعهها بعينين شغوفتين ،
ورد عليها متسائلاً :

-ازاي يعني ؟

ردت عليه بخجل وهي ترسم إبتسامة رقيقة

على شفيتها :

-مش عارفة ، بس عينيك شكلها غريب

أجابها بخفوت أسر:

-يمكن بتقول عن اللي جوايا

سألته هامية :

-وإنت جواك ايه ؟

أخذ آياز نفساً عميقاً ، وزفره على مهل ، ثم

أجابها :

-حاجات كتير

زمت ريمان شفيتها فقد إستشعرت

مشاعره نحوها ، والتي عبرت عنها نظراته ،

وكذلك تصرفاته معها مؤخراً ..

أعادت خصلة من شعرها للوراء ، وسألته
بفضول وقد لمعت عينيها هي الأخرى:٢

-ممم.. زي ايه ؟

رد عليها هامساً وقد رفع حاجبه للأعلى :

-بصي هو مكانها مش هنا ، بس عاوزك
تعرفي آآ....

قاطع حديثهما صوت رانيا المتذمر وهي
تلج للغرفة :

-استغفر الله العظيم

إعتدت ريمان في جلستها ، وبدأت في جمع
أشياءها الخاصة وهي تتمم بسخط :

-أووف ، الغلسة جت

رمقتها رانيا بنظرات حادة ومتفحصة لهما
، وهتفت بتبرم :

-أهلاً ، إزيكم ؟

ردت عليها ريمان بإقتضاب وهي عابسة
الوجه :

-هاي يا رانيا

بينما أجابها آياز بنبرة جافة :

-هالو مس رانيا

إلتفتت ريمان برأسها نحو آياز وسألته
بجدية وهي توميء بعينيها :

-انت فاضي الوقتي ؟

رد عليها بنبرة رخيمة وهو ينظر في ساعة
هاتفه المحمول :

-أه ، لسه معايا وقت

نهضت عن مقعدها ، وتابعت قائلة بهدوء :

-طب تعالى نروح الكانتين نشترى أكل

ابتسم لها قائلاً :

-اوكي

حدجت رانيا ريمان بنظرات متجهمه ،

وقالت بسخط :

-هو إذا حضرت الملائكة ؟!

ردت عليها ريمان ببرود مستفز وهي تشير

بإصبعها :

-خدي راحتك يا مس رانيا ، انجوي بالStaff)

غرفة المعلمات (كله !

راقبتهما رانيا وهما ينصرفان عن الغرفة ، ثم

كورت قبضة يدها في غيظ ، وأكملت بنبرة

مغلولة :

-آآآآه ياني ، ياما فرساني ومش قادرة عليكى

!

.....

انشغلت معظم المعلمات في الترتيب

للنشاط الترفيهي الأخير للأطفال ..

وتولت هناء بنفسها تنظيم كل شيء ..

كان النشاط عبارة عن إحضار الأباء لمشاركة

صغارهم في صنع طائرة ورقية ، ثم إطلاقها

في الهواء لتحلق عالياً ..

تحمس الأباء كثيراً لذلك النشاط ، وحضر

أغلبهم للإستمتاع مع أطفالهم .. ومن لم

يتمكن من الحضور منهم بسبب سفره أو

عدم حصوله على إجازة من العمل أرسل

من ينوب عنه ...

تابعت هناء الجميع بنظرات مترقبة ، فقد
كان شاغلها الأكبر هو التأكد من وجود
الإشراف في أماكنه المحددة ، وكذلك سلامة
الصغار وعدم تعرضهم للخطر

-لو سمحتي !

قالها أحد الأشخاص من خلفها بصوت
رجولي خشن ، فإستدارت ببطء لتراه ..

فغرت شفيتها مصدومة ، وحدثت فيه
بنظرات مدهوشة ، فقد كان هو نفس
الشخص الذي تشاجر معها من قبل
بإسلوب وقح ، وعاملها بفظاظة ..

أفاقت سريعاً من صدمتها ، وحل العبوس
على وجهها ، وردت عليه بجمود وهي تشير

بإصبعها :

-افندم ؟ حضرتك لو جاي تتخانق تاني ، في
إدارة تقدر تروح تشتكي هناك فيها ، لكن
متكلمش معايا شخصياً بـ آآ....

قاطعها الرائد محمد قائلاً بإبتسامة ودودة :

-أنا مش جاي أتخانق على فكرة

نفخت قائلة بنفاذ صبر :

-أومال جاي ليه ؟

رفع الرائد محمد كفه الذي يحمل وردة
حمراء جميلة أمام وجهها ، ورد عليها بهدوء
دون أن تختفي إبتسامته :

-جاي أعتذرلك عن سوء التفاهم اللي حصل

بيننا ، ويا ريت تقبلي دي مني !٣

رمشت بعينيها غير مصدقة ما حدث توأ ،
وشعرت بالحرغ الشديد من تصرفه الجريء

هذا ، وتوردت وجنتيها بحمرة خجلة ،

.....و

.....

واصل قراءة الجزء التالي

الفصل الحادي والثلاثون

الفصل الحادي والثلاثون :

قدم الرائد محمد وردة حمراء إلى المعلمة
هناك كتعبير رمزي عن إعتذاره لتصرفه اللفظ
معها ، فابتلعت هي ريقها بتوتر من حركته
الجريئة والتي أصابتها بالحرج ، ثم رمقته
بنظرات مرتبكة ، وردت عليه بنبرة شبه
خجلة :

-أسفة مش باخد ورد

ابتسم لها قائلاً بإصرار:

-بس أنا مصر يا مس

هزت رأسها معترضة وهي تقول بجدية:

-لأ مش هاينفع حضرتك

قطب جبينه مندهشاً منها ، وسألها متوجساً

:

-ليه ؟ هو إنتي مش قابلة إعتذاري ؟!

ردت عليه بإبتسامة باهتة :

-لا خلاص ، حصل خير ، بس مالوش لازمة

الكلام ده

تابعت رانيا ما يحدث من على بعد بنظرات

ثاقبة كالصقر ، والتوى ثغرها بسخط جلي ،

ولكزت نشوى الواقفة إلى جوارها في

ساعدها ، وأردفت قائلة وهي تجز على

أسنانها بغيظ :٣

-شايفة اللي أنا شيفاه يا نوشة؟!!

تلفتت نشوى حولها بحيرة ، وسألته على

مضض :

-ايه تاني يا رانيا ؟١

أومات بعينيها وهي تجيبها بنبرة مغلولة :

-هنا والراجل اللي هناك

سلطت نشوى أنظارها عليهما ، وتسائلت

بإيجاز :

-مالهم ؟

ردت عليها بحق وقد تحولت نظراتها للحقد

:

-بيديها وردة

فغرت نشوى شفتيها مصدومة ، ورفعت
حاجبيها للأعلى ، وهتفت بعدم تصديق :

-يا شيخة

غمغمت رانيا بتحسر وهي عابسة الوجه :

-جتنا نيلة في حظنا الهباب ، مش بناخد غير

الفقر وبس !

أدارت نشوى رأسها في اتجاه رانيا ، ورمقتها

بنظرات مطولة ، ثم أشارت لها بكف يدها

وهي تتابع بهدوء :

-عارفة يا روني إنتي لو تصفي نيتك من جوا

ربنا هيكرمك إن شاء الله ٣

تقوس فم الأخيرة أكثر لتجيبيها بإزدراء :

-ياختي مصفياها ، بس المنحوس منحوس ٧

دنت سالي من هناء وذلك الشاب ، وحدجته

بنظرات قوية ، وتساءلت بجدية :

-في مشكلة حضرتك ؟

إلتفت محمد ناحيتها ، ورمقها بنظرات جافة

وهو يجيبها بفتور :

-بأتكلم مع المس ، إنتي في حاجة ؟

ردت عليه سالي بنبرة حادة ومحدرة وهي

تشير بإصبعها :

-لأ حضرتك اتكلم معانا كويس معانا ، إحنا

هنا آآ...

قاطعها محمد قائلاً بتنهيذة مسموعة :

-بصي يا مس عشان محدش يفهمني غلط

، أنا جاي أعتذر للمس دي

هزت رأسها مرددة بإستفهام :

-أها ، مس هناء ؟

أضاف محمد قائلاً ببرود :

-وبأقدم لها الوردة دي بس هي مش راضية

تاخذها

شعرت هناء بالخجل الشديد ، واصطبغ
وجهها بحمرة شديدة ، وهتفت بتلعثم واضح

:

-عن اذنكم

ثم تحركت بخطى سريعة مبتعدة عنهما ،
فصاح بها محمد بنبرة شبه مرتفعة :

-استني بس

سدت سالي عليه الطريق ، وهتفت محتجة
وهي ترفع كفها في وجهه :

-لو سمحت يا أستاذ ، حتى لو في خلاف ،
وحضرتك اعتذرت ، اوكي احنا هنقبله ، لكن
تخرج مس هناء بالشكل ده قصاد زمايلها
بيبقى الوضع مش لطيف خالص
تنحج بخشونة ، ودس يده في جيب بنطاله ،
ورد عليها بحرج :

-تمام ، في دي عندك حق

ابتسمت له مجاملة وهي تقول بإيجاز :

-شكراً لتفهمك

ثم تركته هي الأخرى وانصرفت في اتجاه
الأطفال ...

.....

في نهاية اليوم ، كانت الناظرة إعتماذ تقوم
بجولة سريعة داخل مبنى رياض الأطفال

مع المعلمة الجديدة لمادة الموسيقى -
ليندا - وهي من أصول كندية ..

تحمست ليندا كثيراً لبدء العمل والتعرف
على فريق العمل ، وأبدت الناظرة سعادتها
بإستعدادها للتحديات المقبلة .. وخاصة أنها
تمتاز بالروح المرحة ، وبالشخصية المثيرة
للإعجاب ..

تناقشت الاثنتين على عجلة في خطة
العمل القادمة خلال الأيام المقبلة ..
ووضعت كلتاها خطوطاً عريضة للبدء منذ
الصباح الباكر

وبالفعل اجتمع الجميع في غرفة المعلمات
للترحيب بها ..

استطردت الناظرة إعتماد حديثها قائلة بهدوء
جدي :

-النهاردة معنا مس ليندا مكان مس جانبيت

، وهي هاتكمل معنا بقية السنة !

ثم استدارت برأسها نحوها ، وتابعت قائلة

بإبتسامة صغيرة :

Welcome on board Miss Linda (مرحباً

بك معنا مس ليندا)

رسمت ليندا ابتسامة مرحة على ثغرها وهي

تقول :

Thanks-

تركته الناظرة لتتعرف بنفسها على الآخرين

، وعادت لتمارس أعمالها الأخرى ..

أردفت ميادة قائلة بنبرة عادية :

-هالو ، how are you (كيف حالك ؟)

ردت عليها ليندا بإبتسامة ظريفة :

-أنا كندية بس بابا أصلاً مصري

هتفت هناء مصدومة وهي تردد بإندهاش :

-واو ، مصري ، وبتكلمي عربي

-أكيد

قالتها ليندا وهي تحرك كتفيها بدلال

أردفت سالي قائلة بإبتسامة متسلية :

-بصي انتي هاتتبسطي معانا ، احنا هنا

بنشوف العجب ، ومش عاوزين نجيبلك

احباط من الأول ، بس هتتفاجئي كل يوم

بحاجة ممكن تشلك !

ردت عليها لينداً بمزاح :

-ممممم ، لأ واضح إني هاتجلط مش

هاتفاجيء

هتفت منة بنبرة متحمسة :

-اوه ، هاتنجلطي ، ده انتي مصرية وش يا

ليندا !

هزت رأسها بحركة خفيفة وهي ترد قائلة :

-طبعاً ، ويا ريت تنادوني لولو ، بلاش ليندا !

ردت عليها منة مبتسمة :

-أوكي ، زي ما تحبي

ولجت سارة إلى داخل غرفة المعلمات

وهتفت بحماس وهي تشير بذراعها :

-احنا عندنا أجنب !

ردت عليها سالي بإبتسامة واسعة :

-لأ طلعت أوت المرادي ، هي مصرية

رفعت سارة حاجبيها مندهشة ، وهتفت

بمرح :

-بجد ، طب اشطا

تسائلت منة بإهتمام وهي توجه حديثها
لليندا :

-هاتبقي ناشونال ولا إنترناشونال ؟

ردت عليها سارة بثقة وهي تلف ذراعها
حول كتف منة :

-أكيد انترناشونال ، جنسية بقى وحركات

هزت ليندا كتفيها في حيرة ، وأجابت بهدوء :

-مش عارفة لسه ، بس أنا هادي لكله في

الكي جي

-أكيد

أضافت سالي قائلة بجدية :

-يا ريت تبقي ناشونال لأحسن بعيد عنك

اللي بيلبس في الانتر بتجيلوه اللعنة

قطبت ليندا جبينها عقب العبارة الأخيرة

،وردت بإستغراب :

-لعنة؟!!!!

لوت منة شفيتها قليلاً ، ثم دنت من ليندا ،

وهمست لها :

-ايوه ، لعنة الانتر دي معروفة !ع

ضيقت ليندا عينيها أكثر ، وتمتمت بتعجب :

-مش فاهمة حاجة

تابعت سالي قائلة بهدوء جاد وهي تشير

بكف يدها :

-بصي يا لولو في حفلة السنة اللي فاتت

الستارة وقعت على الأطفال ، والسنة اللي

قبلها النور قطع في نص الحفلة ، ولما رجع

حصل ماس كهربى ٢

شهقت ليندا مصدومة :

-اوف

إرتسم على ثغر سالي ابتسامة متسلية

وهي تستأنف حديثها :

-لأ ده في خبايا كثير ، بس هانقولك عليها

بالتفصيل

بادلتها ليندا ابتسامة غامضة وهي تقول

: بخفوت :

-الظاهر إني هاحب المكان ده أوي !

ردت عليها سالي بثقة :

-طبعاً ، ده الكي جي !

.....

في غرفة الوسائط المتعددة ،،،

دقت ليلة باب الغرفة بخفة قبل أن تلج
للداخل ، وبحثت بعينها عن أيمن فوجدته
منكباً على حاسوبه الشخصي ..

تنحنت بخفوت ، ثم همست متسائلة :

-ممکن ادخل ؟

أشار لها بكفه وهو يجيبها بجدية :

-أه طبعاً

ابتلعت ريقها بحرج ، وتساءلت بحياء :

-مشغول ، لو هاعطلك أجي وقت تاني ؟

-لا ، أنا قربت أخلص

-أوكي

تابع قائلاً بجدية وهو يشير على مقعد شاغر

:

-اتفضلي

ابتسمت له مجاملة ، وردت قائلة وهي
تجلس عليه :

-ثانكس

عضت على شفثها السفلى بتوتر ، ومدت
يدها لتخرج من حقيبتها كاميرا صغيرة ،
وأكملت بخفوت :

-أنا مش هاخذ من وقتك كتير

ابتسم لها وهو يطالعها بنظرات متأملة
طويلة ، ثم أجابها بصوت آجش :

-براحتك

تلمست هي عدسة الكاميرا ، وأردفت قائلة
بنبرة شبه مرتبكة :

-هو الكاميرا كان فيها مشكلة وآآ...

وضع أيمن يده على كفها ، فأرتجت من
لمسته ، وتوردت وجنتيها إلى حد ما ،
وقاطعها قائلاً بجديّة واضحة في نبرته ،
وتعابير وجهها ٣:

-ليلة ، ينفع أكلّمك في حاجة كده بعيدة عن
الشغل

سحبت يدها من أسفل كفه ، ورمشت بقلق
وهي تسأله بخجل :

-خير-

برزت أسنانه من خلف إبتسامته وهو يجيبها
بنبرة مطمئنة :

-إن شاء الله خير ، متقلّيش !

أخفضت عينيها ، وفرك أصابع كفها بحركة
شبه عصبية ، بينما أخذ هو نفساً عميقاً ،

وأخرجه من صدره على مهل ، وأكمل بهدوء

:

-شوفي يا ستي ، أنا مش بأعرف ألف ولا أدور

لما أكون عاوز حاجة بأعملها على طول

سألته بتوتر وهي تتحاشى النظر نحوه :

-أها وبعدين

إستأنف حديثه بصوت جاد ورزين :

-من غير مقدمات كده ، أنا مرتاح معاكي

بدت متوترة للغاية من كلماته ، وتلون وجهها

بالكامل بحمرة ظاهرة ..

تلعثمت وهي تحاول الرد عليه :

-هاآآ.. آآ.. انت آآ....

قاطعها بنبرة أكثر جدية :

-مش عاوزك تفهميني غلط ، بس أنا بأفكر

جدياً في الارتباط بيكي ، فايه رأيك ؟

إرتبكت كثيراً ، وسيطر عليها حالة من الحرج

، فعلقت حقيبتها على كتفها ، ونهضت

فجأة من على مقعدها ، ثم هتفت بصوت

متقطع :

-أنا ... آآ.. عن اذنك

أسرع في خطواته ليقف قبالتها ، ثم سد

عليها الطريق ، وسألها بتلهف :

-استني بس ، رايحة فين ؟

ردت عليه بحرج وقد تحول لون بشرتها

لثمرة الطماطم :

-ماهو اصل آآ...

استشعر خجلها منه ، فلم يضغط عليها ،

وقاطعها للمرة الأخيرة بهدوء :

-بصي خدي وقتك في التفكير ، وردني عليا ،

لكن عاوز تتأكدي إني جاد في كلامي

هزت رأسها موافقة وهي تتنحج بصوت

شبه متحشرج :

-احم آآ.. أوكي ، عن اذنك !

سألها بتسلية وهو يغمز لها :

-طب والكاميرا ؟

ردت عليه يارتباك :

-هه .. آآ.. بعدين !

تابعها أيمن بنظراته وهي تنصرف بخطوات

أقرب للركض ، ثم حك فروة رأسه بأصابعه ،

وتنهد بعمق وهو يقول :

-ربنا يكرم !!

.....

انشغل عقل ليلة بالتفكير في الإرتباط بأيمن
وخاصة بعد مصارحة الأخير لها برغبته
الجادة في هذا ..

لاحظت رفيقاتها شرودها أثناء عودتهن إلى
منازلهن في سيارة ريمان ، وتساءلت هي
بفضول وهي تدير عجلة المقود :

-الجميل سرحان في ايه ؟

انتبهت إلى صوتها ، وأسبلت عينيها نحوها ،
وردت بخفوت :

-هه

لكزتها سارة في كتفها بخفة ، وهمست لها
بمكر :

-ده انتي مش معانا من الصبح يا بنتي
سألتها عاليا بجدية وقد أدارت رأسها ناحيتها
:

-في حاجة مضيقاكي ؟

هزت رأسها نافية وهي تجيبهن :

-لأ بس .. آآ

هتفت سارة قائلة بمزاح وهي تسحب
حجابها للخلف قليلاً :

-شكلك متغير ، اوعي تكوني بتحبي

ردت عليها سالي مستنكرة :

-هو احنا أصلاً بتوع حب وغرام ، يا بنتي احنا
خلقنا للعمل والعبادة

ضحكت الفتيات على دعاة سالي الأخيرة ،
وتشجعت ليلة لقول :

-هو الموضوع قريب من اللي بتقوله سارة

ساد صمت مريب داخل السيارة لعدة ثوانٍ ،
وتسائلت بعدها ريمان بذهول واضح على

تعايير وجهها :

-ايه ده بجد ؟

هزت رأسها بإيماءة خفيفة ، وأجابتها

بإبتسامة خجلة :

-ايوه

سألتها سارة بنفاذ صبر :

-قولي يا بنتي في ايه ؟

عضت على شفرتها السفلى ، وأطرقت رأسها

للأسفل ، ثم أجابتها بخفوت :

-أيمن بي فكر يرتبط بيا

سألتها عاليا بجدية وهي قاطبة جبينها :

-أيمن مين ؟

هتفت سالي بنزق :

-اوعي يكون المصور اياه

ردت عليهن بهدوء :

-اه ، هو

شهقت سالي بإعجاب :

-واو يا ولد !

ابتسمت لها عاليا ، وتابعت قائلة بنبرة فرحة

:

-ربنا يسعدك يا لولا ، انتي تستاهلي كل

خير

بادلتها إبتسامة رقيقة وهي تقول :

-يا رب

هتفت سارة بحماس وهي تطالع ليلة
بنظرات سعيدة :

-لالالا.. متاخذيناش في دوكة احنا عاوزين
نعرف التفاصيل

أضافت عاليا قائلة بصوت شبه مرتفع :

-طب قبل ما تحققوا مع ليلة ، أنا عندي
ليكو خبر

سألتها ريمان بإهتمام :

-ايه ؟

وأضافت سالي بهدوء :

-في ايه يا مزة ؟

ردت قائلة بتنهيده مطولة :

-أنا هيتقري فاتحتي الجمعة الجاية

شهقت ريمان مصدومة وقد تشكل على
وجهها علامات الفرحة :

-بجد يا عاليا !

هتفت سارة بنبرة متحمسة وهي تشير
بكف يدها :

-ايه المفاجأة الجامدة دي !

عبست سالي قليلاً بوجهها ، ورددت متسائلة
بحزن مصطنع :

-انتي بتخبي عليا ؟

ردت عليها عاليا مبررة :

-لا والله ، بس الموضوع حصل بسرعة

أضافت سارة بنبرة مازحة وهي تلوح بذراعها
في الهواء :

-احنا محتاجين نبخر شلتنا لأن الخطوبات

عندنا هاتكون بالجملة

وافقتها عاليا الرأي وهي تقول بمرح :

-اه والله ، وأنا هاجيب البخور

تنحنحت سارة بصوت مرتفع ، وتشدقت

قائلة :

-طب هاقولك أنا كمان على موقف حصل

معايا ، وأنا شاكة ان فيه إن ! وأنتو عارفيني

لما بأشك في حاجة

سألتها سالي بإهتمام :

-ايه هو يا شارلوك هولمز ؟

ردت وهي تجوب بنظراتها أوجه رفيقاتها :

-عارفين مس حنان

هتفت عاليا بإختصار :

-ايوه

بينما تسائلت ريمان بجدية وهي تضغط
على بوق السيارة :

-مالها ؟

أخفضت نبرة صوتها ، وثبتت نظراتها وهي
تجيبهن :

-شكلها كده بيدبر إنها تخطبني لأخوها
شهقت عاليا وهي تسألها بعدم تصديق:

-بتهزري ، مس حنان ؟!

أجابتها سارة بثقة :

-لأ والله بأتكلم جد

تابعت سالي قائلة وهي تخمز بعينها :

-معدتش ناقص إلا ريمان

هتفت ريمان بإبتسامة مهذبة :

-أنا ؟

أومأت سالي برأسها بهدوء ، وهي تجيبها :

-ايوه

وضعت عاليا يدها على كتف ريمان ،
ورفعت حاجبها للأعلى ، ورمقتها بنظرات
ذات مغزى ، ثم سألتها بمكر :

-ها يا عم ، الأخبار معاك ايه مع إن احنا
فاهمين كل حاجة ؟!!

ردت عليها بنبرة متريثة :

-إن شاء الله خير

صاحت سارة بصوت مرتفع وهي ترفع
كفيها للأعلى :

-ربنا يكرمنا كلنا ويفرح قلوبنا

ردت عليها بقيتهن :

-يا رب

.....

في اليوم التالي ،،،

في مسرح مدارس اللافانيا ،،،،

استخدمت رانيا عدة أوراق مطوية لتحركها
بحركة ثابتة لترطب على وجهها الذي تنبعث
منه حرارة شديدة بقليل من الهواء
المصطنع ..

نفخت من الضيق وهي تتابع إحدى
التدريبات المملة لأحد العروض الخاصة
بالمراحل العليا..

غمغمت مع نفسها بإنزعاج :

-طب أنا ماليش لازمة في الليلة دي كلها ،
مقعدني هنا ليه كل المدة دي

تلفتت حولها ، وراقبت الجالسين بنظرات
دقيقة ، ثم عاودت النظر إلى خشبة المسرح

..

-مس رانيا ، تعالي من فضلك

قالتها إحدى المعلمات بصوت مرتفع وهي
تلوح بذراعها

ردت عليها الأخيرة قائلة :

-جاية أهوو

نهضت عن مقعدها ، وتحركت للأمام ولكنها
لم تنتبه للمطفأة المسنودة بجوار درجات
المسرح ، فتعثرت بها ، وإنزلقت على وجهها
كالخرقاء ..

ضحك عليها الجميع ، فشعرت بالضيق
الممزوج بالغضب ، وإستندت على مرفقيها
لترفع جسدها عن الأرضية ..٢
اقترب منها أحد الأشخاص ، وأردف متسائلاً
بهدوء :

-انتي كويسة يا مس ؟

ردت عليه بنبرة محتقنة :

-لأ طبعاً

سألها بإهتمام :

-رجلك كويسة ؟ عاوزه مساعدة مني طيب

؟

ردت عليه بتبرم وهي عابسة الوجه :

-ده العادي بتاعي ، أتكفى على وشي زي

تملي

تنحني بخفوت وهو يتابع بنبرته الرخيمة :

-ألف سلامة يا مس !

رفعت بصرها للأعلى لتنظر نحوه ، فوجدته

شاباً ذو بشرة سمراء ، ذقنه حليقه ،

وإبتسامته بشوشة ..

تنهدت بضيق ، وتمتمت مع نفسها بتذمر :

-يا ربي ، ويوم ما يجي حد يساعدني يكون

أفريقي !!! ٨

صاحت دينا بنبرة مرتفعة :

-مستر عبد الرحمن ، ممكن تساعدني في

تعليق اللوحة دي على الستارة

أجابها بإبتسامة مشرقة :

-حاضر

فركت رانيا طرف ذقتها بإصبعيها بعد أن
اعتدلت في وقفتهما ، وحدثت نفسها بفضول :
-حتى بتاعة الأرت طلعت عارفك يا أفريقي

!

لاحقاً انضمت إليهم المعلمة ليندا ، وهتفت
بمرح وهي تصعد درجات المسرح :

-هاي ، إيه الأخبار ؟

رحبت بها دينا ، وقبلتها من وجنتيها ، وردت
عليها مبتسمة :

-تمام ، انتي جاية هنا ليه ؟ عندك بروفة ؟!
أجابتها بإبتسامة لطيفة وهي تطالع المسرح
بعينين مشرقتين :

-ايوه ، المفروض في choir (كورال موسيقي
(هادربه

-أها ، ربنا معاكي

في نفس التوقيت ، انتهى الأستاذ عبد
الرحمن من تثبيت إحدى اللوحات
البلاستيكية على الخلفية السوداء الخاصة
بالستارة ، فهبط مرة واحدة من على السلم
الخشبي ولكنه لم ينتبه لتأرجحه ، فمال
بشدة ، وسقط كلياً على الأرضية ، وارتطم
طرفه بمقعد موضوع بجواره فتحول الأخير
إلى قذيفة أصابت المعلمة ليندا في ساقها ،
فصرخت بفرح ، ووقعت مصدومة ..

أسرع الجميع نحوها ليطمئنوا عليها ،
ولكنها أصيبت في ركبته ، فتأوهت بنبرة شبه
متشنجة وهي ترد :

-مش قادرة ، آآه ، دي أكيد مقصودة

جئى عبد الرحمن على ركبته أمامها ،

وتأسف قائلاً بتوجس :

-أنا أسف يا مس ، والله ما خدت بالي إن

السلم مش متثبت كويس

همست ليندا لنفسها بخوف وهي تتلمس

ركبتها :

-دي لعنة الانتر ٣

سألها بقلق وهو يحاول فحص إصابتها

بعينه :

-بتقولي ايه ؟

سألتها دينا بتلهف وهي تمسح على ظهرها

برفق :

-مس لولو انتي كويسة ؟

صرخت ليندا بصوت متآلم وهي تحاول

تحريك ركبتيها :

-آآآه ، ساعدوني

أردف عبد الرحمن قائلاً بجدية :

-متحركيهاش يا مس ، اسندي عليا ، وأنا

موجود

أومأت برأسها بإيماءة خفيفة ، وضغطت
على شفتيها متوجعة ، ثم مرر هو ذراعه
أسفل ركبتيها ، وطوق بالأخر خصرها ، ثم
حملها بحذر عن الأرضية الخشبية ، وتوجه
بها نحو الكواليس ...

جحظت رانيا بعينيها وهي تتابع بذهول
عجيب ما حدث أمامها ، وإنفجرت شفتيها
للأسفل في صدمة واضحة حتى على تعابير

وجهها ، وهتفت بتذمر وهي تركل بساقها

الأرض :

-لأ كده كثير ، يعني أنا إتأمرت على الأفريقي

واتبطرت عليه ، قام شال الكندية ومشى ،

يا ميلة بختك يا رانيا ، هتشال امتى يا ناس

٧؟

وضعت هي يدها على رأسها ، وضغطت

عليها قليلاً ، وتابعت بخيبة أمل :

-مش هانولها باين غير وأنا متشالة على

الخشبة!!! ه

.....

واصل قراءة الجزء التالي

الفصل الثاني والثلاثون - الأخير - الجزء الأول

الفصل الثاني والثلاثون (الأخير) :

((الجزء الأول))

قرر عدد من أولياء أمور مرحلة البيبي كلاس
التوجه إلى ناظرة الرياض لتقديم رسالة
شكر وعرفان بالجميل إلى المعلم آياز الذي
خيب كل ظنونهم السيئة عنه ، وفاق
توقعاتهم ، وأحدث فارقاً واضحاً مع صغارهم
لم تتفاجيء الناظرة إعتقاد من ردة فعلهم ،
فقد توقعت أن يبذل هو قصاري جهده
لفعل المستحيل لإثبات مبدأه وتحقسق
هدف رسالته ، وبالفعل نجح في هذا ..
استطرد أحد الأباء حديثه قائلاً بإمتنان :

-إحنا كParents (أولياء أمور) ، حابين
نشكر الإدارة ومستر آياز على تعبته مع الأولاد

أضافت سيدة ما قائلة بحماسة :

-أنا مكونتش مصدقة ان بنتي هاتتعلق بيه
أوي

بينما أكمل آخر قائلاً بإبتسامة ودودة :

-بصراحة طلع ممتاز

أشار أحد أولياء الأمور للبقية بكف يده
ليسود الصمت بينهم ، وتابع هو الحديث
بنبرة أكثر جدية :

-احنا عاوزين نعتذره عن آآ...

قاطعتهم الناظرة إعتماذ وهي ترسم على
ثغرها إبتسامة هادئة وبنبرة رسمية :

-مافيش داعي ، هو قام بواجبه مع الأطفال

هتفت سيدة أخرى قائلة برجاء :

-أرجوكي يا مس اعتمدا بلغيه شكرنا ،

وئقتنا فيه

أومات الأخرة برأسها إيجاباً ، وردت عليها

: بهدوء :

-اوكي

انتبهت ريمان للحوار الدائر في الإستقبال ،

وشعرت بالفخر من حديثهم عن آياز ..

وظهرت علامات الفرحة واضحة على

قسمات وجهها ..

لقد تمكن من تحقيق هدفه ، وأثبت مقدرته

على تعليم الصغار دون فرق بينه وبين أي

معلمة ..

قادتها ساقها إلى قاعته الدراسية ، وتحركت

بخطوات أقرب للركض وهي تتجه نحوه ، ثم

هتفت بتلهف وهي تحاول إلتقاط أنفاسها :

-آياز ، مش هاتصدق اللي بيحصل برا
سألها بإهتمام وهو مسلط أنظاره عليها :

-في ايه ؟

أجابته بحماسة وهي تشير بكلا كفيها :

-الParents (أولياء الأمور) بيشكروا فيك
جامد

رفع حاجبه للأعلى ، وتساائل بعدم تصديق :

-Really (بجد) ؟

هزت رأسها عدة مرات وهي تجيبه :

-ييس

أخذت ريمان نفساً عميقاً ، وزفرته على مهل

، ثم تابعت بسعادة :

-أنا فرحانة أوي عشانك

مط شفتيه قليلاً ، وضيق عينيه وهو ينظر
نحوها ، ثم وضع يديه في جيب بنطاله ،
وسألها بمكر :

-بجد ؟ طب ليه ؟

إرتبكت هي من نظراته العميقة ، وظهرت
حمرة خفيفة على وجنتيها ، وتلعثمت وهي
تحاول الرد عليه :

-احم .. آآ.. يعني احنا زمايل ، وأكد نجاهك
هايكون مشرف للـStaff (فريق العمل) كله
اقترب منها خطوتين ، وغمز لها متسائلاً :

-بس كده ؟ ١

زاد خجلها وإضطرابها .. وردت عليه بخفوت
وهي تعيد وضع خصلات شعرها خلف أذنها

:

-آآ.. ماتحرجنيش بليز

أخرج يده من جيبه ، وأشار بإصبعه نحو
قلبها ، وتابع بنبرة رخيمة :

-او كي ، بس أنا متأكد من اللي هنا

أسبلت عينيها ، وابتسمت له إبتسامة خجلة
.. بينما ظل هو محققاً بها بنظرات مختلفة ..
ولكنها كانت مرآة لما في صدره وفؤاده
نحوها ...

.....ا

في المكتبة الملحقة بمبنى الرياض ،،،

أمسكت رانيا بقصة مصورة للأطفال – ذات
حجم كبير – وفتحتها على آخرها ، وبدأت
تسرد ما بها من أحداث ..

وما إن إنتهت حتى سألت الصغار بجدية :

-ها استفدنا ايه يا حلوين من القصة ؟

أجابها أحدهم - ويدعى آدم - ببراءة :

-مانكولش sweets

لوت رانيا ثغرها مستنكرة ، وهتفت مصححة

:

-اسمها حلوى !

اعترض الصغير آدم قائلاً بإصرار :

-لأ يا مس ، انتي بتقوليهها غلط

بررت له قائلة بحذر :

-يا حبيبي ، دي بالانجليش ، لكن باللغة

العربية حلوى

نهض أحد الصغار عن مقعده ، ووقف

قبالتها ، وأردف قائلاً ببراءة :

-عارفة يا مس احنا شوفنا ديناصور هنا
رمقته بنظرات متعجبة ، ثم ردت عليه بهدوء
:

-ديناصور !! ده انقرض يا سيف من زمان
هز الصغير آدم رأسه نافياً ، وأكمل قائلاً
بهدوء :

-لأ هو مش ديناصور يا سيف ،
دهه Crocodile (تمساح)

ابتسمت لهما رانيا بسخرية ، وردت عليهما
بثقة :

-تمساح ، لأ إنت غلطان مافيش تماسيح في
الكي جي !

صاح الصغير سيف قائلاً بعبوس :

-والله شوفته يا مس رانيا !

ثم إستدار برأسه للخلف ، وتابع ببراءة :

-وكان ماشي من هنا وبيhez ديله

عقدت رانيا مابين حاجبيها في إندهاش ،

ورددت بعدم فهم :

-بيhez ديله ؟!!!

أشار لها بذراعه وهو يكمل بثقة :

-اه ، وطلع على الحيطه ٢

جحزت بعينيها مصدومة ، ورددت بتلعثم

وقد بدى الشحوب على وجهها :

-حيطه .. ده مش .. مش تمساح ده آآ...

صاح الصغير سيف بحماس وهو يقفز في

مكانه :

-بس أنا عرفته ، هو Iguana (سحلية) ، أهوو

هناك يا مس ٣

اتسعت مقلتي رانيا أكثر في رعب ، وركضت
كالمجنونة خارج المكتبة وهي تصرخ بهلع :

-يا مامي ، ده .. ده طلع برص ! عاااااا ،

إلحقوني !!ع

تعالت ضحكات الصغار على تصرفها
الأخرق .. وتدخلت إحدى العاملات للتصرف
فوراً ، وإبعاد الأطفال ، والتخلص من ذلك
الكائن الدخيل ...

.....

لاحقاً عرف الجميع بما فعلته رانيا خلال
حصتها ، فضحكوا على حماقتها ..

أرادت سارة أن تنشر ما حدث في منشور
على الفيس بوك ، ولكن حذرتها سالي قائلة :

-اوعي عملي كده

سألتها سارة بجدية :

-ليه يعني ؟

أجابتها سالي بمزاح :

-يا بنتي البوست بعد شوية هيتاخد سكرين

شوت ، ويتبع لجهات سيادية عليا ،

وشوية وهنلاقيه اختفى في ظروف غامضة !

وضعت كفها على طرف ذقنها ، وهتفت

بصدمة :

-يا لهوي

أكملت سالي قائلة بإبتسامة متسلية :

-وإنتي هتتخطي في الBlack List (القائمة

السوداء)

ردت عليها سارة موافقة :

-أووف ، وأنا مش ناقصة

-بالضبط ، بلاش تكوني من المغضوب عليهم

-على رأيك

.....

بعد برهة ، ولجت السكرتيرة أية إلى داخل
غرفة المعلمات ، وأردفت قائلة بصوت رقيق

:

-بنات ، مس إعتماذ عاوزه حد للإشراف في

حفلة الناشونال بالليل

ردت عليها هبة بفتور :

-لأ ، أنا مش فاضية عندي مشاوير كتير

واعترضت ميادة هي الأخرى بجدية :

-ولا أنا

أشارت لهما أية بكفها وهي تتابع بنبرتها

الريقة :

-بصوا ، اختاروا أي اتنين

تسائلت سارة بإهتمام :

-هو مس لولو معاهم ؟

أجابتها أية قائلة :

-اه

أضافت سالي بهدوء :

-دي يا عيني من ساعة اللي حصلها وهي

متعقدة

ضحكت سارة وهي تقول بمرح :

-ايوه لعنة الإنترنت ! عشان تصدق

هتفت هبة قائلة بجدية بالغة :

-بصي أنا مش هاجي المدرسة بالليل لو

دفعولي مليون جنية

سألتها سارة بفضول :

-ليه يا بوب ؟

أجابتها هبة بصوت جاد وهي ترفع حاجبها

للأعلى :

-ايه يا بنتي هو انتي ماسمعتيش عن

العفاريت اللي هنا

رمشت سارة بعينيها وهي تردد بقلق :

-عفاريت

ثم إزدردت ريقها وتسائلت بتوتر :

-بتكلمي جد ولا .. ولا ده هزار ؟

ردت عليها سالى تلك المرة وهي تتنهد

بصوت مسموع :

-ايوه ، ده معروف من سنين ، المدرسة

مسكونة بالليل !

هزت سارة رأسها مستنكرة :

-استحالة ، ده مش حقيقي

تابعت هبة قائلة بنبرة شبه خافتة :

-فاكرة يا سالي لما ناني ناصرة جت المبنى

الصبح ، ولاقت المكاتب كلها عليها آثار

رجلين كبيرة ، حتى جوا مكتب مس إعتما

اللي محدش معاه مفتاحه إلاهي !

بينما أضافت سالي بهدوء حذر :

-أيوه ، والأبواب اللي بتتفتح وتتقفل لوحدها

من غير ما حد يقرب منها

ردت عليها هبة بنبرة شبه منزعجة :

-ولا أوكرة الباب اللي بتتكسر كل شوية

وأكملت سالي بنبرة غامضة :

-ده غير الصوت اياه

ضمت سارة قبضتي يدها إلى صدرها ،
وهتفت بخوف :

-أووف ، ده باينه حقيقي

إستأنفت هبة حديثها وهي تشير بيدها :

-اسألني حتى بتوع الأمن وهما يقولوك ،
طول الليل مشغلين قرآن

حركت سارة رأسها معترضة ، وصاحت
محتجة :

-لألاً .. مش عاوزه أسأل حد

سألت أية مجدداً بإرهاق :

-طب مين هايروح ؟

ردت سارة بإبتسامة عابثة :

-أقولك أنا ، حطي البت رانيا ومعها نشوى

نظرت لها سالي بنظرات ذات مغزى ،
وهتفت لها:

-ده انتي بتموتي فيهم !

ضحكت سارة وهي تضيف بتسلية :

-خلي قلبهم يجمد شوية

وبالفعل تم تكليف رانيا ونشوى بحضور
الحفل المسائي والإشراف عليه ، وإنضمت
إليهما عاليا بعدما اعتذرت معلمة أخرى في
قسم اللغات ...

.....

كما تم الإرسال في طلب المعلمة منة
للحضور إلى مكتب السكرتارية حتى يتم
التنسيق معها لكونها عضواً في الإشراف
على رحلة المدارس إلى تركيا ..

استلمت هي الأوراق الرسمية ، وكذلك
خطاب التكليف ، وبدى على محياها
ابتسامة جلية ، وتمت مع نفسها بسعادة
:

-أخيراً ، هاغير جو وأسافر ، ياه ، أد أيه أنا
محتاجة التغيير ده !

دست الأوراق في حقيبة يدها ، وتابعت قائلة
بجدية :

-محتاجة أشوف اللي ناقصني وأجهز
حاجتي قبل ما أسافر !

.....

في المساء ،،،

ابتلعت رانيا ريقها بتوتر واضح وهي تصعد
على الدرجات المؤدية للطابق الأخير في
مبنى المدارس الرئيسي ..

كان الجو هادئاً للغاية .. والإضاءة خافتة ..

تلفتت حولها بنظرات مذعورة ، وهمست

لنفسها بخوف :

-استر يا رب ، ده أنا هاموت في جلدي ،

عقلي كان فين عشان اطلع هنا لوحدي

تحركت بحذر في الرواق .. وتابع حديث نفسها

بإرتعاد :

-ده أنا لو اتقتلت هنا محدش هايحس بيا

ثم هبت في مكانها مذعورة حينما استمعت

إلى صوت صفق باب ما بقوة ، وكتمت

صرختها بصعوبة ..

ازددت ريقها مرة أخرى ، وشعرت بإرتجافة

شديدة تجتاح أطرافها ..

هزت رأسها مستنكرة ، وأردفت قائلة بإصرار

:

-أنا ايه اللي خلاني أوافق اجي هنا لوحدي ،

ما كنت نزلت الحمام اللي في الأرضي

وخلص

صرخت تلك المرة بهلع حينما شعرت

بقبضة يد توضع على كتفها ، فصاحت بها

عاليا بإندهاش :

-اهدي يا رانيا ، في ايه ؟

هدرت رانيا بفرع وهي تهب في مكانها :

-عفريت !

نهرتها عاليا قائلة بحدة :

-ده أنا يا مجنونة

تنفست رانيا الصعداء ، ووضعت يدها على

قلبها وهي تقول بصوت لاهث :

-يا لهوي ، قطعتي خلفي !

رمقتها عاليا بنظرات سخط ، وتساءلت

بتهكم :

-ايه جو الرعب اللي انتي عملاه ؟!

ردت عليها بنبرة مرتبكة :

-ما.. ما أنا متوقعتش إنك تكوني هنا

بررت لها عاليا قائلة :

-أنا جيت وراكي أشوفك رايحة فين

أجابتها رانيا بصوت متحشرج :

-كنت بأدور على الحمام اللي هنا

-تعالى ، ده هو هناك

-طيب

ثم سارت الاثنتين سوياً في إتجاه المرحاض
، وأصرت رانيا على بقاء عاليا معها حتى
تنتهي مما تفعله ، وبعدها تحركت كلتاهما
عائدتين إلى المسرح ...

.....
في فيلا سرحان عليه ،،،

فاتح رامى والديه في مسألة خطبته من
عاليا - زميلة آياز في العمل - ولم يبذ
أحدهما إعتراضه على رغبته ، فقد كان
واضحاً عليه مدى تعلقه بها ، بالإضافة إلى
حماسة والدته السيدة سوزان في تزويجه
قريباً ..

استأنف المهندس سرحان حديثه قائلاً بهدوء

:

-أهم حاجة تكون البنت كويسة ، ومن أصل

طيب !

رد عليه رامي بإبتسامه واثقة :

-اطمن يا بابا ، محترمة وأخلاق وحاجة

تتشرف بيها

ربت والده على ظهره ، وتابع بهدوء :

-على بركة الله

أضافت والدته قائلة :

-ربنا يكرمك يا رامي ، وتكون بنت الحلال

اللي تستاهلك

احتضن رامي والدته ، وانحنى ليقبل كف

يدها وهو يقول بنبرة ممتنة :

-حبيبتي يا ماما

ثم اعتدل في وقفته ، وتابع بجدية :

-أنا هحاول أظبط ميعاد نتعرف على أهلها ،

وبعدها إن شاء الله نقرى الفاتحة

أوماً والده برأسه موافقاً :

-إن شاء الله ، ربنا يسهلك أمورك

ردت عليه والدته بسعادة :

-تمام يا حبيبي !

تنهد رامي بإرتياح ، واتجه مسرعاً إلى غرفته

ليبلغ آياز بقرار والديه المبهج وقلبه يرقص

طرباً من السعادة

.....

في اليوم التالي ،،

في مبنى الرياض ،،

اجتمعت المعلمات حول دفتر توقيع

الحضور والإنصراف ، وتبادلن المزاح سوياً ..

ولج آياز إلى داخل الإستقبال ، وبحث بعينيه
سريعاً عن عاليا ليخبرها بطلب رامى منه ..
وبالفعل وجدها بصحبة سارة وسالى ، فدنا
منهن ، وتنحنح بخفوت وهو يقول :

-صباح الخير

إلتفتت المعلمات إليه ، ورددن التحية برقبة ،
فتابع قائلاً بهدوء :

-ممكناً تكلم معاكى على جنب يا مس
عاليا

-اه اتفضل

قالتها وهي تتحرك معه للخلف ..
حك هو طرف ذقنه بإصبعه ، وإستأنف
حديثه بنبرة جادة :

-هو الموضوع يخصك إنتي وآآ.. ورامي ابن
خالتي

توردت وجنتيها قليلاً ، ونظرت إليه وهي
ترسم على ثغرها إبتسامة رقيقة .. وسألته
بهمس :

-هو .. هو آآ..

قاطعها قائلاً بثبات :

-شوفي يا مس عاليا هو عاوز رقم تليفونك
عشان يظبط معاكي معاد للخطوبة
إندهشت من عبارته الأخيرة ، وهمست
متوترة وقد اكتسى وجهها بحمرة كبيرة :

-آآ.. خطوبة

ابتسم لها وهو يسألها بخفوت:

-ايوه ، في مانع عندك أخده منك وأديهوله ؟!

تنحنت قائلة بخجل :

-احم.. لأ!

هز رأسه بحركة خفيفة وهو يقول :

-ومبروك مقدماً

بدت مرتبكة ومتحمسة في آن واحد ..
واعتلى ثغرها ابتسامة عريضة وهي تقول

بحرج :

-ميرسي .. آآ.. قصدي الله يبارك فيك

اقتربت منهما ريمان ، وتسائلت بإهتمام :

-خير يا جماعة في حاجة ؟

رد عليها آياز بإبتسامة الدبلوماسية :

-خير إن شاء الله

رفعت حاجبها للأعلى ، ورمقته بنظرات

مطولة وهي تردد :

-واضح كده إن الموضوع فيه آآ...

قاطعتها عاليا بقلق جاد :

-أوف مس اعتماد جت ، يالا بينا على

الكلاسز بتاعتنا

غمزت لها ريمان وهي تقول بعتاب زائف :

-اوكي بتهربي مني ، هاعرف برضوه

ثم تحركت مع آياز نحو قاعتها الدراسية ،

وسألته :

-هو في ايه ؟

رد عليها بهدوء :

-صاحبتك هاتتخطب قريب

سألته بفضول أكبر وهي تطالعه بنظراتها :

-بجد ، وإنّت عرفت منين ؟

أجابها بنبرة شبه مغترة :

-من ابن خالتي ! إنتي ناسية ولا ايه ؟

عضت على شفتها السفلى ، وحكت فروة
رأسها بكفها لتنفض خصلات شعرها ،
وتابعت ٢:

-أها ، صح ، مخدتش بالي ، مبروك ليهم

رد عليها آياز مبتسماً :

-الله يبارك فيكي ، وآآ... وعقبالك !

أسبلت عينيها وهي توليه ظهرها :

-إن شاء الله ، هاروح أشوف الكلاس بتاعي

حرك رأسه موافقاً إياها ، وتابع بهدوء :

-أوكي ، وهنتكلم تاني

-شور

-باي !

.....
في معرض السيارات ،،،

حصل رامى على رقم عاليا من آياز ،
وترقبت هي بشغف كبير مكالمته لها .. ولم
يختلف حاله عنها كثيراً .. ظل ينتظر اللحظة
المناسبة والتي تتوافق مع وقت فراغها
حتى يهاتفها ..

وبالفعل أتاها إتصاله المنتظر ..

أجابت عليه بنبرة ناعمة بـ :

-ألو

رد عليها بحماس وهو يعتدل في جلسته

على المقعد :

-أحلى ألو سمعتها في حياتي

همست له بخجل :

-ميرسي

سألها مازحاً وهو يطرق بأصابعه على سطح

مكتبه :

-ازيك يا أبله ؟

عاتبته قائلة بجدية :

-برضوه أبله

رد عليها بحماسة واضحة في نبرته :

-طبعاً ، أجمل وأحلى أبله في الدنيا

سألته بهدوء مصطنع :

-إنت كنت عاوزني في ايه ؟

أجابها بمزاح وعلى ثغره ابتسامة واسعة :

-أعاكسك

ردت عليه بجدية مفرطة :

-والله ! إنت هتهزر

استشعر رامي التغيير المفاجيء في نبرتها ،

فهتف بتلهف وهو يحاول إسترضائها :

-لالالا .. أنا غرضي شريف والله

سألته مجدداً بهدوء :

-ها ، عاوز ايه ؟

انتظر قليلاً قبل أن يجيبها بتنهيذة عميقة :

-نتجوز

ردت عليه بإندهاش :

-كده خبط لزق مافيش أي مقدمات
التوى ثغره بإبتسامه متحمسه وهو يرد
عليها :

-ما أنا اختصرت ده كله
همست له بحياء :

-عادي كده

سألها رامي بإهتمام :

-ايوه ، ها رأيك ايه ؟

ردت عليه بنبرة شبه مرتبكه :

-ما .. ما انت عارف رأيي

أردف قائلاً بإصرار :

-عاوز أسمعها بوداني

أجابته بإيجاز :

-اوڪي

تعجب من ردها المختصر ، وهتف مستنكراً

:

-اوڪي ! بس كده

تحدثه قائلة بمكر :

-بالظبط زي ما قولتلي

مط فمه ليقول بجدية :

-اها ، واضح إننا هانقف لبعض على

الواحدة

حذرته قائلة :

-المشوار لسه في أوله !

أخذ هو نفساً عميقاً ، وزفره ببطء ، ثم تابع

بصوت هاديء :

-طيب يا ست البنات ، عاوزك تحددى ميعاد
مع الحاج والحاجة عشان نجى نזורكم
ونقرى فاتحة ونبلس الدبل

ردت عليه بنزق :

-مش لما تتعرف الأول عليكم ، ونشوف إن
كنت هوافق بيك ولا لأ

تابع قائلاً بعدم اكرثا :

-كل دي شكليات ، أهم حاجة القبول ، وده
حصل الحمد لله ، وأنا متأكد منه !

ردت عليه بنعومة :

-طيب ، هارتب أموري فى البيت ، وأكلمك

تنهد قائلاً بحرارة :

-هستنى مكالمتك على نار

ثم أنهى معها المكالمة ، ولوح بقبضته
بسعادة في الهواء وهو يدير مقعده بحركة
دائرية ، فقد أوشك على الحصول على
مراده ، وأصبح على بعد عدة خطوات من
تحقيق حلمه ...

.....

في غرفة المعلمات بمبنى الرياض ،،
اجتمعت الناظرة إعتماذ بجميع أعضاء فريق
العمل للترتيب لحفلة نهاية الفصل الدراسي
الأول ..

وقامت بتوزيع الأدوار على الجميع على
حسب طبيعة عرض كل فرد ..

وتولت ليندا الإشراف العام على خشبة
المسرح أثناء بدء العرض ، وكذلك في
الكواليس ..

مررت السكرتيرة أية ورقة خاصة بالتوقيعات
، فوقع عليها الجميع بالعلم .. ثم أعطتها
للناظرة .. وانصرفت كلتاهما ..

اقتربت ريمان من عاليا ، وسألتها بهمس :

-ها ايه الجديد ؟ كلمك ؟!

ردت عليها بخفوت :

-هو مافيش حاجة بتستخبي عليكي

غمزت لها ريمان وهي تضيف بمكر :

-لأ .. ما انتي عارفة أنا ليا لي مصادري

ابتسمت لها عاليا :

-انت هتقوليلي !

.....

في أحد المقاهي الحديثة ،،،

أسند النادل المشروبات على الطاولة ،
فشكرته ريمان ، ثم إلتفتت سالي برأسها
نحو رفيقتها عاليا ، ورمقتها بنظرات غامضة
قبل أن تسألها بهدوء :

-ها ايه جديدك ؟

أجابتها عاليا بإبتسامة سعيدة :

-هاتخطب لرامي قريب

هتفت سارة بسعادة جلية :

-مبروك !!

بينما رددت سالي بنبرة فرحة :

-الله الله ، إيه الأخبار الحلوة دي

ردت عليهما عاليا بإبتسامة مجاملة :

-تسلمولي يا بنات

أضافت ليلة قائلة :

-ربنا يكلمك على خير ، عاوزين نفرح بقى

بينما تساءلت ريمان بإهتمام :

-هاتعملي الخطوبة فين ؟

أجابتها عاليا بتنهيذة وهي تضغط على

شفتيها :

-هي قراية فاتحة ، وهاتكون على الضيق

ردت عليها ريمان متسائلة بجدية :

-طب ايه رأيك لو عملناها في مكان مفتوح ؟

هتفت سارة بحماس :

-واو ، فكرة حلوة ، ايه رأيك يا عاليا ؟

هزت عاليا كتفيها وهي تقول بحيرة :

-مش عارفة

أوضحت ريمان وجهة نظرها بهدوء :

-بصي الكل الوقتي بيحب يعمل الأفراح
والخطوبات في الOpen Area، بتبقى شيك ،
وهادية وحلوة

وافقتها سارة في رأيها وهي تقول :

-أها .. أكيد

عبست عاليا بوجهها ، وإستندت بطرف
ذقنها على مرفقها ، وهمست بعبوس :

-أنا مشكلتي الوقتي هالبس ايه ؟

وضعت ليلة كفها على كتف عاليا ، وردت
بتفاخر واضح :

-لأ ماتشليش هم يا قلبي ، دي لعبتي

أضافت سالي بمرح :

-طبعاً ده ليلة خبيرة الشلة .. دي فاشونيستا

قهقهت الفتيات على دعابة سالي الأخيرة ،
واتفقن سوياً على مساعدة عاليًا في كل
شيء تحتاجه خلال الفترة القادمة حتى
تصبح أحلى العرائس وأكثرها رقة وجمالاً

.....

.....

يتبع الجزء الثاني بعد قليل

واصل قراءة الجزء التالي

الفصل الثاني والثلاثون - الأخير - الجزء الثاني

راسين في الحلل

الفصل الثاني والثلاثون (الأخير):

((الجزء الثاني))

بعد يومين ،،،

في مسرح مدارس الالفانيا ،،،

تولت ميادة تقديم الجزء الأول من فقرات
حفل نصف العام الدراسي .. وتم تنظيم
المراحل الخاصة بالرياض وفق جدول معين
لتقدم كل مرحلة عرضها على حدا ..
كذلك تولت هناء تقديم الجزء الثاني من
الحفل ..

بينما عمدت سالي إلى تنسيق الفواصل
الغنائية خلال العروض ..

تفاعل أولياء الأمور مع أطفالهم الذين كانوا
يتحدثون بطلاقة وثقة واضحة ..

وأشادوا بالجهد المبذول خلال تلك الفترة
لإيصالهم إلى هذا المستوى الأكاديمي
المتقدم ..

انتهت منة من فقرتها ، والتي حازت على
الحاضرين ، وإنهالوا عليها بالتصفيق
المتواصل ، وولجت إلى داخل الكواليس
وعلى ثغرها إبتسامة عريضة ..

تنهدت بإرتياح لتمكنها من طرح فكرتها
بطريقة تتلاءم مع الأطفال ، فأحرزت النجاح
المطلوب ..

أسرعت هناء خلفها لتهنئتها ، ولكنها نسيت
إغلاق الميكروفون ، فبدى صوتها واضحاً
وهي تقول :

-بت يا منة ، عرضك كان حلواً

هتفت منة بسعادة :

-بجد

ردت عليها هناء بثقة :

-أه ، أوي ، طلعا كويسين وشرفوكي

صاحت ميادة بنبرة مرتفعة وهي تلوح

للصغار بيدها :

-بس يا ولاد ، اهدوا ، احنا اللي علينا الدور ،

وآآ...

ضحك الجالسين في المسرح على ما يُقال

في الكواليس ، فأسرعت سالي بتشغيل

أغنية ما للتغطية على الأصوات الداخلية ..١

وركضت ريمان نحوهن ، وهتفت بصوت

شبه لاهث :

-المايك مفتوح ، اقفلوه

وضعت هناء يدها على صدغها ، وهتفت

مصدومة :

-اووف ، كل حاجة بانتي

حركت منة شفيتها للجانبين ، وأضافت

بإستنكار :

-يادي الفضايح

تسألتي هناء بخوف وهي تبتلع ريقها :

-هو في حد خد باله ؟

ردت عليها ريمان بإمتعاض :

-كل اللي تحت

هتفت منة بنزق :

-يالهوري ، هانتنفخ في الحكاية دي !!!

همست هناء بقلق وهي تشير بكفيها :

-استر يا رب

.....

على الجانب الآخر ، إستعد آياز بأطفاله
لتقديم فقرته الأخيرة في عرض اليوم .. وتأكد
من هيئة الصغار ، وحمسهم قائلاً :

-اوعوا تخافوا ، وافرحوا باللي بتعملوه ، انتو
أحسن كلاس ، وأشطر أطفال

هتف بعض الصغار بنبرة طفولية بريئة :

-بنحك يا مستر

رد عليهم بإبتسامة عريضة :

-وأنا كمان بأحبكم

أشارت ليندا بيدها له وهي تقول :

-ياللا يا مستر آياز ، الدور عليك

أوماً برأسه مجيباً إياها بهدوء :

-أوكي

ثم إستدار برأسه في إتجاه الأطفال ، وسألهم

بحماس :

Ready- (جاهزين) ؟

رد عليه الصغار بحماسة مفرطة :

Yes- (نعم)

لوح لهم بذراعه وهو يقول بنبرة مشجعة :

-يا، Let's go.

وبالفعل تحرك الأطفال بصحبة معلمهم ،

ووقفوا على خشبة المسرح بثقة كبيرة ،

وتسابقوا – والإبتسامات البريئة على

وجوههم – في تأدية أدوارهم بحماسة رهيبة

أشعلت الأجواء بالتصفيفات والتشجيعات

الممزوجة بالضحكات العالية ..

لم يصدق آياز أذنيه ، فقد ظفر اليوم بنجاحه

الذي سعى إلى تحقيقه ، وجاء من أقاصي

الأرض لتنفيذه على أرض الواقع ...

أدمعت عينيه تأثراً ، لكنه تمالك نفسه ،

والتف حوله الصغار وأحاطوه ، فطوقهم

بذراعه ، وهتف فيهم بفرحة عارمة :

You're my sunshine- (انتم ضوء الشمس

بالنسبة إليّ) ١

أسدلت الستائر عليه وعلى الأطفال

والتصفيفات مازالت مستمرة ..

تجمع حوله المعلمات ، وحضرت الناظرة

إعتماد ، وشكرته قائلة :

-النهاردة بس أقدر أقول مبروك يا مستر
آياز ، إحنا كلنا فخورين إنك واحد مننا
لمعت عينيه ، وبدى متأثراً وهو يجيبها :

-أنا مش عارف أقول إيه !

هتفت هبة بحماس :

-مبروك

بينما أضافت ميادة بجدية :

-تستاهلها يا مستر

رددت ليندا بإبتسامة مشجعة :

-برافو آياز٢

وهتفت هناء :

-ألف ألف مبروك ، اتبسطنا كلنا بالعرض

وأضافت منة مشجعة :

-برافو يا مستر آياز-

أردفت ريمان قائلة بحماس وعينيها تتحدثان
عن إحساسها :

-من أحسن العروض اللي اتعملت

أكملت الناظرة إعتماد قائلة بنبرة جادة رغم
هدوئها :

-إنتو كلكم هنا أسرة واحدة ، وقدرتم تعملوا
مع بعض اللي محدش بيقدري عمله ، ربنا
يوفقكم دايمًا

رد عليها الجميع بسعادة :

-يا رب

هتفت ميادة بنبرة رسمية :

-ياللا عشان نسلم الأطفال لأولياء أمورهم ،
وبعدها نحتفل كلنا

قاطعتهم عاليا قائلة بحماسة مفرطة :

-طيب بالمناسبة دي أحب أعزمكم كلكم
على خطوبتي الجمعة الجاية في نادي ((....

((

احتضنتها المعلمات ، وتسابقن في تهنئتها ،

فهتفت سارة بفرح :

-ألف مبروك يا عاليا

ردت عليها عاليا بإبتسامة سعيدة :

-الله يبارك فيكي يا سوو

صاحت هبة وهي تخمز لها :

-ربنا يهنكي يا رب

بينما هنأتها الناظرة إعتماذ بإبتسامة هادئة

على ثغرها :

-مبروك يا مس عاليا

ردت عليها بإمتنان :

-الله يبارك فيكي يا مس إعتما

أردف آياز قائلاً بتنهيده :

-مبروك

ردت عليه عاليا بثقة :

-إنت مش محتاج عزومة

أشار لها بإبهامه وهو يقول :

-عارف !

أضافت ليلة قائلة بجدية :

-أنا عندي المصور ، مش هتحتاجوا لحد

غريب

ردت عليها عاليا بضحكة رقيقة :

-أكيد أيمن

تابعت ليلة قائلة وهي تعض على شفيتها :

-صح ، هو هيظبطك

هزت رأسها موافقة وهي تهمس بـ :

-تمام

صاحت هبة بنبرة عالية وهي تصفق بيدها :

-وأخيرا عندنا عروسة !!!

.....

في اليوم المنشود ،،،

تم تزيين الحديقة الخلفية بأحد النوادي
الشهيرة بديكورات بسيطة لتعطي مظهراً
يتناسب مع حفل الخطبة المُقام بها بعد
وقت الظهيرة ..

ووزعت الطاومات بشكل دائري حتى يتمكن
الجالسين من رؤية العروسين بصورة
واضحة ..

كذلك تم وضع أعمدة جرانيت قصيرة تزدان
قمتها بورود بيضاء رقيقة عند المدخل ..
وصممت بوابة رقيقة من البلاين ليلج
العروسين من خلالها ..

إلتقط أيمن صوراً متنوعة للمكان ولباقات
الورد الأنيقة قبل أن يصل العروسين
للحديقة .. ثم اختطف هو بعدسة كاميرته
لقطات مميزة لهما وهو يتأبطان ذراع
بعضهما البعض ، وتعمد التركيز على
ابتسامة عاليا الناعمة ، ونظرات رامي
العاشقة لها ..

سريعاً إمتلأ المكان بالحضور ، وتسابقت
المعلمات في إلتقاط الصور مع العروسين

وتسجيل تلك اللحظات الجميلة ونشرها
على مواقع التواصل الإجتماعية ..

إرتدت عاليا فستان خطبتها من اللون
النبيزي ، خصره ضيق ، وله ذيل قصير .. ثم
ينسدل للأسفل بتموجات رقيقة ، كما أن
أكتافه مبطنة بقماش الشيفون ، والذي تم
تطريزه بورد صغير من نفس اللون ..

جلست هي على الأريكة المخصصة
للعرائس ، وإلتفت حولها رفيقاتها .. وتبادلن
الكلمات المهنئة لها ..

بينما وقف خلف رامي آياز ، وربت على
كتفه مشجعاً إياه .. ثم مال على رأسه ،
وهمس له بسعادة :

-مبروك يا رامي-

وضع رامي يده على كفه ، ورد عليه ممتناً :

-الله يبارك فيك يا إيزوو ، وعقبالك

استدار برأسه نحو ريمان ، ورد عليه قائلاً

بثقة :

-أكيد ها يحصل !

ثم أمسك رامي بيدها ، وألبسها خاتم

الخطبة ، فتعالت الزغاريد المصحوبة

بالتهليلات والتصفيقات ..

قامت والدة عاليًا بتوزيع الحلوى

والشيكولاته على المتواجدين ، واقتربت من

رانيا التي كانت عابسة الوجه ، وناولتها

قطعتين من الشيكولاته وهي تردد بصوت

حائي :

-بكرة ربنا هيعدلها لك يا بنتي ، اضحكي

انتي بس

رسمت ابتسامة سخيقة على ثغرها ، وردت

عليها قائلة :

-حاضر يا طنط !

ثم غمغمت مع نفسها بإمتعاض :

-افرجها من عندك يا رب !

قبلت منة عاليا من وجنتيها ، وهتفت بنبرة

مرحة :

-أنا قولت أسلم عليكى قبل ما أتوكل على

الله وأسافر

سألتها عاليا بعبوس زائف :

-هو خلاص النهاردة ؟

أومات برأسها وهي تقول بجدية :

-ايوه ، يدوب ألحق الطيارة ، ده أنا كمان

متأخرة

صافحتها عاليا بقوة ، و دعت لها قائلة :

-ربنا معاكي ، واجازة عليكي إن شاء الله

تنهدت وهي تردد :

-يا رب !

ثم لوحت بذراعها للجميع وهي تهتف بنبرة

مرتفعة :

-باي يا بنات

ردت عليها هناء :

-باي يا منون ٣

وأضافت ميادة بمرح :

-انجوي يا بيبي

بينما هتفت هبة بمزاح وهي تشير لها :

-ترجعي بالسلامة ، وماتنسيناش

ردت عليهن منة بإبتسامة لطيفة :

-حاضر ، باي

.....

لاحقاً ، إستقلت رانيا سيارة الأجرة لتعود
إلى منزلها ، فقد سئمت الجلوس بمفردها ،
وتأمل الحاضرين دون أن يعيرها أي أحد
الإنتباه ..

أعطت للسائق أجرته ، وترجلت من السيارة
، ولكنها تسمرت في مكانها .. فقد كان يقف
أمام مدخل البناية كلباً متشرداً .. فخشيت
أن يحدث معها مثلما حدث من قبل مع
عاليا ..

فكرت في الركض ولكنها تراجعت سريعاً
عن تلك الفكرة بسبب إرتدائها لفستانٍ

طويل ، وبالتالي سيعيق حركتها ، وربما
يؤدي إلى تعثرها ، فتصبح فريسة سهلة له ..
ضغطت على شفيتها ، وتساءلت مع نفسها
بحيرة :

-طب أعمل ايه الوقتي ؟

ظلت واقفة في مكانها لبرهة تراقب الطريق
بنظرات حذرة حتى آلمتها قدميها ،
فغمغمت بإنزعاج وهي تزفر بصوت
مسموع :

-هو مش هايمشي في يومه ، وأنا مش معايا
رصيد أكلم بابا ينزل يهشه !

توقف إلى جوار الرصيف سيارة ما فارهة ،
وأنزل قائدها النافذة الملاصقة له ، وأطل
برأسه نحو رانيا ، وسألها بهدوء جدي :

-في مشكلة حضرتك ؟

فغرت رانيا شفيتها مصدومة ، ورمشت
بعينها غير مصدقة ما حدث توأ .. فقد كان
الشاب وسيماً ، ويعرض عليها مساعدته ..

ظنت أنها تتوهم ما تسمعه ، فسألته
بإندهاش يعلو قسماات وجهها :

-إنت .. إنت بتكلمني أنا ؟

أوما برأسه إيجاباً وهو يرد عليها :

-أيوه !

ثم ترحل من السيارة ، وحقق بها بنظرات
ثابتة ، وسألها بهدوء :

-انتي مش عارفة تدخلني من الكلب ؟

هزت رأسها عدة مرات وهي تجيبه بتلهف :

-آآ .. أيوه

تقوس فمه بإبتسامة ودودة ، وتشدق قائلاً :

-لحظة ، أنا هاساعدك

وبالفعل تحرك الشاب للأمام ، فتأملته رانيا

بنظرات متفحصة ودقيقة ، فبدى أنيقا

للغاية ، ومهنماً بصورة لافتة ، وكذلك كان

وجهه حسن الطلعة ٢٠٠

ازدردت ريقها ، وتنهدت بحرارة وهي تهمس

لنفسها بسعادة :

-بينها مكتوبالي !

أشار لها بيده وهو يقف بجسده أمام الكلب

- الذي كان مسالماً للغاية - ليمنعه من

الاقتراب منها ، وهتف بنبرة مرتفعة :

-اتفضلي يا أنسة

همست لنفسها بسعادة :

-وحياتك أنسة ونص وتلاتربع !

تابع قائلاً بصوت جاد :

-يالا ، متخافيش ، أنا هادخلك

-م.. ماشي

تحركت هي خلفه ، ونظرات الإعجاب

المصحوبة بالسعادة تعبر عنها ..

أبعد الشاب الكلب عن المدخل ، وإستدار

ليواجهها وهو يقول بإبتسامة خطيرة :

-ده كلب عادي ، مش مؤذي

تلعثمت وهي ترد عليه بإمتنان :

-ش.. شكراً ، انت .. انت انسان ذوق وأنا

عاجزة عن شكرك

زادت إبتسامته سحراً وهو يقول بصوت

رخيم :

-ولا يهملك ، أنا معملتش حاجة ، اتفضلي

همست له بإمتنان أكثر :

-ميرسي

أضاف قائلاً بهدوء :

-وأنا موجود لو في أي حاجة ، أنا محلي في
آخر الشارع

حركت رأسها قليلاً وهي تتمتم بخفوت :

-اوكي

لوح لها بكفه وهو يتحرك مبتعداً :

-مع السلامة يا آنسة

ردت عليه بإبتسامة بلهاء :

-باي ، وفرصة سعيدة

تبعته بنظراتها حتى ركب سيارته ، وتحرك
بها لأخر الطريق ، فتنهدت بحرارة وهي تهز
رأسها للجانبين ، وهتفت بتمني :

-اوعدنا يا رب بالحلويات دي !

.....
في حفل الخطبة ،،،،

تواصلت فقرات الحفل ما بين الغناء ،
ورقص الشباب ، وفقرة أخرى خاصة
بالتنورة ، وكذلك العروض الشعبية ..
وتفاعل الجميع معها ..

تعمدت سارة أن تتواري عن الأنظار حتى لا
تلتقي بالمعلمة حنان أو أخيها ، فقد
ضايقها ملاحظته لها في كل مكان ، خاصة
وأنها قد رأته في العرض المدرسي .. وفرض
عليها نفسه بصورة مزعجة مما سبب لها

الحرص .. وحبست نفسها طوال الوقت في

الكواليس ..

تنفست الصعداء لرؤيتهما يتركان الحفل ،

وهمست لنفسها بسعادة :

-أوف ، واحد لا يُطاق ، مفكر نفسه ظريف ،

وهو غلس ، الحمدلله إنه مشى !

رأتها سالي فتعجبت من تصرفها الغريب ،

واقتربت منها وسألتها بنبرة مرتفعة وهي

قاطبة لجبينها :

-إيه يا بنتي مستخبية هنا ليه ؟

ردت عليها بإقتضاب :

-مافيش

لكزتها سالي في كتفها بخفة وهي تقول :

-طب يالا عشان نتصور مع عاليا

-ماشي يا سالوكة

لم يكف أيمن عن رمق ليلة بنظرات
الإعجاب ، وتحمس كثيراً لرؤيتها تتجاوب
معه وتبادلته بنظرات رومانسية وناعمة ..
وترقب بشغف ردها على طلبه بالإرتباط بها
.. ولكنه كان مطمئناً بدرجة كبيرة من
مشاعرها نحوه ..

وقف الاثنين سوياً وتبادلا حديثاً ناعماً بينهما
..

مسح أيمن عدسة الكاميرا بمنشفة ورقية ،
وتشددق قائلاً :

-عقبالنا

ردت عليه بحياء :

-إن شاء الله

تابع قائلاً بنبرة هادئة :

-أنا مش مستعجل ، خدي راحتك في
التفكير والرد ، احنا مع بعض

أخفضت عينيها للأسفل ، وردت عليه
بإختصار :

-اوكي

.....

بحث آياز بعينيه عن ريمان ، وبالفعل
وجدها تقف بجوار إحدى الشجيرات لتلتقط
صوراً لنفسها ، فابتسم لها ، وتحرك نحوها
بخطوات ثابتة ..

استطرد حديثه قائلاً بإبتسامة متحمسة :

-مممكن أخذ من وقتك دقائق

ردت عليه بإبتسامة رقيقة :

-أكيد

تنحنح بصوت خشن ، وتابع بتلعثم :

-ريمان ، أنا .. أنا آآ...

سألته بإهتمام وهي مسبلة عينيها :

-إنت ايه ؟

أجابها بإرتباك قليل وهو محقق في عينيها :

-هو أنا مش عارف مالي ، بس .. بس جوايا

آآ.. يعني أقصد آآ

شجعته ريمان قائلة بمرح وهي ترمقه

بنظرات حنونة :

-خد نفسك ، واتكلم بالراحة أنا سمعك !

رد عليها آياز ضاحكاً :

-مش عارف الموضوع صعب أوي

وضعت اصبعها على طرف أنفها ، وأخفضت
رأسها وهي تقول بخفوت :

-خد وقتك

أخذ آياز نفساً عميقاً ، وحبسه في صدره
للحظات ، ثم أطلقه دفعة واحدة ، وتابع
حديثه قائلاً :

-شوفي ، أنا حاسس ناحيتك بمشاعر مش
قادر أفسرها ، بس بأكون في حالة مختلفة
وأنا معاكي

أومأت برأسها وهي تصغي له باهتمام ،
فأكمل بنفس الثبات الإنفعالي :

-أنا مش حابب أستعجل في أي خطوة بدون
ما أكون متأكد من اللي أنا عاوزه ، بس
حابب إنك تعرفي إن وجودك معايا الفترة
الجاية هايفرق كثير !

تأمل هو تعابير وجهها ، فوجدها مرتخية إلى

حد ما ..

بينما ردت هي عليه بإيجاز :

-اوكي

برر آياز موقفه قائلاً :

-أنا هدفي من البداية كان أحقق رسالتي
وعملت ده ، ونجحت كمان فيه ، وفي نفس
الوقت مكانتش بأفكر في الإرتباط ،
وماتوقعتش إن في مشاعر جوايا هتظهر
ناحية أي واحدة هنا

-أنا آآ...

قاطعها مكماً بجدية :

-أنا مش عارف أخبي مشاعري ، وعاوزك
تعرفيها ، أنا صادق في إحساسي ناحيتك ،
وهاطلب منك طلب

سألته بإهتمام بعد أن ارتسمت علامات
القلق على تعابير وجهها :

-ايه هو ؟

رد عليها بهدوء حذر :

-نستنى شوية لحد ما أرتب أموري كلها ،
وساعتها هاعمل كل حاجة انتي نفسك فيها
، ها رأيك ايه ؟

ضغطت على شفيتها بقوة ، وأجابته بتنهيدة
حائرة :

-مش عارفة ، بس آآ..

مد يده ليمسك بكفها ، وضغط عليه
بأصابعه قليلاً ليطمئننها ، وهمس لها بصدق :

-ريمان ! طالما احنا مع بعض كل اللي
بنتمناه هيحصل

التوى ثغرها بإبتسامة ناعمة ، وردت عليه
بخفوت وهي ترمقه بنظرات رومانسية :

-اكيد ، وأنا معاك ، وهاستناك !

.....
على متن الطائرة ،،،

تحركت منة في الممر الذي يتوسط المقاعد
بخطوات شبه بطيئة لتحقق بنظرات دقيقة
في أرقام المقاعد .. ولكنها لم تتمكن من
الوصول إلى مقعدها .. فعاونتها المضيئة
في الوصول إليه ..

نزعت عن ظهرها حقيبتها ، وضيقته ما بين
حاجبيها وهي تراقب الجالس في المقعد
الملاصق لها ..

عبس وجهها نوعاً ما ، فقد أرادت الجلوس
بجوار النافذة .. التفت الشاب نحوها ،
وسألها بنبرة جادة :

-في مشكلة ؟

ردت عليه بإقتضاب :

-لأ

ابتسم لها قائلاً بهدوء :

-حضرتك عاوزه تقعدني جنب الشباك ؟

ردت عليه بتلعثم :

-آآ.. لأ عادي يعني ، ده .. ده مكانك

نهض عن مقعده ، وأشار لها بيده وهو يتابع

بهدوء :

-تعالى افضلي ، مافيش مشكلة

ثم تنحى جانباً لتتمكن هي من الدخول ..

بادلته منة إبتسامة مهذبة وهي تقول :

-ميرسي لذوقك

التوى ثغره قليلاً وهو يرد عليها :

-العفو ، دي حاجة عادية

استقرت منة في مقعدها ، ورتبت أشياءها
بحذر ، ثم أمسكت بهاتفها وظلت تعبت به ..

تابعها ذلك الشاب بإهتمام ، ولفت أنظاره
أنها تحمل ورقة مشابهة لما معه ، فأثاره
الفضول لسؤالها عنها ، وبالفعل لم يضعغ
وقته ، وسألها بجدية :

-هو حضرتك طالعة تبع رحلة معينة ؟

ردت عليه بهدوء :

-ايوه ، أنا مشرفة في رحلة مدارس اللافانيا

تابع هو قائلاً بإبتسامة مغترة :

-تمام ، تعرفي إن أنا المنظم للرحلة دي

رفعت حاجبيها للأعلى ، وقالت بعدم

تصديق :

-والله ؟!

رد عليها موضحاً :

-أيوه ، أنا وكيل سفريات ، والرحلة دي تبني

، يعني أنا اللي حاطط البرنامج

فغرت شفيتها لتقول بذهول :

-مش معقول

أكمل قائلاً بإبتسامة سعيدة :

-صدفة غريبة صح ؟

مطت ثغرها وهي تردد :

-جداً

أردف قائلاً بهدوء :

-أتمنى إن برنامج الرحلة يعجبك

-إن شاء الله

ثم تابع بإبتسامة مشرقة :

-بالمناسبة أنا اسمي خالد

ردت عليه بخفوت :

-وأنا مس منة

سألها خالد بنبرة مهتمة :

-مس .. واو .. مدرسة ايه بقى ؟

أجابته بإيجاز :

-انجليش

أكمل خالد قائلاً بجدية :

-عارفة يا مس إن الأتراك مش بيتكلموا إلا

تركي وبس ؟!

ردت عليه بثقة وهي تشير بيدها :

-أيوه ، بس أنا بأتابع كام مسلسل تركي

فحافضة كام كلمة كده على أدي

هز رأسه بإعجاب ، وتابع قائلاً :

-كويس ، أنا بأتكلم تركي كويس ، وأكد

هساعدك لو وقفني في حاجة

-اوكي ..

-رحلة سعيدة عليكي يا مس منة

-وعليك إنت كمان يا مستر خالد !

.....

في حفل الخطبة ،،،

استمر الحفل لعدة ساعات ، وتناول
الجميع المشروبات والجاتوه ، ثم حانت
لحظة إنتهائه ، فصاح أيمن بصوت جهوري
وهو يلوح بيده للمتواجدين :

-ياللا يا جماعة ، صورة أخيرة تذكارية قبل ما
العروسين يمشوا

وبالفعل تحركت المعلمات نحو كوشة
العروسين ، وأحاطت بهما .. وكذلك إنضم
إليهم ذويهم ..

مال المهندس سرحان على ابنه ، وبارك له

قائلاً :

-مبروك يا رامي

رد عليه رامي بسعادة :

-الله يبارك فيك يا بابا

أضافت والدته قائلة بجدية :

-عروستك زي القمر ، حطها في عينيك

رد عليها بمزاح :

-دي لسه خطوبة يا ماما

أكملت قائلة بإبتسامة صافية :

-أديني بوصيك من دلوقتي

هز رأسه موافقاً وهو يردد بإختصار :

-حاضر

صاح أيمن بنبرة مرتفعة وهو يسلط عدسة

كاميرته على الواقفين :

-ياللا يا جماعة ، جاهزين

أشار له الجميع بإستعدادهم لإلتقاط

الصورة التذكارية ..

فتابع هو قائلاً :

-تمام ... ١ ، ٢ ، ٣

بدت السعادة على أوجه جميع المحيطين

بالعروسين ، وزادت إبتسامتهم إشراقاً وهم

يحدقون في عدسة الكاميرا ...

تنوعت نظراتهم ما بين العشق ، والشغف ،

والرومانسية ، والإعجاب ، والترقب ، والفرحة

والانتظار ..

نعم ، فقد تحققت أحلام بعضهم على أرض
الواقع ..

وخطى البعض الآخر خطواته الأولى نحو
تحديد مستقبله بصورة جدية وناجحة ..
وبقيت قلة قليلة تترقب بتلهف معرفة
السبيل الصحيح إلى أهدافها ..

كما ظلت بعض الأحلام في قائمة الأمنيات
حتى يحين موعد تنفيذها ..

ولكن الأكيد في نهاية المطاف أنه تم التوفيق
بين (راسين في الحلال)

تمت بحمد الله

واصل قراءة الجزء التالي

الخاتمة

ومع ختام أحداث رواية (راسين في الحلال)
.. أتوجه بالشكر لجميع صديقاتي وزميلاتي في
العمل لمشاركتهم في الأحداث بشخصياتهم
الحقيقية أو بأسماء مستعارة من أجل
اضفاء البسمة على أوجه القراء ..

غالبية الأحداث واقعية ممزوجة بالكوميديا
الخفيفة ..

المواقف كانت مستوحاة من الأبطال
أنفسهم مع بعض التعديلات الطفيفة
وبموافقتهم الشخصية على نشرها ..

وبالطبع النهاية مفتوحة بالإتفاق معهم
لإتاحة الفرصة لعمل جزء ثاني إن أتيت
الوقت لي بأحداث أخرى متطورة ..

أرجو أن يكون العمل قد حاز على
استحسان حضراتكم ..

